



15.2.201.

15.2.201

XXV

13

14

F. JOSEPHI AUGUSTINI
O R S I

ORDINIS PRAEDICATORUM

Sacrae Indicis Congregationi a Secretis

D E

ROMANI PONTIFICIS

In Synodos Oecumenicas & earum
Canones potestate

PARS SECUNDA.

Accedit Dissertatio, qua Ecclesiasticae Monarchiae
forma explicatur.



ROMAE, MDCCXL.

Typis Sacrae Congregationis de Propaganda Fide.

SUPERIORUM LICENTIA.



LIBER SEXTUS
 Q U O
 MELDENSIS EPISCOPI
 LIBER DECIMUS.

*De Basileensi, aliisque (f. ejusdem) saeculi
 Synodis, quibus Constantiensia
 Decreta confirmantur,*

„ Ad Caput Secundum Declarationis Gallicanae;
Examinatur, & confutatur.

C A P U T P R I M U M.

„ Duo dissidia Basileensia distinguuntur :
 „ Res in primo dissidio gestae .



ALLICANAE Declarationis Propugnatores nulla se se alia re magis efferre solent, quam Synodi Basileensis auctoritate; quae nimirum Constantiensia de summa & ineluctabili gener alium Conciliorum potestate Decreta clare ac diluci-

V u 2

de

de exposuerit, solide & invictè firmaverit, atque identidem usarpaverit ad certum sibi unicum & legitimum Pontificem subjiciendum. Quamobrem si qua de Patrum Constantiensium mente, si qua de priorum illius Concilii Sessionum auctoritate supererat difficultas, per Synodum Basileensem, Adversariorum sententia, de medio sublata est: quum nemo ambigere possit, quin Constantiensia Decreta Basileenses de quibuscumque Romanis Pontificibus intellexerint; & Eugenius IV. eas Concilii Basileensis Sessiones, quibus illa Decreta repetita & firmata sunt, Apostolicis litteris adprobarit. Quum enim, inquit Illustrissimus Adversarius (a), iis litteris laudatus Pontifex a se antea tentatam Concilii dissolutionem irritam declarabat, quum Synodi Acta, se etiam invito & reluctante confecta, rata & valida fuisse agnoscebat, quum supra se Concilii generalis potestatem extollebat; vel vera, vel falsa promebat. „ Si
 „ vera, stant plane Constantiensia Decreta, atque iis
 „ certa fides: stant adversus indubitatum Pontificem:
 „ stat suprema Basileae agnita & exercita in indubita-
 „ tum Pontificem potestas. Si falsa promisit Eugenius,
 „ jam Pontifex non tantum erraverit, verum etiam
 „ errorem firmaverit, eoque Decreto, quo nullum ritu
 „ solemniori promulgari possit, quippe quod fuerit in
 „ Oecumenica Synodo promulgatum, ac Synodi sen-
 „ tentia roboratum. Unde colligit eruditissimus Prae-
 „ sul: „ Sic quidquid dixeris, vicimus, atque omnino
 „ res nostrae utrinque in tuto sunt. Ita illi certissimae
 sibi plenissimaeque victoriae in Synodi decretis tropaea
 & monumenta constituunt.

At

 (a) Cap. seq. in fine.

At rem serio cogitanti, & infinita mala per hanc Synodum in Ecclesiam inuenta, ac turpissimum ejus exitum prae oculis habenti, nullum, mea quidem sententia, efficacius ac luculentius argumentum offerri potest traditae divinitus Romanis Pontificibus gubernandae Ecclesiae, & generalium Synodorum indicendarum, transferendarum, dissolvendarum & regendarum, plusquam Imperatoriae ac Monarchicae potestatis, quam quod ipsius Basileensis Concilii Acta suppeditant. Fortissimi Imperatoris invicta & insuperabilis virtus non tam victoriis demonstratur, quas de hostibus referat, quam cladibus, quibus ejus exercitus afficiantur, si alio duce cum hostibus congrediantur. Id enim manifestissimo argumento est, non multitudini militum, non eorum audaciae, sed Imperatoris militari prudentiae, virtuti vel fortunae tribuendas esse res fortiter, sapienter ac feliciter gestas. Sic prorsus, ex Romanis Pontificibus esse, quod adversus Ecclesiam portae inferri, hoc est pravorum dogmatum & scelerum vis, non praevalcant, non minus luculenter ostenditur ex cladibus, quibus vastatae sunt Synodi, quae illis invitis ac reluctantibus habitae sunt, quam ex earum palmis atque triumphis, quae sub eorundem Romanorum Pontificum auspiciis adversus impietatem dimicarunt. S. Leonem in causa Eutychetis super sedendum Concilio existinasse, in causa Flaviani Synodum postulasse ipsum etiam atque etiam, ac tandem expugnasse, Cl. Thomassinus animadversum est (a), qui etiam haec in rem nostram subjungit: *Quam provida autem utrobique, quamque salutaris Ecclesiae essent Sedis Apostolicae judi-*

(a) Dissert. XI. in Conc. CP. sub Flav. & Ephes. II. num. X.

dicta, ipso rerum exitu comprobatum est. Consultissimum enim fuisset abstinere ab illa Synodo praedatoria Ephesina; consultissimum fuit infligta Ecclesiis illo Latrocinio vulnera per Chalcedonensem Synodum obduci. Itaque in Ephesina illa secunda Synodo, quae invito Leone celebrata est, nec ejus Legatis praesse coetui datum est, nec ipsius litterae recitatae sunt, ad quas velut ad regulam decreta exigentur, Eutychiana impietas praevaluit, & in Catholicam fidem, & Catholicorum dogmatum Defensores longe lateque grassata est: at in Chalcedonensi Concilio, quod auctore Leone habitum est, cui Legati illius praefuerunt, & in quo omnia ad ejus judicium atque doctrinam velut ad normam exacta sunt, & veritas vicit, & profana novitas profligata est. Nec secus accidit in Basileensi Synodo & Florentina. Prior enim refragante Eugenio celebrata, quaecumque se, veterum Conciliorum more, ab illo dirigi & gubernari passa non est, pessimum habuit exitum, & latrocinialis ac praedatoria Synodus evasit, quae Occidentalem Ecclesiam diro schismate laceravit. Posterior autem, quam Eugenius indixit, cui praefuit, quam moderatus est, & praesentia sua fovit atque illustravit, Orientales Ecclesias jamdiu ab Occidentali divulsas, variisque erroribus constupratas, ad unitatem revocavit, fideique Catholicae integritati restituit. Quo sane nullum praeclarior argumentum adferri potest praesentiae Spiritus Sancti in Synodis Oecumenicis, quum illas Romani Pontifices regunt; & contra, eundem ab eis Spiritum veritatis & unitatis abesse, quum adspectabili Ecclesiae Capiti velut membra subesse renuunt, illique leges statuere aggrediuntur, non ab eo accipere volunt. Sed haec inter-

terim missa faciamus, de quibus postea uberius ac luculentius differemus. Quum enim Adversarii non audeant omnia Basileensis Concilii acta palam & aperta fronte tueri, duo illi inter Pontificem & Synodum diffidia distinguunt, ac vel in secundo diffidio aegre patiuntur; ut cum Ephesino Latrocinio Basileense conferatur. Quod autem ad primum diffidium attinet; omnia per Synodum adversus Pontificem, ipsam dissolvere aut alio transferre molientem, legitime gesta fuisse, nec suarum facultatum limites eam esse praetergressam, quum Eugenio ineundae pacis leges & conditiones praescripsit; ipsius Eugenii litteris & auctoritate invicte probari existimant; qui nimirum Synodi legibus obsequutus, quaecunque in eam molitus fuerat, irrita declaravit, Synodumque Basileae jure ac legitime & inchoatam fuisse; & deinceps permansisse, professus est, quamquam ejus dissolutionem ac translationem sollennibus ipse decretis & sanctionibus edixisset. Unde palam effici videatur, semel coactam Oecumenicam Synodum nequaquam ex Romani Pontificis potestate ac voluntate pendere, sed ei potius ipsum Romanum Pontificem esse subiectum qui Patrum Decretis ac legibus obsequi compellatur.

Haec reapse in hocce primo Pontificem inter ac Synodum diffidio gesta fuisse, haud equidem imus inficias: sed jurene an injuria gesta sint, id vero nobis accurate discutiendum est. Nobis enim, contra atque Adversarii sentiunt, & rata & valida fuisse videntur Eugenii IV. de Synodi dissolutione vel translatione Decreta; adeoque irrita & inania, quae ipso reclamante, a Basileensibus gesta & sancita sunt; & nullius esse momenti ejusdem Eugenii litterae, quibus priora Basileensium acta

acta probavit, ut quae ipsi per vim extortae fuerint, atque apertissime constet, nunquam aut Eugenium ipsum, aut Ecclesiam Romanam avita abjecisse dogmata veteresque exuisse sensus, de collata per Christum Apostolorum Principi, ejusque in Sede Apostolica Successoribus, Monarchica in universam Ecclesiam, adeoque & in Synodos Oecumenicas, potestate. Tria ergo mihi in hujusce disputationis limine demonstranda sunt. 1. Jus Eugenio fuisse ad Basileense Concilium, ipso quoque renuente ac reclamante, aut penitus dissolvendum, aut alio transferendum. 2. Justis illum ac legitimis caussis Synodum Basileae coactam abrogasse, ac Bononiam transferre voluisse, post annum cum dimidio ipso praesente ac Praeside celebrandam. 3. De veris ac genuinis ejusdem Eugenii & Ecclesiae Romanae sensibus statuendum non esse ex litteris, quae ipsi per vim in gratiam Basileensium extortae sunt, sed cum ex aliis ejusdem temporis monumentis, tum maxime ex iis, quae ab Eugenio patrata sunt aut litteris consignata, quum ipsi integrum fuit palam & aperte & absque verborum circuitione animi sui sensu depromere.

ARTICULUS PRIMUS.

Penes Romanos Pontifices jus & potestas est ad Synodos Oecumenicas de loco in locum, ipsis etiam invitis ac repugnantibus, transferendas, aut etiam penitus dissolvendas.

A Romanis Pontificibus Oecumenicas Synodos esse congregandas, nec ipsi diffitebantur Basileenses;

ses; At Synodos semel coactas, ipsis etiam invitis ac reluctantibus, dissolvere, vel de loco in locum transferre, in ullius hominis esse potestate, id vero illi praefracte ac pertinaciter abnuebant. Conciliis enim Oecumenicis, simul atque congregata sunt, adesse Spiritum Sanctum, qui illa virtute sua contineat & confirmet, atque illorum Decretis pondus adjungat & ineluctabilem auctoritatem; ut qui Synodum semel coactam & Spiritus Sancti praesentia & virtute firmatam, ipsa quoque reclamante, dissolvere, aut transferre moliat, Spiritui Sancto resistat, vel in ipsius etiam potestatem & auctoritatem invadat. Praesto autem esse Conciliis Oecumenicis Spiritum Sanctum, & quae ab illis communi sententia aguntur aut decernuntur, Spiritu Sancto auctore decerni, adeoque debere integra & inviolata consistere, nec ullius infringi ac labefactari posse temeritate, multis illi & scripturarum testimoniis & Patrum locis persuadere nitebantur. *Ubi duo vel tres congregati fuerint in nomine meo, in medio eorum sum ego. Ecce ego vobiscum sum &c. Spiritus Sanctus docebit vos omnem veritatem. Ecclesia,* quae in Synodo Oecumenica repraesentatur, *columna est & firmamentum veritatis. Adversus eam portae inferi, hoc est scelerum & pravorum dogmatum vis, praevalere non possunt.* Conciliis generalibus idem honor habendus ac quatuor Evangeliiis. *Uniuscujusque Synodi constitutum, quod universalis Ecclesiae probavit assensus, nullam magis exsequi Sedem praeceteris oportere quam primam. Contra statuta Patrum . . . ne hujus quidem Sedis possit auctoritas &c.* Ex quibus aliisque id generis testimoniis, Basileenses sibi jure colligere videbantur, Synodum semel in Christi nomine congre-

giam, & Ecclesiam Catholicam repraesentantem, Praesidem habere ipsum Christum, qui illam per suum Spiritum dirigat doceatque, & ab omnibus erroribus pravisque dogmatis tutam & invictam praestet. Quare eam esse certam & inflexibilem, vel, ut aiebant, *inobliquabilem* regulam veritatis, cui vel ipse Romanus Pontifex, tanquam homo erroribus ac peccatis obnoxius merito subjiatur; quum Synodus universalis nec peccare nec decipi possit, perinde atque ipsa Ecclesia Catholica, quam repraesentat. Haec illi passim jactabant, & ad eam Synodum transferebant, a qua non modo Romanus Pontifex aberat, sed quae illo etiam invito ac reclamante celebrabatur. Quapropter id nobis discutiendum imprimis est, an ejusmodi Synodus certam habeat praesentiae Spiritus Sancti vel in Ecclesiae traditione, vel in sacris litteris promissionem. Frustra enim Pontifici Synodum abroganti Synodi ipsius auctoritas objicitur, nisi certo & perspicue constet, Pontifice ab ea recedente, permanere tamen in illa & cum illa Christum, qui velut proprium & primum Ecclesiae Caput suo illam Spiritu induat, & auctoritate confirmet.

Nobis ergo quod Basileenses tam praesidenter jactabant, sibi adesse Christum & Spiritum ejus, seseque eorum nixos ac praeditos potestate, Eugenio Synodum revocanti jure resistere, non modo ex sacris litteris & Ecclesiae traditione certum & exploratum non est, verum ex iisdem fontibus ac principiis prorsus contraria nobis sententia inest. Nam quod ad primum adinet textum; probandum Basileensibus erat, eos in Christi nomine congregari, quos Romanus Pontifex a sua communione repelleret; contra atque S. Hieronymo visum est,

est, cujus haec sunt ad Damasum verba (a): *Ego nulum praeivium nisi Christum sequens, Beatitudini tuae, id est Cathedrae Petri communione confocior. Super illam Petram aedificatam Ecclesiam scio. Quicumque extra hanc domum agnum comederit, profanus est: si quis in Arca Noë non fuerit, peribit regnante diluvio. Et rursus: Quicumque tecum non colligit, spargit, hoc est, qui Christi non est, Antichristi est.* Si autem profanus est, si non Christi, sed Antichristi est, qui cum Romano Pontifice conjunctus non est, ii profecto in Christi nomine minime congregantur, qui a Romani Pontificis communione se juncti sint. Fatemur quidem, suam Christum praesentiam, suumque Spiritum Apollolis promississe; sed ut praeclare ipsemet Bosluetius alibi nobis laudatus animadvertit, ab eorum consortio Petrus non aberrat, sed inter eos erat velut eorum Caput & Princeps a Christo designatus, quum haec illis promissa sunt. Qua ergo fiducia sibi de Christi & Spiritus Sancti praesentia Episcopi spondeant, si ab eorum coetu Petrus absit, qui, ut ait S. Petrus Chrysologus (b), adhuc *in propria Sede & vivit, & praesidet, & praestat quaerentibus fidei veritatem?* Quis etiam nesciat Ecclesiam Catholicam columnam esse & firmamentum veritatis, & adversus eam portas inferi praevalere non posse. Sed hanc Ecclesiam cum Hieronymo paullo ante laudato super Petram aedificatam scimus, & ideo immobilem & inferis portis invictam & inexpugnabilem credimus, quoniam & hanc ipsam Petram, super quam aeterni hujus aedificii altitudo confurgit, *superbae non vincunt inferorum*

X x 2

por-

(a) Epist. XV. al. XIV. vel LVII.

(b) Epist. ad Eutychem, l. Par. Conc. Chalced. cap. XV.

portae, quemadmodum alicubi S. Augustinus observat, cui & alii Patres alibi nobis laudati (a) apertissime suffragantur; ac proinde ad illos, qui super hanc petram non aedificant, Christi promissa non pertinent. Prius enim dictum est: *super hanc petram aedificabo Ecclesiam meam*; ac deinde subjunctum: *Et portae inferi non praevalerunt adversus eam*. Pars ergo Ecclesiae, quae super hanc petram non aedificetur, ab inferorum insultibus tuta ex Christi promissis non est: nam uti scribit Hieronymus ad Damasum loco paullo ante commemorato: *Qui tecum non colligit, spargit*. Itaque ex sacris litteris non habemus, Synodos, invitis ac reluctantibus Romanis Pontificibus congregatas, ob Christi & Spiritus Sancti praesentiam, deficere & errare non posse, & ineluctabili praeditas esse auctoritate; ut quicumque illarum Decretis obsistit, Spiritui Sancto resistere censeatur.

Sed neque id habemus ex traditione. Nam & hic probandum Basileensibus erat, Pontifices ac veteres Patres, qui Synodis Occumenicis indeclinabilem vindicant potestatem, eas Synodos cogitasse, quae refragantibus Romanis Pontificibus habitae sint, & quas illi improbarint, non autem eas tantum, quibus aut ipsi per se, aut per suos Legatos praefuerint, & quarum decreta Apostolica auctoritate firmarint. Id vero nunquam Basileenses demonstrarunt, imo nec demonstrare potuissent: nam ex vetusta & constanti Ecclesiae traditione contraria plane sententia derivatur. Constat enim, quibilibet Conciliis eorumque Decretis exsufflandis & abjiciendis satis id esse creditum, quod ea Romani Pontifices reprobarint: ea vero convaluisse, quae valida & rata

(a) Sup. lib. IV. cap. II. art. I. & II.

rata iidem Romani Pontifices habuerunt. Sic Julius I. apud Socratem (a) & Sozomenum (b) Orientales admonet: *Legem esse Sacerdotalem, quae pronuntiat, acta illa irrita esse, quae absque sententia Episcopi Romani constituuntur*. Sic Damasus ad Episcopos Illyrici ex Romana Synodo scripsit (c): *Numerum Episcoporum, qui fuerant Arimini congregati, praejudicii vim habere non posse, quod eorum formula composita esset Episcopo Romano minime consentiente, cujus prae ceteris omnibus sententia fuerat expectanda*. Ita Lucentius S. Leonis in Synodo Chalcedonenſi Legatus id primum Dioscoro objecit (d), quod *praesumpſit, & Synodum ausus est facere sine auctoritate Sedis Apostolicae*: quod, inquit, *nunquam licuit, nunquam factum est*. Ita in septima Synodo Actione VI. Concilio trecentorum ac viginti & octo Episcoporum, quod sub Constantino Copronymo fuerat adversus sacras Imagines celebratum, Oecumenici titulus & auctoritas abrogata est, *quia non habuit adiutorem illius temporis Romanorum Papam, vel eos, qui circa ipsum sunt Sacerdotes, nec etiam per Vicarios ejus, neque per encyclicam Epistolam, quemadmodum lex dicitur Conciliorum*. Quae Synodi respicere auctoritatem, ipsi etiam Petro de Marca observatum est (e). Ita apud eundem Illustrissimum Auctorem (f), S. Stephanus Junior eandem Iconomachorum Pseudo-Synodum immerito sibi Oecumenicae titulum ad-

(a) Lib. II. Hist. Eccles. cap. VIII.

(b) Lib. III. Hist. Eccles. cap. X.

(c) Ap. Theodorit lib. II. Hist. Eccles. cap. XXII.

(d) Act. I. Conc. Chalcedon.

(e) Lib. V. de Conc. fac. & Imp. cap. XIV. num. I.

(f) Ibid. num. VIII. & in Add. Baluz.

adrogasse, ea ratione contendit, quod citra Romani Pontificis auctoritatem de rebus Ecclesiasticis decernere fas non est (a): *Quæ Oecumenicum Concilium istud vocari queat, quod Romanus Antistes, citra cujus auctoritatem nullo modo fieri potest, ut res Ecclesiasticae ad normam dirigantur, gratum non habuit?* Ita S. Theodorus Studites Leoni III. scribens agebat, Moechos, hoc est, qui adulterinis Imperatoris nuptiis suffragabantur, haereticam Synodum habuisse, qui neque orthodoxam celebrare, ipso abnuente, potuissent (b): *Haereticam Synodum cogere veriti non sunt, qui ne orthodoxam quidem absque cognitione vestra, ut antiquus mos obtinet, cogere potuerunt.* Quae quum ita sint, qua fronte Basileenses quae de summa & irretractabili generalium Conciliorum auctoritate in Ecclesiasticis Monumentis occurrunt, ad suam pertrahere Synodum nitebantur, quae repugnante atque improbante legitimo Pontifice celebrabatur? Quum ea praerogativa iis tantum Conciliis, etiam Oecumenicis, conveniat, quorum decreta, ut est apud Ferrandum (c), *ad Beati Petri memoriam perducta, diligentius examinantur, atque firmantur.* Haec, inquit, *sequenda sunt, tenenda sunt, amplectenda sunt, in retractatione sub qualibet pietatis specie teneri non debent.* De his autem, quae invitis Romanis Pontificibus decernuntur, nec eorum adprobatione firmantur, quae fuerit veterum Patrum sententia, ex adlatis eorum testimoniis exploratum est: quae tam recte meritoque in Basileensem Synodum intorquentur, quam ipsa

(a) Ex Metaph. in Vit. Steph. Jun. cap. XXX:

(b) Lib. I. Epist. XXXIII.

(c) Epist. ad Pelag. num. VII.

ipsa ea sibi immerito vindicabat, quibus eorum tantum Conciliorum auctoritas a Patribus celebratur, *quibus*, ut ait idem Ferrandus, *Ecclesiae Romanae consensus accessit*.

Illud vero quam absonum & absurdum, quod ut Synodi, quam invito Eugenio Basileenfes celebrabant, supra ipsum Pontificem auctoritatem evcherent, hanc esse jactabant non modo fidei, verum & aequitatis *inobliquabilem* regulam, quae perinde atque ipsa Ecclesia Catholica, quam eorum sententia, repraesentabat, ut non errare, ita nec deficere aut peccare posset; quam tamen Romanus Pontifex velut homo & erroribus & peccatis obnoxius haberetur: qui proinde Synodi non modo de fide, verum & de moribus, & de Ecclesiastica disciplina decretis parere omnino deberet, ad eaque velut ad certissimas & irretractabiles regulas, & suos ipse mores exigere ac reformare, & Romanam Curiam componere cogeretur. Videamus ergo, an quae ipsi de sua illa Synodo tam magnifice praedicabant, veterum gestorum experimentis comprobentur. Propius haec ad praesentem spectabunt disputationem. Nam si Oecumenica Synodus, neglecta & posthabita, quam exhibere debet Romanis Pontificibus reverentia, & sua abuti auctoritate, aut in tyrannidem verti possit; quae causa erit, cur ea Romani Pontificis potestate aut omnino dissolvi, aut alio transferri nequeat? Posse autem Synodum Oecumenicam, nisi Romanum Pontificem praeuntem faciemque praeferentem sequatur, a sanctioribus disciplinae fideique regulis declinare, ex magna illa Synodo Chalcedonensi non una ratione compertum est. Quis enim ignorat, qua verborum vehementia S. Leo Canonem

nem Chalcedonenſem XXVIII. infectatus ſit, quo Conſtantinopolitana Sedes, reſiſtentibus & reclamantibus Sancti ipſius Leonis Legatis, ſuper ceteras Orientis eveſta eſt? Perinde enim S. Pontifex in eum Canonem invec-tus eſt, ac ſi per eum violata fuiſſent omnium Eccleſiarum jura, & everſa diſciplina, quam, inquit (a), *ad pacificationem omnium Sacerdotum per trecentos decem & octo Antiſtites Spiritus Sanctus inſtituit*, & quae, ut ipſe fatetur Boſluetius (b), rei univerſae Eccleſiaſticae conducere videretur; qua proinde ſoluta atque labefa-ctata, Eccleſiarum omnium turbari pacem, & omnia ſuſdeque miſceri, S. Leo frequentiſſimis ac vehementiſſimis litteris inculcabat (c): *Nimis ergo haec improba, nimis ſunt prava, quae ſacraſſimis Canonibus inven- niuntur eſſe contraria. In totius Eccleſiae perturbationem ſuperba haec tendit elatio, quae ita abuti voluit Concilio Synodali, ut Fratres in fidei tantummodo ne- gotium convocatos, & definitione ejus caſſare, quae erat curanda, perſanctos, ad conſentiendum ſibi, aut depravando traducere, aut terrendo compellerent.* En Synodum Oecumenicam, quae nimis improba & prava decernat, & quae in totius Eccleſiae tendant per- turbationem, quaeque idem S. Pontifex (d) in irritum miſit, & per auctoritatem Beati Petri Apolloli generali prorsus definitione caſſavit. Ut illa Baſileenſibus tanto- pere jaſtata de Conciliorum generalium in fidei morum- que, ac diſciplinæ decretis incerrantia, quibus idem ho- nor

(a) Epiſt. LV. ad Pulch. Aug. Tom. IV. Concil.

(b) Par. 2. lib. XIII. cap. VIII.

(c) Epiſt. ad Anatol. 3. Par. Conc. Chalced. cap. V.

(d) Epiſt. LV. ad Pulch. Tom. IV. Concil.

nor atque Evangelicis Decretis habendus sit, quae nemo infringere possit, nisi qui una & Spiritui Sancto resistat; quam vana & futilia sint, vel hoc uno exemplo apertissime demonstretur.

Atque hîc mihi commemoranda sunt, quae circa hunc Canonem loco paullo superius citato Bossuetius observat: „Defendimus, inquit, Constantiense Concilium, quo nempe Concilii potior auctoritas cognoscatur in fide, in schismate, in reformatione generali promovenda. At Orientales Episcopi isto Canone Episcopo Constantinopolitano consulebant, Imperatori gratificabantur, non fidei, non schismati, non reformationi generali providebant. Imo vero rectum ordinem ac primarum Sedium honorem ab antiquo institutum evertabant, qui rei universae Ecclesiasticae conducere videretur. Non ergo adversus effraenem aut extraordinariam potestatem, Canones ac jura libertatemque Ecclesiasticam tuebantur; quod Patres Constantienses volebant; sed Papae, Canones rectumque ac probum & canonicum ordinem defendenti, repugnabant; ac proinde ad nostram quaestionem non pertinet quidquid hîc actum ab illis fuit. Ego autem hinc tria colligo, quae ad praesentem disputationem plurimum pertinere videantur. Et primo quidem, quod neque in ipsa generali reformatione promovenda velut regula *inobliquabilis* spectanda sit generalium Conciliorum auctoritas. Quomodo enim tanquam regula indeclinabilis habenda est, quae ut Regiae Civitatis Episcopo consuleret, & Imperatori gratificaretur, rectum ordinem ac primarum Sedium honorem ab antiquo institutum evertabat, qui rei

Yy

uni-

universae Ecclesiasticae, qui paci omnium Ecclesiarum conducere videretur? Secundo, ergo contingere potest, & reapse aliquando contigit, ut rectum ac probum & canonicum ordinem Pontifex tueretur, quem Synodus Oecumenica suis decretis labefactare & evertere nitebatur. Sic S. Leo Nicaenum de Primarum Sedium ordine Canonem defendebat, cui primū Constantinopolitana Synodus, deinde Chalcedonensis lethale vulnus inflixerant. Tertio, ergo & contingere potest, ut in Synodum Oecumenicam suis decretis rectum ac probum & canonicum ordinem evertentem, suam Romanus Pontifex exerat auctoritatem. Sic idem S. Leo Chalcedonensem illum Canonem, ut jam diximus, in irritum misit, & per auctoritatem Beati Petri Apostoli generali prorsus definitione cassavit. Quidni ergo & quilibet Romanus Pontifex, si Oecumenica Synodus in Apostolicæ Sedis jura involet, eaque appetat, quæ nulla unquam legitima Synodus usurpavit, & Ecclesiæ Monarchiam a Christo institutam evertere manifeste videatur; quidni, inquam, & illi Romanus Pontifex pro virili obstitat, eamque per Beati Petri Apostolorum Principis auctoritatem generali prorsus definitione dissolvat?

Sed graviora sunt, & propius controversiam nostram attingunt, quæ Actione V. in eadem Chalcedonensi Synodo contigerunt. Formula fidei tam æquivoca, & ob quorundam verborum omissionem; quæ S. Leo velut Eutychiano dogmati funditus exscindendo apprimè apta selegerat; Dioscori impietati tam consona Synodo proposita fuerat, ut Anatolius quo hanc ab illa maculam & invidiam depelleret, dicere non dubitavit, propter fidem damnatum non fuisse Dioscorum. Hanc

tamen formulam, praeter Apollonicae Sedis Legatos & paucos Orientales, omnes Episcopi magnis acclamationibus exceperunt, velut Nestorianos & haereticos infectantes, qui eidem subscribere renuebant. Quod S. Leonis Legati indigne ferentes, e Synodo discedere statuerunt, Romamque aut saltem in Italiam reverti ad novam ibi Synodum celebrandam: *Si non consentiant Epistolae Apostolici & beatissimi Viri Papae Leoni, jubete nobis rescripta dari ut revertamur, & ibi Synodus celebretur.* Eorumque petitioni Marcianus annuendum existimabat, nisi Synodus in unam eandemque cum Legatis, & S. Leonis epistolae per omnia congruentem, fidei formulam conveniret: *Cognoscite, quia in partibus Occidentalibus habet fieri Synodus, eo quod Religio sit vestra hic noluit de vera & orthodoxa fide indubitanter definire.* Ex quibus duo, quae ad rem nostram maxime pertinent, colliguntur. Unum est, Ejusmodi Synodi, qualem Basileenses cogitabant animoque informatam habebant, quae nimirum a Romano Pontifice dissentiret; ejusmodi, inquam, Synodi judicia non esse irreformabiles & irretractabiles, aut *inobliquabiles* fidei Catholicae regulas. Nam magna illa Chalcedonenfis Synodus aequivocam, ut jam diximus, fidei regulam adprobaverat, & nisi per Legatos ad S. Leonis Epistolam velut ad certam normam revocata fuisset, eam Orbi Christiano omnium fere Patrum subscriptione munitam obtrusisset: *Definitio omnibus placuit.... Petimus ut definitio subscribatur coram Evangelistis..... Jubete subscribi definitionem. Contra fidem fraus non fiat. Qui non subscribit definitioni, haereticus est.... Spiritus Sanctus definitionem dictavit. Definitio orthodoxa*

est . Definitio modo subscribatur &c. En Synodi voces , quum per omnia Pontificem fidem distantem & praescribentem non sequitur . Nam paullo post agentibus Legatis apertissime constitit , mancā & imperfectā fuisse eam fidei definitionem , quam velut a Spiritu Sancto dictatam , ab omnibus , qui orthodoxi & Catholici haberi vellent , statim esse subscribendam , pertinacibus clamoribus contendebant . Hinc merito postmodum Romani Pontifices tria Capitula , etsi ab eodem Chalcedonensi Concilio , ut falso schismatici judicabant , approbata fuissent , nihilominus retractari potuisse adfirmarunt , quoniam ad hoc negotium pertractandum ac definiendum nulla S. Leonis auctoritas intercesserat . Alterum quod colligimus est , nec Legatorum , nec Imperatoris , nec aliorum Patrum animis haesisse illud Basileensium commentum , quod Synodus generalis , ipsa nequaquam consentiente dissolvi , vel transferri non possit . Nam neque Legati , neque Imperator tam fidenter audacterque minati fuissent , Synodum in Occidente coactum iri , nisi illo transferri etiam invitis Patribus potuisset , neque id Patres silentio dissimulassent , si persuasum habuissent , id ex ipsorum voluntate pendere . Neque hac vice tantum , sed vel sub ipsum Synodi initium se se ab ea discessuros iidem S. Leonis Legati professi sunt , si contra atque sanctissimus ille Pontifex praecipiebat , Dioscoro locus inter Episcopos daretur : *Aut ille egrediatur , aut nos eximus .* Quamquam autem dura videretur Judicibus ea S. Leonis sententia , neque in Concilio deessent qui Dioscoro suffragabantur ; nemo tamen Legatis objecit , etiam illis exeuntibus adhuc Synodum permanfuram , quae paci Ecclesiarum & fidei

Ca-

Catholicae provideret. Nimirum haec somnia nondum cujusquam mentem invaserant, sed ea omnium mentibus sententia haerebat, quae & deinceps ad usque Constantiensis & Basileensis Concilii tempora inter Catholicos constanter obtinuit, certo ac legitimo Pontifice repugnante, Oecumenicam Synodum celebrari non posse; adeoque penes illum esse, quemadmodum & Sanctus Theodorus Studites luculenter docuit (a), summam Oecumenicae Synodi potestatem : *α καὶ τὸ κρείττον ἀναφίεται τῆς οἰκουμενικῆς συνόδου*. Cui & potestas summa defertur Synodi Oecumenicae.

ARTICULUS SECUNDUS.

*Eugenius IV. legitimis justisque rationibus per-
motus, Basileensem Synodum Bononiam
transferre decrevit.*

UT certum est, in Romani Pontificis potestate positum esse Synodos Oecumenicas de loco in locum transferre, aut etiam dirimere: ita & nemo dubitat, non debere illum ejusmodi potestate uti, nisi illa utendi legitimae, ipsius animo justaeque suppetant rationes. Cujusmodi an Eugenio IV. Basileense Concilium dirimenti, aut potius Bononiam transferenti praesto fuerint, prudens Lector ac praepudiciis expeditus facile ex dicendis judicabit. Porro ut aequitas & prudentia, quibus in hoc negotio Eugenius usus est, praeclarius innotescant, varia hinc nobis decreta singulatim lustranda sunt ab ipso edita, antequam *pure ac simpliciter*, ut vole-

(a) Lib. II. Epist. CXXIX. ad Leon. Sacellarium.

leant Basileenses, eorum Synodo adhaereret. Inde enim aperte constabit, nihil ab eo gestum in hac causa faciendumve esse, quod non gravissimae rationes faciendum decernendumque suaderent compellerentque. Atque ut ab eo Decreto auspicemur, quo labente anno 1431. ex sacri Senatus sententia Concilium Basileense dissolvit, & Legatum suum Cardinalem S. Angeli revocavit, nec non aliud Concilium post annum cum dimidio Bononiae celebrandum indixit, has ille ejusmodi Decreti causas fuisse disseminavit (a): Patres parvo numero non supra decem Basileae convenisse, quamvis tempus praescriptum septennii ante octo menses esset elapsum: neque videri aequum a tam paucis Episcopis universae Ecclesiae leges praescribi: Rigere hyemale tempus; neque verisimile esse illos, qui nondum venerant, in posterum venturos: Bellum exortum esse inter Philippum Burgundiae & Fridericum Austriae Duces, omnemque circa Basileam regionem bello vexari; proinde non posse Patres tuto illic congregari: multos convenire non posse, paucos non esse idoneos tam multis & magnis rebus agendis. Jampridem sub Martino Pontifice tractatum fuisse de unione Orientalis Ecclesiae cum Occidentali. Johannem Paleologum Imperatorem, & Joseph Patriarcham Constantinopolitanum, Oratores ad se Romam misisse, qui executionem conventorum cum Martino nomine Ecclesiae Graecae exponerent. Expedire admodum Christianae Reipublicae hanc Graecorum & Latinorum unionem; nihil utilius salubriusque hoc tempore fieri posse. Illis Basileam adire non facile esse, & ex tribus Italiae Civitatibus oblatis, Roma, Bononia & Ancona, Bo-

(a) Aug. Patric. Hist. Conc. Basil. &c. cap. IV.

Bononiam elegisse; non esse tantam occasionem omit-
tendam, neque ullo modo spernendam tot populorum
salutem. Non posse rursus vocari Patres ad Concilium
Basileae sine temporis prorogatione; interea diem Grae-
cis promissam impendere, eodem tempore duobus locis
congregari Ecclesiam non licere, neque, si id fieret,
posse utrobique esse Synodum generalem, & bis conve-
nire, laboriosum omnibus, & plerisque impossibile:
Audiisse praeterea, Patres qui Basileae essent, Haereti-
cos Bohemos, publice ac legitime Constantiensis ac Se-
nensis Conciliorum auctoritate damnatos, nunc iterum
ad disputandum & contendendum super damnatis arti-
culis provocasse, in dedecus & contemptum Apostolicae
Sedis, sacrorum Conciliorum, Sanctorum Patrum De-
cretorum, & Imperialium legum, jubentium damnatos
haereticos non audiri. Ad haec adjungi adversam vale-
tudinem, qua in principio sui Pontificatus correptus sit,
non facile esse corpori per morbum fracto tantum
itineris conficere; & res magnas quae imminerent prae-
sentis Pontificis & sacri Senatus admodum indigere. Fo-
re si ad annum cum dimidio res differatur, ut recuperata
valetudine ad locum viciniorem & ipse cum Romana
Curia facile accedat, & tempore magis opportuno Orien-
tales & Occidentales conveniant frequentiores. Adesse
praeterea plures alias causas, quae hoc fieri suadeant,
quas litteris explicare non esset tutum, neque Reipubli-
cae expediret omnibus esse notas, eas venturas in lucem
quum tempus fuerit.

Eugenii Bullam (*) Patribus adtulit Daniel Paren-
tinus Episcopus, quam ubi Julianus Praefes accepit,
men-

(*) Marten Praef. in Tom. VIII. novis. Collect. &c. num. 9.

mente ultra quam credi potest consternatus, statim ut verus obedientiae filius Praefidis munia dimisit. At non fuit eadem aliorum Praelatorum, licet ultra decem non essent, in Pontificem animi demissio: imo si Juliano ipsi credimus, quum de suspitione dissolutionis coram ipso Parentino Antistite orta esset collatio, *omnes de Concilio quodammodo versi sunt in furorem, & firmaverunt se fortius ad perseverandum.* Et paullo post: *Si ego, aut quivis alius auderet sine consensu istorum dissolvere, aut mutare locum Concilii, lapidarent & caperent me ut haereticum, & credo dentibus me laniarent.* Rebellionis caput fuisse dicitur Dominicus Capranica Romanus, Decretorum doctor & Episcopus Firmanus, qui a Martino V. secreto Cardinalis designatus, nec publice ante mortem ab eo declaratus, quum in Conclavi a Purpuratis PP. admissus non fuisset, nec ab Eugenio sacro Collegio associatus, supra modum effertus, Basileam se contulit, ubi cum inchoatum reperisset Concilium, illiusque revocandi potestatem ab Eugenio factam Juliano, congregatis Patribus auctor fuit, ne Pontifici Concilium dissolventi obedirent: quinimo contenderent, sine Patrum qui convenerant consensu haudquaquam posse dissolvi. His animatus Julianus resumto quodammodo spiritu, praesidentiam etiam resumit, duasque Eugenio ad commovendum idoneas Epistolas scripsit, quibus multis eum rationibus a proposito revocare conabatur. Praecipua ejus ratio, quam praetexebant & alii Patres, erat Bohemorum reductio. Eos quum armis Julianus superare non potuisset, saltem disputatione ad Ecclesiae gremium reducere sperabat. Invitati jam ad Concilium fuerant; missique ad eos Legati Viri egregii, mul-

tis

tis habitis cum eis collationibus, sic tandem effecerant, ut se cum salvo-conductu Basileam accessuros promitterent. Grave igitur videbatur, concilium aut dissolvere, aut alium in locum transferre, ne deterrerentur inde Bohemi, Patribusque exprobrarent, quod causae diffidentes suae ab omni collatione abhorrerent, fugerentque de rebus dogmaticis disserere. *Si Concilium dissolvatur*, inquit Julianus, *quid dicent Haeretici? Nonne insultabunt in nostros, & fient proterviores? Nonne Ecclesia fatebitur se esse victam, quum non ausa fuerit expectare illos quos vocaverat?* Quam turpem notam ut a se amolirentur Patres Basileenses, continuare Concilium decrevere, atque ut Eugenium ad sua vota facilius inflecterent, primam Sessionem VII. die Decembris celebrarunt, in qua Constantiensis Synodi decretum de celebrandis frequenter Conciliis renovaverunt, moxque alteram XIV. Februarii, in qua Concilium legitime inchoatum esse, pronuntiatum est, atque in his, *quae ad fidem, extirpationem schismatis, & reformationem Ecclesiae in capite & in membris pertinent*, esse supra Papam. Subsequutaque est die XXIX. Aprilis tertia Sessio, quae Concilium a Papa dissolvi non posse declaravit. Nec his contenti Basileenses, litteras ad Sigismundum Caesarem, Carolum Regem Francorum, aliosque Reges & Principes dedere, eorum praesidium & tutamen adversus dissolutionis seu translationis Bullam implorantes.

Haec tamen Basileensium contumacia & in Pontificem aperta rebellio, haec eorum agendi ratio, haec celebratarum ab eis sessionum Decreta, calcaria Eugenio addere debuerunt, & maximo esse incitamento ad talem

Z z

Syno-

Synodum dissipandam, atque omni ope summoque studio cavendum, ne a talibus absque suo sacrique Senatus interventu, aliquis Conventus sub generalis Concilii nomine celebraretur. Qui enim quum perpauca adhuc essent, hosce sibi spiritus sumserant, ut se se vel invito Pontifice Concilium Oecumenicum facere praedicarent, cui Romanus ipse Pontifex subiectus esset, & quod ille dirimere Apostolica auctoritate non posset, & haec celebrandae Synodi fundamenta posuerant, quid non ausuri essent, quum ad eos major Praelatorum numerus accessisset? Non enim ignorabat Eugenius, ea & similia dogmata Apostolicae auctoritati plurimum infesta jam inde a Concilii Constantiensis tempore in Germania & in Galliis invaluisse. Quod, si alia argumenta deessent, satis exploratum habebat ex Concilio sub initium anni 1432. Bituricis celebrato, in quo Galliarum Episcopi ab Eugenio ad praefixum tempus Bononiam convenire iussi, communi declararunt consensu: *Concilium Basileae legitime esse congregatum, neque inde posse aut debere quoquo modo transferri; & non modo utile esse & conveniens Concilium non dissolvi, sed necessario Basileae esse perficiendum propter res Bohemicas &c. Ac proinde Praelatos Concilium adire debere &c.* Ex qua etiam Synodo aperte colligi potest, quam infenso erga Pontificem animo essent, qui Basileam conveniant, conventumque Concilii Oecumenici nomine celebrabant. Nam & Archiepiscopus Lugdunensis Basileenses suorum Collegarum nomine, ut est apud Patricium; (a) hortatus est, ut cum summo Pontifice, qui Caput est Ecclesiae, modeste agerent: Et Synodus ipsa Bituricen-

(a) Hist. Conc. Basil. &c. cap. VIII.

ricensis Christianos Principes monuit atque obtestata est, ut nihil a quibuscumque permittant attentari contra Sanctissimum Dominum nostrum, Curiam Romanam, Urbem & Patrimonium eorum, unde Papa & Collegium occasionem indignationis, dilationis, suspensionis aut mutationis assumant. Quae monita haud credibile est, incassum edita fuisse, & quum nulla a Basileensibus ea edendi data fuisset aut daretur occasio. Annon ergo jure ac sapienter Eugenius totis viribus obstabat, ne novum in Ecclesia tribunal erigeretur, quod praeter veterum Conciliorum morem non modo se uni Deo subiectum profiteretur, verum & Romanis ipsis Pontificibus leges praescriberet, quas non impune transgredirentur, adeoque & Monarchicam potestatem infringeret, qua Petrus a Christo donatus est, & quam ad suos in Sede Apostolica Successores ex ejusdem Christi ordinatione transmisserat? Quis enim Rex non ea Comitibus pro virili dirimeret, quae praeter jus & fas summam sibi in Regno potestatem arrogarent, & novam regiminis formam instituere, ac de ipso Rege judicare praesumerent, eique leges dictare, quas violare ac transgredi non liceret? An Rex Galliarum ejusmodi coetus non ferro & igne deleret? Quis ergo Eugenio crimini vertat, ac non eum potius commendat, quod Basileensem conventum dissipare conatus est, qui talia in Ecclesiae regno moliebatur? Utcunque enim Basileenses se se jure agere existimabant, attamen certum est, ante Pisianum & Constantiense Concilium per quatuordecim saecula nullam fuisse Synodum Oecumenicam, reluctantibus Romanis Pontificibus celebratam, aut in auctoritatem receptam; nullam, quam non ipsi suis dogmaticis

epistolis dirigerent, & quae non secundum ipsas de rebus fidei ac generalis disciplinae decerneret; nullam, quae Petri jura & Apostolicae Sedis invaderet; nullam denique, quae Romanum Pontificem, certum & indubium, neque a fide devium, judicare praesumeret. An ergo ferre debebat Eugenius, a paucis Episcopis, jam non dicam, *post quingentos annos*, ut olim adversus Orientales Gelasius (a), sed post mille & quadringentos, statuta Christi subverti, *quum triginta annorum lex hominum non possit abrumpi*? Nam Eugenius, perinde ac ejus Decessores, ea Romanae Sedis privilegia ex Christi largitate & institutione fluxisse, minime ambigebat, nec ea labefactari posse existimabat, quin omnium Ecclesiarum pax & tranquillitas perturbaretur, quae illis veluti solidis & inconcussis fundamentis innitatur. *Privilegia namque Romanae Ecclesiae*, ut praeclare olim Nicolaus I. Carolo Calvo Francorum Regi scribebat (b), *totius sunt; ut ita dicamus, remedia Ecclesiae Catholicae. Privilegia, inquam, Petri, arma sunt contra omnes impetus pravitatum, & munimenta atque documenta Domini Sacerdotum, & omnium prorsus qui in sublimitate consistunt*. Quae proinde concuti ac violari nunquam boni laudabilesque Pontifices passi sunt: quorum vestigiis Eugenius insitens, cum laudato Nicolao merito per haec tempora protestabatur (c): *Quae tamen privilegia usque ad mortem ope freti divina, Praedecessorum meorum vestigia sequendo, cassari taliter, minime patiemur*.

Verumenimvero quum Basileenses, & qui eis adhaerebant totius fere Europae Principes, Eugenio inde-

(a) Vid. ap. Nicol. I. Epist. ad Episc. Gal. ex VII. Conc. Rom.
 (b) Epist. XXX ad Carol. Calvum.
 (c) Ibid. & Epist. XXXII, ad Episc. Syn. Silvanest.

desinenſer obſicerent, quod ſoluto Concilio, de Bohemorum deſperandum erat converſione, eodemque Bononiae celebrando in annum ac dimidium dilato, per tantum temporis ſpatium Eccleſiae reformandae, pacis inter Principes procurandae, & Bohemorum in gremium Eccleſiae reducendorum tolleretur occaſio; quumque eoſdem Baſilcenſes ad conſtandum ſchiſma paratos eſſe laudatus Pontifex animadverteret, plures ineundae pacis vias propoſuit, quas aequiſſimis ac mitiſſimis conditionibus temperavit. Quum enim ipſi & de loco & tempore convocandae Synodi controverſia commoveretur, primum indulſit, ut ſi ad avertenda mala, quae vel ex Bohemica ſecta, vel ex depravatis Cleri moribus, Eccleſiae Germanicae imminerent, praefenti Synodo opus eſſet, & Nationalis ſufficere videretur, ea ſtatim per Legatum Apoſtolicum Francofurti aut Nurembergae haberetur. Si autem neceſſaria Synodus Oecumenica judicaretur, annuebat etiam, ut ea vel Bononiam, vel in aliam Italiae Urbem Sedis Apoſtolicae dominio ſubjectam, & Graecis excipiendis opportunam, nulla interpoſita mora, transferretur. Quum autem Refractarios; ut in Italiam proficiſcerentur, ſeclere ac permovere non poſſet, conſenſit adhuc mitiſſimus & pacis amantiſſimus Pontifex; ut in Germania, modo extra Baſileam, ad celebrandam Oecumenicam Synodum ex univerſa Eccleſia Patres congregarentur. Si Baſilcenſes ea tantum prae oculis habuiſſent, ob quae generalia Concilia indici haecenus conſueverant; nimirum ut glifcentes haereſes proſtigantur, pax inter diſſidentes Principes concilietur, & Eccleſiae mores ad primaevam ſanctitatem revocentur; nihil eis ultra expetendum fuiſſet, quum ad haec

ne-

negotia perficienda quamplures Germaniae Urbes aptae, perinde ac Basilea, & commodae viderentur. At praecipuum ipsorum negotium non erat, aut furentes haereticos delinire vel Ecclesiae reconciliare, aut Christianae Reipublicae tranquillitatem restituere, aut Cleri disciplinam sanctissimis legibus communire: sed cum Romano Pontifice de primatu contendere, ipsum contemnere, ejusque coërcere & infringere potestatem. Quum enim & praeteriti schismatis experimento, & Principum frequentibus litteris monerentur, non posse aut solidam pacem revocari, aut depravatos corrigi mores, dum in varias factiones scinderetur Ecclesia; imo nihil esse schismate aptius, aut gignendis haereticis, aut ferendis fovendisque bellis, aut moribus depravandis; dum tamen vincerent, & Pontificis constantiam expugnarent, in manifestissimum schismatis discrimen Ecclesiam adducere, egregii illi Christianae pacis, Catholicae fidei, & severioris disciplinae vindices & adsertores nequaquam veriti sunt; ut merito illis Eugenius objecerit, quod eorum Acta *non ad reformationem, sed ad deformationem; non ad unitatem, sed ad scissuram Ecclesiae; non ad haereses tollendas, sed nutriendas; non ad pacem fidelium, sed discordiam seminandam spectare viderentur.*

Sequentibus ergo Synodi actis praetextenda non est Bohemorum conversio, quae Synodum in Germania fieri postulare; sed una in iis de potestate & auctoritate contentio spectanda est. Si enim Basilea Synodus abduceretur, vel etiam ibidem, prioribus actis abrogatis, nova veluti Synodus inchoaretur, id obtinebat Pontifex, ut Concilia Oecumenica ab ejus nutu & auctorita-

te

tē pendere viderentur. Si autem Eugenius non modo Basileae permanere Synodum pateretur, verum & ibi hætenus jure ac legitime permanisse agnosceret, atque irrita declararet quæ ad eam dirimendam gesta ac decreta fuerant, ac ei tandem *pure ac simpliciter* adhaereret, id evincebat Synodus, ut ipsa nequaquam Romani Pontificis potestati obnoxia & subiecta esse videretur. Nemo sapiens negaverit, quin plura veterum Patrum, & Pontificum, & Conciliorum testimonia Eugenio suffragarentur, & quin Synodi Constantiensis decretis, quibus maxime Basileenses nitebantur, plures ab Eugeanianis responsiones saltem in speciem probabiles adhiberentur; ut nonnisi temere ac per summam impudentiam jactari posset, eam de Conciliorum generalium supra certum indubiumque Pontificem potestate controversiam per Constantiense Concilium decreto prorsus irretractabili, & quod ad fidei regulam pertineret, fuisse diremtam. Quin suo loco videbimus, quod quamquam illi, qui post Synodum rursus Eugenii auctoritate solutam, & Ferrariam translata, Basileae velut legitimam & generalem Synodum celebrantes permanerant, Concilio subiectum esse Pontificem non ambigerent; attamen ubi quorundam vesania eo prorupit, ut hanc opinionem in fidei dogma erigi vellet, cui nemo nisi hæreticus contradiceret, ferale inter eos dissidium exortum est, nec nisi per Cardinalis Arelatenfis tyrannidem dolosque malos, pravum illud ac temerarium decretum hac de re conditum est, quod Eugenius IV. in Florentina Synodo tota Sedis Apostolicæ auctoritate damnavit. Quin etiam ipse Meldensis Episcopus infra cap. XV. fatetur, Quaestionem Basileensem de translatione pendere adhuc, & in me-

medio relictam & indecisam videri. Quis ergo non damnet eorum temeritatem, qui, ut vel ipsi fatebantur, meritis opinionibus freti, de quibus salva fide inter Theologos disceptabatur, quas palam libereque, & absque ulla nota Sedis Apostolicae Legati, contrariam doctrinam adserendo, in ipsamet Synodo refellebant; qui meritis, inquam, opinionibus freti, Christi Vicarium, & summum Christiani Gregis Pastorem, quem olim sexcenti Patres in magna illa Chalcedonenſi Synodo velut membra caput, & Patrem filii venerati fuerant, nefariis decretis impetere & exagitare aggressi sunt, & concussio Ecclesiae fundamento, eam in certum discrimen adducere non dubitarunt? Profecto hanc eorum temeritatem & inconsultam agendi rationem Sigismundus Imperator, Galliarum & Angliae Reges, S. R. I. Electores, alique Principes improbarunt: qui quamquam Concilio adhaerebant, intactum tamen pro sua pietate & religione volebant sacerrimum Ecclesiae caput, & summopere cavebant verebanturque, ne Christianae Reipublicae corpus, quod vix coaluerat, novo ac tetriore schismate laniaretur. Id quod etiam Eugenius magis veritus est, ac ne Ecclesiam in graviores fluctus conjiceret, concordiae formulam ab ipsis Basileensibus concinnatam amplexus est, qua omnia, quae in Synodum gesserat irrita declaravit; Apostolicis litteris, quibus ad asserendam Pontificiam auctoritatem omnia Basileensium gesta resciderat, vim omnem & firmitatem ademit; & Synodo, tanquam legitime inchoatae, legitime etiam, frustra eam & irrito conatu revocante ac dirimente Pontifice, permanenti, se se pure ac simpliciter adhaerere, & in posterum adhaesurum, professus est. Hoc est Pontificium illud Diplo-

ploma, quo se tum maxime Basileenses extulerunt, & nunc etiam sese Galli Theologi efferunt; *ut nullum jactent, quemadmodum superius animadvertimus, ritu solemniori promulgari posse, quippe quod fuerit in Oecumenica Synodo promulgatum, ac Synodi sententia roboratum.* An tantum in eo monumento ponderis ac momenti sit, mox videbimus. Interim vero ex dictis colligimus, quaecunque ab Eugenio vel in Synodo dirimenda, aut post ejus promulgatam solutionem pro vindicanda Apostolica auctoritate gesta decretaque sunt, gravissimis rationibus niti, & in eis sapientiam, mansuetudinem, aequitatem, aliasque virtutes elucere tanto Pontifice dignas. Quod si in admittenda Basileensi formula aliqua Pontificis culpa fuit, haec potius Basileensibus imputanda est, qui pertinacissima contentione, quam nemo virtuti adscribat aut ipsis laudi vertat, optimi Viri constantiam fregerunt, & in hanc necessitatem compulerunt aut Sedis suae causam prodendi, aut functi schismatis certo discrimini Ecclesiam Catholicam obijciendi. Quem tamen ipsius naevum plurimum elevat, & facile delevit amor, quo Ecclesiae pacem & unitatem dilexit, quam factiosi Basileenses prava aemulatione, & retinendi dominatus seu potius usurpatae tyrannidis studio, scindere rursus ac lacerare, leve existimasse, ac pro nihilo duxisse videntur.

ARTICULUS TERTIUS.

De veris ac genuinis Eugenii IV. & Sedis Apostolicæ sensibus statuendum non est ex iis, quæ Eugenio per vim extorta fuerunt, sed ex iis quæ ante & post initam pacem sponte ac libere & ex animo pronuntiavit.

Mirum quantum Adversarii hanc Eugenii ad Synodum Basileensem adhaesionis formulam jactent, deprædicent, extollantque, & quam inde pro suis opinionibus mirabiles consecutiones eliciant. Non modo enim huic Decreto, utpote a Romano Pontifice consignato, & in generali Synodo sollemniter promulgato summam inesse contendunt & ineluctabilem auctoritatem, verum etiam valere volunt ad omnes controversias, quæ Romanos Pontifices & Concilia generalia committere possint, irretractabiliter terminandas. Verum illi in utroque vehementer peccant. Nam neque Eugenia illa adhaesionis formula ea pollet auctoritate, quam ipsi jactant; neque ullo pacto habenda est pro certa perspicuaque, & minime dubia ac prorsus irretractabili Constantiensium Decretorum per Sedem Apostolicam confirmatione.

Quod ad primum attinet, inter varias notas & conditiones, quibus insigniri debet Pontificium Decretum, ut firmum sit & indeclinabilem obtineat auctoritatem, prima est, ut Pontifex libere & ex animo, non vi aut necessitate premente, sententiam dixerit. Et merito sane ea primùm in Pontificiis aut Conciliaribus Decretis con-

conditio spectanda est, ut suam Pontifices aut Patres sententiam proferant, non alienae sententiae aut vi, aut metu gravissimorum malorum, quae ipsis aut Ecclesiae impendeant, coacti ac repugnantes subscribant. Quod enim Spiritui Sancto, & ipsis videtur, illud divina auctoritate constat: *Visum est*, inquit, *Spiritui Sancto, & nobis*. Quum ergo comperta & explorata res est, Pontificem non ex animi sui sententia, sed malorum impendentium metu cuiuspiam Decreto subscribere, aut formulae adhaerere, nullum ejusmodi formulae vel decreto ex Pontificia subscriptione robur accedit. Sic Privilegium de Investituris, quod a Paschali II. Henricus V. Imperator extorsit, a centum plus minus Episcopis in Lateranensi Concilio *judicio Sancti Spiritus* damnatum est, & irritum judicatum, quod illud *contra deliberationem suam, pro redemptione Captivorum, pro pace populi, pro liberatione Ecclesiae*, sibi extorqueri Pontifex passus esset. Sic S. Athanasius in epistola ad Africanos eis graviter succensebat, qui Decretis Patrum anteferri volebant, quae ab Episcopis in Pseudo-Synodo Ariminensi per vim & metum expressa fuerant: *Quis non odio habeat illos, qui quae Patrum sunt, abrogant; recentiora vero Arimini per vim & metum extorta, anteponunt?*

Eugenium ergo procul ab hac fuisse sententia, quod ipse tanquam Romanus Pontifex Synodi generalis Decretis & coactivae potestati subjiceretur, & quod eam absque Patrum consensu dissolvere aut alio transferre non posset, adeoque non ex animi sui sensu, sed malorum Ecclesiae impendentium metu, praescriptae sibi a Basilcnsibus formulae subscripsisse, exploratum est quam quod maxime. Postquam enim semel Concilium

Basilienſe diſſolvit, aut poſt annum cum dimidio Bononiam transferendum edixit, in quas per duorum & amplius annorum intervallum non ſe ſe anguſtias conjecit, quid paſſus, quid auſus non eſt, ut ſuam Sedisq̃ Apoſtolicæ auctoritatem adverſus rebelles Baſilienſes tueretur? Quoniam ſupervacaneum eſſet omnia in hac cauſa per eum geſta revolvere, ad ea tantum hîc animum ad-jiciemus, quæ propius ad pacem ſequeſtre Cæſare poſtmodum initam ſpectare videntur. Quum graviora Eugenium inter atque Baſilienſes diſſidia ferverent, negante Eugenio, ſolutum Pontificio Decreto Concilium auctoritate pollere; Baſilienſibus vero ſolvi non potuiſſe, Pontificemque Synodalibus teneri legibus contendentibus; Romam appulerat Sigismundus, ut a Pontifice Imperiali Diademate redimiretur. Solennitate peracta, ea, ipſo Sigismundo interprete, concordia ratio inita eſt, ut Eugenius ex æquo & bono Concilium ſuſciperet ac probaret, perinde atque in eam diem legitime propagatum fuiſſet. Quod ille, ut paci conſuleret, amplexus eſt. Sed circa formam decreti hac de re editi gravis inter Pontificem & Baſilienſes difficultas exorta eſt. Scripſerat, probante etiam Imperatore, Eugenius, gratum ſe ac ratum habere Baſilienſe Concilium, perinde ac nulla pro ejus diſſolutione ſeu translatione edita fuiſſet Apoſtolica Conſtitutio: *Volumus*, ajebat Pontifex, *& contentamur, præſtatum generale Baſilienſe Concilium a tempore inchoationis ſuæ continuatum fuiſſe & eſſe.....perinde ac ſi nulla commutatio, translatio, ſeu diſſolutio facta fuiſſet* (a). Baſilienſes, ut nova ſemper jurgia ex aliis ſerebant, ac Pontificiam au-

cto-

(a) Raynald. ad an. 1433. num. 18.

Auctoritatem sibi subijcere moliebantur, ea verba; *Voluimus & contentamur*; inique accepere. Postularunt enim ut Eugenius vulgaret, non modo tolerare se, propagatum fuisse, spretis Apostolicis imperiis, Basileense Concilium, verum decerneret ac declararet, rite ac legitime propagatum. Quam grave id Pontifici fuerit, & indignum majestate Apostolica visum sit, demonstrant ejus litterae ad Franciscum Foscarum Venetiarum Ducem, qui dissensionem componere studebat. Perspicere autem est in his litteris, quae paucis dumtaxat mensibus ante initam pacem datae sunt, qui fuerint ad illam diem Eugenii de sua Sedisque Apostolicae supra generale Concilium auctoritate sensus (a). Nam primum se se per litteras & nuncios ab Imperatore vexatum fuisse refert, ut omnino Basileensi Synodo morem gereret. Quod tamen ipse constanter recusavit, paratus ex Apostolicae dignitatis fastigio potius excidere, aut etiam ex hac luce migrare, quam ut primus ipse contra canonicas sanctiones & suorum Praedecessorum exempla, Pontificiam majestatem, Sedisque Apostolicae dignitatem Concilio subjiceret. Quod quum nemo unquam a certo indubioque Pontifice exigere ausus esset, & Imperator postmodum acquievit, ut neque ab ipso exigeretur. Quare quum Basileenses vellent expeterentque, decerni ac declarari,

Syno-

(a) Primum, ut paullo altius repetamus, quum insitisset nobiscum litteris & nunciis, ut Concilio illi haereremus omnino, hoc recusavimus. Potius enim hanc Apostolicam dignitatem & vitam ipsam posuissimus, quam voluissimus esse causam & initium, ut Pontificalis di-

gnitas, & Apostolicae Sedis auctoritas submitteretur Concilio contra omnes canonicas sanctiones, quod nunquam antea neque aliquis nostrorum Praedecessorum fecit, neque ab illo existit requisitum. Atque in hoc ipse postmodum Imperator acquievit.

Synodum fuisse hactenus rite ac legitime propagatam, sciente & consentiente, probante & collaudante Imperatore, ea verba potius adscita sunt: *Volumus & contentamur*. Quamobrem mirum esse, quod Imperator, qui suam erga Synodum indulgentiam plurimum commendasset (a), nunc veluti praeteritorum oblitus, adhiberi ea verba velit, *quae tunc omnino rejecta fuerunt*: ut quae non recte sentientibus arma essent ad Sedem Apostolicam oppugnandam. *Non esse autem tutum dare nocendi facultatem, ei praesertim, qui jam nocere motus est*. Denique persuadere velit Basileensibus Imperator, longe honestius esse, *ut membra capiti haereant, quam caput membris*.

Consensit quidem post aliquot menses Eugenius ad omnia, quae Synodus expetebat, iis etiam verbis adscitis, quae concordiam retardabant: *decernimus & declaramus*, quae antea coram Imperatore tanta constantia rejecerat. Fregisse tamen Pontificis animum non modo impendentis schismatis metum, in quod Basileenses praecipites ferebantur, & quod rursus universam vastaturum & laniaturum esset Ecclesiam; verum & gravissima mala, quibus jam a Ducis Mediolanensis copiis; aliisque rebellibus ac seditiosis, Ecclesiae Romanae ditiones premebantur, & quae jam-jam Romae ipsi sibi imminuebant; tum per se se absque alio testimonio per quam credibile est, tum
etiam

(a) Multisque praeterea verbis pluries in nostram laudem prolatis, asseruit nos plus fecisse quam deberemus, & ultra quam tenere-

mur, & quod Basileenses ultro acceptare debebant. Quod si recusarent, mirabilia adversus illos pollicitus esse se facturum.

etiam apud Turrecrematam (a), plures gravissimi ac probatissimi Viri testati sunt. Ad hanc tantam, inquit Henricus Spondanus (b), ut multi vocarunt, animi vilitatem seu pusillitatem descendere, tam metus schismatis, & Imperatoris ceterorumque Principum violentissimae suasiones compulerunt; (quod etiam Turrecremata testatur) quam factae in eum undique conspirationes Philippi Ducis Mediolanensis instigatione: qui arma in eum movens per Franciscum Sfortiam generum sibi adsumtum, & Nicolaum Fortebraccium; qui prius Eugenio militaverat, Duces insignes, ingenioque ac manu promptos, aliosque in eum concitatos, adeo profecit, ut paucis locis in fide permanentibus, cetera omnia, tota Italia ad Ecclesiam pertinentia, qua vi, qua arte, qua prodicione, qua rebellionem ab Eugenio deseciverint.

Turrecrematae aliorumque apud eum hac de re iudicia & testimonia Meldensis Episcopus despicit, & tanquam nugae exhibet, quas Aulici gratis jactant (c): „ Bullas ergo, quibus Eugenius dissolutionem suam „ nullam esse judicavit, vi extortas fuisse, Turrecremata significat, idque a pluribus magnae gravitatis „ Viris dictum esse in Curia. Esto dictum ab Aulicis; „ sed

(a) A pluribus magnae probitatis & gravitatis Viris dictum in Curia est, quod praefatae Bullae magis extortae fuerunt minis, quam de mente D. Eugenii emanaverint. Nam, ut fertur, D. Andreas Venetus Dominii Venetorum tunc Orator, & aliqui DD. Cardinales tunc apud D. Eugenium praesentes, timentes futurum magnum scandalum in Ecclesia, minati sunt

praefato D. Eugenio, quod nisi Bullas illas adhaesionis concederet, ipsum solum recedentes relinquerent, praefato Domino in lecto decumbente, praefati Domini referuntur Bullas illas taliter qualiter expeditivisse, & misisse Basilicam. *Lib. II. de Eccles. cap. C.*

(b) Ad an. 1433. num. XXVII.

(c) Cap. IV.

„ sed nullis actis probatum, nullo Scriptore proditum,
 „ & ab ipso Eugenio negatum : qui nimirum apud eum-
 „ dem Turrecrematam, Florentiae in disputatione pu-
 „ blica dixerit : *Nos quidem bene progressum Concilii*
 „ *approbavimus volentes*. Non ergo extortae Bullae :
 „ atque illi Viri graves, qui id in Curia dicerent, nuga-
 „ bantur. Verum, ut paullo ante dicebam, etsi nullus
 Turrecremata, nulli graves probique Viri id unquam
 testati essent; quis tamen hinc mente recolens, quam il-
 le haecenus Pontificiam adversus Concilium, quod se
 pro Oecumenico gerebat, auctoritatem fortiter & ala-
 criter propugnasset, & quam ad eam sententiam de Se-
 dis Apostolicae supra generalem Synodum potestate fir-
 miter ac tenaciter adhaesisset; hinc vero animum ad-
 vertens ad gravissima mala, quae & Ecclesiae imminene-
 bant, & quibus Eugenius undique premebatur; non sta-
 tim suspicaretur in eamque se se opinionem induceret,
 Eugenium non ex animi sui sententia, sed vi metuque
 coactum, praescriptam sibi a Basileensibus formulam su-
 scēpisse? Id vero non modo ab Henrico Spondano, Odo-
 rico Raynaldo aliisque nostrarum partium Historicis me-
 moriae proditum est, verum & iidem alienarum partium
 Scriptoribus facile adprobarunt, quos inter Jacobus Len-
 fant : „ Eugenius IV. *inquit* (a), non minus pressus
 „ in

(a) Eugene IV. non moins vi-
 vement pressé en Italie par le Duc
 de Milan, qu'en Allemagne par le
 Concile de Basle, étoit réduit aux
 plus dures extremités. Il fallut
 pourtant qu'il se desistât du dessein
 de la translation à Bologne, parce
 que d'un côté le Duc de Milan & de
 l'autre les Venitiens le menaçoient
 de lui faire une guerre ouverte, s'

il ne renonçoit à cette translation,
 & s'il ne consentoit à la continua-
 tion du Concile de Basle. Ce-
 pendant comme cette reconcilia-
 tion avec le Concile avoit été ex-
 tortuée par les menaces du Duc de
 Milan qui se portoit en Italie pour
 le Legat du Concile &c. *Hist. du*
Concil de Basle. Liv. XVII. numer.
XXIX. lre.

„ in Italia a Mediolanensium Duce, quam in Germa-
 „ nia a Synodo Basileensi ad extremas incitas redactus
 „ erat.... Itaque opus fuit, ut sibi ab instituto consilio
 „ transferendae Bononiam Synodi temperaret, quod
 „ hinc Mediolanensium Princeps, inde Veneti mina-
 „ rentur, se illi aperto Marte bellum indicturos, nisi ab
 „ indicta translatione abstinuisset, atque una tulisset,
 „ ut Basileense Concilium haberet exitum. *Et infra:*
 „ Interea quum minis Mediolanensium Ducis, qui ut
 „ Legatum Concilii in Italia se se gerebat, extorta haec
 „ fuisset Eugenio cum Synodo Basileensi conventio &c.

Non est ergo quod Adversarii tantopere jactent Basileensis formulae ab Eugenio subscriptae, & in Basileensi Synodo promulgatae auctoritatem. Ea est hujusce Decreti vis, quae Privilegii *Investiturarum*, quod olim Paschali II. Henricus V. extorsit; aut quae gestorum Ariminensium, postquam Imperatoris tyrannide libertas Patribus ademta est. Nam quemadmodum Paschalis II. antequam sibi, & Clero Populoque Romano extrema mala imminerent, Imperialem illam usurpationem, suorum Praedecessorum vestigiis inhaerens, fortiter constanterque damnavit; & quemadmodum Patres Ariminenses quum sui juris essent, Nicaenae Synodi fidem liberrime asseruerunt: ita & Eugenius summam Apostolicae Sedis auctoritatem fortiter & alacriter propugnavit, donec impendentium & sibi & universae Ecclesiae majorum timore labefactata ejus constantia est. Quis ergo, ut olim Achanasius Arianis, ita iis non succenseat, *qui quae Patrum sunt, abrogant*; hoc est, qui nihili facienda existimant, quae Eugenius ex animi sui sententia, & ex veterum Patrum, Conciliorum, Pontificumque de-

cretis, de sua Seditque Apostolicae auctoritate differuit; *recentiora vero per vim & metum extorta, anteposunt?* Nam rursus, quemadmodum Paschalis II. & Patres Ariminenses, statim atque illis respirare datum est, latentes in imo pectore atque intime haerentes pietatis sensus libere iterum praedicarunt: ita, ut postea videbimus, & Eugenius resumto deinde spiritu, oppressam Sedis Apostolicae auctoritatem non minus excelsa quam antea fecerat animo vindicavit: unde adeo de sinceris ac genuinis ejusdem Eugenii sensibus statuendum est. Ac proinde ea non est, quam Meldensis Episcopus & Parisienses Theologi jactitant, Eugeniiani Diplomatis auctoritas; ut, quod invito ac reluctanti Pontifici per vim & metum extortum est.

At quamquam hoc libertatis defectu minime laboraret, non ideo pro certa & indubia, & ineluctabili Constantiensium Decretorum confirmatione habendum esset. Quod a nobis sub Articuli initium secundo loco propositum ad sequentia Capita fusius edisseretur.

C A P U T I I. &c.

„ Ex antedictis Constantiensia Dogmata
„ confirmantur.

IN hoc & duobus sequentibus Capitibus Bossuetius plura congerit argumenta, quibus invictè probari ac demonstrari judicat, Eugenium IV. Synodi Basileensis dissolutionem, & quaecumque in eam gesserat, decreverat, & promulgarat, irrita declarando; Synodum autem ipsam velut hætenus legitime propagatam pure, devote ac simpliciter suscipiendo, Constantiensia de gene-

neralium Conciliorum supra Romanos Pontifices potestate dogmata, Basileensibus decretis inserta, suscepisse, & Apostolica auctoritate firmasse: quae ubi in unam & eandem conspirat cum Synodo generali sententiam, indeclinabilis sit, & controversiis irretractabiliter sancendis ac terminandis idonea: „Primum, *inquit*, Eugenius noverat e Sessione II. III. XII. Basileensi, ante „ & post dissolutionem, Constantiensia Decreta Sessionis V. repetita & constabilita esse, ut quae vera certaque Concilii Oecumenici ubique approbata decreta essent: atqui Concilio Basileensi ita praedicanti ac decernenti adhaeret, & legitime continuatum esse confirmat: Ergo Constantiensia Decreta valere intellexit, valere voluit, nedum suspecta, aut infirma, aut revocanda putaret. Ac tale fuisse jactat illud Eugenii Decretum, quo sese Basileensi Synodo adhaerere professus est, & Constantiensia dogmata valere voluit „ ut nullum ritu solemniori promulgari possit, „ quippe quod fuerit in Oecumenica Synodo promulgatum, ac Synodi sententia roboratum. Unde consequens est, absonum plane esse & cum summa temeritate junctum, ea dogmata retractare velle, & in controversiam adducere; quum nulla sit major & firmitior auctoritas, quam quae ex Sedis Apostolicae & Synodi Oecumenicae consensione firmitatem habet: qua proinde quae semel constabilita & firmata sunt, immota ea consistere necesse sit; quaeque adeo irritum prorsus conatu quisquam concutere & labefactare contendat: „ No- „ tent, *inquit in fine Capitis IV.* damnent, improbent „ quae tantis in diffidiis Sedes Apostolica comprobavit; evertant quae fundamenti loco magna consensio-

„ ne utrinque sunt posita : suo certe pondere firma
 „ erunt ; ad quae quisquis impegit, se potius quam
 „ illa confinget . Quae certe nemo jactarit nisi de iis,
 quae summa & ineluctabili auctoritate constituta sunt .
 Quae tamen jurene solideque jactata sint, an potius im-
 merito leviterque, cum ex dictis satis aperte colligitur,
 tum etiam ex his quae modo subjungimus, magis per-
 spicue luculenterque constabit .

ARTICULUS UNICUS.

*Quamquam Eugenius IV. Basileensi Synodo ad-
 haesit, eamque velut jure ac legitime propa-
 gatam haberi voluit : non tamen ejus Decre-
 ta, eisque inserta Constantiensis Synodi Con-
 stituta, Apostolica auctoritate firmavit .*

HAbemus hac de re apud Turrecrematam (a) lo-
 cuples ac disertum ipsius Eugenii testimonium .
 Nam Cardinali Juliano Florentiae in publica & sollenni
 coram ipso Pontifice & Cardinalibus hoc de argumento
 disputatione, Bullas objicienti, quae in Synodi Basileen-
 sis confirmationem editae fuerant, Pontifex ipse re-
 spondit : *Nos quidem bene progressum Concilii approba-*
vimus, volentes ut procederet, ut incoeperat : non ta-
men approbavimus ejus decreta .

Haec narranti Turrecrematae, hisque insistenti ad
 labefactandam Basileensium Decretorum auctoritatem,
 reponit Bosluetius : „ Tunc ergo ejusmodi colloquiis
 „ dictisque, quorum penes te fides, evertenda aut etiam
 „ in-

(a) Lib. II. de Eccles. cap. C.

„ interpretanda putas ea , quae Synodice gesta , decre-
 „ ta , judicata & approbata sunt . Quid hac responsione
 sibi velit Illustrissimus Adversarius , equidem non intel-
 ligo . Non enim hîc quaerimus , quid in Concilio Basi-
 leensi Synodice gestum , decretum , judicatum & ad-
 probatum sit ; sed quae illius Synodi gesta , decreta &
 judicia , & quo sensu ea Pontifex approbaverit .

Eamdem tamen responsionem adhibet & Odorico
 Rainaldo objicienti , Eugenium , quum ea faceret , pacis
 studio , jure suo cessisse , idque ab ipso ad Imperatorem
 esse perscriptum . Reponit enim Bosluetius : „ Illud
 „ perscriptum quidem Epistola privata , sed ejusmodi
 „ epistolis negamus , *inquit* , jura contineri . Tu mihi
 „ id respice quid Synodice gestum sit . Sessione XIV.
 „ Concilii Basileensis non id a Pontifice postulatum , ut
 „ jure suo sponte decederet , sed ut perperam incoep-
 „ ta Synodi omitteret atque revocaret . Sessione XVI.
 „ Eugenius a Synodo admissus est , ut qui Synodi mo-
 „ nitioni ac citationi satisfecisset , hoc est procul dubio
 „ paruisset : totam ipse causam in Synodi potestate esse
 „ professus est ; sed jussus , ut vidimus , sed praescripta
 „ formula ; non ergo jure suo sponte decessit , qui ex le-
 „ ge in ipsum lata egit . Ergone quicumque alteri ini-
 que imperanti , ad avertenda graviora mala sibi ac Rei-
 publicae impendentia , cedit , seque illi subjicere vide-
 tur , & leges ab eo quamlibet iniquissimas sibi praescribi
 patitur , is jure suo decedere negandus est ? Jura ergo
 non penes eum erunt qui optimis rationibus innitatur ;
 sed qui majori potestate praeditus sit ; adeoque Tyranni
 quaecumque per vim & tyrannidem agunt , jure agere
 censendi sunt ; Respublica vero quidquid ab eis patitur ,
 &

& quaelibet leges accipit, jure accipere ac pati dicenda est. Et si aliquando muslisset, aut privata Epistola alicui scribat, se pacis studio jure suo cessisse, negandum erit, his epistolis jura contineri; obijciendumque, non id cogitasse tyrannum, quum ei in publicis comitiis has & has leges praescripsit, ipsa vero imperanti cessit, ac leges dictanti humillime paruit. Hoc ergo Meldensis Episcopi responsum est. Querebatur Eugenius iniquissimas sibi a Basileensibus pacis conditiones praescribi: negabat id certe Synodus, quae se jure in eum agere contendebat. Ne ferale schisma in Christiana Republica excitetur, cedit Synodo Pontifex; at pacis studio se jure suo cessisse, ad Imperatorem, perscribit. Negat Bossuetius ejusmodi litterarum habendam esse rationem, quoniam alia mens Synodi fuerat, quum leges Eugenio daret, & quum sibi illum satisfecisse declaravit.

Veruntamen, ut paullo ante dicebam, non hinc quaeritur, quid Synodus senserit, quaeve illius sententiae auctoritas tribuenda sit; sed quae Pontificis mens fuerit, quaeve ex illius ad Synodum ex praescripta formula adhaesione in ejusdem Synodi decreta auctoritas derivarit. Nobis autem Pontificiae mentis melior graviorque non occurrit interpretis quam Pontifex ipse; quem adeo praeceteris audiendum esse contendimus. Duo autem, ut vidimus, ex ipso Pontifice habemus. Primum est, probasse eum quidem Synodi progressum, non tamen ejus decreta. Alterum est, quod Synodi progressum adprobando, jure suo pacis studio decessit. Quae duo si invicem conjungantur, & praec oculis habeantur, facile omnia profligantur argumenta, quibus se Illustissimus Adversarius mirifice jactat.

Quod

Quod ut facilius & luculentius praestetur, observandum imprimis est, generatim loquendo fieri optime potle, quod Romanus Pontifex cuipiam Synodo tanquam jure ac legitime habitae adhaereat, eamque probet; nec tamen omnia illius decreta confirmet, rataque habeat. Sic S. Leo & sequuti Romani Pontifices Chalcedonensi Synodo adhaeserunt, eamque summo studio commendaverunt; nec tamen illius postremum Decretum adprobarunt, nec rata illico habuerunt, quae in illa praeter fidei causam decreta sunt. Ergo absolute loquendo, potuit Eugenius Synodi Basileensis progressum legitimum declarare, nec tamen omnia illius Decreta probare. •

Dixi, *generatim loquendo*, hoc est nisi specialis aliqua ratio aut difficultas impediat, quae hic statim se se objicere videtur. Quum enim Eugenius Synodum ante solvisset, idque se jure ac legitime fecisse, acerrime haecenus propugnasset: contra autem Synodus, Constantiensibus nixa decretis, ab ea non semel inculcatis & confirmatis, Eugenium Apostolicae potestatis jura limitesque praetergressum esse, ac propterea irrita esse quaecumque in eam constituta ab illo fuerant, vehementissime contendisset, & licet invito ac reclamante Pontifice, Occumenicae sibi titulum & auctoritatem arrogasset; non videtur potuisse laudatus Pontifex Basileensem Synodum velut haecenus legitime habitam & continuatam suscipere, eique pure ac simpliciter adhaerere, quin ejus & Constantiensium Decretorum auctoritatem agnosceret; quae nimirum Synodum semel coactam Romani Pontificis potestati eximebant. Nisi enim id constitutum, & fundamenti loco positum fuisset, valuerit uti-

utique decreta ab Eugenio Synodi dissolutio, valuisse etiam quaecumque in sibi obstitentem Synodum decrevisset, nec ea Basileae jure ac legitime substitisset. At, Eugenio quoque iudice, irrita fuit Synodi dissolutio, irrita etiam quaecumque in eam variis editis Bullis decreverat, eaque etiam post dissolutionem Basileae jure ac legitime propagata est: Ergo, „Eugenio quoque
 „iudice, inquit Meldensis Episcopus, superior est
 „Synodus, quae ab Eugenio dissoluta, Eugenio reni-
 „tente ac tandem obtemperante, stetit & valuit, quia
 „ex dissolutione fidei periculum, Ecclesiae scandalum,
 „reformationis necessariae mora; quanto ergo magis
 „Synodus praevaleret, si quod maxime quaerimus de
 „fide, de schismate, aut de reformatione directe age-
 „retur?

Haec summa est argumentorum, quae in his tribus Capitibus Meldensis Episcopus urget, quibus facile occurritur, si prae oculis habeatur, Eugenium, quum haec faceret, pacis studio juri suo cessisse, idque ab ipso ad Imperatorem esse perscriptum: *Accepimus*, inquit (a), *exhortationes tuas & acceptavimus Decretum illud Concilii Basileensis Verum quidquid fecimus, sub spe tua & tuo moti consilio fecimus, pro pace Ecclesiae & bono Populi Christiani, voluimusque potius cedere de jure nostro, tui contemplatione & pro salute fidelium, quam perstare in conservanda dignitate & auctoritate nostra & Apostolicae Sedis. Itaque quum secundum exhortationes tuas & consilia sit per nos Decretum illud, prout videre poterit tua sapientia, acceptatum, tuum est munus proprium &*
opus

(a) Epist. ad Sigism. Imp. ap. Rayn. ad an. 1434. num. 3.

opus tueri, & defendere Nos iuraque nostra & Romanae Ecclesiae, ac agere ut Sedes Apostolica in sua dignitate & auctoritate conservetur. In quibus verbis plura notanda sunt, unde variae consecutiones profisciscuntur, quibus tota haec controversia in optimo lumine collocatur. Nam primū ait, quod Caesaris consiliis permotus, & propter ejus exhortationes, decretum illud Basileense suscepit, non ergo decretorum Basileensium aut Constantiensium auctoritate permotus. Secundo, pro Ecclesiae pace, pro Christianae Reipublicae bono, & pro salute fidelium, Basileensi Concilio ex praescripta formula se se adhaesisse significat; non ergo sponte & ex animi sui sententia Synodo adhaesit, sed metu coactus malorum, quae Ecclesiae jam imminuebant, ejusque pacem perturbatura erant. Tertio, se jure suo cessisse profitetur, nec integram inviolatamque praestitisse, ut jure poterat, & alias debuisset, suam Sedisque Apostolicae dignitatem atque auctoritatem; ergo si jure agere voluisset, totaque Sedis suae auctoritate uti, non ipse Synodo morem gerere, sed Synodum ipsam ad obsequium compellere debuisset. Quae omnia plane demonstrant, nullam ab Eugenio, quum Basileensi Synodo adhaesit, Basileensium aut Constantiensium Decretorum habitam esse rationem: & Synodi quidem Basileensis progressum intuitu Caesaris, ejusque suasionibus & consiliis permotum, pro Christianae Reipublicae tranquillitate & incolumitate ratum habuisse, non tamen ejus adprobasse decreta, ex quibus semel probatis atque susceptis consequens fuisset, Synodum invitam ac repugnantem jure a Pontifice non potuisse dissolvi, & irrita esse quaecunque in eam Pontifex constituerat, nec proinde

illum jure suo censuit, quam Synodum Basileenfem velut jure ac legitime propagatam amplexus est.

Hinc porro etiam efficitur, quod quanquam pro illis verbis, *volumus & contentamur*; quae Synodus rejecerat; haec verba, *discernimus & declaramus*, adsciverit; verbis licet diversis unam tamen & eandem inelle voluisse sententiam; ut scilicet decreverit ac declararit, Synodum eo loco habendam esse, ac si legitime continuata fuisset; quascunque vero ipse ediderat in Synodum Apostolicas Constitutiones perinde spectandas esse ac si nunquam emanassent, aut irritae ab ipsa eorum promulgatione fuissent. Hanc certe Eugenii fuisse mentem, cum ex dictis colligitur, tum etiam ex eo, quod quum de pace ageretur, temperari ab hac disceptatione voluit, potiorne esset Pontificis auctoritas a Concilio: quae tamen tum maxime disceptanda fuisset, si ex jure in hoc negotio procedere voluisset. Sed quoniam, ut quidam ex ejus Oratoribus ait (a), *de jure suo etiam clarissimo non parum concedere pro scandalo evitando censuerat, firmiterque decreverat*, ideo abstinere a disceptationibus voluit; summam nullique in terris obnoxiam Pontificiae Majestatis excellentiam simpliciter asseruisse contentus, *ne jura*, ut idem ait, *& potestates Sedis Apostolicae contemni & comprimi, conniventibus oculis pati videretur*. Id quod etiam aliis ad Synodum Oratoribus in mandatis datum a Pontifice est, ne videlicet disputationem sererent de Sedis Apostolicae potestate ad revocandam necne semel coactam Synodum Oecumenicam: *Nobis (b) datum est in mandatis,*

ut

(a) Ab. de Moniac. ap. Marten Tom. VIII. nov. Collect. pag. 545.

(b) Archiep. Spalat. ibid. pag. 656.

ut super hujusmodi potestate non disputemus; ideo an legitima & iusta fuerit, non est nostrum decidere. Vos moveamini ex iuribus scriptis & conscientiis vestris. Quae verba sunt jus certe suum agnoscantis, sed illud tamen prosequi & urgere nolentis coram non acquis Iudicibus, sed infensissimis Adversariis, omnia potius sudeque miscere paratis, quam ut sibi eripi sinerent semel usurpatam in Christiana Republica potestatem. Denique Franciscus de Capitibus Liste, unus ex Venetorum Oratoribus; qui mandatum a suo Dominio acceperant, ut sese pacis & concordiae sequeiros offerrent, quique mentem Pontificis optime perspectam habebant; disputationibus insistendum non esse monuit, vix enim hac ratione posse aliquid confici. Igitur (a) *quaerendum non esse; An sacra Concilia sine Papae auctoritate teneant, vel non: Utrum Concilium Constantiense & illius Decreta teneant, vel non: quia illa disputatio non esset fortasse utilis ut vellemus.* Quia nimirum talia adferrentur ad asserendam Romani Pontificis potestatem, & infirmandam Constantiensium Decretorum auctoritatem, argumenta, ut si his Pontifex niti vellet, nunquam ad ea consensurus esset, quae Synodus exigebat. Omittendas ergo esse inutiles disputationes, quandoquidem Eugenius non ultra juri suo insistere decrevisset, sed pacem & concordiam instaurare, quaecunque ab eo Synodus exegisset: *Ne igitur propter hujusmodi disputationes inutiles retardetur pax, quies & concordia.....supplicamus, ut si quid Bullis restat addendum, id totum petatur, & habebitur.* Tantum igitur abest, ut Basileensis & Constantiensia Decreta, quae

C c c 2

Con-

(a) Ibid. pag. 666.

Concilia Oecumenica supra Romanos Pontifices effecerunt, Eugenius, Synodi progressum adprobando suscepit, ut ne de his quidem disputari voluerit; non ea profecto ratione, quod ea retractari non posse existimaret; sed quia *de jure suo etiam clarissimo non parum concedere*, pro sedanda turbatione & pace restituenda, decreverat.

Unde facile solvuntur quaecunque hinc Illustrissimus Adversarius congerit argumenta. Ea enim valerent utique, nisi certo constaret, Eugenium haud ex animi sui sententia, sed ut suasionibus votisque Principum morem gereret, & extrema averteret mala, quae Christianae Reipublicae immincebant, Synodo Basileensi velut haecenus legitime celebratae adhaesisse, eique sic adhaerendo, se jure suo etiam clarissimo decedere existimasse. At quandoquidem constat, laudatum Pontificem non Basileensium aut Constantiensium Decretorum auctoritate; sed Principum consiliis permotum; non velut jure illis decretis obnoxium, sed tanquam jure suo decedentem, non denique velut jus suum in unum coactis Patribus tribuendi, sed pacis restituendae studio, & Synodum ratam habuisse, & quas in eam ediderat constitutiones, & quas imprefferat notas, velut irritas revocasse; nihil omnino aliud his argumentis confici potest, quam Constantiensia Decreta fuisse in eum statum restituta, unde ea dejecisse Eugenius videri poterat, summa Sedis Apostolicae auctoritate invitam ac reluctantem Synodum dirimendo. Quod quum quisque per se facile perspicere possit, ad singula Meldensis Episcopi argumenta suas aptare responsiones, non esset, opinor, operae pretium. Unum hoc tantum praeterea monebimus, haud bona fide

fide agere Bostueium; quum Capite tertio Bullam, *Deus novit*, inscio Pontifice promulgatam, obtrudit tanquam ipsius Pontificis scriptum e Cathedra emissum, totaque Sedis Apostolicae auctoritate munitum: „Eugenius... „ dissolutione nondum revocata, haec edixit, & quidem „ *universis Christi fidelibus*, ne Eugenii ut privati Doctoris scriptum esse respondeas. Subjecitque unum & alterum ex iis quas dixi litteris testimonium; quas nemo nescit ab Eugenio pro suis agnitas non fuisse, nec ipsius etiam fuisse consensione vulgatas. Quare nullius est ponderis argumentum, quod hujus Bullae verbis innititur. Sed Eugenii mens longe adhuc nobis ex iis, quae postmodum contigerunt, exploratio erit.

CAPUT V.

- „ De secundo Basileensi dissidio: Quid ab initio
 „ reconciliatae gratiae usque ad secundi
 „ dissidii initium a Synodo gestum
 „ sit per biennium.

MIra se in obsequium Pontificis & Apostolicae Sedis facturos promiserant Basileenses, si eorum votis annuens, Synodo, quam diremerat, ex praescripta formula adhaesisset: *Quod si fecerit sua Sanctitas, nemo erit nostrum, qui pedes ejus ut Beati Petri non osculetur, quem ut Vicarium Christi non honoret: erit Concilii Caput, omnes ad eum respicient, omnes ei complacere, obsequi, & quantum cum Deo poterunt, deservire curabunt. Offerimus etiam quidquid dici aut exco- gitari potest nos fidelissime facturos, quantum cum Deo fieri*

fieri poterit, pro honore & *statu* suae Sanctitatis, quam omnium suorum. Quid his promissis desiderari potest magnificentius? Iis tamen, quod futurum praesenserat Eugenius (a), non itererunt Basileenses; sed perinde ac Synodo id tantum negotii datum esset, vel ad hoc unice convenisset, ut Pontificem in ordinem redigeret, & sacratiora Sedis Apostolicae jura convelleret, eo quo coeperant pede ire hoc biennio perrexerunt, & graviora etiam in Pontificiae Majestatis depressionem moliti sunt; nullaque fere ex decem sequentibus sessionibus habita est, in qua non sit aliquid constitutum, quo ea gravissime laederetur. Ut quod Sessione XVI. Legati Sedis Apostolicae ad praesidendum Concilio admissi non sunt, nisi dato sacramento de tuendis Constantiensibus Sessionis V. Decretis. Quod Sessione XVII. iisdem Legatis ademta est jurisdictio coactiva, statutumque est, ut quae Synodus decerneret, ipsi, aut ipsis absentibus vel recusantibus, primus Praelatorum Synodi nomine concluderet ac pronuntiaret. Quod Sessione XVIII. facpius memorata Synodi Constantiensis decreta rursus in medium adtulerunt, inculcarunt, & confirmarunt. Quod Sessione XIX. plura cum Graecis Oratoribus inconsulta Sede Apostolica pepigerunt, quamquam eos non lateret, pendere adhuc quemdam inter Eugenium & Graecorum Imperatorem & Patriarcham tractatum, ad quem perficiendum suos Constantinopolim Oratores direxerat. Qua de re gravissime cum Basileensibus Eugenius conquestus est. Quod Sessione XXI. *Annatas*, seu medios fructus unius anni, quos pro novis *Beneficiis* Pontificis aerario inferunt, omnino sustulerunt, frustra

re-

(a) Epist. ad Franc. Fosc. Duc. Venet. ap. Rayn. ad an. 1433. n. 19.

refragantibus Apolloniæ Sedis Legatis, Johanne Archiepiscopo Tarentino, & Petro Episcopo Paduano, Eugenio nomine protestantibus (a), rem iniquam esse, inaudito Pontifice, tantum præjudicii, tantum detrimenti Romanæ Ecclesiæ inferri, & annatarum & minorum solutiones, jampridem a Romanis Pontificibus introductas, ab universo Clero susceptas, a pluribus generalibus Synodis non violatas, injuste nunc auferri &c. Quod Sessione XXIII. multa de electione ac profecutione Summi Pontificis, de numero & electione Cardinalium, de sacris electionibus celebrandis, de tollendis reservationibus, de Clementinæ litteris, decreta sunt, quibus tanquam pro imperio & potestate agentes amplissimam Sedis Apostolicæ Romanique Pontificis auctoritatem, velut sanctissimis legibus coercerant. Quod Sessione XXIV. cui decem tantum Episcopi & tredecim Abbates interfuerunt (b), nulla accepta a Pontifice potestate, amplissimam noxarum veniam iis largiti sunt, qui itipem transvehendis in Occidentem Græcis erogallent; reclamantibus Legatis Apostolicis, ac in hujusmodi decretum Indulgentiarum ederetur, frustra intercedentibus, ut ab Augustino Patritio memoriarum proditum est. Denique quod Sessione XXV. in duas factiones discissa, magna pars Patrum, quæ, ut habent Acta Patritiana cap. LIV. Pontifici erat infensa, & Concilium, pro unionem Græcorum, in Italia nullo pacto volebat, Avenionem aut Sabaudiam pro loco future Synodi designavit.

Ex hac rerum hoc biennio gestarum narratione patet,

(a) Aug. Patr. Hist. Conc. Bas. &c. cap. XLIV.

(b) Aug. Patr. ibid. cap. LII.

tet, Basileenses itatim post instauratam pacem publicum veluti & apertum bellum opumo Pontifici indixisse, suaque, ut optime Cl. Martene animadvertit (a), Concilii supra Papam superioritate inflatos, quasi praecipuum eorum munus esset, deprimere & conterere Papam, nullam eum molestandi & irritandi occasionem praetermississe. Sic illi promissis steterunt, quibus quum de pace ageretur, Imperatori quidem aliisque Principibus, non autem Eugenio, fucum facere potuerunt: qui, ut antea monuimus, tutum non esse judicaverat, dare nocendi facultatem eis, qui jam nocere moliti fuerant. *Qui enim*, inquit Duci Venetiarum scribens, *nulla antea auctoritate fulti, laxaverunt contra nos suas animi passiones, (ut dicamus leviter) quid agent, quum nacti fuerint agendi prout libuerit potestatem?* Quae inconsulta ipsorum agendi ratio eo magis improbanda est, quod, ut Martene mox laudatus observat, post revocatam ab Eugenio dissolutionis Concilii Bullam cum eis in omnibus pacifice agere consueverat, requisitusque in rebus magni momenti assensum libenter praebebat, multas etiam minoris momenti causas eis remittebat. Ut certe nescias quid magis admireris, patientiamne piissimi Patris ejusque longanimitatem, an rebellantium filiorum temeritatem & imprudentiam. Sed his tandem occurrendum fuit, ne si omnia dissimularet, suam Sedisque Apostolicae causam prodere videretur. Quod ille qua ratione praestiterit, sequenti Capite declarabitur.

CA-

(a) Praefat. in Tom. VIII. nov. Collect. num. 67.

CAPUT VI.

„ Quid per idem tempus ab Eugenio IV.
„ sit gestum .

QUum ergo Basileensium audaciam Eugenius diutius ferre non posset, Legatos misit toto orbe terrarum, suo sacrique Collegii Cardinalium nomine, apud Imperatorem, Reges & Principes de Synodo conquesturos, Libello seu commonitorio instructos, ex quo ab illis temere gesta depromerent, & in omnium gentium oculis constituerent. Quamquam vero hoc Monumentum quod a Raynaldo ad an. 1436. Eugenii sextum, vulgatum est, procul absit a Decreti publici auctoritate, ex eo tamen aliquot loca decerpam, in quibus veri ac genuini & ipsius Eugenii & Ecclesiae Romanae de Pontificia auctoritate sensus luculentissime repraesentantur.

Ac primo quidem is prae oculis habendus est, in quo Pontifex queritur, ipsius Legatos praeter morem in Conciliis Oecumenicis haecenus observatum, admisso in Synodum non fuisset, nisi eis prorsus abrogata omni jurisdictione & potestate coactiva, veluti Romanus Pontifex, quem illi repraesentabant, Ecclesiae & Concilii Caput non esset, sine cujus consensu & auctoritate nihil jure, quod ad fidem aut generalem Ecclesiae disciplinam pertineat, in Synodis Oecumenicis statuatur. At contra Basileenses, cum per aliquot menses post instauratam Synodum disceptasse, an Pontificios Legatos admitterent ad praesidendum Concilio, tum eos admittere quidem decrevisse *ad praesidentiam*,

D d d

ut

ut vocant, *honorariam*, sed absque ulla potestate coactiva; tum denique statuisse, ut iis recusantibus, Synodi nomine, proximi post eos Praelati concluderent, ac praesidentis munus exercerent: perinde ac si in Concilii potestate esset, praeter Romanum Pontificem ejusque locum tenentes, alium sibi Praesidem constituere. Quod ab eis tamen prioris dissolutionis tempore tentatum est, & multo tempore observatum. Id vero *non tam erroneum* esse pronuntiat Eugenius, *quam periculosum & piarum aurium offensivum, necnon ab omni observatione & doctrina Sanctorum Patrum alienum*.

„ Atqui illud erroneum, inquit Bossuetius, atque a
 „ doctrina Patrum alienum ipse Eugenius confirmavit,
 „ dum Synodum a se dissolutam male, bene continua-
 „ tam esse, edito Diplomate definivit. Atqui, inquam,
 vel hinc discere aperteque colligere debes, aut illud Diploma invito ac reluctanti & praeter animi illius sententiam, per vim & metum extortum fuisse, aut Diplomatis verba in eam quam supra diximus mentem interpretanda esse, ut nimirum pacis studio Eugenius velut rata haberi voluerit, quae irrita esse noverat; & contra irrita esse decreverit quae jure suo valida esse intelligebat.

Pergit, innovasse illos duo Concilii Constantiensis Decreta, ea praeter Patrum mentem ad certos & indubios Pontifices, *in magnum Ecclesiasticae Monarchiae periculum* proferendo; unde consequi videatur, neque ab Ecclesia Romana, prout omnes Catholici Doctores profitentur & docent, Concilia Occumenica, auctoritate Apostolica congregata, robur habere ac potestatem, neque in Romano Pontifice, Christi Vicario, & Ecclesiae fideique Petra, velut in fundamento, ea immota con-

consistere, & inconcussa auctoritate pollere: *Quod nemo unquam fidelis & doctus dicere praesumpsit.* Semel enim constituto, Romanum Pontificem, non secus atque alium quemlibet Episcopum, Conciliorum generalium decretis obnoxium esse, constitutis poenis, si ea transgrediatur, puniendum; summam ejus potestatem in nihilum redigi necesse est, vel eam ipsi ereptam, cui a Christo in Apostolorum Principe tradita est, in manibus multitudinis collocari. Quod est, inquit, erroneum, & a doctrina Patrum omnino alienum, imo & Catholicorum Principum statui valde perniciosum. Quoniam & eorum populi semel in unum coacti summam sibi arrogare poterunt in Republica potestatem; *& sic Episcoporum statum, & politiam Christianam evertere: quod minime est dicendum aut tolerandum.*

„ Utcumque est, inquit Illustrissimus Adversarius;
 „ illud erroneum, & a Patrum doctrina alienum, Patres Basileenses pridem amplexi erant, ab ipsis nempe
 „ suae Congregationis initiis, Sessione II. ut vidimus. Id etiam saepe dissolutionis tempore innova-
 „ rant, inculcarant, sciente Eugenio, qui nedum haec reprehenderet, ipsam quoque Synodum rite inchoa-
 „ tam, rite continuatam esse definiret edito diplomate:
 „ ut profecto pateat, quaesitas nunc ab illo clam eas
 „ conquerendi causas, quas ipse antea publice totaque
 „ Sedis Apostolicae auctoritate respuisset. Hinc discat Lector, quam ii magnificare & extollere soleant, quaecunque illorum opinionibus prima fronte vel minimum favere videantur. Quum enim ex antecedentibus & conjunctis & consequentibus apertissime constet, nunquam Eugenii mentem fuisse, Basileensium decreta, eisque in-

ferta Constantiensium, adprobare, vel eis pondus adjungere Apostolicae confirmationis; sed solum Synodi progressum restituendae pacis amore ratum habere, ac jure suo decedere voluisse; jactare tamen audent, & ipsa Basileensium & Constantiensium Decreta tota Sedis Apostolicae auctoritate ab eo probata fuisse: perinde atque nihil curandum sit, quae Pontificis mens fuerit, aut quid illi sit visum, quum aliquod ab eo Diploma signatum est: Quum tamen Apostolicorum Diplomatum inde pendeat auctoritas, quod primum Spiritui Sancto, deinde Pontificibus aliquid visum sit: *Visum est, inquit, Spiritui Sancto, & nobis.*

Vellicat subinde Basileensium Decreta, tum de Annatis, quas in signum eminentiae supra ceteras Ecclesias, quas Romana fundavit, Romani Pontifices exigunt, tum & de Reservationibus auferendis, quibus aliquando necesse est Summum Pontificem uti: neque fas, inquit, sit, quod Deus Vicarii sui reliquit arbitrio, hominum statutis aut legibus interdici. Quum enim plura, inquit, sint negotia quam vocabula, & lex non possit omnes casus comprehendere, dedit Deus legem animatam in terris, non multitudinem, aut Collegium vel Universitatem, sed maximum videlicet omnium Principem Romanum Pontificem, Christi Vicarium & Petri Successorem, cujus esset pro negotiorum exigentia & qualitate, non alieno arbitrio, sed suo, leges interpretari, moderari, declarare, & tollere, si sit opus. Ac subjungit: Quomodo ergo qui sunt Basileae congregati existimant, sibi fas esse supremum Ecclesiae Principem suis adstringere legibus, atque omni potestate nudare, perinde ac solo nomine & velut inutile signum

gnum in Apostolico throno sedere eum velle videantur ? Et infra num. 10. Qua fronte audent legum moderatorem & principem, & qui potest, prout utile vel expedirens judicaverit, legem tollere, requirere ut legem servet, ac velle eum legibus, quibus solutus est, subjacere ?

Queritur etiam Eugenius & vehementissime de concessis a Synodo ; *absque auctoritate vel licentia Apostolicae Sedis*, ac repugnantibus, praeter unum Cardinalem Julianum, qui nulla ad id potestate erat instructus, aliis Legatis ; de concessis, inquam, a Synodo Indulgentiis : *quod*, inquit, *in signum supremæ potestatis est soli Summo Pontifici*, tanquam supremo Ecclesiæ Principi, *reservatum*. Quum ergo ejusmodi & alia Sedis Apostolicae jura Basileenses invaderent, perspicuum esse docet Eugenius, quod *duo exercitia suprema, duo Tribunalia, & duo Capita* in Ecclesiam militantem invadere, & Ecclesiasticam Monarchiam convellere nitentur, & novum in Ecclesia schisma excitare : pro quo terribilo ac funestissimo malo a domo Dei eliminando ; quadraginta ferme annorum intervallo, haud jam pridem omnes fere Christiani Principes conjunctis studiis adlaborerant.

Adjungit, inauditum a cunctis saeculis esse, quod Concilium generale, a quo norma justitiæ, morum censura, summa item pax, omnisque erroris eliminatio prodire debent, de pari aut etiam majore cum Romano Pontifice potestate, cum tanto Ecclesiæ scandalo & Populi Christiani perturbatione, contendat. Ex hominum memoria, aut ex Majorum Annalibus tale scissuræ genus non agnoscere Ecclesiam, quod in Sede Petri legitimum sedente Pontifice, qui generale Concilium facere di-

cun-

cuntur, parem cum ipso aut etiam majorem sibi vendicent potestatem. Quum Jesus Christus mortem obiturus, non multitudinem, sed Petrum Apostolorum verticem, qui suum teneret locum, destinavit; cur Monarchiam Divino jure institutam, ad popularem statum & democratiam revocare moliantur? Cur Summi Pontificis jurisdictionem & auctoritatem toto orbe venerandam, & in summa pace degentem, sede jam plena, infringere, aut omnino labefactare conantur; duo in Ecclesia Capita (quod est omnium perniciosissimum) sub diversis tantum nominibus constituentes, contra atque in Symbolo *unam, sanctam, Catholicam & Apostolicam Ecclesiam* consistemus?

Hæc libuit ex laudato Eugenii Libello paullo fufius excerpere, quod hinc apertissime constet, quis de omnibus fere controversiis, quæ nos hodie cum Gallis Theologis committunt, fuerit olim ipsius Eugenii & Cardinalium, adeoque & totius Ecclesiæ Romanæ sensus. Ut nihil sit magis absurdum, quam quod Adversarii extortas Eugenio litteras ita interpretari renuunt, ut cum tam clavis ejus exploratisque sententiis utcumque congruant; aut quod ad vim & auctoritatem Apostolicæ Constitutionis sufficere existimant, si illi vel contra suam claram exploratamque mentem atque doctrinam subscribere Pontifex compellatur.

Quandoquidem vero Bossuetius sub finem capituli Eugenium neglectæ reformationis arguit, monetque nos divina judicia contremiscere, totque reformationes impias sequente sæculo ex inferis prodituras, neglectæ reformationis ultrices cogitare; atque adeo optimo Pontifici imputat, quod occasionem nefariis hominibus de-

derit ad Ecclesiam reformationis specie, quantum in ipsis erat, funditus evertendam: alium ex eodem commonitorio locum subijciam, quo tantorum malorum invidia in ipsos Basileenses facile retorquetur. Inde enim, si verum fateri volumus, prima mali labes, quod homines temerarii velut Ecclesiae reformandae studio, in summos ipsius Ecclesiae Principes ora laxare, eorum mores & vitia carpere, legitimam potestatem contemnere, jugum excutere, & auctoritatem invadere ausi sunt. Qua semel occupata non ad aedificandam & componendam Christianam Rempublicam usi sunt, sed ad eam temere perturbandam, aut si fieri posset, & funditus evertendam: *Hoc enim modo*, inquit Eugenius, *in Ecclesiam introductae sunt haereses, dum inferiores per contemptum quemdam aut de superiorum vita & moribus judices esse volunt, aut eis leges, quod minime possunt, imponere sitagunt.* Qua in re sequentis saeculi Novatoribus ac Pseudo-Reformatoribus Basileenses optime seu potius pessime praeluserunt. Quare eos optimus Pontifex obtestabatur, ut modeste agerent, elatos spiritus comprimerent, ac ne legitimam auctoritatem lacerarent & indebitam potestatem usurparent, qua & ipsi aliquando & alii in exitium impellerentur: *Desinant ergo Romanum Pontificem lacerare; recognoscant eum Ecclesiae Caput; non recedant a doctrina Patrum, quae ipsi omnes leges subijcit; non seminant peregrinam doctrinam, animas simplicium illaqueantes; non alta sapiant, sed in humilitate persistant.* Hoc enim omnium malorum caput & origo ab initio nascentis Ecclesiae fuit, quum homines sanam non valentes doctrinam intelligere & sustinere, in laqueum superbiae elati, plus
sa-

scire quam oportebat, cum periculo plurimorum, imprimis suo, voluerunt. Hæc Basileenses optimi Patris monita contemserunt, ac protervia & perduellione sua viam ad audendum pejora futuris Pseudo-Reformatori- bus munierunt: qui idcirco Synodum istam Basileensem, quemadmodum Illustrissimus Apamiarum Episcopus testatur (a), toto affectu exosculantur ut Divinum opus, ejusque Historiam & Acta plurima in suo rerum expendarum Fasciculo locum habere voluerunt. En unde illae reformationes impiae sequente sæculo ex inferis prodierunt.

CAPUT VII.

„ Dissidii causa ex Gestis: Quaestio proponi-
 „ tur, An Constantiensia Decreta revo-
 „ cata in dubium.

QUUM Romanus Pontifex centrum Ecclesiasticae unitatis, ipsis fatentibus Adversariis, a Deo constitutus sit, quemadmodum aut Rex in regno, aut Dux in exercitu, aut Pastor in grege, statim atque Ecclesiasticus aliquis coetus a Pontifice dissidet, in discrimen adducitur amittendae per internam seditionem unionis & pacis, quarum vinculis inter se mutuo illius membra conjungebantur. Quare non mirum si Basileensis Synodus etiam post restitutam pacem hoc morbo in suis condendis decretis identidem laboravit. Quum enim Legatis Apostolicis, perinde ac summum Ecclesiae Caput nequaquam repraesentassent, contra omnium

Con-

(a) Ad an. 1436. num III.

Conciliorum morem, omni in Synodum potestate & auctoritate interdixissent, nemo erat qui multitudinem variis affectuum studiorumque motibus agitatam cohiberet, seque subinde in contrarias factiones scindentem ad unitatem revocaret. At prorsus immedicabile illud dissidium fuit, quod Sess. XXV. circa locum celebrandae pro Graecorum unione Synodi exortum est. In duas enim itum est sententias: „ Patrum pars maxima, inquit Bossuetius, locum habendae Synodi Avenionem designabat. Pauciores cum Legatis decretum edidere Synodi nomine de ipsa Synodo Florentiam vel Utinum transferenda, sive in alium locum tutum in anterioribus Decretis comprehensum, Summo Pontifici & Graecis accommodum, dummodo in manu Concilii poneretur. Legatorum, eisque adhaerentium Decretum Eugenius confirmavit, Synodumque Oecumenicam Ferrariam transtulit: quo se se Legati Apostolici, atque ipse etiam Cardinalis Julianus haecenus Synodo addictissimus, contulerunt: Refractarii autem ac perduelles Basileae persistentes, Ludovicum Alemandum Cardinalem & Episcopum Arelatensem, inconditae multitudini & Latrociniali Synodo signiferum praefecerunt.

„ Secuta deinde, subjungit idem Meldensis Episcopus, illa omnibus nota, quae nihil ad nos spectant: Neque enim posteriora illa Basileensis Clerus Gallicanus tutanda suscepit, sed Constantiensis Basileensibus prioribus Gestis, consentiente Pontifice, toties repetita, haec immota stare, ex Ferrariensi quoque & Florentino Concilio, ex ipsius Eugenii & Successorum Decretis, cum maxime damnarent Basileensem

Ecc

„ po-

„ posteriora Decreta , non conjecturis aut ratiocinatio-
 „ ne dubia , sed Actis comprobamus . Haec Bossuetius :
 quae ille quam solide feliciterque praestiterit , & nos ex
 eisdem Actis demonstrabimus .

CAPUT VIII.

„ Ex Actis probatur , priora Basileensia , quibus
 „ Constantiensia confirmantur , integra
 „ auctoritate esse .

„ **N**E quem lateat , inquit Illustrissimus Adversa-
 „ rius , quid ex Actis Monumentisque ordine re-
 „ cendendis probatum velimus , haec summa est : Po-
 „ strema Basileensi contentione quaesitum id tantum :
 „ An Pontifex ea auctoritate fuisset , ut Synodum reni-
 „ tentem alio transferre posset . Ceterum Constantiensia
 „ Decreta Sessionis V. , atque his connexa priora Basi-
 „ leensia valuisse ; neque quidquam ab Eugenio , Edicto
 „ sane publico , commotum in iis , quibus se Synodus
 „ ex Decretis Constantiensibus , in fidei , schismatis ,
 „ reformationisque negotio , Papae anteponeret . Ne-
 „ que hoc tantum , imo & ea velut Oecumenicae , verae
 „ & legitimae Synodi Decreta agnita ab Eugenio fuisse &
 „ expresse adprobata , idem Illustrissimus Auctor contem-
 „ dit . Haec tamen falsa omnino esse , ex iisdem Actis , ut
 „ jam diximus , demonstramus .

ARTICULUS PRIMUS.

Synodus, cui Sedis Apostolicae Legati sine auctoritate & jurisdictione praesuerunt, pro vero, genuino & generali Concilio haberi non potest; nec ejus Decreta velut ab Oecumenica & legitima Synodo edita, unquam Eugenius adprobavit.

Post restitutam pacem Sedis quidem Apostolicae Legati a Basileensibus suscepti sunt, ea tamen, ut jam diximus, lege, ut jurisdictione coactiva carerent, utque ea quae a Synodo decernerentur, ipsi, aut ipsis absentibus vel recusantibus, primus Praelatorum Synodi nomine concluderet ac pronuntiaret. „Quo sublato, inquit „Bossuetius Cap. V. nulla Concilii libertas, imo nullum Concilium esse videretur, sed omnis ejus actio „in Legatorum potestate esset. Adversus ejusmodi Decreta cum ipsi Legati publice ac sollemniter protestati sunt, tum Eugenius vehementer in eo, quem superius laudavimus loco, justeque conquestus est. „Sed ejus querelae, subjungit idem Bossuetius Cap. VI. eo pertinebant, ut tota Synodus sub Legatorum potestate esset.

Verum Eugenius haud alium sibi suisque Legatis locum, haud aliam jurisdictionem ac potestatem vindicabat, quam quae Romanis Pontificibus divinitus contributa est, & quam in illis omnes Oecumenicae Synodi veneratae sunt. Nulla enim legitime celebrata est, quae non cum summa veneratione Sedis Apostolicae Legatos, velut Ecclesiae Synodique ipsius caput repraesentantes,

exceperit ; nullum omnino conditura Decretum , nisi illorum prae lucente auctoritate , imo & Decreta , quae ipsi ab Urbe adtulissent , velut leges , & agendorum decernendorumque normam , & Spiritus Sancti oracula veneratura . An autem inde consequens sit , nullam fore Synodi libertatem , & omnem ejus actionem in Legatorum potestate futuram , alia quaestio est , ob quam non erat Basileensibus a veterum Conciliorum moribus & institutis recedendum : ut qui nihil frequentius in ore habebant , & Eugenio molestius & importunius ingerebant , quam Gregorium Magnum quatuor priores Synodos velut totidem Evangelia in honore habuisse , non darent occasionem , ut eis merito objiceretur , Synodum Basileensem sanctorum Conciliorum vestigiis & exemplis nequaquam insistere , nec ad illorum normam eam esse constitutam . Quam enim Legati Sedis Apostolicae in Conciliis Ephesino & Chalcedonensi , quae duo sunt ex illis quatuor , quae velut Evangelia Magnus ille Gregorius amplectebatur , potestatem exercuerint , cum a nobis saepius demonstratum est , tum Illustrissimus Petrus de Marca lib. V. de Concord. Sac. & Imp. per plura capita haud segniter ac perfunctorie declarat : ex quo aliqua decerpere est animus , ut velut domestico Auctore Basileenses , eorumque vindex ac defensor Bossuetius , refellantur , omnisque illorum Actis ac Decretis auctoritas abrogetur .

Quod ad Ephesinam Synodum attinet , quis unquam inficias iturus est , Caelestinum illi primum per Cyrillum Alex. , cui suas in Nestorii causa vices commiserat , deinde per Philippum Presbyterum , & Projectum & Arcadium Episcopos , suos ad Synodum Legatos ,

tos, cum imperio praefuisse, & coactivam exercuit auctoritatem? Quandoquidem ipsimet Patres in sententia depositionis adversus impium Nestorium, se se ad eam devenisse profitentur coacti, non secus atque per sacros Canones, per Epistolam Caelestini: *Coacti per sacros Canones & Epistolam . . . Caelestini . . . ad lugubrem banc contra eum sententiam necessario venimus.* Magni autem momenti, inquit Petrus de Mar-
 „ ca (a), sunt illa verba, quibus se coactos dicunt, id
 „ est, ex officio adstrictos, ut Canonibus qui contuma-
 „ ciam plecebant, & rebus a Celestino adversus impie-
 „ tatem decretis, morem gererent. Ea est enim aucto-
 „ ritas Epistolae Pontificis, ut parendi necessitas in-
 „ cumbat &c. Ne quis autem existimet alienam a ver-
 „ bis Synodi sententiam nunc primum a me confictam
 „ fuisse, perpendenda sunt quae dixit Firmus Caesareae
 „ Episcopus post adventum Legatorum Arcadii, Pro-
 „ jecti, & Philippi; qui post damnatum Nestorium
 „ Ephesum accesserunt. Ait Firmus, primam senten-
 „ tiam tulisse Celestinum, eamque huic negotio for-
 „ mam per priores literas suas ad Cyrillum perscripsis-
 „ se, quam Synodus executioni dedit.

Postquam vero illa contra Nestorium sententia, cui Caelestini litterae formam regulamque praescripserant, Actione III. praesentibus Legatis relecta est, Philippus Legatorum unus eandem Caelestini nomine confirmaturus, haec praefatus est: *Nulli dubium, imo saeculis omnibus notum est, quod Sanctus Beatissimusque Petrus Apostolorum Princeps & Caput, fideique columna & Ecclesiae Catholicae fundamentum, a Domino no-*
 stro

(a) Lib. V. de Conc. Sac. & Imp. cap. XI. num. II. & III.

*suo Jesu Christo claves regni accepit , solvendi-
ac ligandi peccata potestas ipsi data est : qui ad hoc usque
tempus , & semper in suis Successoribus vivit , & ju-
diciū exercet . Hujus itaque secundum ordinem Suc-
cessor & locum tenens , sanctus beatissimusque Papa no-
ster Caelestinus Episcopus , nos ipsius praesentiam sup-
plentes , ad hanc sanctam Synodum misit &c. Quorsum
haec , nisi ut intelligamus , qua Legati Sedis Apollolicae
auctoritate Synodo praesse debeant , ut qui locum te-
neant illius , cumque velut praesentem Synodo sistant ,
qui omnium Princeps & Caput est , qui fidei columna
& universae Ecclesiae fundamentum est ; qui Regni cla-
ves accepit , & in quo velut in fonte judiciariae potesta-
tis , & exercendae jurisdictionis vis & origo posita est .*

Reapse autem Caelestinum in suis Litteris & Lega-
tis velut Caput & Principem , ut ipsi cum auctoritate &
imperio praesideret , a tanta Synodo fuisse susceptum ,
laudatus de Marca ex acclamationibus probat , quibus
litterarum ejus lectionem Synodus prosequuta est : Nam
lectis quas Legati recens detulerant Caelestini litteris ;
Omnes Reverendissimi Episcopi , ut in Actis legitur , ac-
clamaverunt : *Hoc justum judicium : novo Paulo Cae-
lestino : Novo Paulo Cyrillo : Caelestino custodi fidei :
Caelestino cum Synodo concordii : Caelestino universae
Synodus gratias agit &c. „* Quibus acclamationibus ,
„ inquit Illustrissimus Auctor , ut fieri solebat a Senatu
„ erga Principem , Synodus Ephesina Celestinum ,
„ ejusque Legatum Cyrillum suo quoque nomine valde
„ commendabilem , profecuta est . Quae , non ex mera
conjectura dicta esse , imo ita esse accipienda , constat ex
interlocutione Philippi , qui ea reapse in hanc mentem
in-

interpretatus est, & gratias Synodo seu Patribus egit, quod suis vocibus & acclamationibus tanquam *sancta membra sancto Capiti* se se adjunxerint. Ac subjunxit: *Non enim ignorat vestra Beatitudo, totius fidei vel etiam Apostolorum Caput esse Beatum Apostolum Petrum.* Itaque tota Synodus Caelestinum sibi, velut Caput membris, praesidentem suspexit: sibi quoque gloriae & honori duxit, quod latum jampridem in Nectorium a Caelestino judicium ex forma regulaeque sibi ab illo praescripta executioni mandasset; quemadmodum membrorum est ea exsequi quae ipsis a Capite demandantur: *De praesenti negotio sententiam regulamque praescripserit, quam nos quoque sequuti . . . formam illam executioni mandavimus.* Quod quamquam & suo interposito judicio eos perfecisse non abnuam; hinc tamen constat, huic Synodi judicio Caelestini sententiam velut normam & regulam praeluxisse, ex qua esset de toto illo negotio judicandum ac statuendum; ac proinde non ea Judices fuisse praeditos libertate, ut non essent in judicando ad certam adstricti formulam, cui *necessario* parere, & quam exsequi cogerentur.

Nec minore amplitudine ac libertate Primatus sui & principalis auctoritatis vim Leo exercuit in Concilio Chalcedonenfi, quum Dioscorum Alexandrinum in ipso Synodi exordio ab Episcoporum Sede amovendum per Legatos suos edixit, & inter reos constituendum, ut causam diceret: *Paschasius &c. dixit: Beatissimi atque Apostolici Viri, Papae Urbis Romae, quae est Caput omnium Ecclesiarum, praecepta habemus prae manibus; quibus praecipere dignatus est ejus Apostolatus, ut Dioscorus Alexandrinorum Episcopus non sedeat in*
Con-

Concilio, sed audiendus intromittatur. Hoc nos observare necesse est. Si ergo praecipit vestra Magnificentia, aut ille egrediatur, aut nos eximas. „ Tergiverfati „ quidem, inquit Petrus de Marca (a), sunt Judices, „ acerbam exultimantes & duram Dioscoro impositam „ conditionem. Attamen cum Legati mandata Leonis „ urgerent, & Dioscoro objicerent, quod Synodum celebrasset absque Sedis Apostolicae auctoritate; etsi „ hoc videbatur aliquo pacto convellere Imperatoriam „ potestatem, qua fultus Synodo Ephacinae Dioscorus „ praefederat; Judices praeceperunt, ut Dioscorus in „ medio confellu resideret inter reos. Quisquam ne ergo negabit, S. Leonem per suos Legatos velut Caput Chalcedonenſi Synodo praefuisse, in eaque coactivam potestatem & jurisdictionem exercuisse? Non enim consilia, non suasiones, sed *praecepta* S. Leonis Paschasinus urgebat: quibus omnino parendum esset, suo alioquin discessu Synodum diremturus: quum nefas esset; atque id maxime Dioscoro crimini daret; absque Sedis Apostolicae auctoritate Synodum celebrare. Atque ut intelligerent Judices, unde hanc vim praeceptis Leonis arceſſeret, eis in memoriam revocat, Leonem *Urbis Romae* Episcopum esse, *quae caput est*, inquit, *omnium Ecclesiæ*. Porro in sententia adversus eundem impium Dioscorum lata observandum esse monet idem Illustriſſimus Auctor, quod cum „ Paschasinus non solum censuit a Synodo condemnandum, sed etiam ex „ auctoritate Leonis condemnavit. Referam, inquit, „ ejus verba, prout se habent in Epistola Leonis ad Episcopos Galliae, cui exemplar sententiae latae adversus „ Dio-

(a) Ubi sup. cap. X. num. I.

„ Dioscorum adjunxit, iisdem verbis quae Paschasinus
 „ protulit, qui Latine loquebatur in Synodo. *Unde sanctus ac beatissimus Papa, Caput universalis Ecclesiae, Leo per nos ut Legatos suos, sancta Synodo consentiente, Petri Apostoli praeditus dignitate, qui Ecclesiae fundamentum & petra fidei, & caelestis Regni Janitor nuncupatur, Episcopali eum dignitate nudavit, & ab omni Sacerdotali opere fecit extorrem.* Pro-
 lata est ergo in Dioscorum a Legatis sententia S. Leonis nomine: qui per eos Synodo praecerat velut Caput universalis Ecclesiae, & tanquam petra fidei, & ejusdem Ecclesiae fundamentum, & caelestis Janitor Regni: quae sane nemo negaverit auctoritatis & jurisdictionis titulos esse, cui & ipsa Synodus parere ex necessitate deberet; quemadmodum & Ephesina Caelestino Nestorium exauctoranti: *coacti, ad hanc sententiam necessario venimus.* Ubi rursus cum eodem Petro de Marca observandum est „ iudicium conceptum fuisse a Pascha-
 „ sino sub nomine Leonis de Synodi consensu; quem
 „ consensum Patres statim verbis explicuerunt, & sen-
 „ tentiae Paschasini subscripserunt, nulla sententiae
 „ formula sub nomine Synodi concepta. . . . Itaque mi-
 „ randum non est, si posteriora generalia Concilia in
 „ Occidente celebrata concepta sint ut plurimum sub
 „ nomine Pontificis, *sacro approbante Concilio*, cum
 „ traxerint exemplum ab hac formula: *Leo per nos Vi-*
 „ *carios suos, sancta Synodo consentiente &c.* Hoc
 „ proficiscitur e Primatus jure, quod auctoritatem tri-
 „ buit Pontifici, & Synodo consensum. At contra Ba-
 silienses in suis omnibus Actis ac Decretis sibi auctori-
 tatem usurparunt; Pontifici autem imposuerunt non mo-

do consentiendi, verum & parendi necessitatem; omni-
que & Eugenio & ejus Legatis jurisdictione adempta,
nullo pacto tulissent, aut ferre potuissent, decreta sub
hac formula promulgari: *Eugenius per nos Vicarios suos,
sancta Synodo consentiente &c.* Quod, quamquam ex
magna illa Chalcedonenſi Synodo derivatum, schisma-
tica factio admittere recusavit, quum eorum coetui
Pſeudo-Pontifex non jam per ſuos Legatos, ſed per ſe
ipſe praeceſſet.

Non minus ejuſdem S. Leonis per ſuos Legatos
Chalcedonenſi Synodo praefidentis auctoritas enituit in
contextenda ſanciendaque formula fidei, quam Legati
ad S. Leonis Epistolam velut ad fidei normam & regu-
lam omnino exigi voluerunt; intentata etiam Synodi
diſſolutione, vel ejus in Occidentem translatione, niſi
Patres morem gererent, & conſenſum adhiberent: *Si
non conſentiunt epistolae Apoſtolici & Beatiffimi Vi-
ri Papae Leonis, jubete nobis reſcripta dari ut reverta-
mur, & ibi Synodus celebretur.* Attamen quod vole-
bant ſua tandem auctoritate pervicerunt: nam formula
fidei omnium votis ita concepta eſt, ut diſerte Leonis
epiſtola, cui & omnes antea ſubſcripſerant, recepta ſit
tanquam Petri conſeſſioni congruens; & omnia dubia ad
praefcriptum illius epistolae explicata ſunt. Quae duo,
ut ait Petrus de Marca, maxime illius epistolae auctori-
tatem commendant: quum Decretis ſubſcribatur, & non
Episcoporum ſuffragiis; & quum neſas tandem Synodo
viſum ſit, ſi vel uno verbo ab ea epistoſta diſcederetur;
ac proinde ut certa & irreformabilis fidei regula habita
eſt, cui eſſet immote & indivulſe inhaerendum. „ Qua-
re, ſubjungit idem Illuſtriſſimus Auctor, juſ illud re-
„ la-

„ lationis cum praerogativa suffragii (*quod instar ve-*
 „ *terum Imperatorum Romanis Pontificibus vindicat*)
 „ Concilium Chalcedonenſe in Leone diſertiffimis ver-
 „ bis agnovit: ne quis per adulationem hoc a me con-
 „ fictum putet. Etenim in Synodica epiſtola ad Sum-
 „ mum Pontificem Patres profitentur cum fuiſſe in ex-
 „ poſitione fidei Petri interpretem, ſequē, ipſo duce &
 „ auctore, veritatem Eccleſiae filiis depromiſſe. Οὐ γὰρ
 „ ἐν μείσι ἀρχηγῶ σοι τῷ καλῷ περὶ ἀφίλειαν χρηστῶ μανιοι, τῆς
 „ ἀληθείας τοῖς τῆς ἐκκλησίας τέκνοις τὸν κληρὸν ἐδείξαν. „ Sed
 „ ut dignitatem auctoritatemque Pontificis non diſſi-
 „ mulant; ita quoque Synodi partes non omittunt, quae
 „ uno ſpiritu, una conſpiratione, atque concordia con-
 „ feſſionem fidei declaravit, Chriſto ſpirituales delicias
 „ per literas Leonis, Epiſcopis in Synodo velut in con-
 „ vivio quodam confidentibus, praeſeparante. Ita cum
 „ pace & tranquillitate res diſponuntur, quum ſuum uni-
 „ cuique jus tribuitur, ſuiſque omnes muneribus & officiis
 „ funguntur; quum ſcilicet Romanus Pontifex tanquam
 „ Eccleſiarum omnium, imo & ipſius Eccleſiae Catholi-
 „ cae Caput, Princeps & Magiſter dogmaticis ſuis epiſto-
 „ lis morumque decretis & fidem exponit, & diſciplinam
 „ ſancit; Synodi autem Occumenicae, quae ab ipſo edita
 „ ſunt ac decreta, tanquam Petri voces & Chriſti leges, &
 „ Spiritus Sancti oracula amplectuntur. Quem ordinem
 „ Divino jure conſtitutum quum Baſileenſis Synodus per
 „ ſummam aut temeritatem aut inſcitiam invertere auſa
 „ eſt, ſibiſque principatum & magiſterium uſurpavit, Ro-
 „ manum autem Pontificem ſibi tanquam dicto obedi-
 „ entem ſubeſſe voluit; non pacem & tranquillitatem in Ec-
 „ cleſiam, ſed horribilem perturbationem inſeivit.

Fff 2

Sed

Sed neque illud hoc loco ullo modo praetermittendum, quod jam saepe laudatus Petrus de Marca sequentibus verbis edisserit (a): „Unus tantum restat articulus, in quo utriusque relationis, Imperatoriae & Pontificiae, comparatio ineunda est, ut sciatur an illis per omnia conveniat. Inter ceteros relationis effectus observavimus Senatusconsulta sine Consulibus vel Principis relatione fieri non potuisse. Quaeri ergo potest non absurde, an licuerit Oecumenicae Synodo de aliquo fidei vel disciplinae capite sine relatione Pontificis decernere Ac sane antiquam esse Legatorum persuasionem video ut existimaverint, Pontificem rerum omnium gerendarum in Conciliis Oecumenicis auctorem esse debere; ita ut etsi forte non retulerit, saltem primam sententiam promat. Hanc disertis verbis expresserunt Patres Synodi Chalcedonensis in epistola Synodica ad Leonem: ad quem scribunt, Paschasium Legatum ejusque Socios vehementer obstitisse novae jurisdictioni, quae a Synodo tribuebatur Sedi Constantinopolitanae ex eo capite praecipue, quod Leonem vellent ejus rei auctorem fieri, quemadmodum auctor fuerat rectae fidei faciendae. Volebant scilicet ea de re prius a Leone decerni, cujus auctoritati ceteri deinde Episcopi consentirent & subscriberent (b). Hanc Legatorum opinionem non omnino refutare videtur Concilium; ita tamen ut in casu proposito ei locus esse non posset ob temporis circumstantias. Respondent enim, Imperatoris, Senatus, & Civium Urbis regiae desideriiis obsequendum fuisse, qui novam istam auctoritatem Decreto

„ Syno-

(a) Ubi sup. cap. XI. num. IV.

(b) Epist. Synod. ad Leonem.

„ Synodi Oecumenicae confirmari volebant . Quod
 „ fieri non poterat , si ante omnia Pontificis senten-
 „ tia exquirenda fuisset . Itaque in his angustiis se ne-
 „ gorium constituisse , non dubitantes , quin Leo hoc
 „ quoque decretum amplecteretur : quod perinde ef-
 „ set ac si ab initio ipse illius Auctor fuisset , eo quod
 „ rectorum facinorum a filiis gestorum omnis gloria
 „ redundet in Patres , qui jure patriae potestatis hoc si-
 „ bi vindicant . Quare obnixè rogant Pontificem , ut
 „ suo quoque decreto Synodi judicium honoret ; ut sicut
 „ in rebus fidei rectè constitutis Pontifici tanquam Ca-
 „ piti consensum suum adhibuerunt , ita quoque prima-
 „ tus sui jure ipse quod decet filiis impendat , nempe
 „ confirmationem & consensum , ἡμῶν πατρῶν βί-
 „ βαςίς τε ἔστι συγκατάβασιν .

Haec quamquam proluxiora , integra tamen referre libuit , ut hinc Adversarii discant , qua olim reverentia & obsequio , quave animi demissione magni illius Chalcedonensis Concilii Patres ad Romanum Pontificem scriberent , & sua ab illo decreta confirmari peterent . Scilicet ea qua filii parentes modestia & veneratione adloquuntur . Quod sane longissime distat ab arrogantia & typho , quo Basileenses praecepta legesque suas , gravissimis etiam intentatis poenis , Romanis Pontificibus intimabant . Qua in re dupliciter ab eis peccabatur , & a veterum Conciliorum exemplo discedebatur . Primum quod sine Pontificis relatione , imo & ut plurimum Apostolicis Legatis intercedentibus ac vehementissime repugnantibus , decreta ab illis de rebus gravissimis condebantur . Quod eis non licebat , perinde atque Senatuf-consulta sine Consulibus aut Principis relatione fieri non pote-

poterant. Alterum est, quod ejusmodi decretis inconsulta Sede Apostolica & perperam constitutis, Pontificem non rogabant, seu potius rogare dedignabantur, ut ea saltem primatus sui jure confirmaret: nihil enim in Apostolica confirmatione momenti esse existimabant, sed omnem eorum vim a Synodi auctoritate repetebant: qua freti non ea ad Pontificem Apostolica adprobatione munienda referebant, sed pro imperio cum illo agentes, poenis etiam propositis, exsequenda mandabant. Quumque a veterum Conciliorum institutis tam audacter & immaniter aberrarent; contendebant tamen, ut eorum tumultuariæ & inordinatæ Synodo idem ab Eugenio honor haberetur, quem Ephesinæ & Chalcedonensi, aliisque ad eorum normam exactis, veteres Pontifices detulerunt.

Ab his regulis & veterum Conciliorum exemplis, quæ tanta temeritate & audacia Basileenses violarunt, nonnisi ægerrime & invita discessit Quinta Synodus, ut quæ tantopere laboraverit, ut Vigilus qui Constantinopoli aderat, ad Synodum accederet, & coetui præsideret, ac primam de tribus Capitulis sententiam promeret, quam pro veterum Conciliorum more Synodus ipsa velut Petri oraculum complecteretur. At Pontifice renuente & ad hæc minime consentiente, negotium tamen urgente Justiniano Augusto, Synodus habita est. Verum nec ipsi, nec ejus decretis Synodi Oecumenicæ vis & auctoritas constitit, antequam illa aut suis ad Eutychium litteris, quas Petrus de Marca, aut Constituto, quod Stephanus Baluzius vulgarunt, Vigilus confirmasset. Qua de re hîc pauca addere libet ex laudati Præfatis de hoc argumento & illa Vigilii Epistola Dissertio-

tione (a): „Plane, inquit, si verum amamus, omni-
 „no fateri necesse est altas in mentibus hominum tunc
 „temporis egisse radices traditam a Majoribus senten-
 „tiam de summa Sedis Apostolicae auctoritate. Cum
 „enim de ceteris Synodis Oecumenicis ea reverentia
 „loqui soliti essent, Summi Pontifices, ipseque adeo
 „Vigilius in hoc Decreto, scilicet ut se eas suscipere,
 „amplecti, & devota mente venerari profiterentur,
 „utpote quae Sedis Apostolicae suffragio & universalis
 „Ecclesiae consensione firmatae essent: hanc Quintam
 „Synodum Vigilium ne quidem Synodi nomine coho-
 „nestat: nempe illa ratione motus, quod ejus celebra-
 „tioni, iis conditionibus quibus facta esset, consensum
 „non prae buisset. Deinde vero quod etsi vitium illius
 „ex postfacto dissimulasset, a Constituti sui promulga-
 „tione cessatum fuerat, ut monui. Quod vero ad rem
 „ipsam attinet, ipse sua auctoritate, suoque Decreto
 „tria Capitula damnat: quoscumque vero, qui jam
 „illa condemnauerunt (his verbis Synodum Constan-
 „tinopolitanam. significat) fidem a quatuor Synodis
 „praedicatam amplectentes, eos *fratres & Consecrato-*
 „*res esse* definit, id est, eos communioni suae adjungit,
 „eorumque sententiae robur illud impertitur, quod
 „ex consensione cum ipsius Decreto trahere debent.
 „Eandem sententiam superioribus epistolae verbis sic
 „expreserat: *Quae a nobis definiri debent, revelante*
 „*Domino, & investigata veritate, salubriter impleta*
 „*sunt*: quasi diceret, hanc quaestionem licet ab Epi-
 „scopis discussam in Synodo, & eorum suffragiis deci-
 „sam, Sedis Apostolicae Decreto esse peremptorie de-
 „si-

(a) Dissert. de Vigili Decreto &c. num. XIV.

„ finiendam . Unde hoc suum Decretum *ἡ ἀπόφασις*
 „ appellat , ad Principum exemplum . Itaque Graeci ,
 „ ne dubitari posset in posterum de Quintae Synodi au-
 „ thoritate , Decretum istud in acta retulerunt conti-
 „ nenter post definitionem Synodi &c. *Et infra nume-*
 „ *ro XVI.* Per istud Vigilii Decretum Quinta Synodus
 „ velut universalis admissa est , non solum in Oriente ,
 „ sed etiam in Occidente &c.

Quae quum ita se habeant , qua fronte & olim Ba-
 sileenses & etiamnum Adversarii , Decretis inconsulto
 Romano Pontifice & refragantibus ejus Legatis , Basi-
 leae conditis , Oecumenicam vindicare audebant vel au-
 dent auctoritatem ? Qua fronte Romanos Pontifices
 etiam invitos ac repugnantes suis subicere & adstringe-
 re decretis contendebant , quum ejusmodi decreta irrita
 essent , nisi eis Eugenius robur illud adjungeret , quod
 ex ejus saltem consensione & approbatione pendebat ?
 Qua denique fronte , Bossuetius Eugenium vellicat ;
 quod ob ademptam suis Legatis potestatem coactivam de
 Basileensibus quereretur ; perinde atque illae optimi
 Pontificis querelae eo tantum pertinerent , ut tota Syno-
 dus sub Legatorum potestate esset ; adeoque ut nulla jam
 Synodi libertas , imo nulla jam Synodus esse videretur ?
 An ergo nulla jam Synodus erat , quum Patres Ephesini
 ad ferendam contra Nestorium depositionis sententiam
 se se coactos Caelestini litteris profitebantur ? An nulla
 erat Chalcedone Synodus , quum Paschasius praecepta
 protulit S. Leonis ; quibus omnino parendum esset ; ne
 Dioscorus inter Episcopos federet , sed inter reos consti-
 tueretur ? Quum Synodum idem Paschasius transferen-
 dam edixit , si vel uno verbo a S. Leonis epistola in fidei
 formu-

formula discederetur? Quum denique Sedis Apostolicae Legati intercesserunt, ne quidquam in tanta Synodo absque Pontificis relatione constitueretur? Ludibria haec & commenta sunt: quae non miror Basileensibus in mentem venire potuisse; quibus scilicet summa inerat Ecclesiasticae Antiquitatis inscitia vel contemptus. Sed Bossuetium haec adprobare potuisse, quae veteres & Synodos & Pontifices, illas turpis conniventiae, hos vero tyrannidis arguunt; id certe mirandum est. Quanto rectius cogitassent, nullam omnino futuram Synodum, quae Romani Pontificis Legatos ea potestate instructos admittere recusaret, quam in praeteritis Synodis exercuissent? Quemadmodum, ut jam vidimus, & Synodum V. Vigilius ne Synodi quidem nomine cohonestavit.

ARTICULUS SECUNDUS.

Constantiensia, eisque connexa Basileensium Decreta, intercedentibus ac repugnantibus Sedis Apostolicae Legatis, in medium adlata aut edita sunt: quibus proinde vel ab initio nulla auctoritas constitit: neque convalescere potuerunt absque Pontificis approbatione, quam illis nunquam Eugenius adhibuit.

AD Synodum Basileensem nutu suo instauratam novos Eugenius direxerat Oratores, qui veterum Conciliorum more nomine suo coetui praecessent. Verum inquieti homines & rerum novarum cupidi *magnam*, ut ait Cardinalis Turrecremata (a), & *inaudita*

G g g tam

(a) Lib. III. de Eccles. cap. XXIII.

tam quaestionem commoverunt : num scilicet Sedis Apostolicae Legati admittendi essent ad praesidendum Concilio ? Non enim defuerunt, ut idem Auctor testatur, qui hanc eis praerogativam inviderent, ac debitam esse negarent. Alii vero admittendos eos quidem judicarunt *ad praesidentiam*, ut vocabant, *honorariam*, ut scilicet eminentiorem in Concilio locum tenerent, & primo in eo loquerentur, & quae agenda erant per interlocutionem dirigerent : sed iis tamen adjectis legibus & conditionibus, quibus Sedis Apostolicae auctoritas infringebatur & a veterum Conciliorum moribus & institutis (quae velut immotae constantisque regulae futuris omnibus Conciliis praeclucere debent) apertissime discedebatur ; ut nimirum Legatorum sententiae nulla vis & auctoritas inesset ; ut ipsis absentibus vel recusantibus, primus Praelatorum, quae communibus suffragiis decernerentur, Synodi nomine pronuntiaret ; ut sacramento adigerentur ad propugnanda tuendaque ea Synodi Constantiensis Decreta, quibus, eorum sententia, quorumcunque Conciliorum generalium sanctionibus etiam certi legitimique Pontifices subiciebantur.

Quamquam Eugenii Oratores delatam sibi iis conditionibus Synodi *excedisse* respuere debuissent ; attamen ne vix composito priore dissidio novas cicre turbas ac ferere lites viderentur, injurias sibi Sedique Apostolicae illatas dissimulare interim decreverunt (a) : praemissa tamen solenni protestatione, ne quidquid Sedis Apostolicae juribus ac dignitati haec eorum conniventia derogaret ; eaque etiam freti fiducia, eamque animo spem foventes, fore ut in Synodi progressu avita re-
tere

(a) Eugen. IV. in Commonit. ad suos Legat.

tere jura permitterentur. Quod vero ad sacramentum attinet de suscipiendis tuendisque Synodi Constantiensis decretis; illud *nominibus propriis*, ut in Actis legitur, *scilicet ut particulares personae*, quemadmodum Johannes Turrecremata eorum mentem interpretatur (a), *non autem ut Nuncii Apostolici*, praestiterunt. Imo, ut idem Auctor adjungit, hoc nomine *protestati sunt in contrarium*, *nec interesse voluerunt sessionibus*, in quibus talia concluderentur. Id vero luculentissimo argumento est, Eugenium, quum Synodum Basileensem suscepit, ejusque progressum ratum habuit, nequaquam Constantiensia decreta Sessionis V. hisque connexa priora Basileensia, suscepisse vel adprobasse. Si enim Eugenii Oratores ejusmodi Decreta Sedis Apostolicae auctoritate probata vel confirmata novissent, haud aegre tulissent, se se ad eorum defensionem jurejurando obstringi, neque ut illa confirmarentur, tanquam Sedis Apostolicae Legati intercessissent: uti reapse intercesserunt, quum de his decretis iterum sollenniter confirmandis in Sessione XVIII. disceptatum est.

Haud me latet, haec narranti Turrecrematae Meldensem Episcopum fidem haud obscure abrogare, inficili argumento ex Augustini Patricii hisce de rebus silentio (b): „Itaque haec, praesente Imperatore, Legatis annuentibus, solemnissimo ritu confecta sunt „ Sessione XVII. Secuta Sessione XVIII. sessionis quintae Constantiensis Decreta innovantur. Atque in his „ omnibus Augustinus Patricius, hujus aevi Auctor diligens Eugénianarum partium, nihil turbae refert,

G g g 2

„ cum

(a) Lib. II de Eccles. cap. C.

(b) Capite Quinto.

„ cum accurate soleat hujusmodi memorare. Itane vero? Te scilicet auctore, Patricio recentiori tacenti assentiar; Turrecrematae, qui Synodo aliquando interfuit, nullo modo prorsus assentiar? Non solus tamen Turrecremata, verum & ipse, ut jam vidimus, Eugenius Pontifex de Legatorum suorum, circa ea quae pertinent ad Sessionem XVII. contradictione & protestatione in suo saepe nobis laudato Commonitorio testatur. Eosdem vero a Sessione XVIII. quemadmodum idem Turrecremata memoriae prodidit, abfuisse, ne Sessionis V. Constantiensis Decretis tanquam Sedis Apostolicae Legati & Concilii Praesides robur addere viderentur, idem Pontifex in Libello Apologetico apud Odoricum Raynaldum (a) locupletissimus testis est. Sessione autem XVI. *nominibus propriis*, non autem velut Pontificis ad Synodum Oratores, sacramento se se obstrinxisse ad Constantiensium Decretorum tuitionem, praeter laudatos Eugenium IV. & Cardinalem Turrecrematam, ipsa etiam Acta testantur. Quod sine turbis & animorum contentione vix fieri potuit: neque id tamen Augustinus Patricius, hujus aevi Auctor diligens, litteris consignavit. Denique non modo Legatos, verum & alios Episcopos ac Doctores scientia & pietate conspicuos harumce sessionum Decretis, id quod etiam laudatus Turrecremata commemorat (b), refragatos esse, confirmari potest

(a) Ad an. 1434. num. 14.

(b) Multis Praelatis & Doctoribus in utroque Jure graduatis, sapientia & virtutibus clarissimis, non contentientibus edita sunt: quorum plures attendentes praedita Decreta adversa esse Sanctorum Patrum doctrinis, non modo in deputacionibus suis contradixerunt &

reclamaverunt; verum etiam in sessionibus ipsius Concilii, in quibus talia decreta ad furorem quorundam hostium Apostolicae Sedis cum multitudine populi parvi pretii & nullius auctoritatis publicata sunt, interesse noluerunt. *Lib. II. de Eccles. cap. C.*

potest ex litteris Regis Angliae ad Synodum Basileensem, in quibus vehementer queritur, quod suos Oratores sacramento adigere voluissent ad Constantiensium Decretorum tuitionem, & recusantes hoc se se iurejurando obstringere, adhuc illos suscipere renuissent. Subjungitque (a), vereri se, ne multorum & Principum & Praelatorum animi, ob ejusmodi exactionem juramenti, a Synodo alienentur, & quae credebatur fore universalis, ob paucitatem Praelatorum eo se transferentium, ad eam dignitatem non adsurgat. Profecto quantum ad ipsum pertinet, praemisera in iisdem litteris (b), se jam alios ex suis Regnis Oratores ad Synodum destinasse, sed eos apud se adhuc retinere ob varias causas, ac potissimum ob illud, quod saepe memoravimus, juramentum. Quibus omnino consona tradit & Cardinalis Turrecremata (c); scilicet non fuisse adhuc perfecte Syno-

(a) Non hoc modo . . . credimus eatenus prosperandum sacrum Basileense Concilium, ut optamus: neque talium inventis novitatum corda Regum vel Principum Concilio Basileae congregato conjunget, sed abscindet. Nam Praelatorum multitudinem illic non colliget, sed disperdet; ut formidari possit, quod reclamante notabili parte Nationum orbis tam in Principibus quam in Praelatis, non valentibus illic incorporari sine praestatione juramenti, praesens Basileense Concilium, apud nonnullos, ut sperabatur, universale (f. non) reputetur. Ap. Marten. Tom. IX. nov. Collect. pag. 724. &c.

(b) Quosdam Ambassiatores nostros Basileam destinavimus . . . praestolantes adventum aliorum Ambassiatorum nostrorum, quos de

utroque Regno nostro in numero concedenti decrevimus destinare. Quorum tamen certis rationabilibus de causis suspendimus ad tempus dispositam missionem; ea quidem inter alias &c. *Ibid.*

(c) Non fuerunt unanimitate universali conclusa: quia non expectata plene universali Ecclesia, nec integre Synodo congregata. Non enim expectatis plurium Regum & Principum Oratoribus, conclusa fuerunt: licet aliquos eorum noverint jam in via constitutos. Unde Basileenses cupidi renovare decreta sua, postquam D. Eugenius ad Principum preces revocaverat dissolutionem Concilii quam fecerat; timentes, Dominorum Castellae & Angliae Oratores, quos jam propinquos noverant, pro eorum sapientia & zelo ad fidem & Apostolicam

Synodum congregatam, nec plane Catholicam Ecclesiam repraesentasse; quum adhuc inter alios plurium Regum ac Principum Oratores deessent, quum Sessione XVIII. Constantiensia Decreta Basileenses innovarunt. Imo & eos de industria negotium accelerasse, ut ante adventum Oratorum Regum Castellae & Angliae, quos brevi adfuturos suspicabantur, ea sessio celebraretur, quoniam optime noverant, eos pro sua sapientia, & erga fidem & Sedem Apostolicam insigni pietate, Constantiensium Decretorum confirmationi minime consensuros. Ex quibus omnibus idem Cl. Auctor merito colligit, hifce Concilii Basileensis Sessionibus nec pondus nec robur inesse Oecumenicae auctoritatis. Quod nimirum non intervenerit consensus Apostolicae Sedis per suos Legatos; quod earum decretis Episcopi & Doctores scientia & pietate illustres repugnarint; denique quod de industria plurium potentissimorum Regum & Principum Oratorum adventum praevenerint, quod eos nossent suis Decretis similiter refragaturos. Quod sane de Oratoribus Regis Angliae constanti experimento compertum & exploratum habebant. Eos enim semper & in omnibus Synodi Actis Pontificis & Sedis Apostolicae, quantum in ipsis erat, dignitati & honori consuluisse, discimus ex ejusdem Pontificis litteris ad Henricum VI. Angliae Regem, quibus illi hac de re plurimum gratulatur, ac debitas refert grates (a): *Sicut a multis fide dignis accepti-*

licam Sedem, conclusionibus eorum non praestituros consensum, praestitaverunt ut ante adventum praefatorum DD. Oratorum innovatio fieret suorum Decretorum. Quod

factum est in Sessione XVIII. *Ubi sup.*

(a) Ap. Marten. ubi sup. column. 629.

pimus, Oratores tui, quos destinasti ad Concilium Basileense, semper in omnibus casibus qui acciderunt fideliter obsequentes voluntati tue, pro nostro & Romanæ Ecclesiæ statu, & honore tuo, laudabiliter se habuerunt, & egregiam operam fide & devotione tua dignam cum singulari prudentia præstiterunt Ceterum pro his, quæ tuo jussu & tuo nomine faciunt tui pro nobis & Ecclesiâ, proque multis aliis laude dignis operibus gratiamur Serenitati tuæ &c.

Quum igitur quæ repugnantibus & intercedentibus Sedis Apostolicæ nomine ipsius Legatis, in Conciliis Occumenicis decernuntur, nulla ipso jure & irrita sint, & pro nullis & irritis haberi debeant, nisi ea postmodum Pontifex rata habeat, & Apostolica auctoritate confirmet; videndum superest, quibus Meldenis Episcopus argumentis demonstrat, hæc, quæ pro Constantiensium Decretorum firmitate Basileæ post instauratam Synodum, refragantibus Sedis Apostolicæ Oratoribus, gesta sunt, rata Pontificem habuisse, eaque propterea Apostolica auctoritate convaluisse. Primo ergo ac secundo loco geminum Eugenii IV. Decretum profert, quorum altero, quod incipit, *Salvatoris*; Sessionis Basileensis XXV. Decretum, *Hæc sacrosancta Synodus*, ut legitimi Concilii verum ac legitimum decretum firmat, ac Florentiam vel Utinum, locum habendæ futuri Synodi ex eodem Decreto designat. Altero vero, quod incipit, *Doctores gentium*, Concilium Basileense Ferrariam transfert, idemque Sessionis XXV. Decretum laudat, quo ipsa translatio innititur. Ergo Basileensibus gestis ad XXV. Sessionem innititur, nedum ex dicto improbarit. Quo etiam refert Decretum Sessionis I. habi-

bitae Ferrariae anno 1438. ante adventum Graecorum, quo constitutum est, Synodum Ferrariensem Basileensis continuationem ac prosecutionem esse. Igitur adeo, inquit, non improbat anteriora Basileensia Decreta, ut eis innitatur, & ea continuet.

At quis merito non contemnat tam futillis argumenti vanitatem? An ergo quoniam Eugenius adprobavit confirmavitque electionem loci, quem & ipse antea futurae Synodo habendae designaverat, & ad quem eligendum meliorem ac saniores Patrum Basileensium partem toto studio & conatu ipsius Eugenii Oratores impulerant; ideo censendus est, & ea Basileensium Decreta confirmasse aut rata habuisse, quae certissimum est & ei semper invisa fuisse, ac ne rursus in medium adducerentur, ipsius Legatos Sedis Apostolicae nomine intercessisse? Sane in eo Decreto, quod incipit, *Doctores Gentium*, Avenionis electionem, in quam iidem factioni conspirabant, qui & aliorum contra Pontificiam auctoritatem decretorum auctores erant, irritam ipso jure futuram adfirmat, ob Legatorum Sedis Apostolicae aliorumque ex ipsa Synodo illustrium Virorum contradictionem: *Spretis adhortationibus nostris, Avenionis civitatis electionem IPSO JURE NULLAM decretare tentarunt, Legatis & Praesidentibus nostris, & aliis plurimis & gravibus religiosisque personis renitentibus, atque ad novam loci alterius electionem procedendum esse decernentibus*. Quum ergo & Constantiensia, iisque connexa Basileensium Decreta, renitentibus Legatis & Praesidentibus Apostolicis, necnon aliis plurimis gravibus religiosisque personis, quemadmodum jam ostendimus, in medium adlata constitutaque sint; dubium non est.

est, quin ex Eugenii mente quidquid in hac parte gestum per Synodum & sancitum est, nullum ipso jure & irritum fuerit; ac proinde ea Decreta nequaquam ab eo spectata fuisse tanquam legitimae Synodi ratas legitimasque sanctiones.

Quarto loco profert Meldenfis Episcopus „ Eugenii praesentis in Synodo Ferrariensi Decretum, sacro „ approbante Concilio, editum, quo signanter declarat, „ gesta Concilii a die translationis nullius esse roboris: „ Ergo nec ipse Pontifex anteriora gesta rescissa esse voluit. Cur autem Basileensis haec posteriora rejiceret, „ hanc causam affert: *Nos igitur attendentes excessus „ eorum adeo notorios, ut non possint aliqua tergiversatione celari, quodque error, cui non resistitur, approbari videtur, & latum pandit delinquentibus iter, is qui eorum conatibus non resistit &c.* Atqui „ haud minus notoria erant, quae pro Constantiensibus „ Decretis Basileenses gesserant; ante dissolutionem „ quidem Sessione II. post instauratam vero Synodum „ Sessione maxime XVI. & XVIII. Ergo si Eugenius ea „ improbanda censuisset, & tamen conticesceret, veritatem prodidisset: conticuit autem; non ergo improbanda censuit. Ex his omnibus liquet, Basileensibus „ gestis detractam auctoritatem, eis quidem praecise, „ quae post translationem facta sint, anterioribus vero „ minime; atque ea, non quidem jam Basileae, sed Ferrariac continuata esse. Quare anteriora Basileensis „ Decreta, quibus Constantiensia confirmantur, repugnante nemine, imo tota Ecclesia iis Decretis nisi „ plena auctoritate constant. Itane vero? Eriamne illa, quibus Sess. XXI. & XXIII. de Annatis, deque Electio-

nibus, atque aliis disciplinam spectantibus, tot ac tanta statuta sunt? „Respondemus, *inquit*; Quae ad dogma „ Ecclesiasticum pertinent, magno discrimine distinguen- „ guenda esse ab iis, quae ad disciplinam. Haec a Con- „ ciliis quoque Oecumenicis facta variis de causis, con- „ sentiente Ecclesia, mutari possunt. Illa immota & „ perpetua esse constat. Cum ergo Decreta, quibus „ Basileenses Sessionis V. Acta Constantiensia repetunt „ & inculcant, ad dogma pertineant, neque ea unquam „ Eugenius Edicto edito reprehenderit, imo ut Oecume- „ nicae verae legitimae Synodi decreta agnoverit, non „ est cur de eorum autoritate dubitemus. Quae inte- „ gra exscribere & exhibere libuit, quod omnem fidem su- „ perare videatur, Decreta, quae statim atque edita sunt, „ toties tantoque animi aestu & contentione Eugenius im- „ probavit, repudiavit, rejecit, obtrudi potuisse tanquam „ Decreta, quae velut ab Oecumenica, vera legitimaque „ Synodo profecta idem Pontifex agnoverit ac probavit.

Nos ergo primo non quaerimus, utrum decreta, quae ad disciplinam spectent, & a Conciliis Oecumenicis facta aut probata sint, variis de causis, consentiente Ecclesia, mutari possint: sed quaerimus, utrum Decreta Synodi Basileensis de Annatis, de Electionibus, de Indulgentiis &c. quibus, praeter unum Julianum Cardinalem, Sedis Apostolicae Legati vehementissime restiterunt, adversus quae palam & sollemniter reclamarunt & protestati sunt, & quae constat Eugenii animum offendisse, & ab eo rejecta & improbata fuisse, pro Decretis haberi debeant, quae velut a legitima Synodo profecta susceperit ac probaverit; propterea quod Synodo Ferrariam translata, eis praecise specialibus litteris auctoritatem

tem detraxerit, quae post translationem a Basileensibus gesta sint?

Quaerimus etiam, an eadem de Annatis, de Electionibus, de Indulgentiis Synodi Basileensis decreta inter ea recenseri debeant, quae silentio Eugenius dissimularit, adeoque non improbanda censuerit? Quidquid enim Adversarius responderit, clare ac manifeste perspiciet argumenti sui ac petitionis absurditatem. Nam quis non illum exhibebat, si responderit, ad ea de Annatis, de Electionibus, de Indulgentiis decreta Eugenium conticuisse, eaque propterea non improbanda duxisse, imo & silentio comprobasse? Conticuitne, aut haec decreta silentio comprobavit, qui ob sublatas Annatas, & concessas Indulgentias, tot Epistolis de Basileensibus exposulavit? Conticuit, qui speciales Oratores, Antonium Caussarum Auditorem & Ambrosium Camaldulensium Praepositum generalem Basileam & ad Imperatorem direxit, quo Decretum de Annatis, ipso quidem jure nullum, pacis tamen studio, vel ab ipsa Synodo rescinderetur, vel aliunde debita Sedi Apostolicae provisio fieret? Conticuit, qui ex Cardinalium consilio ad Reges & Principes decrevit Internuntios, qui haec & alia a factiosis Basileensibus perperam gesta in omnium gentium oculis constituerent? Quod si Adversarium haec dicere & jactare pudeat; quid fiet huic argumento? „Haud minus notoria erant, quae pro Constantiensibus Decretis Basileenses gesserant. Ergo si Eugenius ea improbanda esse censuisset, & tamen conticercet, veritatem prodidisset: Conticuit autem: „(ac Decreto quod Ferrariae edidit, iis praecise, quae post translationem facta sint, Basileensibus Gestis au-

H h h 2

„ Ro-

„ auctoritatem detraxit) non ergo improbanda censuit . Quid , inquam , huic argumento fiet , si in hunc modum instauretur ? Non minus notoria erant , quae circa Annatas , Reservationes , Electiones , Indulgentias &c. Basileenses gesserant . Ergo si Eugenius ea improbanda esse censuisset , & tamen conticesceret , veritatem prodidisset : Conticuit autem , atque eo Decreto , quod Ferrariae edidit , iis praecise Basileensibus Gestis , quae post translationem facta sint , auctoritatem detraxit : Non ergo improbanda censuit . At certa & explorata res est ; cum illa circa Annatas &c. Basileensium gesta , tum Constantiensium Decretorum confirmationem vehementissime improbasse (a) , perinde atque iis Decretis si semel ad certos etiam legitimosque Pontifices referantur , potestas Apostolorum Principi Romanisque Pontificibus ab ipso Ecclesiae Institute adtributa in manu multitudinis constituatur . Qua ergo fronte quis audeat , ejusmodi Gesta vel Decreta , propterea quod de illis tacuit in decreto Ferrariae promulgato , velut ab Eugenio adprobata venditare ? An autem ea postmodum in Florentina Synodo *expresse* , ut ait Bossuetius , adproba-verit , Cap. seq. videbimus .



A R-

(a) Vid. supra cap. VI.

ARTICULUS TERTIUS.

*Eugenius IV. quod initio voluerat, Synodum
Ferrariam transferendo, reapse pervicit ob-
tinuitque: Illustrior autem Basileensium
portio Synodi translationi consen-
tiendo, priora Gesta facto ipso
reprobavit.*

NEc illud omnino praetereundum, ne forte & no-
strum silentium ab Adversariis pro adprobatione
habeatur, haud jure sibi sumere Boffuetium, decretum
Eugenii pro Synodi translatione Basileensium decreto
inniti. Quamquam enim antequam Synodum Ferrariam
transferret, speciales Basileam Oratores direxerit, qui
de illa in Italiam transferenda consensum Patrum elice-
rent; falsum tamen est, quod ipsa translatio Decreti Ba-
sileensium auctoritate peracta sit; perinde atque Euge-
nius Decretum illud confirmando, suum dumtaxat ad-
sensum accommodarit. Quo sensu Boffuetius alique in-
terpretari solent etiam in Litteris Apostolicis confirma-
tionis nomen; ut scilicet nihil sit aliud Decretorum Sy-
nodalium per Sedem Apostolicam confirmatio, quam
testificatio unitatis, vel declaratio consensus, qui illis a
Pontifice adhibeatur; ac proinde nihil sit vanius (a),
quam confirmationis vocem ad argumentum superioris
potestatis pertrahere. At non eo sensu Eugenius Basi-
leensium de Synodi translatione Decretum confirmavit;
sed ita ut eam ipse quamvis praevio illorum consensu,
sua

(a) Vid. inf. lib. XIII. cap. II. & sup. lib. IX. cap. XXVIII.

sua auctoritate transitivile videatur, ac reapse transstulerit. Quod melius probari non potest, quam verba ipsa adferendo ex quatuor illis Decretis, ad quae & Bossuetius in praesenti capite provocat.

Primum ergo prodeat Decretalis, quae incipit, *Salvatoris*; in ea Graccorum Oratores, qui Basilea Bononiam accefferant, Pontifici supplices exhibentur, ut Decretum, *Sacrofancta Synodus*, & electionem Florentiae, vel Utini, aut alterius Italicae civitatis pro celebranda Synodo Oecumenica a Basileensibus factam, probare & confirmare dignetur. Quorum votis ac petitionibus Eugenius annuens, ex consilio & assensu Purpuratorum Patrum, *electionem*, inquit, *Florentiae vel Utini, aut alterius loci pro celebratione Oecumenici Catholici Concilii, ut in Decreto continetur, acceptamus, ac etiam confirmamus*. Quibus verbis confirmationem a simplici acceptatione vel adprobatione distinxit. Hanc porro, idest acceptationem vel adprobationem dedit, non tanquam decretis Concilii subditus, sed tanquam superior ac Princeps, qui libere subditorum votis ac petitionibus annuat.

Secundo, non minus clare ac luculenter elucet ea Romanorum Pontificum a Conciliorum Decretis libera & absoluta potestas in altero Decreto, quod incipit, *Doctoris gentium*; ubi quamquam in rerum ad illam usque diem gestarum narratione commemoret Pontifex laudatum Decretum, *Haec Sacrosancta*, Sessione XXV. Basileensi editum; quum tamen Concilium Ferrariam transferendum edicit, non Synodi auctoritate, sed sua nititur: *Tenore*, inquit, *praesentium, auctoritate Apostolica, & ex certa scientia, & ex plenitudine potestatis,*

tis, civitatem Ferrariensem pro loco dicti Concilii transferendi nominamus, assignamus, ac etiam deputamus Et ex nunc transferimus, & translatum fuisse & esse declaramus.

Tertio, his omnino consonum est decretum Sessionis primae Ferrariae habitae ante adventum Graecorum, quo & superiores Eugenii litterae laudantur & recensentur, & in Acta ad perpetuam rei memoriam eas relatas fuisse narratur; tum Synodus ipsa, haud alterius quam Eugenii auctoritate, dicitur Ferrariae legitime congregata: *Sancta universalis Synodus per Dei gratiam, auctoritante beatissimo D. Eugenio Papa IV. in hac civitate Ferrariae in Spiritu Sancto legitime congregata*. Porro Basileensem Synodum tacite sugillans ac reprehendens; quae ab illa Petra dissiliens, supra quam Christus aedificavit Ecclesiam, illique renuens tanquam fundamento inhaerere, nulla stabilitate subnixa, & in varias discissas factiones, Synodi formam, quae pax est & unitas spiritus, jam amisserat; contra Ferrariensis Synodus; sollicita servare unitatem spiritus in vinculo pacis, ut simus, inquit, unum corpus, & unus spiritus, iis se Christi verbis tanquam firmissimo fundamento inhaerere in hoc ipso sessionis primae Decreto professi est; quibus Apostolorum Principem adloquens ait: *Tu es Petrus &c.* En ipsa Synodi verba: *Sancta universalis Synodus &c. illius inhaerens firmissimo fundamento, qui Apostolorum Principi dixit: Tu es Petrus, & super hanc petram aedificabo Ecclesiam meam: sollicita servare unitatem spiritus in vinculo pacis, ut simus unum corpus, & unus spiritus &c.* Quibus verbis haud obscure significat, fieri non posse ut Synodus Oecumenica unitatem ser-

fervet, adeoque ut firma consistat, nisi Romani Pontificis auctoritati, qui centrum est Ecclesiasticae unitatis, tanquam fundamento innitatur.

Quarto in medium adducimus Eugenii praesentis in Synodo Ferrariensi decretum, sacro approbante Concilio editum, quo non modo declarat, gesta Basileensis Concilii a die translationis nullius esse roboris; verum & eam translationem sua fuisse auctoritate peractam. Itaque, quemadmodum Romani Pontificis est Occumenicam Synodum congregare, ita & illam de loco in locum transferre. Quo referri possunt, quae idem Eugenius scripsit ad Marcum Archiepiscopum Tarantisiensem unum ex suis ad Graecorum Imperatorem Legatis, quum accepisset, & Refractorios Basileenses suos Constantinopolim Oratores direxisse, qui Graecos ad locum perducerent per ipsos Basileenses pro celebranda Synodo designandum, sive quo ipsi Synodum translaturi erant. Ait enim (a), hanc eorum molitionem in everisionem tendere privilegiorum & auctoritatis Apostolicae Sedis: *ad quam solum*, inquit, *universalium Conciliorum convocatio pertinet; ita quod sine Romani Pontificis expresso consensu quaecunque congregatio nec Concilium facere, nec auctoritatem habere, manifestum sit*. Quum ergo in Synodi translatione Romani Pontificis auctoritas emicuerit, imo quum ipse Synodum sua solum auctoritate transtulerit; palam est, Eugenium id tandem pervicisse, quod ab initio contenderat; nimirum ad solius Romani Pontificis potestatem pertinere, ut Synodum convocare, ita & congregatam de una in aliam civitatem transferre.

Quod

(a) Ap. Raynald. ad an. 1437, num. 14.

Quod ut etiam efficacius ac luculentius demonstretur, recolendum est ac memoria repetendum, Synodum Basileensem adversus Eugenium in primo diffidio decrevisse, *Concilium ipsum per neminem, etiamsi Papalis fuerit dignitatis, sine consensu duarum partium Concilii, dissolvi, aut de loco ad locum mutari posse*. Id Sessione XL decretum est; observatque Bossuetius (a), quod „sic Concilium suam in Pontificem potestatem „ non modo explicabat decretis, sed etiam re ipsa exercebat. Sessione autem XXV. ut idem Meldenensis Episcopus capite superiore memoriae prodidit, in duas itum est sententias. Patrum pars maxima locum habendae Synodi Avenionem designabat. Pauciores „ cum Legatis decretum edidere Synodi nomine de ipsa „ Synodo Florentiam vel Utinum transferenda. Hinc plura sunt observanda.

Primum est, Decretum illud Sessione XL promulgatum, de non transferenda Synodo etiam per Romanum Pontificem sine consensu duarum partium ipsius Concilii, unum ex iis esse, quae *sacrosancta generalis Synodus Basileensis* (ut se illa inscribebat) *in Spiritu Sancto legitime congregata, universalem Ecclesiam representans, ad perpetuam rei memoriam*, tanquam Constantiensibus Decretis innixa, sancivit: adeoque & ex eorum decretorum numero esse, quae Eugenius quum Synodo adhaesit, *expresse*, si Bossuetio credimus, & pure ac simpliciter approbavit.

Secundum est, Eugenium hoc tam folle Synodi Basileensis Decretum auctoritate decretisque suis, quibus Synodum ipsam Ferrariam transtulit, irritasse. Non

(a) Sup. cap. I. pag. 67.

modo enim huic translationi defuit duarum partium consensus; verum, ut ipse Bossuetius fatetur, *Patrum pars maxima* repugnavit, pauciores consenserunt. Nec refert, quod inter pauciores Legati Sedis Apostolicae recensentur. Quum enim ex Basileensium sententia sine potestate & jurisdictione, ut vocant, coactiva Synodo praesiderent, eorum suffragium non ponderabatur; sed una cum aliis numerabatur. Itaque Eugenius sine consensu duarum partium, imo Patrum maxima parte resistente, & paucioribus suffragantibus, Synodum Basileensem Ferrariam transtulit, contra atque per ipsam Synodum sollemniter constitutum fuerat. Sic ergo Pontifex (ut Meldensi Episcopo sua reddam verba) suam in Concilium potestatem non modo explicabat decretis, sed etiam re ipsa exercebat.

Tertium est, Patrum Basileensium si non maximam, saltem optimam partem, eorum scilicet, qui doctrina, prudentia, aequitate & auctoritate praeestabant, illud ipsum, de quo nunc agimus, solenne totius Concilii Decretum de Synodo non transferenda sine consensu duarum partium, nihil moratam esse: quum ea quae numero praeestabat in aliam abeunte sententiam, ipsa ad votum Pontificis, Legatisque Sedis Apostolicae prae-euntibus, Florentiam vel Urinum pro loco futurae Synodi designarit, & Eugenio Ferrariam Synodum transferenti obtemperarit. Nec est quod respondeas, merito his indignum facinus visum esse, quod quum ipse Graecorum Imperator ac totus Oriens patriam ultro relinquerent, contraria factio iis excipiendis ne in vicinam quidem Italiam movere se vellet, & Avenionem anteferreret procul a Gracis dissitam, cujus nulla mentio in patris

Eis facta esset : non est, i. quam, cur ita respondendum existimies ; inde enim statim efficitur ; temere ergo Basileenses vel ab initio decrevisse, quod sine consensu duarum partium, ne quidem Romani Pontificis auctoritate, Synodus alio transferri posset. Hinc enim novo experimento constat, majorem Synodi partem, dum Romani Pontificis monitis non obtemperat, praevaricari posse, & pessime Ecclesiae rebus & communi bono atque utilitati consulere. Temere etiam iidem Basileenses jactabant, quidquid ab eis sollemniter decernebatur, Spiritu Sancto auctore decerni. Non enim profecto Spiritus Sanctus illius decreti auctor haberi potest, quod paullo post eodem auctore Spiritu Sancto violandum erat, ejusque iniquitas detegenda. Hinc ergo adversus illam quam jactant summam & indeficientem generallium Conciliorum auctoritatem tale conficitur argumentum. Ideo Basileenses ad Synodum jure ac legitime transferendam duarum partium consensum requirebant, aut sufficere existimabant, quoniam in duabus partibus totius Concilii auctoritatem residere judicabant, adeoque & summam illam inesse Ecclesiae Catholicae potestatem, cui parere Pontifex teneatur, & quae in summis Ecclesiae negotiis a Spiritu Sancto regatur, nec deficere possit : Atqui optima Concilii pars decretum majoris partis velut improbum & Ecclesiae noxium rejecit & improbavit, statuitque Synodum esse in Italiam transferendam, quamquam major numerus repugnaret : Ergo illustrior Basileensium portio, translationi ad votum Pontificis consentiendo, priora Gesta damnavit ; agnovitque, fuisse olim tota Synodi auctoritate factum decretum, quod Ecclesiae noxium & perniciosum esset ;

quamquam & hoc ex eorum numero haberetur, quod cum Constantiensibus connexum esset, eisque inniteretur.

CAPUT IX.

„ Decretalis, *Moyse*, in Synodo Florentina
 „ edita, priora Basileensia & Constantiensia
 „ Decreta firmat.

Illustrissimus Adversarius sub finem Capitis superioris hanc veluti thesim in praesenti capite demonstrandam proposuit: *Quod in Synodo Florentina, auctore Eugenio, Constantiensia Decreta (atque his connexa priora Basileensia) expresse approbata sunt. Quae illius thesis, quin statim prudentibus Lectoribus mirabilis videatur, nulli dubitamus. Ut vero illius absurditas magis comperta sit, hanc ei thesim objicimus: In Synodo Florentina, auctore Eugenio, Constantiensia Decreta, atque his connexa Basileensis, quod ad substantiam dogmatis pertinet, expresse damnata sunt. Cur addiderim; Quod ad substantiam dogmatis pertinet; postea declarabo. Quum vero & nostra & Adversarii thesis eodem Eugenii Decretali innitantur, uno eodemque opere & nostram stabilire, & quae ab Illustrissimo Auctore pro sua confirmanda in medium adlata sunt, confutare aggredimur.*

ARTICULUS UNICUS.

*Eugenius IV. in Synodo Florentina non modo
Constantiensia Decreta non adprobavit,
verum & ea, quod ad substantiam
dogmatis pertinet, expresse
damnavit.*

Qui Basileae post Synodi translationem substiterant perduelles, auctore Cardinale Arelatenfi; qui in eo Latrocinio Dioscorum agebat, tres sequentes Propositiones veluti totidem fidei Catholicae veritates Christiano orbi credendas & profitendas obtrudere, minime dubitarunt; quo nimirum & Eugenius haereticus ab eis declararetur, sibi que viam ipsi muni-
rent ad eum Pontificatu dejiciendum.

Prima, Basileensium iudicio, *Catholicae fidei veritas est, sacrum generale Concilium supra Papam & alium quemvis potestatem habere.*

Secunda, *Generale Concilium legitime congregatum sine ipsius consensu nec dissolvere, nec transferre, nec prorogare ad tempus, ex auctoritate sua potest Romanus Pontifex.*

Tertia, *Qui pertinaciter his veritatibus se opponit; haereticus est censendus.* Quod autem Eugenius Pontifex tres hasce propositiones negaret, Sessione XXXIV. haereticus declaratus, & loco motus est anno 1439.

„ Adversus Decreta illa Basileensia Sessionis XXXIV.
„ inquit Bossuetius, Eugenius in Synodo Florentina
„ edidit Decretum, *Moyse*: ubi bis terque repetitur,
„ Syno-

» Synodum Basileensem condemnandam, ejusque Decreta esse irrita; sed ea, quae a die translationis facta sint: Ergo cetera Basileae, etiam post reconciliatam gratiam per biennium acta, ut verae, orthodoxae ac legitime continuatae Synodi acta habebantur: Atqui eo tempore Constantiensia Sessionis V. Decreta innovata: Ergo Decretum de ea innovatione factum, nulla est autoritate rescissum, manetque integrum, ipsaque adeo Constantiensia Decreta firma & inconcussa stant.

Hisne argumentis probare audes, Constantiensia Decreta, hisque connexa Basileensia, in Synodo Florentina, auctore Eugenio, expresse fuisse adprobata? Quod nempe quae ante Synodi translationem *Basileae, etiam post reconciliatam gratiam, per biennium gesta sunt, ut verae, orthodoxae, ac legitime continuatae Synodi Acta habebantur*. Praeter ea, quae ad Caput praecedens Articulo secundo hac de re disseruimus, non pigebit hic Lectori exhibere, quae in hac ipsa Decretali, *Morse*, de eisdem Basileensibus Actis Eugenius profert, ut hinc facile omnes dijudicent; Utrum ea Pontifex tanquam verae, orthodoxae, ac legitime continuatae Synodi Acta probaverit. Sunt quidem illa Eugenii verba paullo prolixiora, sed ea tamen integra hic exhibere operae pretium existimamus, ne Adversarii querantur, quidquam a nobis detractum eorum, quae ad illorum Basileensium Gestorum commendandam auctoritatem pertinerent: *Quam*, inquit, *Basileensem* (apertae perduellionis & schismatis) *impietatem dudum praevidere caepimus: quandoquidem illud tunc Basileense Concilium intuebamur jam in tyrannidem prolabi, dum multi etiam in-*

inferioris gradus ad illud veniendum standumque pro libitu factionis Auctorum cogerentur; dum nonnullorum vota & judicia diversis artibus extorquerentur; dum conspirationibus, conjurationibus, monopolis & conventiculis pene omnia cederent, & pro ambitione Papatus diuturna protractio ipsius Concilii quaerebatur. Ubi denique innumerae novitates, inordinationes, deformitates, & quasi infinita patrabantur mala, ad quod etiam Laici & Clerici infra sacros Ordines constituti, ignorantes, inexperti, vagi, dyscoli, profugi, Apostatae, de criminibus condemnati, & de carceribus fugientes, nobis & suis superioribus rebelles, & reliqua istiusmodi hominum monstra concurrerent, qui & ab ipsis scelerum magistris in omnem corruptionis labem facile traherentur. Haec Eugenii verba ad illa Basileensium Acta pertinere, quae ante Synodi translationem gesta sunt, quaeque adeo Bossuetius tanquam verae, orthodoxae & legitime continuatae Synodi acta, ab Eugenio & Florentina Synodo probata obtrudere vellet, ex eo compertum est, quod statim subiungit; nempe quod ut tantis malis occurreret, Basilea Synodum abduxerat, ac Ferrariam transtulerat. Translationem ergo praecesserant ea mala, quae Pontifici incitamento fuerant ad Synodum transferendam. Haec porro non fuisse ab Eugenio ad libitum exaggerata, patet ex litteris ab Ambrosio Camaldulensi ad Eugenium ipsum conscriptis post vulgatum a seditiosis & perduellibus nefarium illud, ut vocat, & plenum dedecoris adversus optimum Pontificem monitorium. Equidem P. S. nunquam aliud fore existimavi, ex quo gustum coepi seditiosae factionis, scissuramque jam tunc futuram praevidi, & iniqua-

mo-

molimina & deprehendi & saepe argui: Quid enim aliud quam scandalum sperari posset ex malignantium illo conventu, ubi omnia pro voluntate gerunt, nullo Dei timore praevio, nullo casto zelo comitante, sed perturbationibus solis dominantibus ac dictantibus omnia? Haec Vir Cl. doctrina ac pietate conspicuus, qui Basileam Pontificis Orator accesserat, Patribus Eugenii nomine suafurus, ut iniquum de Annatis decretum revocarent. Qui profecto quum coetum illum jam tum pro seditiosa factione & conventu malignantium, ubi nullus Dei timor, sed solae perturbationes depravatique animi affectus dominarentur, habuerit; quae inde decreta prodierant, habere non potuit ut verae & legitimae Synodi Acta; hoc est velut Acta & Decreta Synodi, quae in Spiritu Sancto & in Christi nomine legitime conveniret.

Pergit Illustrissimus Adversarius: „Id vero clarius
 „ apparebit, (nempe Decreta Constantiensia & priora
 Basileensia fuisse ab Eugenio & Florentina Synodo expresse adprobata) „ si notas & qualificationes quas vo-
 „ cant tribus veritatibus Basileensibus adhibitae consi-
 „ deremus. Igitur tres illae Basileenses veritates ipsi De-
 „ cretali insertae atque his verbis damnatae sunt: *Ipsas
 propositiones superius descriptas, juxta praxim ipsorum
 Basileensium intellectum, quem facta demonstrant,
 veluti sacrosanctae Scripturae, & sanctorum Patrum,
 & ipsius Constantiensis Concilii sensui contrarium . . .*
 sacro approbante Concilio, Florentino scilicet, damna-
 mus, reprobamus, ac damnatas & reprobatas nuntia-
 mus. „ Ubi sunt, subjungit Illustrissimus Auctor, qui
 „ nobis Concilium Florentinum objiciunt? Audiant in
 „ Concilio Florentino Propositiones Basileenses non
 „ abso-

„ absolute damnatas, sed ad pravam eorum intellectum;
 „ quem autem intellectum? Nempe eum, quem facta
 „ demonstrant; nempe quod Synodum nulla causa,
 „ etiam maxima, & ad pacem Ecclesiae maxime facien-
 „ te, transferri non posse, idque ad fidem Catholicam
 „ pertinere dicerent. Eo ergo tantum respectu Basileen-
 „ ses propositiones damnat Eugenius.

Quae hîc Bossuetius observat, non pertinent nisi ad secundam Basileensium propositionem. Quid ergo de prima Propositione dicendum? *Veritas de potestate Concilii generalis &c. supra Papam declarata per Constantiense, & hoc Basileense generalia Concilia, est veritas fidei Catholicae.* Nihil hîc de translatione Synodi generalis cum causa, vel sine causa; sed solum decernitur, fidei Catholicae veritatem esse, quod Synodus Constantiensis, eique ut ipsa jactabat, inherens Basileensis, definierant de potestate Concilii Oecumenici supra Papam. Sed & in secunda Propositione nihil aliud statuitur, quam quod reapse fuerat in Sessione XI. ab eadem Synodo constitutum, *quod Papa Concilium generale &c. sine ejus consensu nullatenus auctoritative potest dissolvere, aut ad aliud tempus prorogare, aut de loco ad locum transferre.* Idque solum additur ad illius sessionis Decretum, quod haec pariter Catholicae fidei veritas est. Nihil hîc similiter de causa etiam maxima, & ad pacem Ecclesiae maxime faciente; qua etiam interveniente, Synodum Pontifex transferre non possit. Non hoc certe Basileenses volebant; sed hoc tantum, (& hoc quidem aliis ipsorum doctrinae capitibus consentaneae) ex Synodi ipsius judicio pendere, utrum sufficiens & legitima causa interveniat Synodum transferendi. Quis

Kkk

porro

porro sit pravus ille Basileensium sensus, quem in hisce Propositionibus Pontifex damnat, paullo post inquireremus.

Deinde quaerit Bossuetius, *qua nota*, Eugenius ejusmodi Propositiones afficiat. „Nempe, inquit, eas
 „ damnat, ut quae essent contrariae Concilii Constantiensis sensui. En qualificatio, qua ipsa auctoritas decreti constet ex iis rebus repetita, quae ipsae in Ecclesia summae sunt auctoritatis, Scriptura, Patribus, Concilii Constantiensis Dogmatibus. Qui enim Basilensia Decreta Constantiensibus adversa damnat, is profecto Constantiensium investigandum sensum; auctoritatem vero certam & indubitatam esse definit.
 „ Quid ergo certius, quam id, cui adversari, certa damnatio est? Vel quid magis ad Concilii auctoritatem facit, quam ejus Decreta Scripturis & Patribus conjuncta proferri ut certam fidei normam?

Quanti haec valeant, mox expendemus. Interim observamus, Constantiensis quidem Synodi aliquam a Pontifice haberi rationem, nullam vero Basileensis: atque cum quidem sollicitum esse, ut pravi sensus suspicionem a Constantiensibus Patribus submoveat, secus autem a Basileensibus, etiam in eorum prioribus Gestis. Quod argumento est, aliquo apud eum loco fuisse Synodi Constantiensis etiam priores sessiones, quamquam ea nondum, ex illius sententia, ut mox videbimus, Oecumenica auctoritate polleret; nullo vero pretio & auctoritate fuisse quaecunque Basileensium Gesta, quamquam ab Adversariis sollemniter ab ipso Pontifice approbata ferantur.

„ Et quidem, *inquit*, de Basileensibus Synodum post
 „ trans-

„ translationem continuantibus, haec praemiserat: *In hoc perniciosissimi dum suam malignitatem sub veritatis fidei fucō colorant, Constantiense Concilium in malum ac reprobū sensum, & a sana doctrina prorsus alienum pertrahunt, ceterorum schismaticorum & haereticorum falsam doctrinam sequentes, qui confictos errores & impia dogmata, ex Divinis Scripturis & Sanctis Patribus perversē intellectis, semper sibi adstruere moliantur.* Ex quibus Bossuetius has elicit consecutiones.

„ Sunt ergo Decreta Constantiensia non de quibus Catholicī dubitent, sed quae haeretici & schismatici pervertant, ut sacram Scripturam, ut sanctos Patres.

„ Summo ergo honori ac venerationi habenda. Quae porro Decreta, nisi ea, quibus Basileenses usque erant, hoc est, Sessionis V. decreta? Ergo ea Decreta certa & immota: de quorum auctoritate, tot jam Pontificiis & Conciliaribus Decretis aperte approbantibus, nonnisi temere, ne quid dicam gravius, dubitari possit.

Quid quaeso ex Eugenii verbis eas elicias consecutiones, quas ab illius mente alienas esse, & ipse disertis verbis pronuntiat, & tu optime noris? Itane Lectorum simplicitati illudendum est, aut eorum patientia & otio abutendum? Praemiserat Eugenius, Constantiensia illa Decreta *per unam tantum ex tribus Obedientiis post recessum Johannis XXIII. sic in eadem Obedientia nuncupati, schismate tunc vigente*, edita fuisse. Quae certe non alio pertinere quisquam facile intelligit, quam ut eis Occumenicam detrahat auctoritatem. Idque etiam in sua ad hoc decretum Responsione Basileenses intellexerunt. Quis ergo ferat, Illustrissimum Adversarium ex

Eugenii verbis tales elicere consecutiones, quas a sua mente penitus fuisse alienas, tam disertis ipse verbis testatus est? Nempe Constantiensia Decreta eodem loco habenda esse atque Scripturam & sanctos Patres; summo item honori ac venerationi habenda esse: talia esse, de quibus Catholici non dubitent; denique certa illa esse & immota, de quibus nonnisi temere, ne quid etiam dicatur gravius, dubitetur. Apage ludibria! Sed nondum commentorum finis.

Postquam enim quem modo ex Eugenii Decretali exscripsimus locum adtulisset, quaerit Meldensis Episcopus: „ An ergo propterea Constantiensibus Decretis „ detrahit auctoritatem, qui Basileenses eorum decre- „ torum auctoritate damnet? Esto Constantiensia De- „ creta Sessionis V. Eugenius Pontifex oblique, si ita „ placet, perstricta voluerit; nae tu iniquus sis, qui quod „ narrando oblique & obiter dictum sit, ipsi decreto an- „ teponas. Neque vero dicas, laudari Constantiensia „ Decreta non ut certae auctoritatis, sed ut quae a Ba- „ sileensibus allegata sint: diserte enim Pontifex pro- „ nuntiat, perversa fuisse a Basileensibus Decreta Con- „ stantiensia ea audacia, eo ritu, quo ab haereticis & „ schismaticis Scriptura quoque & Patres soleant. Pla- „ ne eo sensu, quo Petrus docet, Pauli Epistolas, ut & „ ceteras scripturas, a pravis hominibus fuisse pervers- „ fas; hoc est, eo modo, quo ad commendandam Con- „ stantiensium Decretorum auctoritatem nihil dici po- „ tuit firmitus.

Magnam profecto esse oportet gravium argumen-
torum penuriam, quando ad haec tam inepta & inania
Viri gravissimi rediguntur. Nam, ut libere dicam quod
sen-

sentio, haec omnia Viri Cl. effata, mera commenta & somnia sunt. Commentum est, quod Eugenius Basileenses Constantiensium V. Sessionis Decretorum auctoritate damnari; ut qui solum dixerit, sensum, quem Constantiensibus illis Decretis Basileenses adfingebant, Constantiensis Concilii sensui repugnare. Quod profecto aliunde patere potest, quam ex iis decretis, quibus Basileenses innitebantur. Commentum est, quod Eugenii Decreto id anteponamus, quod ab ipso oblique & obiter dictum sit. Non ita profecto res habet; sed quod ab Eugenio utcumque, ut ais, oblique & obiter, vere tamen & reapse dictum est, cum decreto ipso conciliandum esse contendimus: ac nae tu potius iniquus sis, qui omnino gratis, ac ne cum levissima quidem rationis umbra Eugenium cum Eugenio ipso committis. Commentum est, quod Eugenius eandem Constantiensibus Decretis, atque sacris litteris, & Patrum traditioni tribuere voluerit auctoritatem, propterea quod illorum sensum sic dixerit a schismaticis & haereticis depravari, quemadmodum & sacrae litterae & Patrum scripta ab eisdem in pravum & reprobum sensum detorqueri solent. Quid ergo? An ea tantum corrumpere ac depravare solent haeretici, unde firmissima & inconcussa adversus illos argumenta eruantur? Quidni & ea unde solum verosimilia? Cujusmodi sunt, quae ex singularibus Patribus colliguntur. At certum est, haereticos in aliquorum Patrum scripta grassatos esse, aliis intactis, quibus nihilominus refellerentur. An ergo singulorum auctoritatem, cum sacris litteris, & communi omnium traditione, & cum Pauli Epistolis comparaveris? An tu in hoc argumento id inesse ponderis judicabis, ut contra di-

disertum ipsius Eugenii testimonium, Oecumenicam, summam, & ineluctabilem auctoritatem Constantiensibus illis Decretis vindicemus? Somnia haec, ut diximus, visiones & commenta sunt.

Nec minus futile & contemnenda sunt quae sequuntur: „ Jam quod ad eorum sensum attinet, haud
 „ minus finita res ex Eugenii IV. auctoritate & judicio.
 „ Nempe Adversarii Constantiensium Decretorum sensum eum esse volunt, ut adversus dubios tantum Pontifices valeant. Atqui Eugenius cum ei in primo & in
 „ secundo dissidio Constantiensia assidue objectarentur
 „ & inculcarentur, nunquam id respondit. Imo vero
 „ responsum in primo dissidio dictis factisque confutavit, cum Basileenses Constantiensium Decretorum
 „ autoritate adversus ipsum quoque indubitatum licet
 „ Pontificem usos edito Diplomate agnovit orthodoxos, iisque insuper ut superioribus paruit. Quare nec
 „ in secundo dissidio rebus exasperatis ab illo fundamento recessit; etsi Basileenses, multa in se gravissima ex Decretis Constantiensibus molientes, definivit
 „ ab eorum decretorum sensu deflectere; non tamen
 „ ideo quod ea decreta in Pontificem indubitatum verterent; sed quod assererent, nullam omnino esse causam, propter quam Synodus a Papa transferri possit,
 „ idque ad fidem Catholicam pertinere: neque ullo decreto quidquam aliud in Basileensibus condemnavit,
 „ quam quod tanta licet Graecorum reducendorum necessitate translata, continuassent Synodum; neque ulla Synodica Decreta irrita declaravit, nisi ea quae post translationem facta essent. Quare ille est sensus, quem Constantiensibus Decretis male affingi defini-
 „ vit.

„ vit . Manent cetera , Eugenio quoque iudice , immo-
„ ta ; nempe ut Constantiae Decreta summa & indecli-
„ nabili auctoritate constent , utque extra schismaticis
„ tempora sub indubitato quoque Pontifice , suo nati-
„ voque sensu valeant ; nempe in fidei , in schismatis ,
„ in generalis reformationis casibus . Quod unum Pa-
„ tres Gallicani sua declaratione complexi sunt , neque
„ translationis a Basileensibus spretae quaestionem ullo
„ modo attigerunt .

Quae omnia jam nobis superius luculentissimis argumentis confutata sunt . Nempe ostendimus , de Eugenio mente non ex iis statuendum esse quae coactus & invitatus egit , sed quae gessit ac litteris commendavit ; quum liber esset , & ex animi sui sententia scriberet , ageret ac loqueretur . Quae cujuscumque fuerint , non est quod hic rursus inculcemus . Ostendimus etiam , falsum omnino esse , quod schismatici Basileenses contenderent ; nullam prorsus esse vel gravissimam causam , propter quam Synodus a Pontifice transferri possit ; sed quod id fieri non possit absque Synodi ipsius consensu , cujus esset de ipsa translationis causa iudicium ferre . Quod certe Constantiensibus , saltem ex Basileensium sententia , ac prioribus ipsorum Basileensium Decretis nitebatur . Denique ostendimus , quaecumque adversus Romani Pontificis auctoritatem post reconciliatam gratiam Basileae per biennium acta & decreta sunt , irrita ex se fuisse , & pro irritis ab Eugenio habita , quoniam Legati Sedis Apostolicae sine potestate & jurisdictione ad praesidendum Concilio suscepti fuerant , & quoniam decreta illa , iisdem Legatis intercedentibus & refragantibus , per vim & tyrannidem paucorum ut plurimum sancita atque edita fuerant .

Ut

Ut ergo sensus ille pravus ac reprobus statuatur, quem Eugenius in iis Basileensium Propositionibus damnavit; observandum est, illas, quod ad substantiam dogmatis pertinet; quod scilicet Papa subjiciatur Concilio, nec illud absque Patrum consensu transferre possit; ex Constantiensibus Decretis erutas esse, & saepius a Basileensibus in medium adductas & confirmatas. Id verum ipsum Eugenium, tum ejus Legatos improbasse quidem, sed nondum ullo sollemni decreto reprobasse. Tunc ergo primum sollemniter Propositiones illas confixit, quum Basileensium temeritate additum est, eas ad fidem Catholicam pertinere, aut fidei Catholicae veritates esse, quas qui neget haereticus censendus sit, & tanquam haereticus judicandus, Sedeque Apostolica, quamquam unicus & indubius Pontifex fuerit, dejiciendus. Hunc ergo esse eum reprobum pravamque sensum, quem in iis Basileensium Propositionibus Eugenius confixerit, tria haec argumenta suadent. 1. Quoniam Eugenius, ut jam observavimus, illas propositiones non prius sollemni decreto notavit, quam eas in fidei dogmata erigere Basileenses ausi sunt. 2. Quoniam hunc sensum, ut ait Pontifex, facta ipsa monstrabant; quum his propositionibus freti, ad eum velut haereticum judicandum, ac Sede Apostolica dejiciendum, temere ac per summum scelus aggressi sunt. 3. Quoniam hic sensus reapse Constantiensis Concilii sensui aperte contrarius erat: quod nimirum Decreta illa Sessionis quintae *per modum Constitutionum Synodali*um, non autem velut fidei decreta promulgarat; atque ut superius ostendimus, Patres Constantienses, imo & ipsi Basileenses haecenus pro Catholicis habuerant, qui a doctrina illarum Propositionum

ab-

abhorrebant. Quapropter & in ipsa Latrociniali tum Synodo tumultus, seditiones, ac pene feralia dissidia inter primores Episcopos ac Theologos excitata sunt, quum de his veritatibus, ut vocabant, fanciendis, & in fidei dogmata erigendis deliberatum est. De quibus videtis Aeneam Silvium in Historia Concilii Basileensis. Erat ergo Constantiensis Concilii sensui contrarium, quod ejus decreta ut fidei dogmata vel articuli proponerentur.

Sed quod pertinet ad Scripturas & Patrum traditionem, non ea tantum ratione dici potuit, eorum sensui Basileensium Propositiones adversari, quod Synodi Oecumenicae auctoritas supra certum & indubium Pontificem tanquam fidei veritas fanciebatur; sed quoniam absolute huic Basileensium doctrinae Scripturarum & Patrum testimonia refragabantur. Non enim vel in sacris litteris vel in Patrum scriptis habetur, eos esse damnandos, qui illas Propositiones, ut fidei dogmata propugnarent, & velut haereticos judicarent, qui Pontificem supra Concilium eveherent. Quare his temerariis Censoribus haud alia ratione adversari possunt sacrae litterae & Patrum scripta, quam quod generatim ipsa eorum doctrina Scripturarum & Patrum testimoniis profligetur. Quum ergo Eugenius Basileensium Propositiones tanquam Scripturarum & Patrum sensui repugnantes damnavit, non modo propter acerbiter censuram; quo pacto etiam Constantiensis Concilii sensui adversabantur; eas damnasse censendus est, verum & simpliciter, & ut saepius diximus, quod ad ipsam substantiam dogmatis pertinet: quo pacto ipsa etiam Constantiensia Sessionis V. Decreta notavit; saltem eo sensu, ad quem illa

Calli Theologi revocant, & revocanda esse contendunt.

CAPUT X.

„ An Decretum Unionis Florentiae editum
„ Constantiensia Decreta antiquarit.

„ **J** Am, inquit Illustrissimus Auctor, perpendere nos
oportet Decretum Unionis Florentiae editum; il-
lud scilicet, quo Latini Graecique conjuncti sunt:
hoc enim Decreto Constantienses Canones reproba-
tos Bellarminus asserit, cujus dicta alii passim exscri-
bunt. Decreti autem haec verba sunt: *Definimus,*
sanctam Apostolicam Sedem & Romanum Pontificem
in universum orbem tenere Primatum; & ipsam Pon-
tificem Romanum Successorem esse Beati Petri Principis
Apostolorum, & verum Christi Vicarium, totiusque
Ecclesiae Caput, & omnium Christianorum Patrem ac
Doctorem existere; & ipsi in Beato Petro pascendi,
regendi & gubernandi universalem Ecclesiam a Domi-
no nostro Jesu Christo plenam potestatem traditam esse:
quemadmodum etiam in Gestis Oecumenicorum Conci-
liorum, & in sacris Canonibus continetur. Ac paullo
post: Salvis privilegiis omnibus (Patriarcharum) ac
juribus eorum. Datum Florentiae in sessione publica
Synodali &c. pridie Nonas Julii. „ Haec sunt, quibus
Constantiensia Decreta abrogata esse voluit. Quod
est falsissimum.

Neque Bellarminus neque nos adfirmamus, sco-
pum mentemque Eugenii in hoc decreto fuisse, Con-
stantiensia Sessionis V. Decreta configere ac notare; sed
Grae-

Graecis Doctrinam exponere de Romani Pontificis Sedisque Apostolicae Primatu, quam Romana Ecclesia proficitur, & quam omnes Catholici profiteri debeant. Hoc autem iis ab Eugenio verbis praestitum est, quae vix conciliari posse contendimus cum Constantiensibus illis Sessionis V. Decretis. Quod & non pauci ex ipsis Gallis agnoscunt, qui propterea Florentinam Synodum e generalium numero expunctam vellent. Si enim Romanus Pontifex totius Ecclesiae Caput est, atque ipsi in Beato Petro pascendi, regendi & gubernandi universalem Ecclesiam plena potestas a Christo tradita est; ergo tota Ecclesia, ergo universalis Ecclesia Romano Pontifici tanquam Capiti, Pastori, Rectori & Gubernatori subdita est, ab ipso pascenda, regenda & gubernanda. Porro in Synodo Oecumenica, cujus praecipua praerogativa est, quod universalem repraesentat Ecclesiam, non major potestas & auctoritas esse potest, quam sit in ipsa Ecclesia universali. Quare si haec Romano Pontifici ut Capiti, Pastori, Rectori & Gubernatori subdita est; & ipsam pariter Oecumenicam Synodum ei subditam esse oportet, tanquam ab illo cum plena potestate pascendam, regendam & gubernandam. Quemadmodum reapse & in Actis generalium Conciliorum & in sacris Canonibus continetur; ut in eodem Decreti unionis articulo additum est. Ita Actione II. Ephesinae Synodi universi Patres Caelestini litteris tanquam membra Capitis vocibus concinuerunt; & Sedis Apostolicae Legatis eum totius fidei caput & columnam, & Ecclesiae Catholicae fundamentum praedicantibus, consenserunt. Ita & Act. III. Concilii Chalcedonensis S. Leo caput universalis Ecclesiae, ejusque post Petrum Apostolum fun-

damentum, & petra fidei, & caelestis regni Janitor, plaudentibus Patribus, nuncupatur. Et in Epistola Synodica ad S. Leonem, eum Synodo velut caput membrum praefuisse; ipsam autem Synodum ei velut capiti consensisse, universi Patres testantur: qui & eundem velut filii Patrem deprecantur, ad eumque referunt quidquid ejus auctoritate in Synodo gestum esset, quemadmodum bona filiorum ad patrem velut ad auctorem referenda sunt. Ita demum, ut ea quae saepius in medium adlata sunt, in praesentia omittamus, & octava Synodus Can. II. Nicolai I. & Hadriani II. Decreta sese suscipere profitetur ob eam legem, quae ab Apostolo ad Hebraeos Cap. XIII. lata est, quae jubet, ut praepositis nostris subiecti simus. Speciatim vero lecta in Synodo fuerant, & omnium suffragiis confirmata Romanae Synodi Acta sub Hadriano II. ubi is hoc privilegium Romano Pontifici vindicaverat, ut a nemine, ac ne ipsis quidem Conciliis Oecumenicis, nisi in causa haeresis, ac praevio Sedis Apostolicae consensu, judicetur. Cui & ipsa Synodus Can. XXI. concinens ait: *Quod si Synodus universalis fuerit congregata, & facta fuerit de sancta Romanorum Ecclesia quaecumque ambiguitas & controversia, oportet venerabiliter & cum omni reverentia de proposita quaestione sciscitari, & solutionem accipere, aut profectum facere; non tamen audacter sententiam dicere contra summos senioris Romae Pontifices.*

Haec ergo & alia hujusmodi passim in Actis Conciliorum & sacris Canonibus continentur: ex quibus evidenter efficitur, ad Romanum Pontificem pertinere Ecclesiam universalem, non modo dispersam, verum & in Synodis Oecumenicis collectam & adunatam, velut Caput,

put, Pastorem, Rectorem & Gubernatorem pascere, regere & gubernare: Hanc vero illi tanquam Capiti, Pastori, Rectori, Patri & Gubernatori subesse, ab eo pascendam, regendam & gubernandam. Quod Graeci perinde ac Latini in Synodo Florentina sollemniter professi sunt, quum Romano Pontifici in Beato Petro pascendi, regendi & gubernandi universalem Ecclesiam plenam potestatem traditam esse dixerunt, *quemadmodum & in Actis generalium Conciliorum, & in sacris Canonibus continetur*. De quorum verborum sensu, vi ac potestate jam nobis latius disserendum est.

CAPUT XI.

- „ De vero sensu eorum verborum Decreti
 „ Unionis: *Quemadmodum etiam in*
 „ *Gestis Oecumenicorum Con-*
 „ *cliorum continetur.*

NUllum Adversarii non movent lapidem ut evincant, ea verba definitioni addita esse, ut omnes intelligerent, Romani Pontificis auctoritatem, ex Latinorum Graecorumque Patrum sententia, Conciliis & Canonibus subditam esse, ejusque usum ad modum in Actis Synodorum & in sacris Canonibus praescriptum esse coercendum. Itaque aut vulgatam Latinam interpretationem temere sollicitant, aut plura comminiscuntur, quo retenta vetere interpretatione alienum iis verbis sensum adfingant: aliique vertendum ac legendum esse pronuntiant; *Ad eum modum, qui &c.* non autem, *Quemadmodum etiam &c.* Alii vero & Graeca & Latina

tina in unam & eandem conspirare sententiam docent ; eaque prolata fuisse , ut plena potestas , quam Florentini Patres Pontifici adferebant , sacrorum Conciliorum & Canonum auctoritate non tantum probaretur , sed etiam antiquis suisque coerceretur finibus . Quae sententia est Illustrissimi Adversarii , quae pro rei gravitate sedulo nobis excutienda est .

ARTICULUS UNICUS.

Postrema illa Florentini Decreti verba: Quemadmodum etiam , vel , Et &c. quae Graecis examussim respondent , cum tantum sensum admittunt , quem nos illis tribuimus : frustra-que Bossuetius & alii ipsa rerum gestarum verborumque serie in alium ea sensum detorqueere conantur .

Johannes Launoius (a) , & post eum Ludovicus Maimbourg (b) , Nat. Alex. (c) , & alii docent , verba illa Graeci textus in Decreto Unionis , καὶ οὕτως ἐστὶν ὡς πρὸς τὰς ἐκκλησιαστικὰς &c. haud fuisse vertendā , quemadmodum in Vulgatis Conciliorum editionibus legitur : *Quemadmodum etiam in Actis &c.* sed , *Quemadmodum & in Actis &c.* vel potius , *Juxta eum modum , qui & in Actis &c.* „ Sic legendum est , *Quemadmodum & &c.* „ inquit Launoius , non vero , *Quemadmodum etiam &c.*

„ ut

(a) 3. Par. Epist. ad Thom. Rulland.

(b) Traité Historiq. de l'établis. &c. de l'Eglis de Rome chap. XX.

(c) Dissert. VIII. num. XII. & Dissert. X. num. XIV. in Hist. Saecul. XV. & XVI.

„ ut Abrahamus Cretensis vertit, & Justinianus subdole
 „ retinuit. Ac subjungit: quod Latinae *huic* editioni
 „ consentit Graeca, ubi sic habetur: καὶ ὅν τε ἔπειτα
 „ ἐν τοῖς πρακτικοῖς τῶν οἰκουμενικῶν συνόδων, ἐν τοῖς ἱεροῖς
 „ καὶ ἐν τοῖς ἀγλαῖς μετέταται. *Juxta eum modum, qui & in*
 „ *Actis Oecumenicorum Conciliorum, & in sacris*
 „ *Canonibus continetur.* Eademque fere habent & Lu-
 „ dovicus Maimbourg, & Nat. Alex., quorum alter vul-
 „ gatam versionem falsam appellat: *Et non pas selon la*
 „ *fausse version &c.* Alter vero, Graecum textum ita om-
 „ nino, quemadmodum eum vertit Launoius, reddendum
 „ esse pronuntiat, non vero ut habet, inquit, Latina ver-
 „ sio Conciliorum collectioni inserta.

Quae omnia etiam Illustrissimus Petrus de Marca
 sequentibus verbis complexus est (a). „ Sententia hu-
 „ jus Decreti haec est, summam & plenam administran-
 „ dae Ecclesiae potestatem a Christo fuisse Pontifici tra-
 „ ditam, ea lege, ut ea utatur juxta modum, qui & in
 „ Actis Conciliorum Oecumenicorum & in Canonibus
 „ continetur. Itaque Graeci obtinuerunt, quod tan-
 „ toperere urgebant, scilicet, privilegia Papae secundum
 „ Canonum praescriptum esse interpretanda. Eadem
 „ esse debet mens verborum Latinorum; quae tamen
 „ a contextu Graeco desciscunt, propter leve mendum,
 „ quod incuria Amanuensium irrepsit in his verbis,
 „ *Quemadmodum & in Gestis Conciliorum.* Nam La-
 „ tina lectio praefert, *Quemadmodum etiam in Gestis.*
 „ Qui error primam Concilii hujus e Graeco in Lati-
 „ num versi editionem invasit. Ejus versionis auctor est
 „ Bartholomaeus Abramus Cretensis Episcopus Arien-
 „ sis,

(a) Lib. III. de Conc. sac. & Imp. cap. VIII. num. V.

„ lis, quam anno MDXXXVI. publicavit: in qua mul-
 „ toties hallucinatus est, ut observat Arcudius (a).
 „ Suspiciari licet, de industria hunc locum ab eo minus
 „ sincere redditum; quia contentiones, quae de Cano-
 „ nibus inter Graecos & Latinos emerferunt, in Latina
 „ interpretatione Concilii omnino dissimulat. Quod
 „ discrimen alienam a pactis conventis cum Orientali-
 „ bus sententiam Decreto affingit; cum e Graeco con-
 „ textu conficiatur, Papae privilegia esse explicanda &
 „ exercenda secundum Canones & secundum Acta
 „ Conciliorum Oecumenicorum, id est, octo Conci-
 „ liorum, quae ex Occidentali & Orientali Ecclesia
 „ constabant. At e contextus Latini depravata lectio-
 „ ne eruitur, plenam esse Papae potestatem, ilque pro-
 „ bari Actis Conciliorum & Canonibus. Si quis sibi
 „ persuadere malit, delusos a Latinis Graecos ambigua
 „ scribendi ratione, per me licet; praecipue cum apud
 „ Antoninum eadem lectio Latina repraesentetur. Ver-
 „ ba autem Graeca in sincero sensu modum exercitio
 „ potestatis Pontificiae imponunt ei similem, quem
 „ Ecclesia Gallicana tuetur. Quae fere omnia, oppido
 „ falsa sunt. Falsum, in Latini textus versionem mendum
 „ irrepsisse; Falsum, Latina verba a textu Graeco descisce-
 „ re; Falsum, Latinae versionis auctorem fuisse Abraha-
 „ num Cretensem; Falsum, eadem Latina verba habenda
 „ esse tanquam Graecorum verborum interpretationem;
 „ Falsum denique, a Latinis Graecos fuisse delusos, aut
 „ deludi potuisse. Quae mox a me singillatim demonstra-
 „ buntur. Interim vero ex hisce Illustrissimi Auctoris ver-
 „ bis satis aperte constat, cur communem & pervulgatam Le-

(a) Lib. III. de Conc. Eccles. Occid. & Orient. cap. IX.

Lectionem ejusmodi Scriptores sollicitandam existima-
 rint; quod nempe ex ea eruatur, plenam esse Romani
 Pontificis potestatem; idque ex Actis Conciliorum &
 Canonibus demonstrari. Quod etiam Launoium cavisse
 ex sequentibus ejus verbis apparet: „ Mutatio, inquit,
 „ particulae, *Et*, in particulam, *etiam*, pascendae,
 „ regendae & gubernandae Ecclesiae rationem & for-
 „ mam pervertit, & habitas Patribus pro asserendo Pri-
 „ matu disputationes ut invalidas procul amandat. Par-
 „ ticula, *etiam*, regendae Ecclesiae modum ultra sacros
 „ Canones & Acta Oecumenicorum Conciliorum, de
 „ quibus sermo instituitur, protendit: at geminata par-
 „ ticula, *Et*, *Et*, *Et*, *Et*, regendae Ecclesiae modum
 „ intra sacros Canones & Acta Oecumenicorum Con-
 „ ciliorum, de quibus sermo instituitur, coercet. Con-
 „ cinit Maimbourg, qui vulgatae versionis sensum expo-
 „ nens ait: „ Perinde ac si diceretur, ipsos quoque
 „ Conciliorum Canones, plenam regendae universalis
 „ Ecclesiae potestatem, Pontifici vindicare: qui sensus,
 „ inquit, Synodi verbis omnino repugnat, (*c'est un*
 „ *sens tout contraire aux paroles de ce Concile*), quae
 „ solum ait, Pontificem a Jesu-Christo recepisse pote-
 „ statem ad regendam Ecclesiam juxta modum, qui illi
 „ per Canones praescriptus est, vel, *juxta eum modum*,
 „ qui *Et* in Gestis Conciliorum *Et* in Canonibus conti-
 „ netur. Si ergo antiquae versionis auctoritas adseratur,
 neque eam temere fuisse sollicitandam invicte demon-
 stretur, consequens erit, jure ac merito illimitatae po-
 testatis Defensores, ut ipsis Meldensis Episcopi verbis
 utar, asserere, postrema Decreti Florentini verba pro-
 ferri, non ad coercendum iustis legibus Pontificiam po-

tetatem; sed tantum ad demonstrandum, pascendi ac regendi potestatem plenam, quae anterioribus verbis definitur, a Conciliis quoque generalibus sacrisque Canonibus fuisse agnitam; & hunc sensum hac voce, *etiam*, maxime, imo & unice comprehendi *. „ Age vero „ productis autographis, quibus maxima auctoritas in- „ est, utris adhibenda sit fides videamus; Gallisne ad- „ firmantibus, verba Synodi: *Quemadmodum etiam in „ Gestis &c.* ex Graecis bonis Latina facta esse non bo- „ na; an Italis contra acriter vehementerque pugnantibus? Silvester Syropulus, infensissimus ille Romanorum hostis in *Historia vera unionis non verae* (a) „ quinque omnino Exemplaria, Papae atque Imperatoris subscriptionibus munita fuisse prodidit. Sed plura „ ne fuerint subsignata; necne: non equidem laboro. Illud certe mihi est explorate compertum & cognitum, „ quinque Decreti ejusdem exemplaria etiamnum superesse, quae Pontificis, Imperatoris, multorumque „ Patrum Chirographis confirmata sint. Ac priore quidem loco memorare oportet, quod in Gazophylacio „ Magni Etruscorum Ducis servatur, altero autem, „ quod visitur in Bibliotheca Faesulana PP. Reformatorum S. Francisci, cujus Transumptum quam accuratissime exaratum penes me habeo, tertio, quod in „ Colbertina, Bossuetio praedicatore ac teste, quarto „ quod Vir Cl. & in omni studiorum genere versatissi- „ mus

(*) Quae hic de Graeci Latini-
que textus consonantia accuratius
disputantur, ea mihi perhumaniter
communicavit egregius Juvenis F.
Thomas Lusinianns, alias Mama-

chius Chienfis Ord. Praed. probe &
supra aetatem Latinis Graecisque
litteris, & Philosophicis ac Theo-
logicis disciplinis excultus.

(a) Sect. X. cap. XVII.

mus Scipio Maffejus nuper Bibliothecae Vaticanae
 „ dono liberaliter dedit, quodque egomet non ita pri-
 „ dem hisce oculis vidi, quinto denique, quod in Arce
 „ S. Angeli extat. In Latino autem horumce omnium
 „ textu sic oppido verba eadem leguntur: *Quemadmo-
 „ dum etiam in Gestis icumenicorum Conciliorum, &
 „ in sacris Canonibus continetur*. Launoius igitur,
 „ Maimburgius & Nat. Alex. animum inducent suam
 „ illam legendi rationem contra Autographorum fidem
 „ defendere? Nonne enim haec, ita ut scripta hinc sunt,
 „ clara voce ab Juliano Cardinale (a) lecta fuerunt in
 „ Synodo? Tum vero quum praesto essent Bessarion,
 „ Trapezuntius, Gennadius aliique complures Graeci,
 „ qui Latini sermonis peritia Launoio ceterisque, quos
 „ inimicos experior, multis parasangis praecederent;
 „ quidni nostros summi sceleris arguerunt, quod frau-
 „ de mala Graecis imponere auderent, si Latinus textus
 „ ulla ratione discrepallet a Graeco? Post itane impro-
 „ bis moribus fuisse Latinos putabimus, ut Graecis fu-
 „ cum fieri paterentur? Quid enim? Praestat aliorum
 „ verba Bossuetii trahere atque ipse accepit: An Grae-
 „ cos dicamus fuisse delusos? An subdola interpretatio-
 „ ne avocatos eos ab eo sensu, quo Graeca ipsa ferrent?
 „ Absit hoc ab Ecclesiae Latinae candore ac majestate;
 „ quare in eam potius iremus sententiam, quam Latina
 „ verba postulant, quaeque, uti mox videbimus, cade-
 „ re optime potest in Graeca. Neque vero iis assentior,
 „ qui Latinum textum merae interpretationis numero
 „ haberi oportere contendunt. Est enim primigenius,
 „ omnium Latinorum atque Graecorum sermonem La-

M m 2

„ ti-

(a) Syropul. In Histor. Vera Union. non verae sect. X. cap. X.

» tinum callentium , qui Synodo aderant , consensione
 » probatus ; quo circa si quis est , qui de illius auctorita-
 » te quidquam detrahendum putat , is profecto nullam
 » habebit Latinae Ecclesiae rationem .

» Sed ades animo atque una videamus , an Graeca
 » Latinis altera ex parte respondeant . Tunc enim Ad-
 » versarii fasces supponant necesse est qui cum se Lati-
 » nis pressos atque agitados vident , ad Graeca velut ad
 » aram confugiunt . Ludunt autem illi , quum *καὶ οὐ*
 » *τεύπον ἔχει* , in quemadmodum etiam aut nullo pacto ,
 » aut contorte omnino verti posse contendunt . Ego
 » vero , neque commodiorem ullam neque acquabilio-
 » rem esse hac interpretandi rationem puto . Quis enim
 » ita est in Graecis institutionibus peregrinus atque ho-
 » spes , quem fugiat *τὸ κατὰ* idem plane atque ad iden-
 » tidem indicare ? Legant , ac lexicographos omnes , si vim
 » Graecorum vocabulorum assequi ipsi per se nequeunt ,
 » diligenter evolvant , compertumque habebunt ; mul-
 » ta esse Scriptorum Graecorum loca , in quae haec no-
 » stra interpretatio apte competere possit & commode .
 » Tritum est illud *ἡς ἰσθμοῦ κόντα* : cap. I. Genesis a
 » Philone Judaeo , & ab Graecis Patribus saepe ac mul-
 » tum vexatum : *ποῖσιν μὲν αἱ θεῶν καὶ εἰκόνα ἔχει ὁμοίω-*
 » *σιν ἑμῶν* . Veteres novique interpretes , qui magnos
 » progressus in Graecis Latinisque disciplinis ac linguis
 » fecerunt , sic oppido vertendum esse putarunt : *facia-*
 » *mus hominem ad imaginem & similitudinem no-*
 » *stram* . Non is ego sum , qui *secundum imaginem*
 » verti non potuisse dicam ; sed qui *ad imaginem* trans-
 » ferri etiam commode potuisse contendam . Quid ca-
 » pite XV. *Actor. Apostolicorum . Versu XI. & capi-*
 » *te*

te XXXVII. ver. XXV. nonne τὸ καὶ ὃν τεύων a vul-
gato interprete in *quemadmodum* vertitur. Jam ve-
ro illud Platonis ἐν τῷ e primo de republica libro κατὰ
τὴν ἡέρας, nonne a Budaeo, & aliis pluribus lexico-
graphis traductum κατὰ λίσιν est, ad *necessitatem*.
Sed hoc quidem palmare quod κατὰ, & κατὰ ad-
verbia, quorum alterum ex κατὰ, & ἀπὸ, alterum ex
κατὰ, & ἀ conflare video, in idem omnino recidunt,
atque τὰ *sicuti*, *quemadmodum* &c. Quod si Lau-
noio aliisque generis ejusdem grammaticis esset au-
ctoritas adjungenda, qui τὸ κατὰ in *secundum* tra-
duci oportere defendunt κατὰ, & κατὰ in *secun-*
dum quae transferri omnino deberent; quo quid un-
quam dici, aut commemorari posset obtusius? Ve-
rum quoniam semel suscepimus genus hoc argumen-
ti, age quaeso atque una videamus quorsum evadat.
Pugnat Launoius τὸ καὶ ὃν τεύων hanc esse veram
interpretationem latinam: *secundum eum modum*
qui. Sed quis hominem docuit, ut cum ratio nulla
postulat, de suo adjungat τὸ *eum* cujus in Graeco
exemplari nullum prorsus extat vestigium? Tum τὸ ὃν
accusativum in *qui* nominativum sine causa cominu-
tare nonne est hominis otio, ac litteris abutentis? Quod
si quisquam nihil plane immutet, vertatque τὸ καὶ
ὃν τεύων in *secundum quem modum*, quam erit ille
 Romanae linguae cultoribus deridendus? Quis enim,
rogo, est, qui aliquam his verbis inesse vim censet
proprietaemque significandi? Et ipsi (Pontifici) a
Domino nostro Jesu Christo plenam potestatem tra-
ditam esse secundum quem *modum* & in *gestis* iu-
menicorum Conciliorum & in *sacris Canonibus* con-

tine-

„ *tinetur*. Ergo quum τὸ κατὰ in *ad* apte ac commo-
 „ de transferri identidem posse ostensum demonstra-
 „ tumque sit, haec una erit κατὰ λέξιν germana τῷ καθ'
 „ ὅν τελέποι interpretatio. *Sicuti, quemadmodum* &c.
 „ Quamobrem Graecus textus ita latino respondet, ut
 „ nequeat ovum ovo esse similius.

„ Nam qui opponunt τὸ καὶ in & verti posse, in
 „ *etiam* contra nonnisi contorte posse; nae illi vehemen-
 „ ter erraverint. Omitto Stephanum, Budaeum alios-
 „ que linguae Graecae cultores, quanvis mihi magno
 „ sint praesidio & adjumento. Ad ῥητὰ Scriptorum
 „ Graecorum descendo. Quid? τὸ ἀλλὰ καὶ, in *sed*
 „ *etiam*, τὸ καθάπερ καὶ in *quemadmodum etiam* an-
 „ non accurate transferre licet? Nega, si potis es, κατὰ
 „ λέξιν hanc esse Plutarchianae pericopes interpretatio-
 „ nem latinam *In Alexandro*: ὃ γὰρ μέντοι τὴν ἡμε-
 „ ρίαν ἡγάποιεν, ἀλλὰ καὶ νοσῶσιν ἐβοήθη τοῖς φίλοις, καὶ
 „ σωίταίη θραπέας τίνας, καὶ διαίτας. *Non enim so-*
 „ *lum speculativam amavit, sed etiam amicis laboran-*
 „ *tibus auxilia tulit, & medicationes quosdam &*
 „ *diaetas praecepit.* Viden ut geminatum & &, καὶ
 „ καὶ nihil impediat, quominus τὸ ἀλλὰ καὶ in *sed etiam*
 „ converti possit? Haec autem Aristotelica (*lib. de Au-*
 „ *dibil. apud Porphy. commentar. in Musc. Ptrole-*
 „ *maei*) ἀδυνάτοι γὰρ, μὴ πλείως τέττοι διωρθωμέναι;
 „ τὰς φωνὰς εἶναι σαφεῖς· καθάπερ καὶ τὰς τῶν δακτυλίων
 „ σφραγίδας, οὗτοι μὴ ἀψυγνῶσθαι ἀκριβῶς: Quid obstat
 „ quominus hac ratione transferantur? *Impossibile enim;*
 „ *non perfecte his dearticulatis vocem esse claram;*
 „ *quemadmodum etiam annulorum sigilla, si non ex-*
 „ *culpantur exacte.* Dixerat aliquanto superius: ἀνάγκη

„ γὰρ

13 γὰρ ἐ τῷ ἔξωτιν αἰετῷ τοιαύτας γίγνεται τὰς πληγαί,
 14 καὶ μέγιστα τὰς φωνὰς ὅταν ἀφ' ὑψηλότητος συνιστάται πρὸς
 15 τὴν ἀκούω, ὡς καὶ τὰς ὁσμὰς, εἰ τὸ φῶς, καὶ τὰς
 16 θερμότητας· εἰ γὰρ πάντα ταυτὰ ἀραιότερα γινόμενα πρὸς
 17 τὴν ἀφ' ὧν αἰσθάνονται, ἀσθενέστερα γίγνεται· καθάπερ καὶ οἱ χυλοὶ
 18 κρηνίτις τῷ ὕδατι ἐ ἰστέροις χυλοῖς. *Neceſſe enim etiam*
 19 *externi aeris tales fieri percuffiones, & maxime vo-*
 20 *ces ita emitti conſtitutus ad auditum, ſicut etiam*
 21 *odores, & lucem, & caliditates: etenim haec omnia*
 22 *rariora dum apparent, ſenſui debiliora fiunt: ſicut*
 23 *etiam ſucci temperati aqua, & aliis ſuccis. Ita ver-*
 24 *tit ad litteram Franciſcus Patricius Vir Clariffimus*
 25 *graeceque ad miraculum doctus. Quod ſi haec ſucci*
 26 *& lucis & annulorum exempla, quoniam aut ſimili-*
 27 *tudinis, aut confirmationis eorum, quae Ariſtoteles*
 28 *diſputaverat, loco afferuntur, in cauſa ſunt cur τὸ*
 29 *καθ' ἑαυτῇ, atque etiam τὸ ὡς καὶ in quemad-*
 30 *modum etiam transferantur, quid eſt, quod ea De-*
 31 *creti Unionis verba: καὶ ὅτι ἐν τῷ ὕδατι καὶ ἐν τοῖς*
 32 *πρακτικοῖς τῷ οἰκουμενικῷ ſυνώδῳ, ἐ ἐν τοῖς ἱεροῖς κα-*
 33 *νότοις ἀφ' ἑαυτῇ, ut eorum quae ſuperius poſita*
 34 *ſuerant confirmatoria intelligi nequeant atque in hunc*
 35 *modum transferri: Quemadmodum etiam in Geſſis*
 36 *icumenicorum Conciliorum κ. τ. λ. veluti latinus*
 37 *textus eſt flagitat? Sed quid plura perſequor? Graeci*
 38 *qui aut praefito Synodo adſuerunt, aut eam proxime*
 39 *attigerunt aetatem non Catholici ſolum, verum etiam*
 40 *e medio ſchiſmate, non alio ſenſu Decreti verba ac-*
 41 *ceperunt, quam latina praeferebant. Habe tibi Rha-*
 42 *cenditae ſchiſmatici apud Johannem Pluſiadenum*
 43 *verba. (Dialogo pro Synodo Florentina pag. 645.*

» *Tom. I.*

„ Tom. I. Graec. Oribod. Leonis Allatii.) Φράσον μοι
 „ πῶς καλῶ μὴ ὀκνῶντας, ἔπει τῷ τελευτᾷ κεφαλῆς τῷ
 „ ὄρει. Πᾶς τὸν ρώμης ἀρχιερέα λέγει ἐξ κεφαλῶν πάσης
 „ τῆς ἐκκλησίας, ἔμὴ δ' αὐτὸν ὡς εἶνα ἐξ ἡς ἄλλων πα-
 „ τριάρχων; Respondet Plufiadenus. Ἡ μῆς πᾶτες αἰθε-
 „ ρισμα, ὡς εἶνα ἡς πατριάρχων τὸν τῆς ρώμης ἀρχιερέα λί-
 „ γομαι κ. τ. λ. Rhacend εἶπω τῷτο ὁμολογῶ καὶ διχομαγ.
 „ Αλλ' ὅτι αὐτοὶ δὲν ἐξ ΤΟΝ ΚΑΝΟΝΙΖΟΝΤΑ
 „ ΠΑΣΑΝ ΤΗΝ ΕΚΚΛΗΣΙΑΝ, ΚΑΙ ΝΟΜΟ-
 „ ΘΕΤΟΥΝΤΑ ΤΗΝ ΠΙΣΤΗΝ, ΕΤΙΓΕ Α-
 „ ΠΟΡΩ. Plufiadenus: ΤΟΥΤΟ ΠΑΡΑ ΤΟΥ
 „ ΣΩΤΗΡΙΟΥ ΕΙΛΗΦΕ σῶματ' ἀπὸ τῆς
 „ ἡλῶβαν ἔχουσιν, τῷ σπρίξιν, ἔδξιντάξιν, ἔκασιξιν;
 „ καὶ διοξδῶν τὰ πᾶς τῶ πῆσιν. Age mihi, nec deponas
 „ studium rogo, de postremo Decreti capite, qua ratio-
 „ ne dicitis Romanum Pontificem caput universae Ec-
 „ clesiae, nec censetis eum tanquam unum ex Patriar-
 „ chis? Plufiaden. Et nos Reverende Pater, Romanum
 „ Pontificem tanquam unum ex Patriarchis censemus
 „ . . . Rhacendita. Esto boc. Fateor, & recipio; sed
 „ decere ipsum esse qui universam Ecclesiam regula di-
 „ rigat, & fidem praescribat, nondum plane capio.
 „ Plufiaden. Hoc ab ore Salvatoris habuit. Allatis vero
 „ Christi Servatoris Petrum alloquentis verbis sic tan-
 „ dem argumenti concludit sententiam: His auctori-
 „ tatem habet confirmandi, examinandi, dirigendi, &
 „ res fidei corrigendi.
 „ Accedit Georgius Trapezuntius, qui etfi alicubi
 „ minus accurate de Romani Antistitis auctoritate lo-
 „ quatur, ut quae affirmat, ne Galli quidem probare
 „ possint, ubi tamen de Unionis Decreto sermonem
 „ in-

„ instituit, non coarctari eam Canonibus Conciliorum,
 „ sed magis magisque illis confirmari contendit. (*In*
 „ *Epist. ad Cretenses. Pag. 579. Tom. I. Graec. Orthod.*
 „ *Leon. Allatii*) Πάντες, inquit, μᾶ βελῶ, μᾶ γνά-
 „ με, μᾶ ψυχῶ.... ὁμοφρονήσατες, ἐ τῷ ᾧ παλαιῇ πα-
 „ τέρων, ἐ διδασκαλίᾳ τῆς ἐκκλησίας διδασκαλίᾳ, μέλλοι
 „ δὲ τῷ θαγγελίῳ ἀκολουθήσατες, ὑπὸ χάριτι τῷ σωτη-
 „ ρίᾳ παρὰ αὐτοῦ ὄντι, οἱ ᾧ δὲ τῷ μέγιστον περὶ ξίτι.....
 „ Ἐ ὅτι πρὸς τῷ ἁρχιερεῖσι πάντων ὁ ῥῶμος; Omnes
 „ unis animis, una mente, unaque voluntate concor-
 „ des, & antiquorum Patrum atque Doctorum Eccle-
 „ siae doctrinae conformes, quin immo Evangelium se-
 „ quentes, compositae ab iisdem definitioni subscripse-
 „ runt, in qua duo potissima continentur..... & pri-
 „ mum Praefulem Romanum esse: Patrum autem do-
 „ ctrina quatenam rogo est, quam quae sacris Canoni-
 „ bus illorumque operibus continetur? Habeo alia mul-
 „ ta, quae nunc condonabuntur, quae proferentur post;
 „ si pergant Adversarii laedere. Illud interea teneo:
 „ manere immotam Latini textus auctoritatem. Quare
 „ si quis eam sollicitare ausit; nihilo plus agat quam ut
 „ cum ratione insaniat.

Jam vero quid Bossuetius, & Nat. Alex. & alii pro-
 ferant, quo Decreti verba in eum sensum, quem Latinus
 textus nullo modo patitur, jure ac merito detorquere vi-
 deantur, sedulo expendamus: „ Id, inquit Bossuetius;
 „ non jam nudis verbis, sed quod Theologum maxime
 „ deceat, ipsa verborum gestorumque serie. Haec ille: in
 quae profecto optime illud quadrat, quo nos supra capi-
 te IX. ipse Meldenensis Episcopus excipiebat: *Nae tu ini-*
quus sis, qui non jam quod narrando oblique, ut vis, &

N n n

obi-

obiter, tamen in Decreto ipso dictum sit; sed quae a Graecis in praeviis disputationibus temere, ut mox videbimus, ac perperam dicta sint, ipsi Decreto anteponas, in quo Graeci pariter ac Latini unam tandem & eandem fidem, diverso quidem idiomate, sed uno tamen eodemque sensu ac spiritu professi sunt. Quid enim Bossuetius, quid Nat. Alex. quid alii proferunt? Nempe haec imprimis Bellarionis verba, quae Latinis reposuit, quum in additione vocis *Filioque* Ecclesiae Romanae auctoritatem urgerent: *Scimus quidem*, inquit, *quae sint jura & praerogativae Romanae Ecclesiae: nihilominus scimus; praerogativae ejus quos terminos habeant.* „Haec jam „ inde a Synodi initio Graeci profitebantur Sessione IX. Plura vero ex ea Nicaeni Archiepiscopi disputatione Nat. Alex. (a) in medium adfert, quae oppido mihi praetereunda non sunt: *De potestate autem Occidentalis Ecclesiae multa dicenda suppeterent, nisi aliud nobis esset propositum. Et scimus quidem quae sint jura & praerogativae Romanae Ecclesiae: nihilominus scimus etiam, praerogativae ejus quos terminos habeant. Nosse tamen volumus Reverentiam vestram, a nobis facultatem hanc negari universae Ecclesiae, & Synodo, vel etiam Oecumenicae, non tantum Romanae Ecclesiae. Quoniam igitur quantacumque facultate polleat Romana Ecclesia, minus tamen Synodo Oecumenica, & universali Ecclesia, si nos id universae negamus Ecclesiae, multo magis negabimus Romanae. Negamus autem non ipsi a nobis, sed arbitramur hoc Patrum decretis negatum.* Haec ex ea Bellarionis oratione Nat. Alex. qui statim subjungit: „Romanam Ecclesiam, adeoque & Ro-

„ ma-

(c) Dissert. VIII. in Hist. Eccles. Saec. XV. & XVI. num. XLII.

„ manum Pontificem ipsi praesidentem, universali Ec-
 „ clesia, & Synodo Oecumenica ipsam repraesentante
 „ inferiorem, coram Eugenio IV. & frequenti confes-
 „ sione Patrum in solenni sessione Florentinae Synodi asse-
 „ rit Bessarion totius Orientalis Ecclesiae nomine; ne-
 „ mo reclamat, nemo redarguit: nec summus Ponti-
 „ fex, qui iura certe sua noverat, nec Cardinales, Epi-
 „ scopi, Theologique Latinae Ecclesiae doctissimi,
 „ ipsum Pontificiam dignitatem violare, aut de ea ma-
 „ le sentire, vel prope haereticum esse clamaverunt:
 „ Imo *nihil responderunt*, ut habent Acta. An vero
 „ non dicam Bessarionis, sed totius Ecclesiae in eo
 „ Concilio congregatae auctoritati anteponenda Bel-
 „ larmini auctoritas &c.

Quanti haec valeant, simili omnino ex iisdem ver-
 bis ducto argumento experiamur: Occidentali Eccle-
 siae, imo & Ecclesiae universae, & Synodo Oecumeni-
 cae ipsam repraesentanti, coram Eugenio IV. & fre-
 quenti confes-
 sione Patrum in solenni sessione Florentinae
 Synodi, Bessarion totius Orientalis Ecclesiae nomine
 facultatem detrahit addendi Symbolo vocem *Filioque*;
 nemo reclamat, nemo redarguit, nec summus Ponti-
 fex, qui perinde ac sua, & universae Ecclesiae, & Syno-
 di Oecumenicae iura certe noverat, nec Cardinales, Epi-
 scopi, Theologique Latinae Ecclesiae doctissimi, ipsum
 Ecclesiae universae & Synodi Oecumenicae dignitatem
 & iura violare, aut de eis male sentire, aut prope hae-
 reticum esse, clamaverunt: Imo *nihil responderunt*, ut
 habent Acta. Videat Nat. Alex. quo illum hoc suum ar-
 gumentum ducat. An enim dicere audebit; quod ta-
 men inde sponte ac necessario fluit; non jam unius Bes-

farionis, sed totius Ecclesiae in eo Concilio congregatae, auctoritate probatum & constitutum esse, non modo Romanae vel Occidentalis, sed neque universalis Ecclesiae jure ac facultate addi potuisse Symbolo vocem *Filioque*? Ea quidem, speciatim quod spectat ad Romanum Pontificem & Ecclesiam Occidentalem, Graecorum schismaticorum sententia erat: sed eis, ut alibi demonstravi (a) Ratramnus Corbejenfis, Aeneas Parisiensis, Anselmus Havelburgensis, aliique Latini Scriptores acerrime resisterunt. Falso autem ac pessima fide, velut ex Synodi Actis, relatum est, quod ad eam Bessarionis disputationem Pontifex, Cardinales, Episcopi, Theologique Latinae Ecclesiae doctissimi *nihil responderunt*; perinde atque illam a Bessarione Graecorum nomine prolatam haeresim adprobarint. Exstant quidem duo illa verba in Actis Graecis; quorum tamen hinc fidem merito in suspicionem Horatius Justinianus adducit (b); sed omittenda non erant quae in eisdem Actis praecedunt & sequuntur, eaque cum Latinis conferenda: inde enim apertissime patuisset, nequaquam Patres Latinos in eam Bessarionis & Graecorum haeresim consensisse, vel suo eam silentio tacite adprobasse. Sic enim in Actis Graecis, ex quibus duo illa verba Nat. Alex. evulsit: *Haec quum Nicaenus dixisset, illi, nimirum qui selecti erant, una cum omnibus Cardinalibus & aliis quibusdam accessere ad Pontificem; ac per aliquantum temporis spatium habito simul consilio, sederunt. Quumque opus esset ad ea, quae Nicaenus proposuerat, apposite respon-*

(a) Tom. II. lib. III. cap. XX. artic. unic. & alibi.

(b) Vide sis in Not. ad Collat. VIII. Syn. Flor. quae Graecor. A&or. Sess. IX. respondet.

respondere, illi quidem nihil responderunt. Vix tandem vero Praesul Colossensis sermocinari aggressus, nullum interrogationi congruum dedit responsum: neque enim suppetebant illi, ut arbitror, aptae responsiones & causae reddendae: sed orsus dicere tantam verborum effudit redundantiam, ut conveniens praefixumque tempus effluerit. Non ergo Latinos nihil omnino ad ea Bessarionis verba respondisse, Graecorum Actorum Editor prodit: sed Colossensem Praesulem nihil eorum nomine apte respondisse, partium utique studio, comminiscitur. Quid porro responderit, quod Graecus Scriptor referre noluit, ex Latinis Actis habemus, & quod quidem ad propositum attinet, quae sequuntur: *Quum vestrum problema fuisset, quomodo sancta Romana Ecclesia fecerit rem prohibitam, & quomodo illi licuit: dixi ad hoc, quod non fuerit additio, quod non fuerit prohibitum, quod fuerit verum, quod impellente maxima necessitate, quod esset manifesta veritas in Ecclesia Dei, & quod oportebat id fieri per Romanum Pontificem, ad cujus officium specialiter ista spectare noscuntur: ex quibus conclusi, fuisse omnino licitum Romanae Ecclesiae illam declarationem facere. Et infra: Et inviti venimus ad silentium partis illius; quod scilicet particula Filioque manifestam in Ecclesia Dei veritatem contineret; & certe satis moesti. Ex illius enim partis probatione facile erat probare, fuisse licitum Romanae Ecclesiae facere declarationes. An adhuc Nat. Alex. iactabit, eam Bessarionis disputationem, manifestam haeresim continentem, fuisse Latinorum silentio, atque adeo totius Synodi auctoritate probatam?*

Adjungit Bossuetius quaedam Eugenii IV. Bessarionis

nis & Graecorum Imperatoris verba, quae in unam hanc sententiam conspirent, non unius Romani Pontificis voluntate, vel unius Romanae aut Occidentalis Ecclesiae auctoritate, sed universalis Ecclesiae consensione, cum alias omnes fidei controversias, tum praecipue celeberrimam hanc de vocis *Filioque* ad Symbolum additione finiendas ac dijudicandas esse. Ubi imprimis quod ad Graecos attinet, observandum est, eos jam plurimum in hisce cum Latinis disputationibus profecisse. Nam Sessione IX. ut jam vidimus, ipsi quoque Synodo Oecumenicae & universali Ecclesiae facultatem adesse negabant addendi Symbolo vocem *Filioque*: At Sessione XXV. Bessarion & Imperator, ut ex eorum locis & verbis a Bossuetio laudatis exscriptisque compertum est, hanc eandem facultatem & Ecclesiae universae & Synodo Oecumenicae disertissime vindicabant. Quod ergo eos nondum in Romano Pontifice vel Ecclesia Romana id juris agnoscentes Eugenius tolerabat, remque toties definitam retractari patiebatur, quo communi tandem iudicio & consensione sanciretur; optimi Pastoris, ut alibi luculentissime demonstravi (a), indulgentia erat, qua eos paulatim ac suaviter sibi & Ecclesiae Romanae perfecte conjungere satagebat. Quid enim jure ab eis exigere potuisset, satis jam compertum & exploratum habebat Clementis IV. & Gregorii X. suorum Praedecessorum exemplo, qui ad Michaëlem Palaeologum Graecorum Imperatorem fidei formulam destinarant ab eo Graecisque antea subscribendam, quam generalis Synodus haberetur, quam postea celebrari posse indulgebant, non ad eam tamen fidei formulam retractandam,

(a) Tom. I. Par. 2. cap. XXXV. art. unic.

dam, quam tanquam Romanorum Pontificum stabili diffinitione firmatam nec ipse (Clemens IV.) voluit, nec nos intendimus, sicut non decet, nec foret expediens, in dubium, novo eam exponendo examini; revocare: inquit Gregorius X. in litteris ad Michaëlem Palaeologum Graecorum Imperatorem: qui laudatam fidei formulam & suscepit, & suis ad eundem Gregorium litteris inseruit, eaque ipsius nomine in Concilio Lugdunensi a Georgio Acropolita & magno Logotheta subscripta est. In ea porro se credere probebatur, quod *vere tenet & fideliter docet & praedicat sancta Romana Ecclesia*, atque inter cetera, *Spiritum Sanctum ex Patre Filioque procedentem*. Quam fidei Confessionem si Romani Pontifices, vel antequam Occumenica Synodus haberetur, jure a Graecorum Imperatore elicuerunt; quanto magis Eugenio licuisset ad eandem absque nova exaniine profitendam Graecos adigere, postquam etiam fuerat secundi Lugdunensis Concilii auctoritate firmata? Sed indulgentia, ut jam diximus, uti voluit, quo eos paulatim ad perfectam fidei confessionem proveheret. Hinc ea de Spiritus Sancti processione controversia semel composita, petiit a Grecis Eugenius, ut tandem id etiam faterentur: quod *licuerit ei (Romano Pontifici) suo jure, quippe ut summo Pontifici, adjicere quod sacro Symbolo additis*. Id jam Graeci in Synodo Lugdunensi palam professi fuerant. Quare summae temeritatis fuit, quod ab eis Eugenio responsum est, *Postulat esse iniquissimum*, nec eis licitum esse affirmare; *facultatem esse Romanae Ecclesiae addendi seu demendi absque suis fratribus Patriarchis*. Qua tamen de re nulli in Romanos Pontifices a Graecis in Synodo Lugdunensi quae-

quaestio commota est, sed hoc tantum petierunt, ut eis & deinceps liceret sine voce *Filioque* Symbolum recitare. Quis ergo inficias iverit potuisse Eugenium jure suo adigere Graecos ad ea sine ulla retractatione servanda & profitenda, quae ipsi antea in Synodo Lugdunensi sollemniter professi fuerant; adeoque ad Apostolicam optimi Principis oeconomiam & indulgentiam referendum esse, quod res jure suo prorsus irretractabiles retractari in Synodo Florentina permiserit, quo rursus communi consensione sancirentur? Sed propius ad praesentem disputationem pertinent quae sequuntur.

„ Jam ne quid super sit dubii, operae pretium erit diligenter excutere quae dixerint, quum de privilegiis
 „ Papae speciatim ageretur, ac postrema haec, de quibus nunc agimus, Decreti verba expenduntur:
 „ Graeci igitur sic loquuntur: *Admissimus privilegia Papae, praeter quam duo, ne convocet Synodum Oecumenicam sine Imperatore & Patriarchis, si conveniant. Quod si advocentur, nec veniant, ne impedimento sint quominus Synodus fiat. Alterum est, ut si quis putet se ab aliquo Patriarcharum pati injuriam, & veniat qui interposuit appellationem, ne Patriarchae ipsi se sistant judicandos, sed Papa mittat Inquisitorem ad Provincias κατὰ χώραν & ibi in partibus τοῦ κόσμου judicetur. Hic Papa respondit, se velle omnia Ecclesiae suae privilegia; velletque ad se fieri appellationes: nec non regere & pascere universam Christi Ecclesiam uti ovium Pastorem. Auctoritatem praeterea sibi esse & facultatem celebrandi Synodum Oecumenicam, quum opus fuerit: & omnes Patriarchas parere ejus voluntati.* „ Haec postulata Papae, subjungit Bossuetius,
 „ omnia

„ omnia ad absoluta imperia revocantis Graeci respue-
„ re: Gestaque Synodi sic habent: *Imperator his auditis*
„ *desperavit, nec aliud respondit nisi: curate de nostra*
„ *hinc professione.* Adeo abhorrebant ab eo, ut Eccle-
„ sia non Canone, sed voluntate regeretur. Ergo con-
„ ventum est, ut Papa regeret Dei Ecclesiam, *salvis*
„ *Patriarcharum Orientis privilegiis & juribus:* quo
„ fixum, valere Canones, nec mero imperio regi Ec-
„ clesiam, omnibusque Ecclesiis sua jura canonico ordi-
„ ne fundata constare.

Mirum est, quam varias in his Meldenſis Episcopi scriptis personas induat Eugenius. Nunc enim Constantiensis Canones probat, amplectitur, exosculatur; adeoque se se & Conciliis Oecumenicis subditum & eorum decretis obnoxium agnoscit ac profitetur; ab eaque mente quam longissime abest, qua nihil absurdius aut iniquius fingi possit, ut graviora & difficiliora, de Pontificis Primatu, a Graecis, quam a Latinis peteret. Nunc autem cum Graecis agens, ad absoluta imperia omnia revocat, totaque inter ipsum & Graecorum Imperatorem concertatio in eo posita est; an ratione primatus Pontifici inesset auctoritas ad Ecclesiam universalem mera voluntate & imperio, an Canone certisque legibus gubernandam. Et iis quidem Pontificis postulatis nihil absurdius aut iniquius fingi posse, ex Meldenſis Episcopi sententia dicendum est; ut contra, nihil aequius ea Graecorum resistentia, ne ad illa Pontificis postulata consentire compellerentur. Secus tamen de his judicabit qui animum advertet ad ea, quae olim Graeci in secunda Synodo Lugdunensi professi fuerant. His enim & duo illa capita continebantur, de quibus nunc Eugenio litem

O o o

Grae-

Graeci & eorum Imperator intendunt . Nam quod pertinet ad Patriarcharum Orientis privilegia , ea tunc illi ad Sedem Apostolicam velut ad fontem & originem referebant . Fatebantur enim imprimis , quod ad Sedem Apostolicam *poteſt gravatus quilibet ſuper negotiis ad Eccleſiaſticum forum pertinentibus appellare : & in omnibus cauſſis ad examen Eccleſiaſticum ſpectantibus ad ipſius poteſt judicium recurri* . Fatebantur etiã , quod eidem omnes Eccleſiae ſunt ſubjectae , & quod ipſarum Praelati ipſi obedientiam & reverentiam exhibent . Praeterea nihil ſe admiſſuros ſpondebant contra doctrinam ſanctorum generalium Conciliorum , quae celebrata ſunt a ſpirituali dominatione Eccleſiae Romanae *εὐχαριſτεύοντες τῇ πνευματικῇ διαποτείᾳ τῆς ἐκκλησίας τῆς Ῥώμης* . Quibus verbis celebrandorum generalium Conciliorum auctoritatem & poteſtatem ad Sedem Apostolicam referebant . Denique ſic eſſe fatebantur penes Eccleſiam Romanam plenitudinem poteſtatis , ut ceteras , ac potiſſimum Patriarchales , in partem ſollicitudinis admitteret : quas etiã *diverſis privilegiis eadem Romana Eccleſia decoravit* . Porro , ut Johannes Provincialis in Synodo Florentina publice praedicabat , mens non erat Eugenii aliarum Eccleſiarum privilegia turbare , quae ex Juſtiniano Imperatore probabat , ex ipſa Eccleſia Romana velut ex legum & Sacerdotii fonte tanquam rivulos profluxiſſe : *Nec Eccleſia Romana vult turbare ejus (Conſtantinopolitanae Eccleſiae) privilegia , imo & ſibi & aliis Eccleſiis vult ſervare privilegia . Unde Juſtinianus dicit : Legum originem antiqua Roma ſortita eſt , & ſummi Pontificatus apicem , & Sacerdotii fontem apud eam eſſe , nemo dubitat . Si ergo eſt fons*
Sa-

Sacerdotii; ergo sicut ex fonte derivantur rivuli, ita aliae Ecclesiae ut filiae vocantur in partem sollicitudinis ad conservandam Ecclesiae unitatem, & ex ea suam originem habuerunt. Quis ergo dixerit, inde recte probari Pontificem Conciliorum legibus esse subditum, quod aliis Ecclesiis privilegia servare velit, quorum ipse auctor, fons & origo sit? An si Rex Christianissimus dixerit, suae mentis ac voluntatis esse, quod Parisiensi Parlamento, quae ipse vel ejus Decessores privilegia dedissent, facta testaque serventur; inde quisquam jure colligeret, cum Regni legibus esse subditum, nec mero & absoluto imperio Galliae Regnum administrari?

Pergit Illustrissimus Adversarius: „Cum in eo jam
 „ essent ut conscriberetur Decretum unionis, de Papae
 „ privilegiis sic erat scriptum, ut Papa illa habeat *juxta*
 „ *determinationem sacrae Scripturae, & dicta San-*
 „ *ctorum*. Obstitit his verbis Imperator: *An si quis,*
 „ inquit, *Sanctorum in Epistola honoret Papam, exci-*
 „ *piet hoc pro privilegio?* Ac Papae significavit, ut aut
 „ hoc corrigeret, aut de reditu ejus cogitaret: cogebat-
 „ que apponi, *juxta tenorem Canonum, & non, se-*
 „ *cundum dicta Sanctorum*. Nunc nemo negaverit,
 „ quin tunc vel maxime quaereretur, non de consti-
 „ tuenda, sed de regenda suisque coërcenda finibus Pon-
 „ tificia potestate, cum Graeci vererentur, ne ambigua
 „ formula Papae privilegia in immensum tenderent.
 „ Quare hinc omnis unionis spes rursus pene concidit:
 „ patetque omnino intellexisse Graecos, regendam qui-
 „ dem a Papa universam Ecclesiam juxta Canones, non
 „ mero Imperio & absoluta voluntate. Quae cum diu
 „ multumque agitata fuissent, atque omnino Eugenius

„ quidem vocem illam, *secundum dicta Patrum*, ve-
 „ hementer urget, Graeci vocis ambiguitate deterri-
 „ haud minore vehementia repugnarent: tandem con-
 „ ventum est, *ut Papa habeat sua privilegia juxta Ca-*
 „ *nones & dicta Sanctorum, sacramque Scripturam*
 „ *& Acta Synodorum*: quae collecta simul veram ad-
 „ ministrandae Ecclesiae formam exhibebant: patebat-
 „ que, a Synodo Papalis potestatis non solum habendae
 „ firmamentum, sed etiam exercendae regulam fuisse
 „ praescriptam. Hic Eugenius *dicta Sanctorum* toties
 „ inculcata omisit, ut quae jam ipsi quoque ambigua
 „ viderentur, convenitque utraque Ecclesia in hanc for-
 „ mam, ut Papae quidem inesset a Christo tradita re-
 „ gendae ac pascendae Ecclesiae potestas, sed secundum
 „ eum modum, qui & in Gestis Oecumenicorum Con-
 „ ciliarum, & in sacris Canonibus continetur. Quae
 „ quidem Gersoni, Alliacensi, nostrisque concinunt,
 „ in Papa agnoscendam plenitudinem potestatis, sed a
 „ Conciliis sacrisque Canonibus regulandam. Hinc au-
 „ tem videre est, cur jam Eugenius hanc vocem, *dicta*
 „ *Sanctorum*, hic omitti ipse vellet, quippe cum haud
 „ satis apta videretur regulandae Pontificiae potestati,
 „ quae Canonibus quidem & Conciliis Oecumenicis,
 „ non autem dictis Sanctorum generatim sumptis pare-
 „ re soleat.

Quicumque hanc Bossuetianae disputationis perico-
 pen legerit, in eam facile sententiam descendet, Grae-
 cos, ac potissimum eorum Imperatorem, auctores fuisse,
 ut articulo de Primatu Pontificis illa adderentur ver-
 ba: *Quemadmodum etiam &c.* & haec itidem: *salvis*
privilegiis Patriarcharum & juribus eorum: Latinos
 autem,

autem, atque inprimis Eugenium, qui Pontificiam auctoritatem nullis voluissent finibus circumscribi, invitos & pene coactos his tandem additamentis consensisse, quibus regendae Ecclesiae forma praescriberetur, & Pontificia potestas certis quibusdam limitibus coerceretur. Sed hanc meram fabulam esse, ex Actis demonstramus: ex quibus aperte constat, Eugenium ultro Graecorum Imperatori & selectis Episcopis praefatum articulum cum iis clausulis communicasse, ut de illo deliberarent.

Composita namque ea quae maxime urgebat de processione Spiritus Sancti controversia, Eugenius Rhuteno, Nicaeno & Mitylenensi Episcopis, ad se post obitum Patriarchae, feria sexta XII. Junii accedentibus, significavit, velle se, quo unionis opus felicius ac perfectius absolveretur, ut de his etiam articulis convenirent; scilicet de fermentato & azymo, de Purgatorio, de Primatu Papae, de additione vocis *Filioque*, & de Mysteriorum consecratione. In Actis autem Latinis adjungitur, Ecclesiae Romanae de iisdem articulis doctrinam scripto fuisse traditam, & eisdem Episcopis ab Eugenio communicatam, ut illam Imperatori ac ceteris adprobarent. Articulus autem de Primatu & de Juribus Patriarcharum iis omnino verbis conceptus erat, quibus deinde in fidei Definitione seu Decreto Unionis expositus est: deque illo feria tertia XVI. Junii coram Pontifice & Imperatore, aliisque Latinis & Graecis Patribus copiose disseruit Johannes Provincialis, singula ferme ejus verba testimoniis Patrum, Actis Conciliorum, & Romanorum Pontificum Synodicis epistolis confirmando. Haec tamen Johannis disputatio Imperatori non multum pla-

placuisse videtur, ac vix consensit, breve scriptum seu *schedulam* a Pontifice accipere, qua memorati Articuli continebantur: Quibus ab ipso una cum selectis suae Nationis Episcopis diligentius examinatis; *reperimus*, inquit Graecorum Actorum editor, *ea quinque Latinorum Postulata aequa omnia & recta & compulimus valde Imperatorem dicentes: nos omnia recipimus, & statuatur rei finis*. Verum Imperator varias circa Articulum de Primatu difficultates excitavit, velut intelligere cupiens, quatenam speciatim privilegia Latini iis verbis Romano Pontifici vindicarent. Quare iussus est Provincialis rursus de privilegiis Papae disserere ea oratione, quam Acta Graeca ad Feriam quintam XVIII. Junii referre videntur, Acta vero Latina ad diem XX. referunt. Ex hac Johannis disputatione habemus, quoniam scrupuli Imperatoris animum pungerent. Id vero potissimum animadversione dignum est, quod quum in praecedenti disputatione Johannes Provincialis Agathonis, Hadriani, & Concilii Chalcedonensis Synodicas epistolas laudasset, testimonia ex iis excerpta minus apta Imperatori visa fuerant Catholico dogmati confirmando, & probationem ex solis canonibus & capitulis Conciliorum institui voluisset. Verba ipsa adferenda sunt, ut quae maximam lucem sequentibus Gestis affundant: *Et quo ad Epistolas*, inquit Johannes, *ita dicebatur: Quod illa, quae nos inducebamus ex his epistolis, videbantur verba per modum bonoris posita, & videbantur ut non facerent auctoritatem quam voluissent; sed voluissent videre Canones aut Capitula Conciliorum, ex quibus ea possunt colligi, quae ponuntur in cedula & capitulo Primatus*. Quem scrupulum Dissertator Graecis eximere

mere conatus est uberrime demonstrando, quod *Epistolae illae Decretales, quum omnes essent epistolae Synodicae, non minorem habent auctoritatem, quam ipsi Canones.*

Hinc vero plura colligere atque intelligere est. Et primo quidem cur Latini quum ad concinnandam fidei definitionem perventum est, articulo de privilegiis Papae adjungi voluerint, *quemadmodum definiunt sacrae litterae ac dicta Sanctorum*: quae verba articulus ille initio non habebat. Scilicet volebant Latini, Sanctorum dictis, ac praecipue Romanorum Pontificum & Conciliorum epistolis, adferere auctoritatem, quam Graeci illis adimere satagebant. Secundo intelligitur, cur ea verba Imperatori displicuerint, & cur ea e Decreto Unionis expungi omnino voluerit, & eorum loco illa reponi, *Juxta tenorem Canonum*. Quod nimirum Canones quidem generalium Conciliorum idoneum Catholico dogmati confirmando praebere argumentum existimabat, secus autem dicta vel scripta Sanctorum: quorum pleraque praesertim in epistolis, ex officio quodam potius quam ex vera animi sententia ducta atque profecta esse suspicabatur. Quis enim horumce duorum locorum consonantiam non statim animadvertat? *Videbantur*, inquit Johannes Provincialis, *verba per modum honoris posita*, nec satis habere auctoritatis; ideoque Canones & Capitula Conciliorum in medium adferri voluissent. In Actis autem Graecis rejicit Imperator a fidei definitione *dicta Sanctorum*, & *Canones* substitui petit, quoniam ad stabiliendas firmandasque Romanae Sedis prerogativas, minus illi apta & idonea videntur, quae Sancti officii causa in suis ad Pontificem litteris conscriptis-

sent:

sent: *An si quis Sanctorum in epistola honorat Papam, excipiet hoc pro privilegio?* At vero Latini graviter ferentes Sanctorum dictis abrogari a Graecis auctoritatem, toto pectore contendebant, ut dicta Sanctorum in definitione retinerentur: *Unde enim, inquiebant, melius possumus habere primatum, quam ex dictis Sanctorum?* Ac rursus: *de dictis vero (Sanctorum) quo pacto illa velimus in definitione allegari, nihil ambigimus; quum dicta Sanctorum sint, & per ea Symbolum quoque fidei compositum sit, & sacrificium, & quidquid Canonibus continetur; ac sine dictis Sanctorum nihil sit factum.* Quae plurimum valebant ad commendandam eorum dictorum auctoritatem. Graeci autem nova adhibita consultatione, consenserunt quidem, ut dicta Sanctorum allegarentur, sed una cum sacris litteris, & Canonibus & Actis Conciliorum: *Nos (Graeci) consilium iniimus, scripsimusque habenda esse a Papa sua privilegia juxta Canones & dicta Sanctorum, sacramque Scripturam & Acta Synodorum.* Quod Latinis satisfecisse non videtur, quod Sanctorum dictis ideo Synodorum Acta & Canones jungerentur, quod sola illorum auctoritas Graecis minus efficax videretur. Eaque fuisse ratio videtur, cur tandem Sanctorum dicta penitus omissa sint, & articulus in definitionem insertus, cujusmodi ab initio fuerat concinnatus, & per schedam Graecis a Pontifice communicatus, cum sola clausula: *Quemadmodum etiam &c.* Ex quibus omnibus tertio loco colligitur, in eo positam fuisse hanc Latinos inter & Graecos disputationem, an in dictis Sanctorum satis momenti esset ad probandam Romani Pontificis potestatem super universam Ecclesiam, adfirmantibus Latinis, Graecis autem

autem negantibus. Quarto ex jam dictis habemus, quod quamquam, uti recte superius adnotatum est, tum Graecus tum Latinus Decreti Unionis textus pro originariis haberi debeant; attamen si invicem conferantur, Graecus potius pro Latini textus versione habendus est, quam contra. Articuli enim de quibus nunc agimus, primum seorsim a Latinis conscripti sunt, Graecisque traditi ut illos examinarent, deinde vero totidem verbis in decretum inserti sunt. Quod quum etiam graece vulgari placuisset, in Graecum sermonem fuerunt articuli convertendi. Non ergo a Launoio, Maimburgo, Nat. Alex. Petro de Marca & aliis fuerat Latinus textus sollicitandus, nec Latinus Interpres exagitandus, perinde ac illud Graecorum καὶ ὁ ἑρμηνεύει &c. minus bene reddiderit: *Quemadmodum etiam* &c. sed contra, si haec examussum haud sibi responderent, Graecus interpres culpandus esset, quod Latinum, *Quemadmodum etiam* &c. haud recte vertisset, καὶ ὁ ἑρμηνεύει &c. ac proinde textus Latinus regula esse debet, ad quam Graecus exigendus est, secus atque Adversarii opinantur. Unde tandem efficitur, quod quum Latini, atque imprimis Eugenius, ea verba protulerint, non utique ad coercendam subjiendamque & circumscribendam certis legibus ac finibus Pontificiam potestatem; sed tantum ad demonstrandum, pascendi ac regendi potestatem plenam, quae praecedentibus verbis definitur, a Conciliis quoque generalibus, sacrisque Canonibus fuisse agnitam; & hic sensus hac voce, *etiam*, maxime comprehendatur; imo ea, vel ipsis fatentibus Adversariis, alium sensum prorsus excludat. Graecas etiam voces ad eundem sensum, qui & illis, ut supra ostendimus, omnino nativus est, esse referendas,

das, nulla ratione dubitandum est. Adeoque Graeci & Latini plenam potestatem nullisque limitibus circumscriptam ad regendam universalem Ecclesiam Romano Pontifici velut a Conciliis generalibus sacrisque eorum Canonibus agnitam, in Florentina Synodo eisdem verbis & uno atque eodem spiritu asseruerunt.

CAPUT XII. &c.

- „ An Constantiensibus Decretis & Conciliari
 „ potestati noceat, quod Ecclesiae pars
 „ maxima, ac praesertim Galli Eu-
 „ genio Basileae damnato ac
 „ deposito obedirent?

Quamquam Meldensis Episcopus Basileensium Acta post translationem aperte defendere & propugnare non audet; atramen & eorum impietatem extenuare quantum potest, & elevare conatur, & omnes industriae suae nervos intendit, ut ex eis quidpiam eliciat, quod ad firmandam Constantiensium & priorum Basileensium Decretorum auctoritatem utcumque facere videatur. Quo enim alio pertinent haec praesentis Capituli verba? „ Jamque Viris maximis neque „ Eugenianae, neque Basileensium partes plane probantur: Cardinalis Sancti Petri viri sancti & gravissimi sententia placebat, qui neque hos neque illos laudare solebat. *Et haec rursus*: Hic iterum in Rudia „ scindi Christiana Respublica; pars hunc (*Eugenium*), „ pars illum (*Felicem*) colere, pars neutrum, & exspectare, quid copiosior ac certior Synodus declaret: „ ret:

„ ret : Hanc sententiam Germani maxime sequebantur .
„ Galli quum Basileensem Synodum colerent , Floren-
„ tinam respuerent , Constantiensia omnia confirma-
„ rent ; simul Pontificem Eugenium agnoscebant , de-
„ positionem non admittebant , quod malorum Eccle-
„ siae recordati , schisma vererentur . Quo, inquam ,
haec verba pertinent , nisi ut nobis insinuetur , tam altas
profundasque in hominum mentibus egisse radices Con-
stantiensium Decretorum & priorum Basileensium aucto-
ritatem , ut adhuc post translationem , & quum toties
imminuta fuisset , Basileensi Synodo plerique adhaeren-
dum existimarint , vel generatim & in omnibus ejus de-
cretis ; vel iis solum exceptis quae ad Eugenii exaucto-
rationem , & Felicis electionem pertinerent : quum inter-
rim tota ferme Germania inter Eugenium & Synodum
Florentinam , & Felicem ac Synodum Basileensem an-
ceps haereret ? Huc etiam spectant nobilissimarum Uni-
versitatum , Basileensibus & Felici propter Constantien-
sium Canonum auctoritatem obsequentium , testimonia ,
quae capite sequenti laudantur . Huc & impensum Ca-
pite XIV. eisdem Felici & Basileensibus studium ad eos
a schismatis infamia vindicandos . Huc & locus Johan-
nis de Paradiso Carthusiani de rebus Basileensibus Capi-
te XV. descriptus . Huc denique commendata Cap. XVI.
Christianissimi Regis sollicitudo , qua *Basileensium Pa-
trum ad finem usque honori consuluerit* .

Quantum in ejusmodi Gestis ac testimoniis , pro
tuenda adferendaque Constantiensium Decretorum au-
ctoritate , ponderis ac momenti sit , haud segniter nobis
excutiendum est . Nam prima fronte tantum abest , ut
hinc pro illis Decretis elici posse argumenta credamus ;

ut in his potius iudicio nostro perspicue cernere sit, quam perniciofa & infesta Ecclesiasticae paci & unitati sint Constantiensia Sessiois V. Decreta, nisi ad tempus schismatis & dubiorum Pontificum referantur. Ad hanc ergo thesim confirmandam, & in optimo lumine collocandam tota quae sequitur disputatio collimat. Sed ejus probatio ex pluribus veluti principiis pender, atque informanda est: quae etsi certissima sunt, ac reapse veluti principiorum loco adsumi deberent, in iis tamen seorsim & singulatim confirmandis immorari libet, quod Adversarii rebus etiam clarissimis tenebras offundere, & firmissimas suis impetere argumentis audent. Ut uno autem velut intuitu mentem hac de re meam, ac totius disputationis oeconomiam Lector perspectam habeat; sciat illam sequentibus Propositionibus contineri, quae totidem Articulis argumenta suppeditabunt.

1. Eugenius IV. Synodum Basilea Ferrariam & Florentiam jure ac legitime transtulit.
2. Synodus Florentina non solum legitima, verum & Occumenica fuit.
3. Synodus Basileensis post translationem illegitimum & schismaticum conventiculum.
4. Eugenii per Pseudo-Synodum Basileensem exauctoratio schismaticum & sacrilegum facinus.
5. Atque idem iudicium de Felicis Pseudo-Pontificis electione ferendum est.
6. Quod Basileenses, quum pax inita est, neque ut schismatici habiti sunt, neque schismaticorum poenis affecti, mera Nicolai V. & Sedis Apostolicae indulgentia fuit.
7. Eorum, qui post translationem Basileensibus quo-

quocunque modo adhaerunt, aut nec illis nec Eugenio obediendum existimarunt, nulla omnino ratio habenda est, omnemque illis auctoritatem merito abrogamus.

8. In Pseudo-Synodo Basileensi cernere apertissime est, quam perniciofa & infesta Ecclesiasticae paci & unitati sint Constantiensis Sessionis V. Decreta, nisi ad tempus schismatis & dubiorum Pontificum referantur.

ARTICULUS PRIMUS.

*Eugenius IV. Synodum Basilea Ferrariam
primum, deinde Florentiam, jure
ac legitime transfudit.*

Penes Romanos Pontifices plenum jus esse ac potestatem transferendorum atque etiam dirimendorum generalium Conciliorum, saltem ubi legitima, gravis & idonea causa intervenerit, ne ipse quidem Illustrissimus Adversarius diffiteri audeat: quinimo identidem monet, id sibi tantum non probari (a): „A Papa dissolvi posse Concilia, nulla idonea causa, nulla necessitate, atque ut Eugenius ejusque adulescentes (*quum Synodum primo dirimere aut transferre voluit*) ferebant, pro suae libitu voluntatis. *Ac rursum* (b): „Ut ut is maxime dissolvere possit Synodum, non tamen pro libito, non indicta causa, non levi quacunque objecta difficultate, sed magna gravique, quae tota Ecclesia merito commoveri possit. *Et infra* (c): „Ut Pontifex Concilia indicere, transferre ac dissolvere

„ re

(a) Cap. XVII.

(b) Ibid.

(c) Cap. XVIII.

„ re valeat ; *quum videlicet iusta & idonea caussa in-*
 „ *tercedit* ; nec ad quaestionem nostram , nec ad ea quae
 „ tuemur Decreta Constantiensia pertinere , saepe osten-

dimus . Eandemque sententiam cum Nicolaus Cusanus Natali Alex. memoratus , tum Natalis ipse (*a*) , & alii tuentur .

Plures autem ejusmodi dirimendae seu transferendae iustas & legitimas causas Johannes Turrecremata recenset (*b*) : Primo quidem & maxime quum contingeret , quod ad eorum hominum impietatem Synodus esset devoluta , quorum studia privata in eversionem fidei , pacis , & unitatis agerentur ; sicut ait Leo Papa de secunda Synodo Ephesina . Secundo , quum Episcoporum , qui Patres & columnae dicuntur Ecclesiae , iudicio contempto , inferiores multitudine seditiosa praevalente , Hierarchicum ordinem molirentur confundere . Tertio , quum Synodus in tyrannidem esset conversa . Quarto , quum aliqui in Concilio novis ausibus usurpare jura Apostolici Principatus pertinaci animositate contenderent . Quinto , si Concilium faveret hostibus Romanae Ecclesiae ac Summi Pontificis . Sexto , quum Princeps terrae , in qua Synodum celebrari contingeret , suorum Clericorum multitudine fretus , adversus Romanum Pontificem vel Romanam Ecclesiam , vel alios Christiani orbis Praelatos quidquam moliri praesumeret . Septimo , quum Synodus in eorum esset potestate , qui vel ob principatus sui gloriam augendam , vel quodcunque aliud temporale commodum obtinendum , ultra debitum terminum producere ac prorogare Synodum nite-

ren-

(*a*) Dissert. X. in Hist. Eccles. Saec. XV. & XVI art. I.

(*b*) Lib. III. de Eccl. cap. LXVII.

rentur. Octavo, quum studiose & ex industria id ageretur, ut tandem Romano Pontifice decedente, ad Synodum futuri Pontificis electio perveniret. Quin ejusmodi causae dirimendae vel alio transferendae Synodo aptae & idoneae sint, inscriptae cordibus hominum sensus communis notiones persuadere videntur; atque adeo nemo nisi ratione vacuus, ut idem Auctor subjungit, effutire ac docere audeat, Romanum Pontificem, universalis Ecclesiae Principem, Pastorem & Custodem non posse, Patribus etiam invitis ac repugnantibus, Concilium solvere, aut alio transferre. Plane, inquit, non nisi insanus contenderet, quod turba Luporum ovibus insidiante, integrum non sit Pastori, sine eorum consensu Lupis illis occurrere, eosque in fugam convertere, & eorum dirimere societatem.

His concinens Nicolaus Cusanus in epistola ad Rodericum Archidiaconum de Trevino, adhuc etiam disertius addit, nullius generalis Concilii Canone vel decreto eripi posse hanc Romano Pontifici potestatem; ut Ecclesiae periclitanti subveniat, & pro variis locorum ac temporum circumstantiis, fidei religionisque negotia propagationemque promoveat: *Sacri namque Principis Ecclesiae manus ad aedificationem extensas, nulla observantia aut regula Patrum, etiam in Conciliis, impediri, inhiberi que posse.... Nam sicut non est potestas Pontificis ad destructionem bene actorum per Patres: ita non est potestas sub caelo, quae ejus possit auctoritatem minuere, quominus errantes ad ovile reducat.* Quibus & gemina sunt, quae Julianus Cardinalis S. Angeli Synodi Basileensis Praefes Oratoribus Eugenii totius Concilii nomine respondit: *Per Concilium*

cilium statuta in nullo derogant suae potestati, quin pro tempore, loco, causis & personis, utilitate vel necessitate suadente, moderari dispensareque possit, atque uti summi Principis & Imperatoris, quae ab eo auferri nequit. Quapropter neque ipsum Basileense Concilium translationem simpliciter prohibuisse, Nat. Alex. observat, sed quae sine iustis causis & manifestis fieret, ut constat, inquit, ex Sessione XIX. in qua Synodus Patres obsecrat, ne dissolutioni consensum praestent, nec loci mutationem fieri permittant, nisi ex iustis causis & manifestis.

Quam iustae autem essent ac manifestae transferendae Synodi Basileensis rationes, quam evidens illarum acquitas, liquet, inquit mox laudatus Auctor, ex Eugenii IV. Diplomate, quod incipit, *Doctores Gentium*, quo illas in totius orbis Christiani luce collocavit. Et ex Actis liquido constat, eas fere omnes intercessisse, quae supra ex Turrecremata descriptae sunt: in quibus certe colligendis haec ipsa Basileensis Synodi Acta prae oculis habuisse videtur, quin & diserte testatur; statim subjungens, dirimendarum Synodorum causas, quas enarraverat, ad arbitrium non fuisse confectas, *tam ex antiquorum quorundam Conciliorum practica, quam ex praevis Basileensium studiis*, esse perspectum. Et alia quidem dissimulari utcumque ab Eugenio potuissent: illud vero nullo modo, quod paucorum pervicacia, obstinatione & privatis studiis, revocandis ad unitatem fidei & Ecclesiasticae communionis innumeris gentibus, insuperabile objiceretur impedimentum. Graeci enim jam inde a multo tempore nefario schismate conflato, ut in unam
teter-

ram cum Latinis Ecclesiam coalescerent, Synodum celebrari poscebant, cui Romanus Pontifex praesideret: (Eugenius IV. Diplomate, *Doctōis Gentium*, & Diplom. *Salvatoris*, nec non Silvester Syropulus in *Historia vera Unionis non verae* Segm. 2. cap. 23. & 35.) Eugenius autem, auctore Augustino Patricio in Hist. Conc. Basileens. cap. XLII. *Propter adversam valetudinem, propter res novas, & periculum Provinciarum Ecclesiae, Italia excedere* minime poterat. Itaque unio tanta, tamque diu optata, nisi in locum alium revocata fuisset, exitum habere non poterat. Ergone aequo animo tulisset optimus Pater hanc sibi eripi occasionem tot segreget filios ad dulcis Parentis sinum revocandi? Tulissetne Latinae Ecclesiae a Graecis indignum facinus exprobrari: quod quum eorum Imperator ac totus Oriens Patriam ultro relinquerent, Latinorum Synodus iis excipiendis, ne in vicinam quidem Italiam movere se vellet, Avenionem anteferreret procul a Graecis dissitam, cujus nulla mentio in pactis facta esset? Haec enim, ut ipse Bossuetius agnoscit, Graecorum Legati querebantur, ac palam Basileae sollenni edita contestatione declararant, non adventuros Graecos, & eorum Imperatorem & Patriarcham nisi in Italiam, totamque schismatis culpam in Latinos Latinamque Ecclesiam conferebant. Tantamne ergo optimus Pontifex sponsae suae adspergi maculam passurus unquam fuisset? Quum ergo transferendae in Italiam Synodi tam gravis esset causa, ut gravior occurrere & excogitari non possit; quis neget Eugenium Ferrariam primum, deinde Florentiam iuste ac legitime Synodum transtulisse? Ne-

Qq q

que

que porro deerant aliae rationes, quae supra ex Tur-
recremata recensitae sunt, ut ex dicendis Lector fa-
cile perspectum & exploratum habebit.

ARTICULUS SECUNDUS.

*Synodus Florentina non solum legitima, verum
& Oecumenica fuit.*

Synodum Florentinam jure ac legitime fuisse coa-
ctam, paucis sed solide mea quidem sententia ex-
tequutus sum articulo superiore; sequitur ut doceam
audiendos illos non esse, qui numero Oecumenicarum
habendam esse incipientur. Quoniam vero & in hac
Thesi propugnanda consentientes habeo Galliae Theo-
logos, quorum aliqui illam data opera, & specialibus
dissertationibus illustrarunt, ac praesertim Nat. Alex.
qui in omnium manibus est; ideo paucis & hic me
expediam, satisque habebo, ut hanc ipsam Gallorum
Theologorum nobiscum consensionem breviter iis edif-
feram, qui ex nostratibus paullo incuriosiores sunt,
& in harumce rerum ignoratione versantur. Proba-
tiones autem ex supplici Libello depromam, quem Fa-
cultas Theologica Parisiensis anno 1738. Regi obtu-
lit adversus Decretum Parlamenti, (*l'Arrest du Par-
lement*) quo aliquot Theses confixae fuerant, quibus
Florentina Synodus inter Oecumenicas recenseri vide-
batur.

Contendit autem Facultas, in dubium revoca-
ri non posse, (a) quin memorata Synodus in nume-

ro

(a) Il n'étoit pas douteux, mis depuis long-temps au nombr^e
que le Concile de Florence ne soit de Conciles généraux.

ro generalium Conciliorum jam inde etiam in Galliis habeatur. Id enim sequentia documenta clare luculenterque demonstrare.

1. Clerus Gallicanus an. 1655. & 1656. Florentinam Synodum, perinde ac Lateranensem IV. & Tridentinam, fundamentum esse voluit Censurae, quam in sollennibus horumce annorum comitiis adornavit.

2. In omnibus Conciliorum editionibus cum vetustioribus, tum recentioribus, & in ipsa etiam Luparense an. 1644. Regio jussu, & ipso quoque spectante Parlamento adornata, Concilium Florentinum inter Oecumenica recensetur. Quod si aliqua de hac re difficultas excitata est ob postremam editionem anno 1715. Luparaeis typis confectam, eam Regia Majestas neglexit in Decreto, quo illam editionem in publicam prodire lucem permisit. Nam inter conditiones, quas Decretum exigebat, nulla titulum sollicitabat, quo perinde atque in omnibus Conciliorum praecedentibus collectionibus, Florentina Synodus exornabatur.

3. In variis Theologorum Operum editionibus, quae quinquaginta ab hinc annis Regio etiam Privilegio munitae prodierunt, & quas Parlamentum ignorare non potuit, & in iis etiam, quae Auctores habent, de quibus Libertatum Ecclesiae Gallicanae Defensoribus nulla potest esse suspicio; & quos certum est ab iis opinionibus quam longissime abfuisse, quae Regni placitis adversentur; in iis, inquam, Operibus, non modo Florentina Synodus velut oecumenica celebratur, verum & hic ei titulus specialibus dis-

sertationibus, & magno rationum pondere vindicatur.

4. D. Bossuetius Episcopus Meldensis, cujus testimonium majoris etiam momenti est, & quem Parlamentum ipsum fatetur, debitam Sedi Apostolicae fidelitatem cum amore ac defensione Gallicanarum libertatum miro foedere conjunxisse, Concilium Florentinum velut Oecumenicum celebravit in eo ipso Opere, quod tam circumspice & accurate pro defensione Gallicanae declarationis elaboravit.

Denique hanc esse omnium Academiarum Regni sententiam, & quod praecipue ad Parisiensem pertinet, recensitis omnibus Thesis, quae ab anno 1650. ad annum usque 1700. in Theologica Facultate publice expositae ac propugnatae sunt, constituisse, nullam earum, quae generalium Conciliorum catalogum exhibet, ab eo censu Florentinum eximere; imo nullam omnino repertam esse, quae non illud nominatim eo numero comprehendat. Hinc ulli censurae obnoxium esse non posse Theologiae Baccalaureum, qui ejusmodi testium auctoritate fretus, & eorum vestigiis insistens, Florentinam Synodum eodem titulo exornet. His autem permota rationibus Regia Majestas eodem anno 1738. XVII. Kal. Aprilis Decretum tulit, quo illud Parlamenti, de quo Facultas conquerebatur, abrogatum est, eidemque Theologicae Facultati restituta libertas est, ut Florentinum Concilium Oecumenici titulo in suis Thesis insigniret.

Quum igitur de hac re Parisiensibus Theologis Gallicanisque Patribus nobiscum conveniat; palam est, illos audiendos non esse, si qui sint e Foro, qui e generalium Conciliorum censu Florentinum Concilium expun-

expunctum vellent. Horum enim non est, ut in eodem Libello Sacra Facultas observat, de id genus quaestionibus judicare: quos sibi merito Ecclesia vindicat, ad quam solam pertinet cum auctoritate decernere, ex quibus fontibus fidei dogmata haurienda sint; quoque obsequio excipienda sint decreta, quae in harumce rerum declaratione versentur.

ARTICULUS TERTIUS.

Synodus Basileensis post translationem illegitimum & schismaticum conventiculum fuit.

HAec propositio ex duabus praecedentibus sponte fluit. Quum enim non sit nisi unica Ecclesia, similiter esse non potest nisi unicum universale Concilium, quod eam vere ac legitime repraesentet: At ejusmodi Concilium, quod jure sibi ac legitime Oecumenici titulum adferebat, vereque universalem repraesentabat Ecclesiam, post translationem, primum Ferrariae, deinde Florentiae celebrabatur: Ergo quod eodem tempore Basileae habebatur, illegitimum erat & schismaticum Conventiculum.

Eodem argumento freta & ipsa Synodus Basileensis quemcumque alium coetum, qui, quum ipsa vigeret, sub generalis Concilii nomine cogeretur, velut schismaticorum conventiculum Sessione VIII. in antecessum damnaverat: *Sicut unica est Ecclesia Sancta Catholica, Christo ipse sponso dicente: Una est columna mea, dilecta mea, & fidei articulo hoc proficiente; quum*

quum unitas divisionem non capiat: sic esse non potest nisi unicum generale Concilium, ipsam Sanctam Ecclesiam Catholicam repraesentans. Quum ergo in hac Civitate Basileensi generale Concilium institutum & stabilitum sit, & in Spiritu Sancto legitime congregatum; isto durante Concilio, constat aliud generale Concilium alibi esse non posse. Quicumque igitur, hoc sacro durante Concilio, aliam congregationem sub nomine generalis Concilii erigere aut facere praesumpserit, non Catholicae Ecclesiae Concilium, sed schismaticorum conventiculum erigere aut facere convincitur. Quae ratio optima est, & in quamcunque generalem Synodum quadrat, quoad illa legitime perseverat. Sed ut legitime perseveret, satis non est, ut praecedentis Oecumenicae Synodi, aut Romani Pontificis decreto coacta & constituta sit; sed praeterea requiritur, ut eodem auctore Pontifice continuetur. Nam si ab eo jure ac legitime revocetur, & alio transferatur, legitimum Concilium ibi esse definit, ubi primùm coactum fuerat, & esse incipit quo a Romano Pontifice translatum est: quod proinde unicum deinceps est Ecclesiae Catholicae Concilium, praeter quod quicumque alius coetus schismaticorum conventiculum est.

Profecto, si ad legitimam Synodum constituentem satis est, eam a Romano Pontifice congregari: semel autem congregatae adest Spiritus Sanctus, qui eam per se & *ἀντὶς* regat, foveat, gubernet, auctoritatem & vigorem ei conferat, eamque in unitate conservet, ne a quoquam transferri, dissolvi aut everti possit; nulla ratio erit, cur non & Ephesinum Latrocinium

in

in Conciliorum numerum recipiamus. Nam & Ephesi Concilium Leo Magnus Romanus Pontifex congregaverat, & suos illo Legatos direxerat, & eo plurimi ex toto Oriente Episcopi convenerant. Quibus rebus Basileensi Latrocinio Ephesinum illud antecellebat, ut Eugenio scribens Ambrosius Camaldulensis observat: qui & S. Leonis exemplo illum urget, ut Basileensem Synagogam conterat, quemadmodum ille olim Ephesinam everterat: *Exerendae omnes ingenii vires, tota expedienda est auctoritas, ne premamur aut opprimamur imprudentes. Cogenda videtur a Domino nostro legitima Synodus Sacerdotum, exemplo Leonis Papae, qui contra secundam Ephesinam Synodum, & quidem constantem ex Sacerdotibus plurimis, non ex vulgari multitudine, neque nisi Apostolica auctoritate conflatam, atque ab se primum probatam, aliud Romae Concilium collegit, in quo Gestis illius irritavit: quia in perniciem Ecclesiasticae disciplinae & fidei Catholicae everfionem emanarant.* Neque dixeris, Dioscori tyrannide, qui praeter fas Ephesi praecerat, ereptam fuisse Patribus libertatem: nam nec meliore jure Pseudo-Cardinalis Arelatensis Basileensibus praecerat, nec minore vi ac furore tyrannidem inter eos exercebat; ut vel a suis symmystis velut alter Catilina, a nostris autem velut alter Dioscorus haberetur: eoque duce, & ad omne scelus inconditam multitudinem inflammante, Basileensis conventus, ut idem Ambrosius subjungit, non secus atque ille Ephesinus, in apertum Latrocinium evasit: *An vero Ephesina Synodus est quam ista nocentior? Quis hoc sapiat nisi plane desipiat?*

Meri-

Merito proinde Carolum VII. Francorum Regem Eugenius monuit, ne perfidorum hominum synagoga, & scelerum colluviem Concilii nomine cohonestaret. Qui enim unicum esse fatetur Ecclesiae caput & principem, is nunquam disjunctorum ab eo membrorum conspirationem Synodi aut Concilii nomine decorabit: *Quos* (Basileenses) *a te Concilii verbo* appellari, vide ne nimis alienum sit a tam Catholici Principis gravitate. Quomodo enim potes, quum verissime teneas & rectissime profitearis, nos esse verum Vicarium Jesu Christi, atque unicum Ecclesiae suae sponsum, conventiculam illam Concilium nominare? An scelerum omnium & scandalorum sentina reproba, & sententiis Apostolicis damnata, nomen Synodi meretur? Ille potius malignantium conventus est, ac Phariseorum Christum tradentium perfida synagoga &c. Et infra: Hos tua serenitas seditiosos, damnatos, a Dei Ecclesia praecisos, & tanquam mundi purgamenta reiectos, nequaquam amplius Concilium nominet: quum nullum Concilium legitimum unquam fuerit, neque etiam esse possit, nisi Sedis Apostolicae auctoritate suffultum.

ARTICULUS QUARTUS.

Eugenii IV. per Pseudo-Synodum Basileensem exauctoratio, tanquam schismaticum & sacrilegum facinus habenda est.

Quamquam gravissimorum scelerum reus olim erat Dioscorus Alex. Episcopus, omnium tamen

teterrimum Chalcedonensibus Patribus visum est, quod anathema in S. Leonem intorquere veritus non est, & haec ipsius damnationis ac dejectionis potissima causa fuit. Ita enim Synodus in Relatione ad Leonem ipsum: *Qui multa prius pessime operatus, pirora sequentibus superavit.* Tum depositos ab eo Flavianum & Eusebium, restitutum Eutychetem commemorant. *Et post haec omnia, insuper & contra ipsum, cui vineae custodia a Salvatore commissae est, extendit insaniam: id est contra tuam quoque Apostolicam Sanctitatem: & excommunicationem meditatus est contra te, qui corpus Ecclesiae unire festinas.* Non de injusta, ut recte Cl. Thomassinus (a) monet, sed de qualicunque excommunicatione in primae Sedis Antistitem lata conqueritur Synodus, nempe contra Apostolicam & primam Sedem, contra eum, cui jure divino vineae totius, seu Ecclesiae universae principatus competit, qui adeo pro capitis officio membra totius corporis lacera sibi recolligere laborabat. Ideo hoc ejus facinore cetera obduci & obliterari ait Synodus. Et in Epistola ad Marcianum Imperatorem post Act. 3. depositionis jaculo confixum testatur Dioscorum, quod Leonis epistolam in Ephesina Synodo secunda legi renuisset; quod Eutychetem a Leone damnatum restituisset; tertio denique *quoniam super alias suas nequitias, & adversus ipsam Sedem Apostolicam latravit, & excommunicationis litteras adversus Sanctissimum & Beatissimum Papam Leonem facere conatus est.* Et Act. 3. in ipsa

R r r

adver-

(a) Dissert. XII. in Conc Chalcedon. num. XXXV. Idem observat & Nicolaus I. ep. VIII. ad Michaelem Imperatorem.

adversus Dioscorum sententia: *Quoniam secundis excessibus priorem iniquitatem valde transcendit: praesumpsit enim & excommunicationem dictare adversus sanctissimum & beatissimum Archiepiscopum magnae Romae Leonem. Et ibidem ex Libello Theodori Diaconi: Nihil arbitrans quod ab ipso in sanctae & sacrae memoriae Flavianum commissum est, insuper ad mala majora se vertit: Excommunicationem namque faciens contra sanctissimum & beatissimum Apostolicae sedis magnae Romae Episcopum Leonem, suasisit subscribere eis, qui cum ipso de Aegypto exierunt, sanctissimis Episcopis plus minus numero decem aliquoties comminans, aliquoties decipiens &c. Anatolius denique (cujus hac de re sententiam probat & laudat Nicolaus Primus epistola octava ad Michaëlem Imperatorem) ejusdem Synodi Chalcedonensis Actione quinta testis locupletissimus est: Propter fidem non est damnatus Dioscorus, sed quia excommunicationem fecit Domino Archiepiscopo Leoni. Ergo haec summa flagitii fuit, constitutum divino jure Caput Ecclesiae impetere, & ideo Ecclesiam ipsam obtruncare voluisse. Quod Patribus gravius & immanius flagitium visum est, quam S. Flaviani iniquissima depositio & immanissima caedes; quam Eutychetis restitutio, quam Eutychianae perfidiae approbatio, quam Synodi Ephesinae grassatio & tyrannis, quam fidei Catholicae, quantum in ipso fuit, constupratio.*

Quorsum haec nobis commemorata sunt? Nimirum ut hinc Lector intelligat, quam gravi se & inexpiablem scelere obstrinxerit ille Pseudo-Cardinalis Arc-

laten-

latensis, quum velut alter Dioscorus seditionis facem praefrens, consentientibus sibi ad omne flagitium *Episcopis plus minus numero decem*, damnationis & ejectionis sententiam in Eugenium IV. conscribere ausus est, & Ecclesiam Catholicam nefario schismate lacera-
re, & ab eo divellere; quum ille non secus atque olim Magnus Leo ejusdem *corpus Ecclesiae unire festinabat*, & Graecos, Armenos, Syros, Aegyptios, Aethiopes, pluribus jam saeculis a vera Ecclesia disjunctos, velut membra corporis sui lacera, caelo votis ejus obsecundante, felici jam exitu & prospero conatu sibi recolligere satagebat.

Nec est profecto, quod ad elevandam immanissimi sceleris atrocitatem, Adversarii objiciant Synodi Oecumenicae auctoritatem. Nam primo ejusdem Cardinalis Arelatensis dolo, fraude, perfidia malisque artibus effectum est, ut a paucis Episcopis, & ab incondita minorum Clericorum, imo & Laicorum turba, tanquam fidei veritas sanciretur, subditam & obnoxiam esse Oecumenicis Synodis Romanorum Pontificum potestatem: deinde qua fronte idem Arelatensis & *Episcopi plus minus numero decem*, contradicentibus omnium fere Catholicarum Nationum ac Principum Oratoribus, Concilium Oecumenicum facere praesumebant? Id certe non elevat, sed exaggerat supra illam Dioscori, Arelatensis & Symmystarum culpam, eosque communi odio, invidiae & indignationi objicit: quum inauditae & intolerabilis impudentiae sit, quod decem Episcopi se universalem Ecclesiam repraesentare mentiantur, quod in se totam ejus auctoritatem translatam esse definiant, quod ipsi invitae ac reluctanti caput obtruncare moliantur.

tur, quod leges disperfis per univerſum orbem Episcopis dictare non erubescant. Praeterea in multitudine Episcoporum Capiti suo adhaerentium inesse Ecclesiam, & cum Ecclesia individuo nexu conjunctam, de rebus ad fidem ejusque regimen pertinentibus decernendi, summam & ineluctabilem auctoritatem, plerique ex nostris Adversariis fatentur, & adversus Refractarios ac rerum novarum cupidos validissimis argumentis propugnant. Quis ergo nisi eadem, qua illi decem Episcopi vesania, & schismatico furore ac vertigine actus, in tam paucis ab Eugenio damnatis reponat agnoscatque Ecclesiae Catholicae potestatem; & non potius in multitudine Occidentalium & Orientalium Episcoporum, qui Eugenio velut unico & legitimo Christianae Reipublicae capiti adhaerebant? Denique etsi Basileensium conventus, spectato Episcoporum numero, Oecumenicus haberi posset; attamen quum Acta in Eugenum falsis criminationibus innitantur, omniaque in eum ab insanientibus & vesano furore percitis ac fanaticis gesta sint, eodem loco habendus esset, atque Ariminense, Ephesinum, & Iconomachorum sub Constantino Copronymo Latrocinium: Quae sane Episcoporum coitiones Basileensem numero superabant, ut haec illis audaciae, temeritatis & impudentiae palmam praeripuisse videtur. Quae Lector ut sibi facile persuadeat, non Augustinum Patritium Eugenianarum partium Scriptorem adiri ab eo volumus, sed Aeneam Silvium, qui tum adversus Eugenum Basileensibus adhaerebat, & rerum ab eis inique gestarum historiam litteris consignavit: quam semel percurrisse sufficit, ut quisque a studio partium alienus Basileensium conventum non utique pro generali Con-

Concilio habeat, quod regeret Spiritus Sanctus, Spiritus unitatis & pacis, sed ut Satanae synagogam detestetur, quam Spiritus ille nequam in omne scelus inflammaret.

ARTICULUS QUINTUS.

*De Felicis V. in Eugenii locum subrogatione,
idem ac de ipsius Eugenii ejectione,
ferendum iudicium est.*

DEjecto, quantum in ipsis erat, Eugenio, ad consummandum iniquitatis negotium, de Pseudo-Pontifice in ejus locum subrogando, actum a Basileensibus est: de quo nihil nobis ultra dicendum esset, nisi & in Idoli hujus erectione longe luculentius schismaticus eorum furor & insania demonstraretur. Quum enim Eugenium deposuerunt, spes illis aliqua esse poterat, probaturum forsitan orbem terrarum, aut maximam ejus partem eorum iudicium. Sed quum universa Ecclesia constanter in Eugenii fide perseveraret, omnesque Principes ac Nationes sacrilegum eorum facinus detestarentur: quis rogo furor ulterius procedere ad alterum Ecclesiae reluctanti Caput imponendum? Id certe a schismatis piaculo excusari nulla ratione potest. Vera enim Ecclesia & Catholica, & una est: Catholica autem dicitur, quoniam per omnes Nationes diffusa est. Una vero, quoniam sub uno Capite continetur. Ille ergo schismaticus est, qui aliud sibi caput constituit, praeter illud, quod universa per orbem Ecclesia veneratur & colitur, & in qua diffusae dispersaeque per omnes Gentes Eccle-

Ecclesiae, velut in centro unitatis & communionis invicem conjunguntur. Hoc argumento Sanctus Cyprianus Novatianos, hoc Sancti Optatus Milevitanus & Augustinus Donatistas schismatis arguerunt. Quum enim, inquit laudatus Optatus sub initium libri secundi de schismate Donatistarum, sit una Ecclesia, & apud omnes haereticos & schismaticos esse non possit, restat ut uno loco sit. Ergo vel apud Donatistas, vel apud Catholicos: sed apud Donatistas esse non potest, quoniam ibi tantum esset, ubi Donatistae sunt; & ubi Donatistae non sunt, illa non esset. Sunt autem Donatistae solum in angulo Africae, in aliis vero innumeris Occidentis & Orientis Provinciis Regnisque non sunt; in quibus tamen esse oportet Ecclesiam, quae vere Catholica, & Christi hereditas sit: Ergo ut in particula Africae, in angulo parvae regionis, apud vos esse possit: apud nos in alia parte Africae non erit? In Hispaniis, in Gallia, in Italia ubi vos non estis, non erit? Si apud vos tantummodo esse vultis, in tribus Pannoniis, in Dacia, Moesia, Thracia, Achaia, Macedonia; & in tota Graecia, ubi vos non estis, non erit? Ut apud vos esse possit, in Ponto, Galatia, Cappadocia, Pamphilia, Phrygia, Cilicia, & in tribus Syriis, & in duabus Armeniis, & in tota Aegypto, & in Mesopotamia, ubi vos non estis, non erit? Et per tot innumerabiles insulas, & ceteras Provincias, quae numerari vix possunt, ubi vos non estis, non erit? Ubi ergo erit proprietas Catholici nominis, quum inde dicta sit Catholica, quod sit rationabilis & ubique diffusa? Annon haec optime quadrant & in paucos illos Basilicenses, qui novum sibi caput constituentes, aliam ab ea, quae per totum

totum terrarum orbem diffundebatur, in illo Germaniae angulo Ecclesiam condiderunt? Ergo ut in particula Germaniae, in angulo parvae regionis apud vos esse possit; in alia Germaniae parte non erit? In Hispaniis, in Gallia, in Anglia, in Italia, ubi vos non estis, non erit? Si apud vos tantummodo esse vultis, in Hungaria, Polonia, Britannia, ubi vos non estis, non erit? Ut apud vos esse possit, in tota Graecia, in magna Russia; in Iberia, in duabus Armeniis, in Syria, in Aegypto, & in Aethiopia, nuper Eugenio & Ecclesiae Romanae reconciliatis, ubi vos non estis, non erit? Si autem propter unum aut alterum Siculum, & Hispanum, & Germanum, aut propter aliquot Insubres & Sabaudos, Basileenses sibi de variarum gentium communione gratulentur, & ad Catholici nominis decus adspirare se posse confidant: occurret illis S. Augustinus, qui in suis omnibus adversus eosdem Donatistas libris hanc velut certissimam discernendi Ecclesiam Catholicam ab haereticorum & schismaticorum conventiculis notam seu regulam tradit, quod ubicunque ii sunt, & illa est: sed non contra ubicunque illa est, & ii reperiuntur. Sic lib. IV. cont. Crescon. cap. LX. *Ecclesia Catholica, quae, sicut ait Cyprianus (a), ramos suos per universam terram copia ubertatis extendit, etiam in eas terras extenditur, ubi jacent illa quaeque in sua regione fragmenta: illa vero singula, quaecunque ipsa distenditur, non sunt; quamvis aliquando vix rarissima folia ex eorum ariditate ventus elationis in peregrina dispergat.* Et infra cap. LXI. *Veruntamen ubicunque sunt isti, (haeretici vel schismatici) illic Catholica, sicut in Africa, ubi &*

vos

(a) Lib. de Unit. Ecclesiae.

vos, non autem ubicunque Catholica est, aut vos estis, aut haeresis quaelibet illorum. Unde apparet, quae sit arbor ramos suos per universam terram copia ubertatis extendens, & qui sint rami fracti non habentes vitam radices, atque in suis quique jacentes & arescentes locis. Hac nota seu regula dijudicari ac discerni facile potest, ubinam esset per ea tempora, de quibus agimus, Catholica Ecclesia, & ubi schismatica separatio. Ubicunque erant, qui Pseudo-Pontificem venerabantur, sicut in Italia, Gallia, Germania, Hispania, Sicilia; ibi & illi erant qui Eugenio constanter adhaerebant: non autem ubicunque illi erant, qui Eugenium velut legitimum Pastorem ac Pontificem agnoscebant; velut in tot Italiae Provinciis, in tot Hispaniarum, Galliarum, & Angliae Regnis, in duplici Graecorum Imperio, Constantinopolitano & Trapezuntio, in Armenia, Russia, Iberia, Syria, Aegypto, Aethiopia; & illi erant qui Pseudo-Felici tanquam Pontifici obsequebantur. Unde apparet, ut ejusdem Augustini verbis utamur, eos a nobis exisse, non nos ab ipsis: quia nos etiam in his terris eramus, ubi ipsi erant: illi autem quaquaversus nos eramus, non nisi forte peregrinantes inveniebantur. Sed ad Optatum redeamus.

Ergo, inquit, probavimus eam esse Ecclesiam Catholicam, quae est in toto terrarum orbe diffusa, ejus jam commemoranda sunt ornamenta: & videndum, ubi sint quinque dotes inter quas Cathedra est prima Videndum est ergo, quis, & ubi, prior Cathedram sederit. Subjungitque, nec ipsos Donatistas latere, aut ab eis negari posse: Petro primò Cathedram Episcopalem esse collatam in qua una Cathedra uni-

unitas ab omnibus servaretur. Adtexitque seriem Romanorum Pontificum a Petro usque ad Siricium; bodie, inquit, qui noster est socius: cum quo nobiscum totus orbis commercio formatarum in una communionis societate concordat. Haud secus & ii qui Eugenio adhacerebant, Romanorum Pontificum Successionem a Petro & Siricio ad ipsum usque Eugenium perducentes, per eum cum toto terrarum orbe in una communionis societate conjungebantur. In hoc enim velut in centro Ecclesiasticae communionis & unitatis omnes, ut jam ostendimus, Gentes firmiter & inconcussae persistebant, quum pauci primi & secundi ordinis Sacerdotes, Synodi Oecumenicae auctoritatem temere usurpantes, aliud sibi caput constituerunt: de quo merito cum eodem Optato quaerere possumus, ubi federit, & cui successerit: non enim utique in Petri Cathedra, quam neque oculis novit, & in qua sedentem Eugenium universae gentes colebant; neque ipsi Eugenio, & per eum Petro successit, qui antequam ille decederet, Apostolatam ejus invasisit: Profecto huc optime facit locus ille S. Cypriani de Cornelio & Novatiano in Epistola ad Antonianum: Factus est autem Cornelius Episcopus quum Fabiani locus, id est, quum locus Petri & gradus Cathedrae Sacerdotalis vacaret: quo occupato de Dei voluntate, atque omnium nostrum consensione firmato, quisquis jam Episcopus fieri voluerit, foris fiat necesse est; nec habeat Ecclesiasticam ordinationem qui Ecclesiae non tenet unitatem. Quisquis ille fuerit, multum de se licet jactans, & sibi plurimum vindicans, profanus est, alienus est, foris est. Et quum post primum secundus esse non possit, quisquis post unum, qui

Sff
solus

*solus esse debeat, factus est, non jam secundus ille, sed nullus est. Quae omnia quam bene in Eugenium & Pseudo-Felicem transferri & aptari possint, nobis etiam tacentibus, Lector intelligit. Factus est enim & Eugenius Episcopus, quum locus Martini V. id est, quum locus Petri & Cathedrae Sacerdotalis vacaret. Quo proinde occupato, & omnium, ut jam vidimus, gentium consensione firmato, quisquis Episcopus fieri voluit, tanquam profanus & alienus, imo & nullus habendus est, quum post primum secundus esse non possit. In quem etiam & illa optime quadrant ejusdem S. Cypriani in Epistola ad Magnum: *Ecclesia enim una est, quae una & intus esse & foris non potest. Si enim apud Novatianum (apud Felicem) est, apud Cornelium (apud Eugenium) non fuit. Si vero apud Cornelium (apud Eugenium) fuit, qui Fabiano (qui Martino V.) Episcopo legitima ordinatione successit. Novatianus (Felix) in Ecclesia ordinatus non est, nec Episcopus computari potest, qui Evangelica & Apostolica traditione contempta, nemini succedens a se ipso ortus est.**

ARTICULUS SEXTUS.

Quod Basileenses, quum pax inita est, neque ut schismatici habiti, neque schismaticorum poenis affecti sunt, mera Nicolai V. & Sedis Apostolicae indulgentia fuit.

A Schismatis proprie dicti labe purgandos esse Basileenses, etiam postquam Eugenium IV. in jus
vo-

vocaverunt & depoſuerunt, ac Felicem V. elegerunt, Boſſuetius aliiſque Pariſienſes Theologi contendunt, iis ferme ducti fretique rationibus, quas Diſſert. VIII. in Hiſt. Eccleſiaſt. ſaec. XV. & XVI. Nat. Alex. congeſſit. Quarum fundamentum eſt, eos proprie ſchiſmaticos eſſe, qui propria ſponte & intentione ſe ab Eccleſiae unitate, vel ab Eccleſia matrice fidei, & omnium Chriſtianorum Matre, & Eccleſiaſticae communionis centro, fonte & radice diſjungunt: At Synodus Baſileenſis, inquit laudatus Auſtor, propria ſponte & intentione ſe ab Eccleſiae unitate non ſeparavit; ſed Eccleſiae matriſ fidei, & omnium Chriſtianorum Matri ſemper adhaeſit, & Sedi Apoſtolicae, Romanae Eccleſiae, ceteriſque Chriſtiani & Catholici orbis Eccleſiis, communione conjunctiſſima fuit: quamvis ab Eugenio IV. obedientia ſeceſſerit, eumque exauſtorarit, ac Felicem in ejus locum ſubrogarit, ob rationes quas legitimas & canonicas eſſe exiſtimabat: Ergo quamvis nec Eugenio juſta exauſtoratio, nec Felicis canonica fuerit electio; dubio tamen jure Baſileenſes Patres, Felicem V. & eorum Obedientias, bona fides a ſchiſmatis labe purgavit; maxime cum ipſi juſ a partibus ſtare ſuis perſuaſum haberent.

Verumenimvero ut quis ſchiſmatis labem ac reatum contrahat, haud opus eſt, ut ſe ex animo & ex certa conceptaque ſententia & voluntate ab Eccleſiae ſeparet communione, vel ejusdem Eccleſiae laceret ac praecidat unitatem: ſatis enim eſt ut id opere ipſo perficiat. Quemadmodum ut quis velut homicida puniatur, nemo quaerit, an gladium in hominis viſcera adegerit ea mente ac voluntate ut ei vitam adimeret: ſatis

est enim ut sciens prudensque id egerit, unde mors ejus certissime sequutura erat. Quicumque ergo Romanum Pontificem in Petri Cathedra legitima ordinatione constitutum, & in cujus communione permaneat orbis terrarum, abjicit & contemnit, seseque ab ejus communione disjungit, ut alium sibi Pontificem caputque constituat, quacumque mente & voluntate id faciat, is opere ipso se se ab Ecclesiae Catholicae communione divellit, ejusque scindit ac lacerat unitatem. Perinde enim est, ex S. Cypriani sententia, alium Episcopum & aliam Ecclesiam constituere, ejusve corpus laniare & Christi membra discerpere: *Gravat enim me atque contristat.... quum vos illic comperissem, contra Ecclesiasticam dispositionem, contra Evangelicam legem, contra institutionis Catholicae unitatem, alium Episcopum fieri consensisse, id est, quod nec fas est nec licet fieri, Ecclesiam aliam constitui, Christi membra discerpi, Dominici gregis animum & corpus unum discissa accumulatione lacerari.* Haec S. Martyr epist. XLIV. ad aliquot Romanos Confessores, qui se a Cornelio disjunxerant, & in Novatiani ordinationem consenserant. Et hi quidem, ut ex sequente ejusdem Cornelii ad ipsum Cyprianum epistola habemus, haud se se ea mente a Cornelio sejunxerant, & ad Novatiani partes contulerant, ut Ecclesiae Catholicae scinderent unitatem, sed a schismaticis circumventi, eadem atque Basileenses *bona fide*, Novatiani potius quam Cornelii legitimam & canonicam ordinationem existimant. Haec enim S. Cornelius eorum verba, ad suam communionem & Ecclesiae castra postliminio revertentium, in ea epistola exhibet: *Impossuram passi sumus: circumventi sumus perfidiae loquacitate*

citae captiosa. Nam etsi videbamur quasi quamdam communicationem cum schismatico & haeretico homine habuisse, sincera tamen mens nostra semper in Ecclesia fuit. Nec enim ignoramus, unum Deum esse, & unum Christum esse Dominum, quem confessi sumus, unum Spiritum Sanctum, unum Episcopum in Catholica Ecclesia esse debere: Nec tamen sincera illa eorum mens, qua se in Ecclesia semper fuisse jactabant, & unum Episcopum in Ecclesia esse debere cognoverant, illos apud Cyprianum a schismatis & haereticis labe purgavit, ut constat ex sequentibus S. Martyris verbis epistola XLVII. ad S. Cornelium, qua illi de eorumdem Confessorum reditu gratulatur: gaudetque illos ad Ecclesiam Catholicam regressos esse, id est, errore deposito, & schismatico imo haeretico furore deserto, unitatis ac veritatis domicilium fidei sanitate repetiisse. Et epist. LI. gratulatoria ad eosdem Confessores: Simpliciter enim quid in meo corde fuerit debetis audire. Dolebam vehementer & graviter angebar, quod eis communicare non possem, quos semel diligere coepissem. Posteaquam vos de carcere prodeuntes schismaticus & haereticus error excepit, sic res erat quasi vestra gloria in carcere remansisset. Quae etiam in medium adferre libuit, ut Adversarios reprimamus, qui Basileensium Heroum sanctitatem miris encomiis celebrant, quo illos bona fide egisse credamus, atque adeo a schismatis proprie dicti scelere immunes habeamus. At quae major gloria, aut quod illustrius verae germanaeque pietatis testimonium, quam Christum coram tyrannis esse confessum, ac diu in squallore carceris jacuisse? Nec tamen satis Confessorum maculam, Cypriano iudice, aut

aut bona fides, aut Confessionis decus absterferat.

Est etiam in eisdem Cornelii ad Cyprianum de Confessorum reditu litteris aliquid animadvertendum, quod viam nobis sternat ad alterum argumentum labefactandum, quo maxime apud Adversarios stat nititurque Basileensium causa. Quod scilicet nulla ipsis, ut Nat. Alex. observat, Ecclesiasticae erga schismaticos disciplinae lex imposita est: sed ipsos inter & Nicolaum V. aquis pene & honorificis conditionibus transactum est, ut in causis obscuris, & ubi dubia sunt jura partium, fieri solet. Atqui & Cornelius; ut ex laudatis litteris constat, multum severitatis in recipiendis schismaticis servari solitae erga Confessores remisit, oblivione deletis, ac divino judicio reservatis, quae in ipsum antea gessissent: *His ita gestis, in Presbyterium venerunt Maximus, Urbanus, Sidonius & Macarius, & plerique fratres qui se eis adjunxerant, summis precibus desiderantes, ut ea quae ante fuerant gesta, in oblivionem caderent, nullaue eorum mentio haberetur, perinde atque si nihil esset vel commissum vel dictum, omnibus invicem remisissis &c.* Quorum se precibus annuisse SS. Pontifex sequentibus verbis testatur: *Quapropter Maximum Presbyterum locum suum agnoscere iussimus: ceteros cum ingenti populi suffragio recepimus. Omnia autem remisimus Deo omnipotenti, in cujus potestate sunt omnia reservata.* Quod autem magis mirandum est & observatione dignum, Confessores quoque suam cum Cornelio Pontifice ejusque Clero reconciliationem Cypriano per litteras significantes; iisdem fere verbis utuntur, remque ita describunt, perin-

perinde atque aquis pene utrinque conditionibus, ut in caussis dubiis, & ubi obscura sunt jura partium fieri solet, inita pax esset: *certi sumus*, inquit (a), *frater carissime, te quoque nobiscum pari voto congaudere, nos habito consilio, utilitatibus Ecclesiae & paci magis consulentes, omnibus rebus praetermissis, & judicio Dei servatis, cum Cornelio Episcopo nostro, & cum universo Clero pacem fecisse*. Quibus verbis plane significare videntur, intervenisse aliquid in hoc negotio, quod utrinque remitteretur, seque & causam suam, & jura quibus ea niteretur, studio pacis & ob Ecclesiae commodum neglexisse, ac Dei judicio reservasse. Neque Cornelius de se ac de suis juribus secus, ut jam vidimus, sentiebat ac loquebatur. Nec opus est ut hic alia Ecclesiae Catholicae Sedisque Apostolicae in schismaticos & haereticos indulgentiae ac lenitatis exempla congeramus. Obvia enim sunt, eisque ipsi etiam Adversarii, ubi illorum proposito favent, passim utuntur; ut hinc velle Basileenses a schismatis labe purgare, aut ab ea immunes fuisse demonstrare, perinde sit atque vel ipsis Donatistis argumenta suppeditare, quibus facile majores suos ab eodem scelere absolverent, cum quibus scilicet „ Episcopi Africani, ut ipse Bossuetius animad- „ vertit (b), ductore potissimum Augustino, maxi- „ mo illo post Apostolos caritatis & auctoritatis Ec- „ clesiasticae assertore, quasi aequo jure disceptarunt. Nihil ergo hoc argumento effici potest, quum nimium late pateat: quandoquidem in omnibus fere schis- mati-

(a) Epist. L. inter Cyprianicas.

(b) Sup. lib. IX. cap. XXVII.

maticis, ac potissimum in eorum Principibus & auctoribus ad unitatem Catholicam revocandis, multa tolerarit indulseritque Sedes Apostolica: quae illius quidem maternam sollicitudinem caritatemque commendant, sed schismaticis a scelere vindicandis idoneo argumento non sunt.

Et certe quis non merae indulgentiae fuisse dicat, quod miseris illis Conventus Basileensis, toties concissi, dissecti atque imminuti, reliquiis Lausanae congregatis, permisum est, ut hunc adhuc titulum usurparent: *Sancta haec Synodus, in Spiritu Sancto legitime congregata, universalem Ecclesiam repraesentans*; ut Nicolaum V., Thomam adhuc ab eis appellatum, Romanum Pontificem eligerent; ut omnibus Christianis mandarent praeciperentque, ut eitanquam vero, unico & indubitato Pontifici obedirent? Hosne ludicros sane & scenicos actus Bosuetium & Nat. Alex. proferre non pudet in argumentum pacis Nicolaum V. & Pseudo-Felicem aequis pene conditionibus initae, ut in rebus dubiis, & ubi obscura sunt jura partium, fieri solet? Quis enim non rideat, quum videt paucos Sabaudos ab omnibus desertos, Oecumenicae Synodi ac totius Ecclesiae auctoritatem adfiscere, Pontificem Christianis omnibus colendum constituere, denique leges condere, quibus universa Christiana Respublica obsequatur? Non minus tamen illi ridiculi sunt, qui haec aliquo jure, vel saltem dubio & obscuro, a Basileensium factione, seu potius perditae illius factionis frustulo gesta fuisse, & ipsi sibi persuadent, & aliis persuadere nituntur.

Haud me latet, quam haec Adversarii ex nobis audi-

audire, aegro animo ferant; qui videlicet (a) *non modo summae temeritatis, sed etiam manifestae impietatis* esse definiunt, quod Cardinali Arelatenſi ejuſque Symmyſtis, viris eorum opinione ſanctiſſimis, & ab omni dolo, & mendacio, & prava affectione alienis, aut falſitas imputetur, aut bona eorum fides in ſuſpicionem adducatur, nedum ut illos ſchiſmaticae pravitatis inſimulemus. Quamobrem Nat. Alex. de Lauſanenſibus illis Decretis loquens: „ Futile porro eſt; „ inquit (b), quod ſcribit Odoricus Raynaldus haec „ decreta Patres Baſilcenſes per ſimulationem ſeu fi- „ ctionem juris edidiſſe; ſicut illiberale eſt, inhone- „ ſtum, & Auctore Eccleſiaſtico indignum, quod ad „ marginem horum Decretorum, quibus condendis „ praeerat Vir ſanctiſſimus Ludovicus Cardinalis Arelatenſis, adſcribit convitium, *Mentiantur*. Haec „ enimvero ab ipsis animo ſincero edita, & ex per- „ ſuaſione ſui juris, quod ad extremum uſque tuiti „ ſunt, probat Aſtorum fides, quam non evertunt „ Raynaldi & aliorum figmenta & convitia. Sed nos utrumque certum & exploratum habemus, nimirum & plura illos temere, caeco impetu ac praecipitanter egiſſe, nec malis artibus ac fraudibus abſtinuiſſe: & illam, quam Nat. praedicat ſui juris perſuaſionem; quod ad extremum uſque tuiti ſint, non lumini & virtuti, ſed mentis caecitati ac pervicaciae, cujuſmodi ſchiſmaticorum eſſe ſolet, adſcribendam. Quod poſtremum accuſationis noſtrae caput articulo octavo proſequemur: interim autem quae ad primum pertinent

T t t

expe-

(a) Sup. lib. IX. cap. V.

(b) Diſſert. VIII. in Hiſt. Eccleſ. Saec. XV. & XVI. num VIII.

expediamus, neque in iis quae proposita sunt comprobandis alium adhibebimus testem, quam Aeneam Silvium, qui, ut saepe dictum est, id temporis Basileensibus adhaerebat.

Is igitur lib. 1. Comment. de Gestis Concilii Basileensis, earum Congregationum Gesta describens, in quibus de octo illis notissimis Thesis, quas *fidei veritates* temere nuncupabant, & quibus sibi ad Eugenium velut haereticum exauctorandum Basileenses aditum munierunt, disceptatum est; ita ut sequitur sanctissimos illos viros modeste, amice ac pacifice, & ut decet sanctos, inter se differentes inducit. „ Plus
 „ tamen, *inquit* (a), inter eos processum est, quam
 „ disputandi modus exigeret: neque enim a probris
 „ abstinerunt. *Et rursus* (b): Nec res sine violentia fuit Erat namque ubique clamor, ubique
 „ strepitus, ubique jurgia effundebantur.... Episcopi cum Episcopis, inferiores cum inferioribus verbales habebant rixas, omniaque contentionibus &
 „ probris insonabant. Quae quum vidisset Ludovicus Patriarcha Aquilejensis & eo zelo, quem ad
 „ Ecclesiam gerit universalem, versus ad Panormitanum & Ludovicum Protonotarium: *Ne credite*,
 „ *inquit*, *rem sic abire: Germanorum nescitis mores;*
 „ *nempe si sic proceditur, nequaquam fas erit integris* *banc Provinciam exire capitibus.* Quo verbo
 „ veluti caelesti fulmine tacti Panormitanus, Ludovicus, ac Mediolanensis, uno impetu adsurgentes:
 „ *Libertas*, *inquiunt*, *nobis eripitur? En quid est,*
 „ *quod*

(a) Pag. 6.

(b) Pag. 27. & sequ.

„ quod frangenda nobis capita Patriarchæ minatur ?
 Quæ mox subijcio proprius ad Arelatensem pertinent,
 cui non modo sine summa temeritate, verum & sine
 manifesta impietate, imputari non posse falsitatem,
 Bossuetius monet; cui mendacii dicam conscribere,
 Natali Alex. inhonestum, illiberale, & Auctore Ec-
 clestiastico indignum facinus est. At ejus non unum
 aut alterum mendacium, sed narrationem mendacii a
 capite ad calcem contextam idem Aeneas Silvius re-
 censet, quam legere est eodem libro pag. 31. Est etiam
 lectu dignum elogium, quo eundem Arelatensem
 Mediolanensis Archiepiscopus exornavit, quod pag. 32.
 idem Historicus refert: „ Mediolanensis quoque Ar-
 „ chiepiscopus, quod ejus rei periculosissimum exi-
 „ tum judicabat, in auctorem Arelatensem acerbissi-
 „ me convitiatus est: Ipsum esse, qui Copistarum Pac-
 „ dagogorumque gregem nutriret, remque cum eis fi-
 „ dei concluderet; alium eum Catilinam vocitans ad
 „ quem desperati & perdit omnes confugerent: illo-
 „ rumque ipsum esse principem, & cum illis Eccle-
 „ siam regere. Quæ quidem convitia aut falsa, aut
 vera sunt. Si falsa; quo loco habebimus Mediolanen-
 sem Praefulem, qui hæc maledicta in Collegam, Ro-
 mana purpura ornatum, & Concilii Praesidem jacta-
 re veritus non est? Si vera; quo loco habebimus Car-
 dinalem Arelatensem, qui se in illa conjuratione al-
 terum Catilinam, vel in eo Latrocinio alterum Dio-
 scorum exhibuerit, ad quem desperati & perdit omnes
 confugerent, quorum fretus temeritate & Episcopos
 contemptui haberet, & Romanis Pontificibus Sedique
 Apostolicæ immineret, & universam Christianam

Rempubliam perturbaret? Et ego quidem ut vera fuisse existimem, quae Arelatensi Mediolanensis Archiepiscopus exprobravit, facit auctoritas ac testimonium Cardinalis Turrecrematae, S. Antonini Archiepiscopi Florentini, & aliorum, quibus memoriae proditum est (a), interfuisse ac subscripsisse Eugenii depositioni & Monachos apostatas, & Episcopos jamdudum ab ipso Eugenio propter eorum scelera Episcopatu dejectos: facit etiam, quod Romanos impiae in Eugenium conjurationis auctores, qui & illum Roma abire compulerant, & abeuntem imo & fugientem armis insequuti fuerant, non modo tanto facinore nondum expiato, verum & illud adspersis Pontifici calumniis nefarie tuentes, in suum recipere coetum iidem Basileenses veriti non sunt, de quo graves querelae apud Principes ab Eugenio effusae (b). Quae profecto cum eximia illa Basileensium Procerum sanctitate, miroque Ecclesiam Catholicam reformati studio, quae de illis Gallici Scriptores jactant ac depraedificant, conciliari non possunt: ut adeo nobis religioni non sit schismatica illos pravitate insimulare. Nec illos *bona fide* a tanti sceleris labe intactos aut immunes existimamus: qui caeco furore perciti, nec illos audire sustinebant, qui pro Eugenio, & pro Sedis Apostolicae dignitate verba facere, aut vel mutire auderent: faciles autem omnibus calumniis praebebant aures, quibus optimus Pontifex ab hostibus proscindebatur; & illorum sermones tranquillo animo excipiebant, qui totius qua late patet Ecclesiae

(a) Vid. Henric. Spond. ad an. 1439. num. XXXI.

(b) Vid. Odox. Rsyn. ad an. 1434. num. II.

elſiae auctoritatem Baſileam confluiſſe, temere prae-
 dicabant: „ De poteſtate Romani Pontificis; *inquit*
 „ *idem Aeneas Silvius, jam Pius II. (a)*; pauci
 „ erant qui loqui praefumerent: omnes qui publice
 „ loquebantur, prurientes auribus, multitudinē ap-
 „ plaudebant Eugenii facta damnabant raro
 „ aliquis Eugenii cauſam defendit. Adverſus Conci-
 „ lii dignitatem mutire aliquid crimen haereſis fuit.
 „ Una omnium vox Concilium Eugenio praeferebat:
 „ de Sedis Apoſtolicae praecellentia aut ſilentium aut
 „ contemptus: Concilium, Concilium cuncta ſonabant.
 „ *Et infra*: Multa inter Neutrales didicimus, quae nos
 „ antea latebant. Eugenium falſo de multis accuſa-
 „ tum invenimus: Cardinales, qui Baſileam venerant;
 „ ob privatas inimicitias bono & ſancto Viro notam
 „ inurere voluiſſe. Quis bona fide illos agere exiſti-
 „ met, qui viam lumini obſcurnata mente praecludant,
 „ & ea tantum prono animo excipiant, quae pravis ſuis
 „ affectionibus adblandiantur? Hinc idem ſubjungit, quod
 „ Cardinalis S. Angeli, qui olim Concilii Praeſes & co-
 „ lumen fuerat, poſtea „ Baſileenſium opera multis mo-
 „ diſ deteſtabatur, Baſileaeque non Synodum Eccle-
 „ ſiae, ſed Satanae & Miniſtrorum ejus Synagogam
 „ remanſiſſe dicebat. Ac ruruſ ab eodem Cardinali
 „ haec ſibi dicta teſtatur: *Caecus erravi, & in tenebris*
 „ *ambulavi: Reliqui tandem Eccleſiam malignantium,*
 „ *& cum impiis ſedere reuſavi.*

Rerum perperam ab eis & inique geſtarum poe-
 nitentiam ab illis peractam eſſe, quos nihilominus
 velut ſanctos aut beatos colunt, praefraſte Gallici

Scri-

(a) Bulla Retraction.

Scriptores negant. Nos autem illos nisi poenitentes numquam colere institueremus: qui cum eodem Cardinale S. Angeli profiteamur (a): „ Omnes virtutes
 „ mancas esse ei, qui Pontifici obedire recusat, quam-
 „ vis in sacco & cinere jacens, dies & noctes jeju-
 „ net & oret, & in ceteris videatur legem implere:
 „ *Quia melior est obedientia quam victimae.* Et *Omnis*
 „ *anima potestatibus sublimioribus subiecta est:* Et
 „ Romanum Praefulem in Ecclesiae vertice constitu-
 „ tum esse constat, a quo nullam ex ovibus Christi
 „ exemptam novimus. Ergo ad Ovile redii, qui diu
 „ erraveram extra caulas, & pastoris Eugenii vocem
 „ audiui. Haec ille: qui tamen statim atque intelle-
 „ xit, consummatum iri mysterium iniquitatis, a ta-
 „ bernaculis hominum impiorum recessit. Quamquam
 ergo cum schismaticorum ducibus, ex Sedis Apo-
 stolicae indulgentia, aequis pene & honorificis con-
 ditionibus inita & redintegrata pax est: attamen tot
 & gravissimorum scelerum veniam nisi plurimis la-
 crymis illos a Deo consecutos esse non credimus.



AR-

(a) Ap. Pium II. ubi sup.

ARTICULUS SEPTIMUS.

*Eorum, qui post translationem Basileensibus
quocunque modo adhaeserunt, aut nec illis
nec Eugenio obediendum existimarunt,
nulla in hac causa ratio habenda est,
omnemque illis auctoritatem meri-
to abrogamus.*

QUum jam clarissimis argumentis demonstratum sit, Eugenium IV. legitimam & oecumenicam Synodum primū Ferrariae, deinde Florentiae constituisse; Basileenses autem Eugenium exautorando, & Pseudo-Felicem adsciscendo, schismaticae pravitatis infamiam contraxisse; quicumque Eugenio & Florentinae Synodo non adhaerebant, aut Basileensem conventum ejusque acta non omnino improbabant, nobis in hac causa ullo modo audiendi non sunt; ut qui schisma fovendo, nec debitum legitimo Pontifici & Synodo obsequium exhibendo, omnem sibi ademerint auctoritatem. Ex iis quidam omnia Basileensium decreta velut Spiritus Sancti oracula suscipiebant, atque in his etiam Eugenii ejectionem & Amedei Ducis Sadaudiae in ejus locum substitutionem. Itaque & Eugenium tanquam legitime ejectum non jam Eugenium sed Gabrielem appellabant, & Amedeo tanquam canonice electo sub Felicis nomine obsequiebantur. Atque haec erat illarum, quas Meldensis Episcopus laudat, *nobilissimarum*, ut ait, *Universitatum* sententia, Parisiensis, Viennensis, Erfordienfis, Colonien-

loniensis, & Cracoviensis, quae, inquit, propter Constantiensium Canonum auctoritatem Basileensi Synodo in omnibus adhaeserunt. Alii quamquam Eugenium ut legitimum Pontificem agnoscebant, ab eo tamen congregatam Florentinam Synodum respuebant; & contra, Felicem aversebantur, Basileensem autem tanquam legitimam & oecumenicam Synodum suscipiebant. Quam sententiam Germani maxime sequebantur: de quibus haec Pius II. in Bulla retractationis: *Erat tunc ille (Fridericus Romanorum Rex) cum tota fere Germania neutralis. Concilium Basileae dicebant esse Germani, & Idolum ejus respuebant: Eugenium Christi Vicarium appellabant, & Concilium ab eo celebratum recusabant: Nec Eugenio, nec Basileensibus plene obediebant.* Neque ab his multum discrepabant Galli: de quibus ait Bossuetius, quod quamquam Basileensem Synodum colerent, Florentinam respuerent; simul tamen Pontificem Eugenium agnoscebant, depositionem non admittebant, quod maiorum Ecclesiae recordati, schisma vererentur. In ceteris Basileensia decreta, atque iis nixam Pragmaticam Sanctionem, studiosissime retinebant.

Quam ergo auctoritatem *nobilissimis* illis Germaniae & Galliarum *Universitatibus* dabimus, quas ipsi quoque Germaniae & Galliarum Reges ac Principes, tanquam perniciofa & schismatica suggerentes consilia, contemserunt? Nam praeclara illa, quae Meldensis Episcopus laudat earum Scripta, in eos edita sunt, qui quum Constantiensium & Basileensium Decreta probarent; tamen in Eugenii fide perseverabant, & Pseudo-Felicem execrabantur. Contendunt
autem

autem Decreta illa admitti non posse, quin simul & Eugenii exauctoratio probetur, & Felicis electio suscipiatur. Neque sane sua illos ratio fallebat. Nam si Concilio semel congregato, in ejus potestate, ut Constantienses decreverant, Romanus Pontifex est: si Oecumenicam Synodum Romanus idem Antistes, uti Basileenses constituerant, nisi ex consensu duarum partium, neque dissolvere, neque alio transferre potest: denique si Romanum Pontificem Ecclesiae, eamque repraesentanti oecumenicae Synodo rebellem & contumacem velut Ethnicum, & publicanum ab se abjicere potest, ac Sede Apostolica exturbare, ut Constantiensibus simul ac Basileensibus Decretis constitutum fuerat; ex his profecto principiis omnino consequens erat, Eugenium, qui, ex Gallorum Germanorumque sententia, Synodum Basileensem nullo jure alio transfulerat; qui eidem Synodo adhuc Basileae, ut eisdem videbatur, legitime perseveranti palam adversabatur; qui Synodica Decreta non modo violabat, verum & irrita pronuntiabat, eisque obsequentes diris devovebat; legitime ab ea fuisse depositum, & Felicem in ejus locum canonice fuisse substitutum. Haec ergo illarum Academiarum sententia erat, quam tamen Germaniae, & Galliarum Reges ac Principes respuebant. In qua ergo parte veritatem ponemus? Nam si Academiarum sententiam recipimus, Regum ac Principum improbamus. Si horum consilia laudamus, illarum nos abjicere & exspuere scripta necesse est. Sic Principum Sanctiones Academiarum judiciis, sic harum judicia omnem illorum sanctionibus abrogant auctoritatem.

Vuu

Imo

Imo vero, inquis, hinc apertissime liquet, summam fuisse apud omnes Constantiensium decretorum auctoritatem. Nam „ etsi de aliqua parte Basileensium Gestorum fuerit dubitatum; non proinde Concilii universalis, aut Constantiensium decretorum „ auctoritas in dubium revocata est; sed certa & in- „ concussa, suoque inmotâ pondere constitit; uti Meldensis Episcopus animadvertit. Imo vero, inquam, hinc apertissime liquet, nullam omnino esse debere Constantiensium perinde ac Basileensium decretorum auctoritatem. Nam si decreta recipimus, & schismaticas consecutiones admittere necesse est, quae Academicarum iudicio ex illis sponte fluebant; quae tamen Regum ac Principum pietati ac religioni horrore erant. Si vero schismaticas illas consecutiones horremus, & decreta ipsa nos abjicere oportet, cum quibus illae individuo nexu conjunctae sunt. Sibi ergo Academicarum doctrina optime cohaerebat, sed ea, probanda non est, neque in auctoritatem suscipienda quoniam schisma in Ecclesiam invehebat, aut jam potius inVectum confirmabat. Reges autem ac Principes schismaticas quidem consecutiones detestabantur; sed quum principia retinerent, ex quibus illae profiscuntur, eorum sententia, ut sibi neutiquam cohaerens, laudanda & amplectenda non est; ut optime ac luculenter *Nobilissimae* illae *Universitates* suis hoc de argumento Lucubrationibus demonstrabant: In quibus sane si aliqua vis est, necesse est ut sententiam Germanorum & Gallorum Principum contemnamus. Si hinc autem velut aequam & Ecclesiae paci consulentem adprobamus, illas exsecremur oportet,

tet, quibus teterrimum schisma confirmabatur.

ARTICULUS OCTAVUS.

In Pseudo-Synodo Basileensi cernere apertissime est, quam perniciosa & infesta Ecclesiasticae paci & unitati sint Constantiensis Sessionis V. Decreta, nisi ad tempus schismatis & dubiorum Pontificum referantur.

HAec, ut identidem monui, est omnium Theologorum ab antiquissimis Patribus & constanti Ecclesiae traditione ducta sententia, Christum, ut Christianae Reipublicae paci & unitati consuleret, Romanum Pontificem in Ecclesia constituisse velut caput, a quo in omnia hujusce corporis membra sibi intime cohaerentia spiritus & vita manaret; aut velut centrum, ad quod omnes Ecclesiae, velut ad centrum lineae, confluerent; aut velut Principem, Pastorem & Patrem-familias, qui in Ecclesia velut in Regno, grege vel domo, loco & auctoritate omnibus praesideret. Noverat enim ille ipsius Ecclesiae sapientissimus conditor & institutor, tot gentium multitudinem in unius fidei communione contineri vix posse nisi per unum, cui omnes tanquam communi Magistro auscultarent, & qui omnes ad unitatem auctoritate sua moveret ac revocaret, atque omnibus, ut ait nobis alibi memoratus illustrissimus Petrus de Marca, eadem sentiendi necessitatem imponeret. Nam quotidiano &

constanti exprimento compertum est, quod ubi quisque suam libere opinionem promit ac tuetur, nec adest qui auctoritate sua multitudinem regat, & ad cujus sententiam omnes accedere teneantur, facile fiunt opinionum divortia, ut pene tot sententiae quot capita numerentur. Unde existunt animorum dissidia & pertinaces contentiones, quae unitatem scindunt, caritatem violant, communionem dissipant, & dirimunt societatem. Hujus rei praeclarum & insigne argumentum est in Synodo Basileensi, quae veluti Constantiensibus nixa decretis, quum Romano Antistiti coactivam in suum coetum ademit potestatem, & summam de fide, moribus ac disciplina condendi dogmata, faciendaque leges auctoritatem in multitudine collocavit, latissimum gravissimis & acerbissimis contentionibus ac seditionibus aditum patefecit: quae & florentissima Regna in factiones sciderunt, & nisi Principes restitissent, universam Ecclesiam quadraginta annorum turbine ac tempestate jactatam, novo ac turbulentissimo schismate concussissent. Plura jam supra memoravi, ex quibus aperte liquet, non a me ea mala supra modum inflari ad graviores in Synodum invidiam concitandam. Ut enim multa, eaque etiam gravissima praeteream, & aliqua tantum speciminis loco commemorem; quum de loco designando, ad quam Synodus pro Graecorum unione transferretur, disceptatum est; scisso in duas factiones Concilio, duo contraria decreta in una eademque sessione, Synodi nomine universalem Ecclesiam repraesentantis, edita sunt, quorum altero Florentia vel Utinum, altero aut Basilea ipsa aut Avenio, aut altera in Sabaudia Civitas designatae sunt: quae

quae inter Patres indecoras lites pepererunt, unde qui ceteris morum gravitate, sapientia, doctrinaque praecelebant, Basilea discesserunt. Quae deinde sequuta sunt, graviores quoque turbas excitarunt. Quidquid in Eugenium decretum est, alii probabant & commendabant, alii improbabant, ac ne ultra procederetur, intercedebant.

Sed haec tamen veluti leviores velitationes habenda sunt, si cum acrioribus illis conflictationibus conferantur, quae inconditam illam turbam in se invicem commiserunt, quum in medium adlatae sunt notissimae illae Theses, quas earum auctores per summam temeritatem & audaciam *fidei veritates* appellabant. Nam alii generatim omnes amplecti, alii omnes rejicere, alii tres priores adprobare, quinque posterioribus adversari: tantaque pertinacia suam unumquemque opinionem tueri, ut non modo nullus in disputationibus decor & ordo servaretur, verum & vis adhiberetur, & ab inferioris ordinis Clericis in Episcopos, ab his vero tum in se invicem, tum in Concilii Praesidem Romana purpura fulgentem contumeliae & maledicta effunderentur: *Nec res*, inquit Aeneas Silvius, superiori etiam Articulo memoratus, *sine violentia fuit, quum nec mandata Praesidentis reciperentur, nec ordo in rebus agendis solitus custodiretur. Erat namque ubique clamor, ubique strepitus, ubique iurgia effundebantur &c.* Pars illa, quae Praelatorum & Episcoporum numero praecelebat, se se Concilium esse jactabat, & Episcopis hoc veluti proprium & peculiare jus adscribebat de fidei controversiis sive in Synodo sive extra Synodum judicandi. Verum pars altera, quae promiscuae multitudinis auda-

audacia nitebatur, id audire sine furore & indignatione non poterat. Quapropter quum Archiepiscopus Panormitanus dixisset: *Nos Praelatorum major pars sumus, nos Concilium facimus, ad nos concludere spectat: tantus*, inquit Aeneas Silvius, qui praesens aderat, *exortus est clamor, quantus solet in praeliis tubarum clangor, & equorum fremitus audiri, quum signis collatis duo invicem concurrunt exercitus*. Tuebantur multitudinis partes, eique faces & calcaria subdebant Pseudo-Cardinalis Arelatenfis & Johannes Segovius, quorum alter in hac factione dignitate, alter Theologica scientia praecellere videbatur. Si tamen aut ille Theologus audire debet, qui traditionis fonte neglecto sacras litteras ad libidinem interpretatur; aut in eo dignitas suspicienda est, qui & illa Romani Pontificis sententia dejectus est, & ipsius etiam dignitatis jura per summum dedecus prodit. Quemadmodum is, de quo nunc loquimur, Arelatenfis, qui Aërii haeresim ab orco revocans, Presbyteros Episcopis acquavit constitutosque divinitus Ecclesiasticae Hierarchiae gradus subvertere molitus est. Ut enim Presbyteris jus definiendi una cum Episcopis fidei controversias, & Ecclesiam una cum illis gubernandi vindicaret, id palam effutire veritus non est: *Neque in Concilio dignitas Patrum, sed ratio spectanda est*. Omniaque argumenta collegit, quibus veteres ac recentes Ecclesiasticae Hierarchiae hostes Episcopalem dignitatem in ordinem redigere aggressi sunt; ac potissimum notissimos illos S. Hieronymi textus, quibus imprimis Calviniani ac Presbyterani nituntur: quibus ille praeludens ait: *Et si, prout Hieronymo placet, Episcopi sunt sola consuetudine praelati Presbyteris, utique fieri potest,*

potest, ut consuetudinem contraria tollat consuetudo. Ita egregius ille Reformation ad Calvinianam Ecclesiae reformationem aditum praestruerat, quum fieri posse effutiebatur, ut abolita per consuetudinem Episcopali dignitate, Ecclesia per solos Presbyteros gubernaretur. Unde porro colligit, quod si Presbyteri debent Ecclesiam Dei cum Episcopis in communi regere, satis notum est, quod ad eos quoque decidere res spectat Ecclesiae dubias.

Concinebat Arelatenſi Segovius, acriter & ipſe contendens, priores in Synodo partes illius factionis eſſe debere, quae multitudine ſuperaret, quamvis altera pars ſeſe majori Episcoporum numero eſſeiret. *Sed ajunt, quia non debent inferiores aliquid judicare, & quia non licet nobis cum minori Episcoporum parte aliquid agere, quamvis Concilii major pars ſimus. Quod, inquit, ſi verum eſſet, plurima ex vſtris decretis ruerent. Id autem & verum & certum & exploratum inter Catholicos eſſe debet: ergo vel hac una ratione, ſi cetera argumenta deeſſent, plurimis ex Baſileenſium decretis nulla apud Catholicos conſtare deberet auctoritas. Quo loco illud, inquit, praefertim habendus eſſet, quod de Provincialibus & Episcopalibus Synodis promulgatiſ: quod quum non placeret Praelatis, Cardinalis S. Angeli tunc praefidens, vix quinque associatus Episcopis cum majori parte inferiorum concludiſſet, licet Episcopi admodum multi obſtarent. En qualia Decreta Chriſtiano orbi velut Concilii generalis Eccleſiam univerſalem repraeſentantis nomine & auctoritate munita obtrudebantur! quibus nimirum vix quinque Episcopi conſentiebant, maximus autem Episcoporum numerus refra-*

refragabatur. Quod tamen absonum videri non debet, si quemadmodum Pseudo-Cardinalis Arelarenfis effutiebatur, in Conciliis non dignitas Patrum sed ratio spectanda est. Illud paullo majorem absurditatem praefert quod statim Segovius adjungit: *Habetis praeterea in adventu Abbatis Virgiliacensis, qui primus omnium huc venit, incepisse Concilium, quamvis nullus adhuc comparuisset Episcopus.* Quibus si adjungas, Concilio semel inchoato, ex eorum sententia, adesse Spiritum Sanctum ad res fidei faciendas, & ad Ecclesiam in membris & in Capite reformandam, neque illud a Romano Pontifice dissolvi aut transferri posse, sed ipsum potius Romanum Pontificem in Synodi esse potestate, ab ea puniendum & exauctorandum, si decretis ejus obluetur, inde plane consequens est, temerarium illum Abbatem cum aliquot Basileensis Ecclesiae Presbyteris, qui Synodum Oecumenicam auspicati esse dicuntur, eam potuisse legitime etiam invito ac reluctante Romano Pontifice, prorogare, & Spiritus Sancti & Ecclesiae universalis auctoritate adscita, fidei controversias dirimere, Ecclesiae universae ac summo illius Hierarchae leges statuere, eumque sibi obstitentem in jus vocare, velut Ehtnicum & publicanum habere, Sedeque ipsa & dignitate Apostolica exturbare. En quo fundamento, Segovienfis judicio, Basileensis Synodus stabat: quo semel concussio, & ipsam everti Synodum necesse erat. Statim enim subjungit: *Id ergo quod isti ajunt; scilicet pluris in Synodis Occumenicis faciendam esse Episcoporum auctoritatem, quam inferiorum Clericorum turbam; nil aliud est quam funditus hoc Concilium evertere.*

Id autem si semel admittatur & invalescat, quod scili-

scilicet pauci ac temerarii Presbyteri Concilium Occumenicum facere, universalis Ecclesiae auctoritatem adsciscere, & de rebus fidei statuere, & de Episcopis, imo & de Romano Pontifice judicare, permittantur; quis non videt, quanta in Ecclesiae regimen perturbatio invehenda sit? Ut enim egregie S. Cyprianus animadvertit (a): *Inde schismata & haereses obortae sunt & oriuntur, dum Episcopus, qui unus est & Ecclesiae praest, superba quorundam praesumptione contemnitur, ut homo dignatione Dei honoratus indignus hominibus judicatur.* Et in alia Epistola: *Haec sunt enim, inquit (b), initia haereticorum, & ortus atque conatus schismaticorum male cogitantium, ut sibi placeant, ut Praepositum superbo tumore contemnunt.* Sic de Ecclesia receditur, sic altare profanum foris collocatur, sic contra pacem Christi, & ordinationem atque unitatem Dei rebellatur. Quae haud inaniter & ad libitum jactata & exaggerata fuisse, effectu ipso ac novo experimento Basileensis Latrocinii exitus comprobavit: quum scilicet Presbyterorum & inferiorum Clericorum schismatica turba, repugnantibus totius orbis Episcopis, Eugenium in jus vocare ac throno deturbare, altare profanum & Idolum erigere, & novam Ecclesiam constituere, vesano furore molita est. His autem iniquissimis molitionibus Constantienses Canones passim obtendebantur; quibus nimirum inter cetera statutum fuerat, neque per recessum Pontificis, neque per recessum quorumcunque Praelatorum, aut solum esse aut solum iri Concilium, sed in sua perfectione & integritate per-

X x x

ma-

(a) Epist. LXIX. ad Florent. Pupian.

(b) Epist. LXV. ad Rogatian.

manere; neque cujuslibet potestate, nisi ex Patrum consensu, aut unquam dirimendum, aut alio transferendum. Cujusmodi sane decreta nisi ad sensum traditioni & Catholicae doctrinae consentaneum inflectantur, nemo non videt, quam latum schismatibus ac seditionibus aditum patefaciant.

Profecto si ob absentiam Romani Pontificis & quorumcumque Praelatorum non solvitur universale Concilium, sed in sua integritate permanet & perfectione, retinetque potestatem & auctoritatem de Romano Pontifice ac de reliquis Episcopis judicandi, de Monarchica imo & de Aristocratica gubernatione actum est; ac supremum Ecclesiae regimen penes multitudinem ac Democraticum esse, omnino fatendum est. Quo nihil ad propaganda schismata & fovendas dissensiones accommodatius. Quo omnia Basileensium molimina collimasse, candide agnovit in sua Caroli VII. nomine ad Eugenium IV. gesta legatione Petrus Meldensis Episcopus, cujus Acta Odoricus Raynaldus edidit (a), & Bossuetius ejusdem Sedis Episcopus memorat cap. XVI. Is ergo Eugenium adloquens, & Basileenses insimulans, ait, quod veritatem de suprema potestate in uno extinguere pertentarunt: quod pulcherrimam Monarchiam Ecclesiae, & nobilissimam Politiam abolere ac suppressere, & ad Aristocratiam vel ad Democratiam redigere contenderunt: quod schisma ab eis factum est nedum in obedientia capitis, verum & in doctrina Evangelii: Quod, inquit, est omnibus Christicolis abominandum. Subjungitque, pacem instaurari non posse, nisi concussa Ecclesiasticae Monarchiae fundamenta constabiliantur,

ac

(a) Ad an. 1441. num. VIII. & seqq.

ac suprema potestas, quam multitudo temere usurpaverat, ad unum cui Christus illam contulerat, revocetur:
„ Quid quaeso, inquit, magis posset in perpetuitatem
„ schismatis tendere, quam Monarchiam Ecclesiae;
„ quae Christianos tenuit in unitate, tollere & abolere?
„ quam auctoritatem supremam multitudini, quae cito
„ scinditur, tribuere? quam potestatem judicandi superioribus inferioribus dare? Et sic de multis aliis, quae
„ in practica & doctrina Basileensium concurrunt: quibus simul junctis & stantibus non est pax in Ecclesia
„ Dei possibilis. Unde liquet, tum nullam esse & nihili omnino faciendam eorum, qui Basileensi Latrocinio quocunque modo adhaeserunt, auctoritatem; tum nihil esse Ecclesiasticae paci & unitati magis infensum, quam Constantiensia Decreta, si legitimum eorum sensum illuni esse dicamus, quem iis Basileenses adfinxerunt.

CAPUT XVII.

- „ Bulla retractationis Pii II. ad Colonienfium
„ Academiam, Constantiensia Decreta
„ firmat, Basileensia tantum
„ posteriora damnat.

Convenit inter omnes, qui vere sapiunt ac recte sentiunt, ad veterum Scriptorum mentem atque sententiam tuto eruendam, hanc regulam imprimis esse adhibendam, ut quae ab eis obscure vel ambigue, & verbis generalibus, pluresque admittentibus sensus, tradita sunt, ita exponantur, ut cum iis congruant, quae

diserte iidem & apertis conceptisque verbis tradiderunt :
 At contra id eorum esse, qui veritatem sincero animo
 non inquirunt, sed eam potius obrui & obscurari vel-
 lent, quod iis omissis, quorum est certa, constans &
 explorata sententia, ad ea confugiant, eaque maxime
 jacerent, ac veluti ceterorum amissim haberi velint ;
 quae liceat in plures sensus interpretari. Id in hoc Mel-
 densis Episcopi Opere cum saepius est nobis animadver-
 sum, tum maxime in praesenti capite observare licet.
 Nam quae in Bulla Retractionis Pius II. pro nostra
 sententia clare ac diserte docet, ea Bossuetius negligi ac
 pro nihilo haberi vellet : confirmatam vero generalibus
 verbis in eadem Bulla Constantiensium Decretorum au-
 thoritatem (quod variis modis interpretari fas est) in
 eum accipit sensum, qui cum aliis perspicuis & explora-
 tis laudatae Constitutionis capitibus conciliari non pos-
 sit. Docet namque in ea Constitutione inter alia lauda-
 tus Pontifex, hunc esse in rebus a Deo sapientissimo
 Moderatore ordinem constitutum, *ut inferiora a superio-
 ribus gubernentur, & ad unum tandem perveniatur
 tamquam Principem & moderatorem cunctorum, quae
 infra sunt.* Ac propterea quemadmodum Grues unam
 sequuntur, *& in Apibus unus est rex : ita, inquit, &
 in Ecclesia militanti, quae instar triumphantis habet,
 unus est omnium moderator & arbiter Jesu Christi Vi-
 carius : & quo tamquam capite omnis in subiecta mem-
 bra potestas & auctoritas derivatur, quae a Christo
 Domino Deo nostro sine medio in ipsum influit.* Hic
 nemo non videt, quam in Ecclesia Monarchiam Pius
 agnosceret, talem videlicet, quae in unum rerum om-
 nium supremum moderatorem & arbitrum totam con-
 fer-

ferret auctoritatem, quae ab ipso velut a capite & fonte in reliqua membra totumque corpus efflueret. Quare & infra subjungit, quod Romanus Pontifex *supremam a Deo potestatem sine medio consequitur, & per ordinem in omnem diffundit Ecclesiam*. An ejusmodi in Ecclesia Monarchiam etiam Galli Theologi agnoscunt? An ii agnoscere possunt, qui Constantiensia Decreta; quibus sancitum est, Oecumenicam Synodum, quae universalem repraesentet Ecclesiam, immediate a Christo potestatem habere, cui vel ipse Romanus Pontifex subditus & obnoxius habeatur; nullis circumscribi limitationibus patiuntur?

Ut autem multa praeteream quae in eandem sententiam ab eo luculentissime differuntur, ad eum propius accedam locum, quem nobis potissimum Bossuetius objiciendum existimavit: qui tamen recte percipi non potest, nisi & quae praecedunt & quae sequuntur, prae oculis habeantur. Postquam enim de Monarchico Romani Pontificis principatu multa disseruit, suam in pauca doctrinam contrahens, in hunc modum concludit: *Liquet igitur, unum in Ecclesia Caput esse & unum Principem: quia pax populi ex uno rectore dependet, & pluralitas Principum discordiam parit. Christus Ecclesiae suae in ultimo testamento pacem reliquit, & pacem multis verbis commendavit: dedit ergo & regimen pacis amicum, id est Monarchicum; sub Beato Petro & Successoribus ejus administrari cuncta praecipiens, clavibus illi commissis & cura gregis demandata*. Ex hoc autem Romani Pontificis Monarchico Principatu statim colligit, ad ejus auctoritatem & potestatem pertinere, ut Concilia generalia congreget

get & dissolvat: Cui, inquit, *Et congregare generalia Concilia Et dissolvere datum est*. Quod generatim pronuntiatum Constantiensibus adversari Decretis, prout ea olim Basileenses, & nunc Galli Theologi interpretantur, compertum est. Quamobrem eo se redigit Bosfuctius, ut saltem obtineat, *non eo usque*, Pio auctore, protendi Romani Pontificis auctoritatem, ut etiam congregati dissolutique Concilii iussa in fide, in schismate, in reformatione detrectare possit. Quod unum; inquit, ex Constantiensi Concilio, eique conjuncta declaratione Gallicana tuendum suscepimus: cetera aliis tractanda relinquimus. Sed attendat Illustrissimus Adversarius quae sequuntur, ac nullis interpositis Pius ibidem adjungit: *Qui (Romanus Pontifex) est filius est (Ecclesiae) propter regenerationem, propter dignitatem tamen Pater habetur: Et sicuti filiationis causa venerari debet Ecclesiam tanquam matrem; ita Et praelationis causa praefertur ei ut Pastor gregi, Princeps populo, Rector familiae*. An haec etiam cum Constantiensibus & Basileensibus Decretis Meldenis Episcopus conciliabit? Nae illum imprudentem, si se in hunc locum conjiceret! Prudentius ergo talia dissimulantur, quae male compactum systema a fundamentis evertunt. Quid enim, ut Romanum Pontificem Ecclesiae subiectum esse demonstrent, Adversarii frequentius objiciunt, quam illum Ecclesiae esse filium, eique velut matri esse subiectum? At negat hoc loco disertus Pius, quod si dignitas in eo spectetur, Ecclesiae, ut filius matri, subji-ciatur; imo eum Ecclesiae praeponit ut Pastorem gregi, Principem populo, Patrem ac rectorem familiae: quorum utique est jura gregi, populo, ac familiae dare,

non

non ab eis recipere, aut eis esse subjectos :

His praemissis, ea subjungit, in quibus causae suae firmamentum Meldensis Episcopus collocavit : *Cum his & generalis Concilii auctoritatem & potestatem complectimur, quemadmodum & aeterno nostro Constantiae, dum ibi fuit Synodus universalis, declaratum definitumque est. Veneramur enim Constantiense Concilium & cuncta quae praecesserunt a Romanis Pontificibus nostris Praedecessoribus adprobata.* Quo ex loco colligit Bossuetius adprobasse Pium Constantiensis Concilii de generalium Conciliorum auctoritate Constitutiones. At quaestio superest, quomodo illas adprobavit; atque ex sequentibus verbis haud obscure colligimus, coarctasse illas ad ea Concilia, quae sub dubiis Pontificibus, ad eos in ordinem redigendos & evellenda schismata, celebrentur. Nam statim adjungit: *Inter quae (Concilia) nullum invenimus unquam fuisse ratum, quod stante Romano indubitato Praefule, absque ipsius auctoritate convenerit: quia non est corpus Ecclesiae sine Capite, & omnis ex Capite defluit in membra potestas.* Quae si vera sunt, necesse omnino est, Synodi Constantiensis Decreta, si semel in auctoritatem recipiantur, ad ea referri Concilia, quae sub iis Pontificibus celebrentur, qui de Apostolica dignitate aequo jure disceptent. Nam iis Decretis constitutum est, Conciliorum generalium auctoritatem *immediate* a Christo profuere; adeoque & recedente Pontifice suam constare Synodo integritatem & perfectionem. Quum contra hic Pontifex statuatur, irritum esse Concilium, quod sub indubio Pontifice sine illius auctoritate conveniat; quod non sit corpus Ecclesiae perfectum & integrum sine capite;

pite; quod in membra potestas a Capite derivetur. Futile porro est quod Meldensis Episcopus ex suo ad libitum addit: „ Sane ut congregentur, quod verborum „ tenor indicat, non autem usque adeo omnis, ut Patres „ semel congregati nullam a Christo habeant potestatem. Sed hanc limitationem, quam ad arbitrium his Pii verbis Bossuetius adjicit, nullo modo recipiunt alia ejusdem Pontificis verba, quae paullo ante in medium adlata sunt: quibus, ut jam vidiimus, absolute ac generatim docet, (repetamus enim Pontificis verba) quod a Romano Pontifice *tanquam capite omnis in subiecta membra potestas, & auctoritas derivatur, quae a Christo Domino Deo nostro sine medio in ipsum influit*. Et rursus, quod ipse *supremam a Deo potestatem sine medio consequitur, & per ordinem in omnem diffundit Ecclesiam*. Quae quoniam Meldensis Episcopus dissimulare & silentio involvere satius existimavit; expectabimus dum aliquis Parisiensis Theologus nos doceat, quomodo ea sint cum Constantiensibus & Basileensibus Canonibus concilianda.

CAPUT XVIII.

- „ An Lateranensi Synodo sub Leone X. Constantiensia Decreta abrogentur: Quantis
 „ auctoritatibus haec firma sint. Cur Patres
 „ Gallicani priora Basileensia Gesta in declaratione
 „ ratione sua exprimenda non putaverint.

Mirum profecto in hoc Capite videri debet, quod Galli, qui Constantiensi Synodo in suis omnibus

bus Sessionibus tam liberaliter Oecumenicae titulum indulgent, & Basileensi, etiam post translationem tam aegre eandem praerogativam abrogant; mirum, inquam, videri debet, quod Oecumenicae titulum & auctoritatem Lateranensi Synodo invadeant. Quum & is Episcoporum numerus, & aliquot, ex omnibus fere Catholici Orbis provinciis, praesto fuerint, cujusmodi profecto nunquam Basileensis Synodus vidit: Omnium quoque Catholicorum Principum, atque ipsius etiam Galliarum Regis, Oratores interfuerunt: & quod plurimum ponderis ac momenti habet, illi per se Romanus Pontifex praefuit, & sacer Purpuratorum Ecclesiae Romanae Patrum Senatus ornamento fuit. Quid ergo Oecumenicam potestatem Basileensi Concilio tam liberaliter largiuntur, Lateranensi tam pertinaciter adimunt? Nimirum Episcoporum conventus, prout eorum rationibus aut propitii aut infensi sunt, Galli Theologi vel ad sydera extollunt, vel in ordinem redigunt. Vide sis Nat. Alex. Dissert. XI. in Hist. Eccles. saec. XV. & XVI. artic. IV. ubi ex Actis syllogem profert Catholicorum Principum, qui per suos Oratores *sacro & canonico Lateranensi Concilio, Ecclesiam universalem representanti, rite & legitime congregato*, ut in sua adhaesionis formula Maximilianus Imperator profitebatur, adhaeserunt: Quibus & Rex Christianissimus concinens, per suos item Oratores, *pure, libere & simpliciter sacrosancto Lateranensi Concilio, tanquam vero, unico, & legitimo adhaesit*. Quae satis esse videntur ad refellendam Antonii Arnaldi de hoc argumenti disputationem (a), qui inter alia Lateranensi Synodo

Y y

men-

(a) Eclaircissement &c. cap. XXVII. num. IV.

mendacissime objecta, paucitatem quoque Episcoporum objicit & defectum libertatis: quum & Maximilianus Imperator se illi ut *Ecclesiam universalem repraesentanti*, Rex autem Christianissimus *libere* sese adhaerere, profiteantur.

In hac ergo Lateranensi Synodo, cui perperam, ut jam vidimus, & immerito Galli Theologi Oecumenicae praerogativam invident, Leo X. *sacro approbante Concilio*, Bullam edidit, qua Pragmaticam sanctionem in Bituricensi conventu, glisciente Basileensium schisma te editam, abrogavit. Sanctioni plura capita inserta erant Sedis Apostolicae Romanorumque Pontificum auctoritati perquam infesta; ac potissimum Constantiensium & Basileensium Decreta, quibus Oecumenicis Conciliis supra Romanos Pontifices auctoritas vindicatur; atque his potestas adimitur eadem generalia Concilia, ipsis invitis ac reluctantibus, dirimendi, aut alio transferendi. Quare ut haec maxime in reprobata illa sanctione & sibi & Patribus improbare Pontifex declararet; *Romanum Pontificem tanquam super omnia Concilia auctoritatem habentem, Conciliorum indicendorum, transferendorum, ac dissolvendorum plenum jus & potestatem habere*; tum id & sacrarum litterarum testimonio, & Sanctorum Patrum, Romanorumque Pontificum oraculis, & Canonum decretis, & propria eorundem Conciliorum confessione manifeste constare, diserte ac verissime pronuntiavit. Quae quamquam pro ultima, suprema & irretractabili Romani Pontificis & Concilii Oecumenici definitione vel Canone habenda esse non judicem aut contendam; attamen gravissimam iis constare auctoritatem, aut certe longe majorem quam

quam quibuslibet Parisiensis Academiae & Ecclesiae aut Cleri Gallicani Actis aut Decretis, nemo profecto qui sapiat inficias iverit.

Denique ut id semel expediam quod identidem atque hic potissimum Bossuetius ingerit queriturque; quum Romanis Pontificibus dirimendorum seu transferendorum generalium Conciliorum plenum jus & potestatem cum Leone X. & Lateranensi Synodo adserimus; non id certe volumus, ut ille nobis imponit (a), a Papa dissolvi posse Concilia nulla idonea causa, nulla, necessitate, atque ut Eugenius ejusque adulescentes, rebant, pro suae libitu voluntatis; non haec, inquam, nostra sententia est, neque id unquam Eugenius ejusque, ut eos ille perperam vocat, adulatores somniarunt. Sed dicimus ac tuemur, penes ipsos Romanos Pontifices judicium esse debere, an dissolvendae seu transferendae generalis Synodi idonea suppetat causa & justa necessitas. Et quum ab Apostolica Sede dissolutionis Concilii seu translationis litterae prodeunt, dubitandum non est Apostolici Decreti iustas & legitimas esse causas. Ita vel ab initio legitimas Eugenio fuisse causas Basileensem Synodum dirimendi, ipso exitu comprobatum est: nam *per annos circiter novem* & decem, quibus Eugenio IV. & Nicolao V. invitis ac repugnantibus prorogata est, *pauca bona*, ut ait Cl. Martene (b), *infinita peperit mala partium studio, & defectu debitaee summo Patri reverentiae*: quae vel inde ab initio satis se aperte prodebant. Hinc Synodi Oratoribus ad Venetorum Rempubicam, suadere conantibus, legitime

Y y v 2

Cen-

(a) Sup. cap. XVII.

(b) Praefat. in Tom. VIII. amplif. Collect. sub fin.

Concilium, ad haereses eliminandas, pacem inter Principes conciliandam, & Ecclesiam in capite & membris reformandam, inchoatum & prorogatum fuisse; sapientissime omnium nomine Dux respondit (a), ex fructibus & exitu comprobatum iri, an bonum & legitimum principium habuisset. Nam arbor bona pacem & unitatem tulisset; plantatio autem mala, quam non plantasset Pater Caelestis, schismata & divisionem. Quoad erectionem Concilii ad illa tria bona &c. dixit, quod arbores ex fructibus cognoscebantur; quod ipse finis declarabit, an habuerit bonum principium, quae expectare cupiebat, ut securius judicare posset, an fructus bonos produxisset arbor: post, Utinam non produceret schisma & divisionem in Ecclesia, prout reapse intulit: atque adeo ex fructibus innotuit, non absque causa arborem malam, quam non plantaverat Pater caelestis, Eugenium vel ab initio exscindere voluisse: neque illi paruisse, funestissimum Ecclesiae fuit. Id quod etiam de secunda Synodo Ephesina & Chalcedonenſi Concilio alibi nobis cum Cl. Thomassino (b) observatum est. Scilicet Leonem in causa Eutychetis superſendum Concilio existiſſiſſe, in causa Flaviani Synodum postulasse etiam atque etiam, tandem expugnasse. Quam provida autem utrobique, quamque salutaria Ecclesiae essent Sedis Apostolicae judicia, ipso rerum exitu comprobatum est. Consultissimum enim fuisset abstinere ab illa Synodo praedatoria Ephesina; consultissimum fuit infligta Ecclesiae illo Latrocinio vulnera per Chalcedonenſem Synodum obducere. Neque fecus & consul-

tissi-

(a) Ap. enmd. ibid. col. 696.

(b) Dissert. XI. in Conc. Constantinop. sub Flav. &c. num. X.

tissimum fuit Eugenio Basileensem Synodum revocanti morem gerere, & consultissimum fuit Florentinam Synodum indicenti obtemperare. Quibus exemplis satis aperte liquet, ad Sedis Apostolicae judicium pertinere, an generalis Synodi celebrandae vel differendae, retinendae in eodem loco aut alio transferendae, idonea suppetat causa aut iusta necessitas.

CAPUT XIX.

„ An Constantiensibus Decretis nixa sententia ad fidem Catholicam pertineat.

Indigna profecto ipsa per se Meldensis Episcopi iudicio & gravitate ejusmodi quaestio est. Quis enim post ea, quae haecenus disseruimus, non rideat hominem serio quaestionem hanc, sane ludicram, proponentem, an ad fidem Catholicam sententia illa pertineat, quae Romanum Pontificem generalium Conciliorum potestati subjecit. Multo autem amplius ejus moderatione & sapientia illud indignum est, quod gravem sententiae nostrae notam inurere non veretur, & in medio fere relinquit, num ejus Defensores ab haereseos infamia immunes habendi sint: „ An ergo, *inquit*, Adversarii, „ ex omisso anathemate, ab haeresi satis purgatos se „ putent, ipsi viderint: a gravi certe nota immunes esse „ non possunt. Atqui, ut jam vidimus, vel inter ipsos Eugenii acerbissimos Adversarios non deerant, qui quamvis doctrinam illam veram existimarent; eam tamen ad fidei regulam minime pertinere, acerrime propugnabant; eaque controversia Basileense Latrocinium

in

in duas factiones disjunct, quae in se invicem caeco furore & impetu incurrentes, se etiam mutuis contumeliis & maledictis onerant. Quum ergo ex haecenus disputatis harumce & quaestionis & opinionis vanitas ac temeritas sit omnibus explorata, in eis pertractandis ac perstringendis tempus conterendum non est. Etenim verendum esset, ne si serio refellerentur, aliquam consequerentur auctoritatem, aut *ne responsionis gravitate*, quod ait Tertullianus (a), *adorarentur*.

CAPUT XX.

- „ An ea, quam vocant, Parisiensem sententia
 „ occasione schismatis exorta sit. Censura
 „ lata in Johannem de Montefono
 „ anno 1387.

Probaturus Meldensis Episcopus, Parisiensem de potiore Concilii generalis auctoritate opinionem nequaquam, ut multi putant, occasione schismatis emisisse, quod Pontifices Romae & Avenione sedentes commisit, ea in medium adfert quae Petrus Alliacensis, Academiae Parisiensis nomine, adversus Johannem de Montefono coram Clemente VII. anno demum 1387. disseruit. Is enim tum ob sequentes propositiones Johannem haereticos postulavit: *Solius Sedis Apostolicae est circa fidem declarare, damnare & reprobare*. Et iterum: *Eorum quae tangunt fidem, ad solum summum Pontificem pertinet examinatio & decisio*. Tum etiam quum in haec propositiones invheretur, dicere veritus non

(a) Lib. advers. Valentianum, cap. VI.

non est, quod in causis fidei a summo Pontifice appellari potest ad Concilium.

Putassem certe ad eam, de qua nunc agimus, opinionem refellendam, ab Illustrissimo Adversario in medium adlatum iri Theologorum testimonia, qui saltem uno vel altero saeculo floruissent, antequam Ecclesia diro schismate lacerata & in discrimen adducta, nulla de subveniendis ejus malis consilia agitari coepissent. Id enim clare luculenterque demonstrasset, haud occasione schismatis Theologos Parisienses hanc induisse sententiam. Quid est ergo, quod ad Petri Alliaccensis orationem provocat? quae anno demum 1387. coram Clemente VII. habita est, quum jam a decem annis Ecclesia diro illo turbine quateretur; quum jam multis esset exorsa absoluta illa Romanorum Antistitum potestas, quibus dubii Pontifices in Ecclesiae perniciem abutebantur; quum denique multi jam persuasum haberent, pacem Ecclesiae restitui non posse, nisi eorum, qui de summa dignitate certabant, auctoritas coërceretur. Scribit enim ad annum 1379. Parisiensis Universitatis Historicus: *Non disuerunt ex Academicis nostris, qui sedentibus Romae & Avenione Pontificibus Urbano & Clemente, scriberent, non aliam esse compendiosorem concordiae pacisque Ecclesiasticae viam, quam si uterque cederet, & Concilio generali litis decisionem permetteret.* Quod quum illi pertinaciter recusarent, profecto haud absurde creditur, hoc tot annorum intervallo, Petro Alliaccensi aliisque in animum succurrere potuisse, non potior Pontificia Oecumenicae Synodi sit auctoritas, atque adeo annon jure, quod sponte renuebant, Concilii generalis auctoritate uterque loco ac dignitate

cc-

cedere compelleretur. Quam ergo Illustrissimi Adversarii scopo ac proposito minus aptum & idoneum sit ejusmodi testimonium; quid est, inquam, quod antiquiorum Theologorum testimoniis; quorum tamen aliqua ratio habenda esset, usus non est? Nimirum ea minime succurrebant, adeoque tum primum ab avita Ecclesiae Gallicanae doctrina, ut optime Thomassinus alibi memoratus animadvertit (a), Alliacensi Duce descitum est.

Non mihi est animus de duabus illis Montefoni propositionibus, necnon de appellationibus a Summo Pontifice ad generale Concilium in causis fidei, dissertationem hoc loco texere. Ut enim Lector perspectum habeat, quantum in illis haereseos insimulandis, his vero adferendis, ab ea quae haecenus obtinuerat in scholis Gallicanis doctrina, Alliacensis aberrarit; sufficit, ut ei in memoriam revocetur, unum & alterum Romanae Ecclesiae Summum Pastorem Clementem Quintum, & Sextum in Galliis natos, & Galliarum Academiarum lacte innutritos, id juri Sedi Apostolicae ac Romanis Pontificibus hoc eodem faculo vindicasse, quod soli de emergentibus in Ecclesia circa fidem controversiis irretractabile judicium ferant. Nam Clemens V. in Concilio Viennensi & Clementina prima de *Summa Trinitate* & *Fide Catholica*, errorem Petri Johannis Olivi Apostolica auctoritate configens, ad eos dumtaxat horum declarationem pertinere, conceptis verbis pronuntiavit: *Ad quam* (Sedem Apostolicam) *dumtaxat horum declaratio pertinet*. Clemens vero

(a) Differt. XV. in Concilio Rom. sub Symmacho num. XX. & Differt. XVIII. in Syn. Roman. an. 532. num. LXXVI.

vero VI. in Epistola ad Consolatorem Armenorum Catholicum, ut hoc ipsum velut ad fidei regulam pertinens diserte profiteretur, sequentibus verbis urgebat: *si credidisti, & adhuc credis, SOLUM ROMANUM PONTIFICEM dubiis emergentibus circa fidem Catholicam posse per determinationem authenticam, cui sit inviolabiliter adhaerendum, finem imponere?* Quibus potius credemus; Alliacensine, huic doctrinae haereticae infamiae notam inurenti; an duobus Pontificibus eandem doctrinam ad fidem pertinere decernentibus?

Quod vero pertinet ad appellationes in causis fidei ad universale Concilium, quas coram Clemente VII. Alliacensis adituere veritus non est, id in praesentia adnotasse sufficiat, quod est Cl. Thomassino animadversum (a): Quod „ si omnia excutiantur de Gallicanis libertatibus exarata Monumenta, „ id certo comperietur, nusquam de fide certatum, „ nusquam de fidei dogmate litem motam esse Pontifici, quoties pro libertate Gallicana conferta pugna est. Nunquam a Pontificia fidei definitione, „ vel a Sorbonicis, vel ab Universitate Parisiensi, „ vel ab Ecclesia Gallicana, vel a suprema Parlamenti Curia ad Concilium appellatum est. Et antequam „ hae provocationes usurparentur, quandiu solo dissensu Gallia suas tuebatur consuetudines, nusquam „ Pontificis & Romanae Sedis fidei vel definitioni „ dissensu qualicumque suo reluctata est. Haec, inquam, in praesentia adnotasse sufficiat, ut qui saeculo XIV. appellationes in causis fidei a Romano Pontifice ad generalem Synodum commendabat, velut no-

Z z

vae,

(a) Ubi sup. Dissert. XVIII. num. CX.

vae, atque adeo fugiendae doctrinae auctor infimuletur.

C A P U T X X I. &c.

„ Facultatis articuli adversus Joannem Sarrazini
 „ ni Praedicatorem paulo post Constantien-
 „ tiense Concilium, ac Martino V.
 „ sedente.

IN hoc & sequentibus sex Capitibus Bossuetius varia profert Parisiensis Facultatis Acta, quibus probatur, eam summopere invigilasse, ne doctrina Constantiensibus & Basileensibus decretis firmata, libero & effreni contrariorum dogmatum cursu concuteretur. Hinc confixae variisque notis affectae Propositiones, quibus aut Pontifex diceretur fons & origo Ecclesiasticae potestatis, aut ei summa & inconcussa in definiendis fidei dogmatibus auctoritas vindicaretur, aut illi non modo Concilia generalia subjicerentur, verum & ipse ab eorum legibus & coactiva potestate eximeretur.

Notissima haec quidem sunt; sed plura tamen occurrunt, quibus istiusmodi Actis omnis auctoritas abrogatur. Et primo quidem quoniam ejusmodi Acta, quibus auctoritas Apostolica labefactatur, sedes ipsa Apostolica Romanique Pontifices, suorum Praedecessorum vestigiis inhaerentes, constantissime improbarunt. Quum autem nemo, qui Catholico gloriatur nomine, ignoret, Sedem Apostolicam seu Romanam Ecclesiam omnium Ecclesiarum esse Magistram, sacrae doctri-

doctrinae fontem indeficientem, Apostolicarum traditionum fidam custodem, lucidissimam fidei columnam, & Catholicorum dogmatum firmamentum; in qua salutem, vel ipsis fatentibus Adversariis, error inolere ac diu perseverare non possit, & de cujus judiciis salutem, ut vel iidem agnoscunt, recte praesumendum sit; nemo profecto nobis jure succenseat, si pluris quam Parisiensis Facultatis Acta, Sedis Apostolicae eadem Acta improbantis, facimus auctoritatem. Illud vero huic argumento majus pondus ac momentum adjungit, quod turbinibus illis, qui totam Christianam Rempublicam concusserunt, paullulum quiescentibus, ceterae omnes Nationes & Ecclesiae, ac fere omnes aliarum Gentium Academiae ad avitae doctrinae fontem, unde illos violenta tempestas ejecerat, veluti postliminio reversae sunt, Sedique Apostolicae Romanisque Pontificibus, Parisiensis Academiae seu Parlamento Acta improbantibus, adfentiuntur. Quis autem neget Sedis Apostolicae Romanorumque Pontificum, quibus maximus Episcoporum ac Theologorum per orbem Catholicum numerus suffragetur, eminentissimam esse auctoritatem, cum qua cujuslibet Academiae aut Nationis auctoritas nulla ratione conferenda sit?

Secundo, neque ipsa Gallica natio, vel omnes hujus Nationis Theologi vel Episcopi unanimi consensione Parisiensis Academiae sensus amplexi sunt, vel eis, adhuc post Synodum Basileensem constanter ac firmiter adhaeserunt. Exstat in veteri Codice Vaticanae Bibliothecae Collectio testimoniorum ex veterum Patrum & insignorum Theologorum Lucubrationibus

excerptorum, quam Christianissimo Regi Carolo VII. tres status Linguae Occitanae obtulerunt: quibus & Rex ipse munitus & illustratus sibi a schismaticorum dolis caveret, & universum Regnum in Eugenii fide & obedientia contineret. Libet ex tam insigni Monumento aliqua loca decerpere, quibus ad liquidum constet, haud universam Galliam post Constantiense & Basileense Concilium veterum Theologorum dogmata ejuralle, sed insignem Gallici Imperii partem eorum testimonia, quibus talia dogmata adseruntur; & laudasse, & exscripsisse, Regique suo velut apprimae *Catholica* & *authentica* obtulisse. Hoc enim laudatae Collectioni praemittitur exordium: „ Ut ap-
 „ pareat vobis Christianissimo Principi D. N. Regi;
 „ ac vestro honoratissimo & metuendissimo Conci-
 „ lio, supplicationes Vestrae Celsitudinis traditas pro
 „ parte humillimorum subditorum vestrorum trium
 „ Statuum Patriae vestrae Linguae Occitanae, ex zeli
 „ Domus Dei sinceritate processisse pro Ecclesiasticae
 „ pacis, & unionis reformatione, imminentisque
 „ schismatis evitatione, Christianaeque devotionis &
 „ Catholicae obedientiae, quae omni jure debentur
 „ Sanctae Sedi Apostolicae, observatione, ex acervo
 „ innumerabilium auctoritatum, & dictorum Sancto-
 „ rum & Catholicorum atque Scripturarum pro ipsa-
 „ rum declaratione requestarum, & ut ipsis plenarie
 „ per vestram Celsitudinem annuatur, aliqua media,
 „ sed tamen autentica, cum omni subjectionis hu-
 „ militate, praesenti scripto denotantur. Ex quo
 hic aliqua in medium adferre, haud ex re esse judi-
 camus.

Lau-

Laudant enim imprimis plures Angelici Doctores textus ex Summa Theologica, & ex Summa contra Gentiles, atque hunc potissimum ex Comment. in 4. Sent. Dist. XXIV. „ Quamvis omnibus Apostolis data sit communiter potestas ligandi atque solvendi, tamen ut in hac potestate ordo aliquis significaretur, primo & principaliter soli Petro data est; ut ostendatur, quod ab eo in alios debeat ista potestas descendere: propter quod etiam ei dicit singulariter: *Confirma &c. Pafce &c.* id est, lo co mei.

Proferunt & hunc textum Durandi de S. Porciano super eundem Sent. librum & diuinat. „ Potestas, quae data est uni in suo fonte, non est in aliis nisi derivata & limitata pro illius voluntate: sed potestas jurisdictionis, quae est ad regendum populum, tota & in suo fonte data fuit soli Petro, & in eo successoribus ejus, quando cura Ecclesiae sibi soli commissa fuit, dicente Dom. Joh. ult. *Pafce &c.* hoc enim nulli alii Apostolorum dictum est: Ergo talem potestatem plenam & perfectam habet solus successor Petri, qui ad hoc Papa dicitur, quia Pater Patrum: in aliis autem non est nisi derivata & limitata, prout Papae placet. Est hoc est rationale: quia optimum regimen unius multitudinis est, quando regitur per unum superiorem, a quo descendit auctoritas regendi in medios & usque ad infinitos: & propterea hoc regimen est optima Politia secundum Philosophum 2. Politic. Sed regimen Ecclesiae est a Christo optime institutum: Ergo in tota Ecclesia debet esse unus universalis Rector, a quo
„ descen-

„ descendit auctoritas regendi in medios usque ad Re-
 „ ctiores infimos : & hic est Papa . Et propter hoc
 „ stat unitas Ecclesiae , quia omnia membra itant sub
 „ uno capite : qua de causa illi , qui hanc potestatem
 „ negant , schismatici dicuntur , quasi unitatis Eccle-
 „ siasticae divisores .

Exscribunt & haec Alvari Pelagii verba ex libro
 de statu & planctu Ecclesiae : „ Supremam Monar-
 „ chiam & universalem potestatem Christi Jesu Papa
 „ ejus Vicarius per ipsius commissionem , & ipsius vi-
 „ ce & loco obtinet . Inde patet , quod impossibile
 „ est , illas homini subjici : quia in eo in quo sub-
 „ mitterentur , nec eliet Christi Suprema Monarchia ,
 „ nec universalis potestas . Quod est insanum & haer-
 „ eticum ponere . Unde patet , esse impossibile , Pa-
 „ pam in his , quae ad praedictam Monarchiam &
 „ potestatem Papalem pertinent , se cuicunque subji-
 „ cere , dum est Papa .

Neque verentur & hoc Regi exhibere legendum
 Johannis de Lignano testimonium : „ Petro & suis
 „ Successoribus fuit per Christum commissa & tradi-
 „ ta Monarchia terrestris , quae erat penes Salvato-
 „ rem nostrum , plena & libera spiritualium & tem-
 „ poralium . Et pro hoc facit Extravag. Bonif. VIII.
 „ *Unam Sanctam* , ubi dicitur , quod tenere contra-
 „ rium , est haeticum .

Denique , ut alia omittam , suae collectioni &
 haec inserunt verba Augustini de Ancona ex lib. de
 Potest. Eccles. ubi docet : „ quod secundum B. Au-
 „ gustin. super illo verbo Gen. 1. *vidit Deus cuncta*
 „ *quae fecerat , & erant valde bona ; omnia a Deo*
 „ pro-

„ producta, bona quidem erant in se, sed valde bo-
 „ na propter ordinem, quem invicem retinent. Cum
 „ igitur totius Ecclesiastici ordinis Dux & Caput sit
 „ Papa, sicut per appellationem tolleretur talis ordo,
 „ ita tolleretur tale bonum. Dicit ulterius: Quod si-
 „ cut Deus comparatur ad omnes causas secundas in
 „ actione naturali: ita Papa comparatur ad omnes
 „ potestates inferiores Ecclesiastici ordinis in jurisdi-
 „ ctione vel actione morali: Sed sic Deus compara-
 „ tur ad causas secundas in jurisdictione naturali,
 „ quod potest exemptare unam creaturam a jurisdictio-
 „ ne & actione alterius sed non potest exime-
 „ re aliquam creaturam a jurisdictione sua. Nam se-
 „ cundum Apostolum: *Fidelis est Deus, & seipsum*
 „ *negare non potest*: Si autem eximeret creaturam ali-
 „ quam a jurisdictione sua, negaret se esse Deum:
 „ Sic conformiter Papa potest eximere unum Praela-
 „ tum, vel unum Collegium aut plura a jurisdictio-
 „ ne aliorum Superiorum; nullum autem potest exi-
 „ mere a jurisdictione sua: quia tunc negaret se esse
 „ caput totius. Cum igitur per appellationem, si fie-
 „ ret a Papa, homo subtraheret se a jurisdictione Pa-
 „ pae, & supponeret se jurisdictioni alterius, non po-
 „ test sustineri, nec Papa potest de hoc facere statu-
 „ tum: sicut nec facere statutum, quod Papa ex-
 „ sistens Papa, negaret se esse caput totius Ec-
 „ clesiae.

His ergo aliisque quamplurimis veterum Patrum
 ac Theologorum testimoniis praemissis, in haec tan-
 dem desinunt verba: „ Ex praemissis igitur mature
 „ consideratis apparere potest lucide & patenter, sup-
 plica-

» plicationes pro parte praefatorum subditorum ve-
 » ltrae Regiae Majestati Christianissimae porrectas,
 » iustas esse & catholicas, pro veritate S. Matris Ec-
 » clesiae, & ad ipsius scissurae patentis, & quasi ine-
 » vitabilis schismatis, reformationem.

Itaque & post Constantiense & post Basileense Concilium liberum erat in Galliis, & coram Rege Regnique Optimatibus, profiteri, Romanum Pontificem fontem esse Ecclesiasticae jurisdictionis, ac talem esse Ecclesiasticam Monarchiam, ut non secus atque in aliis Regnis, auctoritas & potestas ab uno in alios omnes derivetur: Monarchiam Romani Pontificis utramque potestatem & spirituales & temporales complecti: Pugnancia loqui, qui Pontificiam potestatem supremam & universalem esse fatentur, & eam tamen cuicunque homini aut creaturae potestati subijciunt: Denique & eos pariter *ἀκούειν* docere, qui Romanum Pontificem totius Ecclesiae Caput agnoscunt; nec tamen improbant, quod aliquis per appellationem ab ejus se eximat potestate.

Quum ergo Basileensium doctrinam nec universa Gallia amplexa sit, & ei reliquae per orbem Nationes constantissime refragentur, & in veteri sententia perseverarint, quae ante finem saeculi XIV. & initia XV. haud secus in Galliis atque in reliqua Ecclesia passim ac libere tradebatur; quumque in re ad fidem & ad interpretationem divini juris pertinente versemur: viderint Adversarii, qua ratione cum Parisiensis Academiae censuras & acta tueantur, tum suis dogmatibus catholicum titulum vindicare praesumant: Illud

Illud enim scimus esse (a) *Catholicum*, quod ubique ; quod semper, quod ab omnibus creditum est ; cui & universitas, & antiquitas, & consensus suffragatur. At eorum Acta, censuras & dogmata nec universitas, nec antiquitas, nec omnium vel intra Gallias consensus probant ; quin eis vehementissime refragantur. Quid ergo, inquis, an eos Catholicos esse negas, qui nostris dogmatibus adversantur ? Absit, ut aliquam iis infamiae notam inuram, qui Catholicae communionis carissimis vinculis nobis conjuncti sunt. Sed hoc monemus, sufficere illis debere, quod eorum doctrina, quae & novitate & sectatorum paucitate suspecta est, in Ecclesia toleratur. Nec proinde Censuras & Acta proferant & ostendent, quae & antiquitas, & universitas, & ceterarum Nationum consensus neque probat, neque unquam probabit. Summopere autem mihi probatur Cl. Thomassini sententia, quam hîc ego ipsissimis ejus verbis pro coronide adtexam (b) :

„ Quod etiam, *inquit*, temeritatis & erroris macula
 „ absolvit Duvallius eos, qui errare posse in docen-
 „ do Pontifices pronuntiant, (*atque eadem ratione*
 „ *qui eosdem Pontifices Conciliorum generalium po-*
 „ *testati subjiciunt*) nec id abnuerim. Quamquam
 „ enim tam perspicua, & tam inconcussa illis omnium
 „ retro saeculorum ante Constantiensem Synodum tra-
 „ ditio infesta sit : quamvis adversus nuperas tot hae-
 „ reses sibi non discors Ecclesiae disciplina refrage-
 „ tur : clementius tamen habendi sunt, tum quod
 „ Pontificias Constitutiones saltem Ecclesiae Catholi-

A a a a

„ cae

(a) Vinc. Lirin. Commonit. I. cap. III.
 (b) Dissert. XVIII. in Syn. Rom. an 532. num. XCVII.

„ cae contemplatione adducti venerantur : tum quod
 „ aliud in Ecclesia, quam in schola ; aliud moribus,
 „ quam calamis sequantur. Abrepti enim torrente
 „ quodam universitatis fidelium toto orbe diffusae ad
 „ Pontificiorum de fide decretorum venerationem pa-
 „ riter impelluntur, nec penitus illibentes. Ut sum-
 „ mum ergo, quod non semel jam supra astruximus,
 „ his illi accensendi sunt, qui *minus caute & sim-*
 „ *plicius* aliquid opinantur ; nec Catholico nomine
 „ excidunt, quibus simplicitas sua patrocínio est.
 „ Nam utcumque sibi docti videri soleant, non pos-
 „ sunt tamen non valde hospites & peregrini in an-
 „ tiquissima Ecclesiae & universae, & in primis Gal-
 „ licanae, doctrina & disciplina existimari, qui tam
 „ longe ab illa deviant ; & nuperis dumtaxat, nec
 „ Ecclesiae ubique terrarum approbatis documentis,
 „ novellam suam opinionem communiunt.

C A P U T X X V I I I.

„ An sententia de potiore Concilii potestate
 „ Regum juribus ac potestati noceat. Tho-
 „ mae Corcellaei responsum : Propositio Jo-
 „ hannis Hussi (*leg. Wicleff*) in Constan-
 „ tiensi Concilio condemnata.

Quidquid in hoc Capite Meldensis Episcopus
 dicat ; certum est, tamen, Petrum Alliacensem
 & Johannem Gersonium, qui praecipui no-
 vorum dogmatum auctores habentur, ut Pontifices
 Ecclesiae & Concilio generali, ita Reges Reipublicae
 Regni-

Regnique generalibus Comitibus & Conventibus subjecisse. Certum est etiam, Aenea Silvio, qui praefens aderat, referente, quod Episcopo Conchenfi Basileae hac ratione Concilii causam agente, summo cum plausu, commendatione & approbatione ab universo Coetu ejus oratio excepta est: *Adductoque*, inquit (a), *in testem summo omnium Philosophorum Aristotele*, dicebat, *in omni Regno bene instituto illud in primis desiderari, ut plus Regnum posset, quam Rex: si contra reperiretur, id non Regnum, sed tyrannidem dici debere*. Sic etiam sibi de Ecclesia videri, quod eam plus suo Principe, id est Papa, posse oporteret. *Quem sermonem sic ornate, sic suaviter disputavit, sic docte atque verifice, ut omnes ab ejus ore avide dependerent ipsumque unicum esse scientiae speculum praedicarent*. Denique certum est, Almainum, Johannem Majorem, & Edmundum Richerium, post Alliacensem & Gersonium, ejusdem doctrinae vindices & adsertores, eidem principio innixos, perinde & Reges regnis, & Romanos Pontifices Ecclesiae, subiectos esse, diserte ac data opera propugnasse.

Quod ergo Thomas Corcellaeus, Factionis Basileensis Oratorum unus, coram Carolo VII. Francorum Rege, & a se & a suis symmystis hanc sententiam rejicere visus est; id factum ab eo potius ad declinandam & repellendam invidiam, quam quod reapse illos ab eo dogmate alienos judicaret. Utunque est, illud etiam certum & exploratum esse videtur, neque memoratum Auctorem, neque Meldensem Episcopum jure sibi summis, Constantiense Concilium,

A a a 2

quum

(a) Lib. 1. de Gest. Conc. Basileens.

quum XVII. Wicleffi propositionem confixit; quod *Principes debeant puniri ad arbitrium populi*; eorum quoque sententiam damnasse, qui Reges regnis, quibusdam in casibus, subjicerent, non Regna regibus. Non enim Alliacensis, Gersonius, Conchenſis Episcopus, Aeneas Silvius, Johannes Major, & Almainus, quos certum est eam tenuisse sententiam, unquam dixissent, ad arbitrium populi Principes esse puniendos. Quemadmodum neque Synodus Constantiensis, quae ejusdem Corcellaei & Illultriss. Adversarii opinione, Synodo generali Romanos Pontifices subjecit, non Romanis Pontificibus Synodos, unquam eos probasset, qui abrupte ac temere effutirent, ad arbitrium Episcoporum aut Synodorum Romanos Pontifices esse puniendos: Quum ea utique non ignoraret, VIII. Synodi Oecumenicae decreto sancitum esse: Quod si Synodus universalis fuerit congregata, & facta fuerit etiam de Sancta Romanorum Ecclesia quaevis ambiguitas & controversia: oportet venerabiliter, & cum convenienti reverentia de proposita quaestione sciscitari, & solutionem accipere, aut proficere aut perfectum facere; non tamen audacter sententiam dicere contra summos senioris Romae Pontifices.





LIBER SEPTIMUS
 Q U O
 MELDENSIS EPISCOPI
 LIBER UNDECIMUS!

*De Pontificiae Potestatis usu per Canones
 moderando,*

„ Ad Caput Tertium Gallicanae Declarationis
Examinatur, & confutatur.

C A P U T P R I M U M.

„ Refertur Caput Tertium hujus declara-
 „ tionis.



INC Apostolicae potestatis usum moderan-
 dum per Canones, Spiritu Dei conditos,
 & totius mundi reverentia consecratos. Va-
 lere etiam regulas, mores & instituta a Re-
 gno & Ecclesia Gallicana recepta, Patrumque termi-
 nos manere inconcussos: Atque id pertinere ad am-
 plitu-

plitudinem Apostolicae Sedis, ut statuta & consuetudines tantae Sedis, Ecclesiarum consensione firmatae, propriam stabilitatem obtineant.

Hoc tertium Caput est celeberrimae Declarationis, cujus sensum Meldensis Episcopus sequenti capite breviter ac nitide exponit. Sed antequam ad ea retractanda aggredior, quae in ejus confirmationem idem Illustrissimus Adversarius toto hoc Libro disseruit, operae pretium existimavi sequentem praemittere Dissertationem, qua Ecclesiasticae Monarchiae formam, vim ac potestatem edissero; unde clare ac dilucide constet, sitne Romanus Pontifex Ecclesiae legibus subiectus nec ne sit; quoque sensu id adfirmari vel negari commode possit.



DISSERTATIO,

Q U A

*Ecclesiasticae Monarchiae forma
seu ratio explicatur.*

Uamquam ex his, quae in superioribus Libris late copioseque disserui, satis constare arbitrer, tum esse in Ecclesia Monarchicum regimen divinitus institutum, tum etiam quae talis regiminis vis & potestas & auctoritas sit: attamen vereor, an adhuc tantae rei satis claram nitidamque notionem informarim, & quae ad omnium mentes satis apta & accommodata videatur. Qui enim alterius Operis refellendi provinciam suscipit, ac potissimum si Adversarii sui vestigiis ~~non~~ ^{non} insilire proposuerit, vix fieri potest, ut cogitationes suas tam apte eleganterque disponat, & ad unius certi limatique systematis, cui nihil defit & in quo nihil redundet, formam & venustatem revocet, atque is qui ab hac necessitate solutus ac liber est, & qui non aliena diruere, sed sua accurate ac nitide exponere & stabilire conatur. Quum ergo Meldensem Episcopum insequor, & in ejus argumentis evertendis immoror, quae quum rerum olim gestarum monumentis fere nitantur, paucis ut plurimum expediri non poterant, non omnia suis locis disponere, & longius aliquando excurrere coactus sum, quam concinnandi systematis ratio postularet. Itaque, ut & mihi imprimis satisfacerem, qui
rerum

rerum omnium, quarum tractationem aggredior, quantum quaelibet patitur, claras ac distinctas ideas & notiones expeto; atque ut in pauca contraherem quae latissime disputata sunt, ac variarum & disjunctissimarum rerum narrationem ad certa capita revocarem; ac denique ut Lector perspectum atque exploratum habeat, quam apte omnia concinneque & sibi & communibus notionibus in nostro systemate congruant respondeantque; contra vero quam inconcinna & *arsuata* sint quae Adversarii comminiscuntur: haud abs re esse judicavi, si speciali Dissertatione Romani Pontificis Monarchiam, quam omnes Catholici agnoscunt, ad certa principia & regulas exigerem, ex quibus illius forma ratioque pendeat & innotescat. Hunc autem sibi locum haec disputatio vindicare debuit: quoniam & ejus fundamenta in praecedentibus libris posita sunt; & quae in sequenti libro dicenda sunt, nisi ea praemissa, feliciter explanari, probe intelligi, & in bono lumine collocari non possunt. Ubi autem semel Apostolicae Monarchiae forma rite constituta fuerit, quae deinceps ad ejus vim ac potestatem labefactandam Meldensis Episcopus adjiciet, ea aut sponte concident, aut nullo negotio dissolventur.



CAPUT PRIMUM.

Veræ, propriæ & perfectæ Monarchiæ ratio in eo posita est, ut non modo singula Reipublicæ membra, verum & universa Respublica ab uno pendeat, eique omnino subjiciatur: Talem esse Romani Pontificis Monarchiam, eadem argumenta suadent, quibus Adversarii probant, fuisse a Christo in Ecclesia Monarchicum regimen institutum.

Christum, Ecclesiam suam, quamquam in universum qua patet orbem, & in omnes gentes, quæ cæli ambitu continentur, propagandam, sic tamen instituisse, ut esset velut una Respublica vel unum Regnum, una civitas, una familia vel una domus, unum ovile, unus exercitus, & unum corpus; cum sacrae litteræ, tum omnes Patres ab ipsa Christianæ Religionis origine perspicue luculenterque testantur. Quibus etiam illud aperte proditum est, hanc omnium Christianorum societatem, hanc omnium Ecclesiarum ad unum veluti corpus constituendum conspersionem, hanc denique totius Ecclesiæ individuum & inviolabilem unitatem, non ipsorum inter se Christianorum aut Ecclesiarum pacto seu foedere initam esse continerique; sed divina quadam vi ac potestate niti, quæ hanc omnium hominum & omnium gentium societatem, & universam compagem summo jure & auctoritate gubernet. Quamquam enim, uti Viris Juris publici consultissimis observatum

B b b b

est,

est (a), duo sunt potissimum vincula, quibus plurium hominum voluntates connectuntur, ut in unum conspirent; pactum & imperium: attamen sola pacta vincula non satis valida sunt, ut plures in unum corpus *morale* firmiter colligantur: longeque validius vinculum est imperium. Non enim, quemadmodum aequaliter foederati, ita & qui eodem imperio continentur, manent omnes inter se aequales, sed dum in unum hominem aut Concilium confertur potestas praescribendi, malumque aliquod per modum poenae repraesentandi illis, qui praescripta obire neglexerint, omnibus longe major incumbit obsequii necessitas, quam si solo pacto necerentur, quo aequalitas inter socios, & jus resistendi alteri, non forent sublata. Quum ergo Christus Ecclesiam suam ex omnibus Gentibus congregandam & in aeternum duraturam, unam esse voluerit, velut unam Civitatem aut unum Regnum; Christianae religionis cultores, non mero foedere aut solis pactis, sed auctoritate & imperio tanquam firmissimo vinculo in mutuam societatem & in unum corpus colligare debuit. Quod & re ipsa perfecisse, ex sacris litteris & constanti Patrum traditione compertum est.

Hanc ergo summam potestatem, quae suapte vi & Imperio universam Christianam Rempublicam contineret, aut penes unum, aut penes paucos, aut penes universos, Christus esse voluit; si penes unum, Monarchicum in Ecclesia regimen instituit; si penes paucos, Aristocraticum; si penes universos, Democraticum. Nemo autem Catholicorum ignorat, aut non aperte profite-

(a) Puffend. de Jure N. & G. lib. VII. cap. IV. §. IX. & Dissert. de Reb. gest. Philippi §. IV.

fitetur, Ecclesiae regimen ex divina institutione Monarchicum esse, & penes Romanum Pontificem, Apostolorum Principis Successorem, esse hanc ad regendam universalem Ecclesiam Monarchicam potestatem. Verum, ut Hugo Grotius (a), Arnisaeus (b), alique sapienter admonent, sollicite cavendum est, ne decipiamur ambiguo nominis sono, aut rerum externarum specie. Saepe enim accidit, ut qui omnia Majestatis jura usurpaverant & Rempublicam Regia plane seu Monarchica potestate premebant, regio tamen nomine & splendore abstinere; contra vero regio titulo & externa majestatis specie gauderent, qui illius vi ac potestate destituti essent. Quod laudati Auctores plurium cum veterum tum recentium Regnorum ac Rerumpublicarum exemplis accurate demonstrant. Si quis enim Ex. Gr. ex solo titulo Romanorum post Caesarem Imperatorum majestatem metiri voluisset, proculdubio Regiam iis Majestatem abjudicasset: quibus tamen Regiam summamque dominationem (c) qui rem ipsam spectarunt, disertis verbis adseruerunt: *Quicumque*, inquit Apianus Praef. Hist. *post Caesarem imperium tenuerunt, licet se Imperatores tantum dixerint tamen ἡγετα καὶ πάντα βασιλεῖς exstiterunt*. Cui concinens Dion lib. 53. *Quum ad Imperatores*, inquit, *summa rei deferatur, fieri non potest, quin sub Regno Romani sint*. Et contra Lacedaemonii Duces ex Herculis posteritate, postquam Ephoris subiecti fuere, Reges nihilominus dicebantur, nimirum

B b b b 2

no-

(a) Lib. de Jure B. & P. cap III. § X.

(b) Lib I de Jure Majest. cap I.

(c) Tert. & Polog. cap. XXIIV. vocat Imperium summae dominationis.

nomine magis quam imperio, seu, *nomine non potestate*, quemadmodum Cornelio Nepoti in Agesilao proditum est: Et veteri Germaniae Reges erant, quos Tacitus praefuisse ait auctoritate suadendi, non iubendi potestate. Cavendum est ergo, ne qui Monarchicam potestatem Romano Pontifici verbis adserunt, re ipsa denegent, aut vim ejus & jura labefactent. Quare accurata ejus notio nobis sollicitè prae oculis habenda est: ac vel Romano Pontifici tribuenda sunt quae ad Monarchici regiminis constitutionem, *velut* aut substantiam pertinent; aut absolute negandum est, Monarchicum esse in Ecclesia regimen: quum Christianam modestiam minime deceat titulis sine re, & magnificis vocabulis ad meram pompam summum sacrorum Antistitem decorari.

Illum ergo rerum Politicarum Scriptores vere ac proprie Monarchica potestate praeditum esse definiunt, qui solus & sine alterius consortio summa auctoritate, non modo singulas Reipublicae partes, verum & universam Rempublicam administrat. „ Monarchiam, inquit Johannes Bodinus (a), Reipublicae genus esse „ diximus, in qua penes unum summa totius Reipublicae potestas est. Unum cum dicimus, ipso Monarchiae verbo satis significatur: nam si duos pluresve adjungamus, nemo eorum summum imperium habet: „ quia summus dicitur qui nullius imperio tenetur, & „ ceteros cives tum universos, tum singulos coërcere „ potest. Hoc enim omni perfectae civitati seu Reipublicae commune est, quod summa aliqua potestate gubernentur: quae si penes unum est, Monarchia dicitur; si penes paucos, Aristocratia; si penes universos Demo-

crat-

(a) Lib. II. de Republ. cap. II.

cratia. Ac propterea quemadmodum in populari gubernatione populo quidem in singulos cives potestas est, sed populus ipse a nemine pendet: & in Optimatum dominatione, singuli Patres Senatui, at Senatus ipse nulli subijcitur: ita in Monarchico Principatu unus est, qui a nemine pendet, & in quem proinde ulla nec singulis civibus nec universis potestas est. Nam rursus quemadmodum Aristocratia totius populi potestatem ad Senatum sive Optimatum coetum: ita Monarchia omnia & populi & Senatus jura ad unum transfert; cui proinde quidquid in Republica est, & ipsa universa Respublica subiecta est.

Et haec quidem, quod ad Politicam seu Civilem Monarchiam pertinet, Adversarii ultro ac libenter admittunt, nihilque frequentius ingerunt, quam Principem, qui vere ac proprie Monarchico jure gubernet; uni Deo subiectum & obnoxium esse, nullam totius populi in ipsum Principem esse potestatem, hujus denique unius auctoritate universam Rempublicam contineri. At Monarchicum Sedis Apostolicae principatum alius esse rationis: neque enim Ecclesiasticam Monarchiam, sub Christo praecipuo Monarcha constitutam, ad formam Monarchiae saecularis penitus institutam esse, ut illa ex hujus praerogativis ac legibus omnino metienda & aestimanda sit: neque adeo quoniam nec singulis civibus, neque universae Reipublicae in Principem, qui vere ac proprie Monarchico jure praesit, ulla potestas est, inde legitime eorum judicio sequitur, ullam non modo singulis Episcopis, sed neque universae Ecclesiae, inesse in Romanum Pontificem potestatem.

Paria his etiam de Civili seu Politica Monarchia
ali-

aliquot Scriptores commentos esse, Hugo Grotius (a), Puffendorfius (b), alique testantur. Majestatem illi seu summam potestatem in *realem & personalem* distinguunt, posteriorem quidem Regi, priorem autem Populo vindicantes, unde mutua quaedam subjectio Regem inter ac populum exsistat; ut populus universus Regi recte imperanti parere debeat, Rex autem male imperans populo subjiciatur. In qua tamen divisione, uti Puffendorfius observat, potiora essent jura populi quam Regis, quod jura realia personalibus ut plurimum antecellant, & majore in pretio habeantur. Et hanc quidem civilis Monarchiae ideam Alliacensis, Gersonius, Aeneas Silvius, Johannes Major, Almainus, alique novorum dogmatum architecti seu defensores animo informasse videntur, eamque postmodum ad Ecclesiasticam Monarchiam accommodasse. Atque ut alios praeteream, quorum una est de his rebus eademque sententia, instar omnium erit Jacobus Almainus, qui adversus Cajetanum de Ecclesiae & generalium Conciliorum auctoritate differens, capite primo *de origine* tractat *Jurisdictionis Civilis, ut per ejus*, inquit, *comparationem notificetur Jurisdictio Ecclesiastica; sicque lege naturali Ecclesiae auctoritas super Papam demonstretur*. Has porro de Civilis Jurisdictionis origine theses statuit: „Quod
 „ lege naturali Jus gladii concessum est Reipublicae.
 „ Quod quanvis populi consensu Jus omne & potestas
 „ translata sit in Regem; tamen Respublica semper habitu hanc retinet potestatem, neque a se abdicare
 „ cam potest. Quod tota Communitas potestatem ha-

» bet

(a) Lib. I. de Jure B. & P. cap. III § VIII & IX.

(b) Lib. VII. de Jure Nat. & Gent. cap. VI §. IV.

„ bet super Principem ab ea constitutum, qua eum (si
 „ non in aedificationem, sed in destructionem Politiae
 „ regat) deponere potest, alias non esset in ea sufficiens
 „ potestas se conservandi: & ista potestate Gallorum
 „ Communitas quondam usa Regem suum deposuit,
 „ non tam pro criminibus, quam pro eo quod tanto
 „ regimini inutilis esset. Quod non ideo dicitur Poli-
 „ tia aliqua Regalis, quia unicus ei praesit, qui sit tota
 „ Communitate in Jurisdictione major, nec ei quovis
 „ modo subjectus; sed solum propter hanc causam quia
 „ unicus praest, qui in quemlibet alterum de Com-
 „ munitate jurisdictionem habet, & est eo superior.
 Haec ergo sunt Almaini de Civilis Jurisdictionis origine
 Theoremata: quae subiinde ad Ecclesiasticam Monar-
 chiam, & modum exercendae in Ecclesia jurisdictionis
 accommodans, ait inter cetera (cap. IX.) quod quem-
 admodum Rex „ quamvis dicatur caput regni in civi-
 „ libus, non est tamen concedendum, quod sit regno
 „ congregato superior in civilibus: pariformiter de Pa-
 „ pa in ordine ad Ecclesiam dicendum est. Cui concin-
 ens Johannes Major, & ipse adversus Cajetanum pro
 Concilii generalis potiore auctoritate disputans, ait: *Quod*
sicut populus virtualiter est super Regem & in casu, ut
in rebus arduis, in quibus convocantur tres status re-
gni, qui Regem in casibus habent dirigere: sic in casibus
arduis Concilium universale rite congregatum habet le-
ges obligatorias Pontifici imponere. Horum ergo Au-
 ctorum sententia, vis Monarchici Principatus non in
 eo posita est, ut Princeps absolute ac generatim univer-
 sa Republica superior sit, eamque subjectam habeat;
 quum haec vim abdicare non possit ad Principem coër-
 cen-

cendum vel in ordinem redigendum, si ad regimen ineptus judicetur, aut potestate sua abutatur. Quos ideo minus mirandum est, eandem sibi Ecclesiasticae Monarchiae formam confinxisse: ad quam etiam utcumque statuinendam iisdem ferme rationibus utebantur, quas ad Civilis Monarchiae vim infringendam cum iisdem, tum alii apud Grotium & Puffendorhium Scriptores adhibebant; atque eam potissimum, quod regimen omne, eorum qui reguntur, non qui regunt, causa paratum sit, unde eorum iudicio consequens erat, quod & Regalis potestas propter populum, & Pontificia propter Ecclesiam a Christo instituta sit.

Libuit tamen postmodum, ut paullo antea monēbam, recentioribus Scriptoribus, quos Adversarios in hac causa experimur, utriusque Monarchiae rationes sejungere; ut civili quidem non modo singuli, verum & universi cives generatim & absolute subicerentur, Pontificiae vero Monarchiae universa Ecclesia antecelleret, atque hujus potestas & auctoritas potior & excellentior haberetur. Cujus tamen discriminis non modo ab illis Auctoribus nulla solida ratio adferri potest, sed quaecunque ab eis ad stabiliendum in Ecclesia Monarchicum regimen adferuntur, perinde probant, haud aliam esse excogitandam Civilis atque Ecclesiasticae Monarchiae rationem. Et sane si rerum notiones fixae & immobiles non sunt aut esse non debent, easque licet ad arbitrium ad proprias rationes & hypotheses accommodare, nemo non videt, quanta illico in res Philosophicas ac Theologicas perturbatio inferenda sit. Non enim hic quaerimus, an Romani Pontificis principatus Monarchicus appellandus sit, sed rem ipsam quaerimus; & an

& an Monarchicus reapse sit. Nam quod ad vocabulum pertinet, facile ab illo abstineremus, quod neque ex Scriptura, neque ex primaeva traditione habeatur, sed a posterioribus rerum divinarum tractatoribus adscitum & usurpatum est ad rem ipsam significandam, quae clare atque perspicue in sacris litteris & Ecclesiae traditione contineretur. Non ergo quaerimus, an Romani Pontificis principatus ad pompam & splendorem ejus augendum, & fucum faciendum imperitis Monarchici appellatione donandus sit; sed an res hoc nomine significata in eum conveniat, hoc est, an reapse illius Principatus Monarchicus sit necne. Nam si Monarchicus est, quae ad notionem & ~~visum~~ sive substantiam Monarchiae pertinent, ipsi abroganda non esse, jure meritoque contendimus. Hanc autem quum in eo positam esse, ut non modo singuli cives, verum & universa Respublica ab uno pendeat, in quem populo nulla sit auctoritas & potestas, perspicue demonstratum sit; inde consequens esse judicamus, non modo singulos Episcopos, verum & universam Ecclesiam ab uno Romano Pontifice pendere, in quem pariter eidem Ecclesiae seu per orbem diffusae sive in Synodum congregatae nulla sit vis & auctoritas tribuenda.

Non modo autem id exigit ipsa Monarchici Principatus ratio, verum id etiam suadent argumenta, quibus Theologi, & in his etiam qui nobis adversantur, Monarchicum regimen a Christo in Ecclesia institutum fuisse demonstrant; suadent, inquam, talem Monarchiam fuisse a Christo institutam, qualem paullo ante descripsimus, & cujusmodi in Civilibus admittenda est, nec deterendam esse Monarchici regiminis vim, quum

C c c c

de

de Christiana Republica sermo est. Civilis gubernatio, quemadmodum superius adnotatum est, vinculum est humanae societatis, & ad hominum pacem fovendam & multitudinem in unitate continendam instituta est. Quoniam vero ad hunc finem consequendum Monarchica gubernatio aptissima esse videtur; ideo Monarchia, communi Sapientum judicio, omnium gubernationum optima & perfectissima species habita est. Indeque Theologi jure colligunt, hanc Christum ceteris praetulisse; tum quia maxime decuit, perfectissimam Rempubicam seu civitatem, cujusmodi est ejus Ecclesia, optima & praestantissima forma administrari (a): tum etiam qui a longe arctiori vinculo in unam societatem & in unum corpus omnes Gentes constringere & colligare voluit, quam quo in unam civitatem ejusdem Nationis homines conjunguntur. Quid enim frequentius, quidve majori studio quam pax & unitas in sacris novi Foederis litteris commendatur, ingeritur & inculcatur? Debit ergo omnes Gentes in hoc unum caelestis Reipublicae corpus arctissimo atque validissimo humanae societatis vinculo colligare. Quod, ut jam diximus, omnium fere Sapientum consensione, Monarchicum imperium est, quando, ut quidam ait (b), unus fulminat Jupiter, & unius jussa exaudiuntur, unus veneramur

mur

(a) Optima regiminis forma in Ecclesia instituta a Christo est: sed Monarchia omnibus regiminis formis antecellit, ipsa natura teste, quae regem unum Apibus, gregibus ducem unum, armentis rectorem unum praeficit; ipso naturae Austore demonstrante, qui caelestibus Hierarchiis unum Angelum

constituit ceterorum ducem ac praesidem: ergo Ecclesiae regimen ex Christi institutione Monarchicum est. *Nat. Alex. Dissert. IV. in Hist. Eccles. saec. I.*

(b) Vander Muelen ad lib. I. Grotii de J. B. & P. cap. III. §. VIII. num. 2.

mur majestatem & purpuram adoramus, nobis obedientiae relicta gloria. Vix enim, ut idem subjungit, ita commode haberi potest illa animorum ad unum eundemque finem conspiratio, ubi plures imperium tractant, propter varia hominum ingenia, & multorum male composita saepissime desideria. Quot homines, tot sententiae, quas in unum consensum cogere, hoc opus, hic labor est. Inde saepissime dissensiones gravissimae, discordiae, rixae, bellorum intestinorum causae, quibus incommodis mederi non possumus, nisi unus constitutur Dominus, unus Rex, ut exclamat Caligula apud Svetonium cap. II. Unde illud apud *Salustium*: *Non potest Respublica geri multorum imperiis*. Et apud Homerum: *Multorum imperium baud bona res*. Cujusmodi incommoda quum providerent mortales, videntur in excitanda societate civili eandem regiminis formam, quam natura cuilibet Patrifamilias tribuerat, introducere voluisse. Arbitrantes eam maxime humanae naturae consentaneam, quae ei erat coaetanea & quasi innata. Quae nemo non facile intelligit, quam etiam ad Ecclesiasticam Monarchiam commendandam & stabilendam apta & idonea sint.

Verum ii, qui ob ejusmodi rationes Monarchicae gubernationis formam ceteris in civilibus praeferebant, haud aliam Monarchiae speciem cogitabant, quam quae non modo in singulos cives verum & in universos jus imperanti & potestatem tribuit. Atque hoc maxime, ut ait Johannes Bodinus (a), Monarchicum regimen ceteris antecellit, quod in Aristocratico & Democratico, qui summum imperandi jus habent, omnibus qui-

C c c c 2

dem

(a) Lib. II. de Repub. cap. VI.

dem sigillatim imperare possunt, collectim non possunt. Igitur Monarchia eo praestabilior est ac illustrior, quod unus universis ac singulis imperandi jus habet: quod animadversione singulari dignum mihi videtur. Quod autem pertinet ad illam Monarchici regiminis formam, quam ii sibi confinxerunt, qui summa potestate in *realem* & *personalem* distributa, hanc quidem Regi, illam vero populo vindicarunt; de illorum opinione Puffendorfius graviter sapienterque pronuntiat (a), aequae illam absurdam ac periculosam esse, potissimum si commentitia illa distinctio ad monarchicum regimen accommodetur: ut nimirum simul ac semel in una eademque Republica duae supremae Potestates habeantur; altera *personalis*, quae penes Regem; altera *realis*, quae penes populum sit, ac priori illi opposita & aequalis, vel etiam illa praestantior: quum Jura realia personalibus ut plurimum praestent. Ac reapse fieri & concipi nulla ratione potest, quod simul ac semel duae summae Potestates in una eademque civitate sint: nec duo capita in eodem corpore essent, quin illud mortalibus morbis conflictaretur. Eademque & Arnisaeus (b), & alii pluribus prosequuntur: quae nos in Caput proximum reservamus, in quo demonstrandum nobis est, quot & quibus incommodis obnoxia sit ea, quam sic vocant, monarchicae gubernationis forma, qua Adversarii Ecclesiam esse regendam, & sibi & aliis persuadere voluerunt. Interim ergo paucis observasse sufficiat, non esse hanc optimam gubernationis speciem, & ad populorum pacem, & *moralis*, ut ajunt, *corporis* sanitatem tuendam ma-

(a) Lib. VII. de J. N. & Gent. cap. VI. §. IV.

(b) Lib. I. de Jure Majest. cap. III.

maxime accommodatam: sed illam praestantissimam esse, quum unus omnibus & singillatim & collectim praecelt. Et merito sane: nam in qualibet bene instituta gubernatione summa Potestas; seu penes plures, seu penes paucos, seu penes unum sit; instar animae ac mentis est (*a*), quae ut in corpore naturali, ita in corpore Politico una esse debet; ut nimirum non alia sit in populo ratio & voluntas, alia in summo Gubernatore: sed hujus voluntas & ratio, potestas & imperium, populi quoque voluntas & ratio, potestas & imperium sit: quoniam ex duobus una persona quasi formatur, & quidquid vult summus Gubernator & imperat, etiam universus populus velle & imperare videtur. Atque haec una ex rationibus est, ob quas Monarchica gubernatio ceteris antecellit (*b*): quoniam Populus aut Senatus non nisi *moraliter* una persona sunt ex pluribus personis physicis constituta, quarum quaelibet suam physice voluntatem habet: quas omnes non adeo facile ac proclive est in unam conjungere voluntatem; in Monarchia vero una etiam *physice* persona & voluntas est: quae proinde aptior esse debet ad populi pacem unitatemque tuendam.

Quae quum ita sint, nemo jam non facile intelligit, quod si Christus Monarchicum in Ecclesia regimen instituire debuit, quoniam optimum & praestantissimum est, & ad conservandam Reipublicae pacem & unitatem imprimis aptum & idoneum: etiam talem Monarchiam instituire debuit, quae maxime & excellentissime

(*a*) Vid. Vand. Muel. ubi sup. §. VII. num. I. & Puffendorf. de Rebus gestis Philippi §. 6. & seqq.

(*b*) Vid. Puffend. lib. VII. de J. N. & G. cap. V. §. IX.

sine ad hunc finem conducere videatur, cujusmodi, ut jam ostendimus, illa est, quae majestatem & summum imperium in unum confert, qui tuendae societati praesit, nec ullas imperii vel majestatis partes populo aut societati reservat. Hanc ergo in Ecclesia Christus instituit. Nam quod ad eam pertinet Monarchiae formam, quam Adversarii comminiscuntur, illa, ut sequenti capite demonstrabitur, plurimis & gravissimis incommodis obnoxia est, & ad Reipublicae pacem obtinendam unitatemque servandam, Democratia aut saltem Aristocratia minus accommodata. Quapropter haec ipsa ratio, qua vel ipsi Adversarii probant, monarchicum regimen fuisse a Christo in Ecclesia institutum, quod optimum & praestantissimum sit, probat etiam haud aliam monarchici regiminis formam instituisse, quam quae totam majestatem & summum imperium in uno collocat, cui non modo singuli cives aut omnes singillatim, verum & universa Respublica subjecta sit: haec enim optima & perfectissima forma est, & ad Rempublicam seu civitatem continendam & conservandam aptissima: qua nimirum fit ut universum corpus uno spiritu & una mente regatur.

Neque id minus aperte luculenterque demonstrant aliae rationes, quae ad stabiliendam Romani Pontificis Monarchiam ab eisdem nostris Adversariis adferuntur. Monarchicum enim regimen fuisse in Ecclesia a Christo institutum; „Probatur (inquit Nat. Alex. ubi supra) „ex similitudinibus, sub quibus in veteri & novo Testamento adumbratur Ecclesia. *Terribilis dicitur ut* „*castrorum acies ordinata*. Cantic. VI. At in acie ordinata, praeter Tribunos & inferioris ordinis Duces, „unus

„ unus esse debet Imperator, ad quem summa rei mili-
„ tatis referatur, quique exercitui quod factio opus sit
„ significet ac decernat. *In quamvis grandi exercitu*
„ *unius signum exportatur*, inquit S. Hieronymus epi-
„ stola IV. Ecclesia regnum est Danielis II. praedictum
„ his verbis: *In diebus regnorum illorum s. scitabit*
„ *Deus caeli Regnum, quod in aeternum non dissipabi-*
„ *tur* &c. Cum itaque regnum Christi sit praesentis
„ temporis Ecclesia, in ea summus Princeps esse debet,
„ qui ipsam regat ac moderetur. Ecclesia navis est, in
„ qua per Baptismum salvamur, in similitudinem eo-
„ rum, qui in Arca Noë salvabantur, I. Pet. 3. Navi
„ porro unus summus Nauclerus praesse debet, qui
„ singulis nautis sua munia praescribat. Ecclesia ovile
„ est, Johan. X. *Fiet unum ovile, & unus Pastor.*
„ Numquid vero in ovili, praeter minores opiliones,
„ non est aliquis summus Pastor, cui incumbat ovium
„ curam gerere, easque universim regere ac fovere?...
„ Ecclesia domus est. Nonne igitur unus esse non de-
„ bet illius Dominus, unusque in ea oeconomus con-
„ stitui?... Ecclesia denique unum corpus est, Ad
„ Rom. XII. Quemadmodum igitur in membrorum
„ multitudine caput unum est, quod omnia membra
„ necit ac regit: ita in Ecclesia Christi unum caput su-
„ premum esse debet. Quodnam porro illud est nisi Ro-
„ manus Episcopus?

Verumenimvero si quis harumce similitudinum
vim serio ac diligenter expenderit, statim intelliget,
non qualemcumque Monarchici regiminis formam in
Ecclesia Christum instituisse, sed eam, de qua nobis
cum Parisiensibus Theologis concertatio est, quacque,

ut

ut saepe diximus, plenam & summam auctoritatem & majestatem in unum Romanum Pontificem conferat ad regendas & moderandas non modo singulas Ecclesiae partes, verum & ipsam universalem Ecclesiam; quae proinde ab ipso pendeat, nihilque in illum auctoritatis habeat. Id, inquam, adlatae similitudines, derivataeque ex illis argumenta plane luculenterque suadent. Nam in acie ordinata summus Imperator, non modo singulos tribunos & inferioris ordinis duces, verum & omnes collectim & universum exercitum imperio continet ac moderatur. In Regno, quod vere ac proprie monarchice administratur, quae sit Regis ejusque potestatis & imperii vis & amplitudo, notissima illa Justiniani verba declarant (a): *Populus ei & in eum omne imperium suum & potestatem contulit*. Quo etiam pertinent illa in Argiva Tragoedia supplicibus sic populi Regem affantis apud Aeschylum:

Σὺ τοι πῶλε, σὺ δὲ τὸ δῆμον.

Tu res populi, tuque urbs tota es?

Et illud Pompejani apud Herodianum (b): *Εἰς τὴν Πόλιν, ὅσα ἔστιν ὁ βασιλεὺς ἦ*. Ibi Roma, ubi Imperator est. Quibus eleganter significatur, totam populi seu civitatis vim in Regem esse translatam, ut ipse universa civitas seu respublica esse videatur. Ita & in navi & in ovili summus Naucerus & summus Pastor non modo singulis nautis & minoribus opilionibus imperant; verum quum in eos cura totius navis ac totius ovilis incumbat, nulla omnibus simul & nautis & minoribus opilionibus in Navarchum & summum Pastorem vis

(a) Inst. de Jur. nat. gent. & civ. §. VI.

(b) Lib. I. cap. XIV.

vis ac potestas inest. Quid vero in domo? Numquid universae familiae aut famulorum gregi in his quae pertinent ad ejus gubernationem, jus aliquod in Dominum aut Patremfamilias est? Annon in suam quisque familiam, si naturalis status spectetur, absolutissimum habet imperium? Unde illud Homericum:

Natis dat & conjugibus quisque leges.

Quid denique in corpore naturali caput? Annon singula membra, & universam compagem regit ac moderatur? Ut quod ille agebat: capitis esse imperare non pedum, ad universum corpus transferri possit, ejus nimirum non esse ullam imperii partem in caput exercere. Si quid ergo ejusmodi similitudines probant; probant utique, Romanum Pontificem, qui in Ecclesia militante summus Imperator est, in Christi Regno summus Princeps, & in Arca Noë summus Nauclerus; cui Dominus tanquam summo Pastori *totius curam ovilis injunxit* (a); quem idem Dominus super familiam suam velut summum Oeconomum seu dispensatorem constituit (b); qui denique totius orbis Episcopis in Synodum congregatis, *velut caput membris* praestit (c); Romanum, inquam, Pontificem non utcunque monarchica potestate praeditum esse, sed quae illi totam Ecclesiam & per singula membra, & universe subiciat.

D d d d

C A.

(a) Simplicius epist. IV. ad Zenon.

(b) S. Johan. Chrys. lib. II de Sacerdot. cap. I.

(c) Conc. Chalcedon. in Relat. ad S. Leon.

CAPUT II.

Ex Adversariorum hypothefi confequens eft, Ecclefiae regimen vere ac proprie neque Monarchicum, neque Aristocraticum effe; fed Ecclefiam speciem effe Respublicae irregulavis; cujufmodi fere, ex quorundam Scriptorum fententia, Imperium Germanicum eft: cujus systematis fve opinionis abfurditas pluribus demonftratur.

DE Republica irregulari pluribus in locis ac fpeciali etiam de hoc argumento differtatione, late copiofeque differtuit Samuel Puffendorfius, ex quo illam hinc primum delineari neceffe eft, ut deinde ad hanc formam Ecclefiae regimen exigamus, quo illam velut ex Chrifti institutione adminiftrandam effe, Adverfarii comminifcuntur. Itaque Respublicae, illius Auctoris fententia (a) in fimplices & compofitas dividendae funt. Ad compofitas referuntur Systemata civitatum, quae non vinculo unius imperii, fed pacto dumtaxat contineantur. Semplices autem rurfus in regulares & irregulares diftinguuntur. Regulares funt tres illae notiffimae civitatum fpecies, ex fubjecto fummi imperii proprio refukantes, prout illud eft vel una perfona phyfica, vel unum corpus ex paucis, aut univerfis civibus confians. Porro ad effentiam civitatis perfectae & regularis requiritur, ut in ea fit talis unio, per quam omnia,

(a) Differt. de Repub. Irregul. & lib. VII. de Jure N. & G. cap. V. §. XLII. & feqq.

omnia, quae ad ipsam regendam faciant, velut ab una anima proficisci videantur. Si quae supersint quae ad neutram harum classium quadrent, inter irregulares numerandae sunt. Atque id in praesentia generatim observasse sufficiat, quoniam, ut idem subjungit, irregularium Reipublicae formarum neque certus iniri numerus, neque certae constitui species queunt, propter magnam varietatem, quae hinc re ipsa occurrere, aut animo fingi potest. Videamus ergo, utrum ad aliquam ex tribus illis simplicibus ac regularibus formis revocari ea possit, qua Adversarii Ecclesiam regi & gubernari constituunt. Et quoniam de populari seu Democratica nulla esse potest difficultas, ad Aristocraticam & Monarchicam quaestio referenda est: ac sedulo inquirendum: An forma illa, quam Adversarii in Christianam Rempublicam invexerunt, Aristocratica sit an Monarchica, vel ad neutram omnino quadret, adeoque inter irregulares numeranda sit; & ad quam propius ex duabus illis simplicibus & regularibus formis accedat.

Pro Aristocratico haberi posse Ecclesiae regimen, quod Adversarii tuentur, illud suaderé videtur, quod Aristocraticum regimen hoc imprimis secernitur a Democratico & Monarchico, quod in illo summa potestas & omnia majestatis jura penes universos, in hoc autem penes unum sunt; at vero in Aristocratico penes aliquot primores seu Principes civitatis. Hujus porro naturae minime repugnare constituunt, unum habere caput auctoritate reliquos antecedens, quod velut Directoris & Praesidis in Concilio Optimatum vices obeat. Discrimen enim esse faciendum inter Reipublicae formam, & modum administrationis. Interdum enim con-

D d d d 2

tin-

tingere, ut una Respublica modum administrationis ex alterius formae Republica mutuetur, aut cum videatur aemulari, aut saltem aliquod ejusdem signum praeferre. Sic si Rex aliquis de summis Reipublicae negotiis ad concionem populi, aut ad Senatum referat, modus administrationis Democratici vel Aristocratici speciem referet; & tamen revera forma Reipublicae erit Monarchica, siquidem concilium populi & Senatus tanquam consilarii adhibeantur, nec ab eisdem Rex necessario pendeat. At contra, si in Democratia vel Aristocratia exstet Magistratus aliquis eminentior, aut Princeps proprie dictus, cui jus referendi de negotiis publicis, atque exsequendi leges ac decreta soli aut praecipue competat, & cujus nomen acta & decreta publica prae se ferant; erit quidem aliquod simulacrum Monarchiae in administratione Reipublicae; summa tamen potestas revera penes populum aut concilium Optimatum residebit. Cum his ergo Adversariorum hypothesis pene congrueret, si ad communia Ecclesiae negotia pertractanda, aut Concilia Oecumenica frequenter statisque temporibus celebrarentur; aut Purpurati Patres, ex praecipuis Christiani orbis Nationibus selecti, earum Nationum Ecclesias repraesentarent, & apud Sedem Apostolicam earum nomine agerent, atque una cum aliis Episcopis, quorum in Urbe ingens semper est numerus, coetum facerent, seu corpus constituerent, quod vim Concilii Oecumenici quodammodo exhiberet. Utrobique enim Romani Pontificis auctoritas emereret, penes eum esset Jus primae relationis cum praerogativa suffragii, ejus nomen acta & decreta publica prae se ferrent, & legum seu Canonum executio ad ejus maxime curam & auctoritatem per-

pertineret. Verum haec omnia simulacrum quidem Monarchicae gubernationis exhiberent, non veram Monarchiam constituerent; quum summa potestas de communibus Ecclesiae negotiis statuendi, penes Synodum seu coetum eorum esset, qui Ecclesiam ipsam repraesentarent, a quorum cum Pontifice consensione Decretorum vis ac robur existeret, & a quibus Pontifex ipse penderet, & quibus esset obnoxius. Esset ergo vera Aristocratia, sed quae Monarchiae speciem aliquam praese ferret.

At reapse, inquis, ejusmodi perpetuum concilium statusque Senatus, cujus sit, una cum Romano Pontifice, deliberare & statuere de rebus ac negotiis ad universam Christianam Rempublicam pertinentibus; legum tamen & Canonum executione, & rerum quotidianarum administratione eidem summo Pontifici injecta; qui tamen tali Concilio vel Senatui administrationis suae rationem reddere teneatur; ejusmodi, inquam, perpetuum Concilium statusque Senatus institutus in Ecclesia non est. Quam tamen institutionem Aristocratici regiminis ratio postulare.

Verumenimvero neque nos volumus; Ecclesiae regimen vere proprieque, ex Adversariorum hypothesi Aristocraticum esse: alioquin regularis Reipublicae speciem seu formam indueret, contra atque nobis videtur. Deinde dicimus, quod quamquam hinc effici videatur, Christianae Reipublicae regimen actu ac re ipsa Aristocraticum non esse; non hinc tamen efficitur, quin saltem Ecclesiae auctoritate in Aristocraticum converti possit. Nam si penes universalem Ecclesiam, & Synodum oecumenicam, in qua illa re-

prac-

praesentetur, summa potestas sit, cui Romanus Pontifex subiectus & obnoxius existat; tum poterit sese ipsa Synodus, nequidquam Romano Pontifice refragante, in multos annos producere; tum ad certum ac determinatum tempus ac locum, neque ab ipso Romano Pontifice commutanda, aliam indicere Synodum, ad quam graviora Ecclesiae negotia differenda sint; tum denique certas praescribere leges, quas in quotidianarum rerum administratione & executione sequi Pontifex teneatur; ac potissimum ut nihil alicujus momenti agat inconsulto gravissimorum Patrum Senatu; iudicium Synodi subiturus, si in has leges peccaverit. Haec, inquam, omnia Ecclesia constituere poterit, si penes illam, non autem penes Romanum Pontificem, summa potestas & auctoritas est, atque adeo poterit in Aristocraticam formam Ecclesiasticum regimen transformari.

Haec merae speculationis non esse, sed ad praxim aliquando revocari posse, demonstrant exemplum, acta & decreta Conciliorum Constantiensis atque Basileensis. Semel enim constituto, Synodum oecumenicam, quae universam repraesentet Ecclesiam, *ἐκκλησίαν* a Christo potestatem habere, cujus decretis ad fidem & reformationem spectantibus & ipse Romanus Pontifex subjiciatur, ab ea, si parere contumaciter contemserit, coercendus; Constantiense Concilium cum alias leges ad Ecclesiae capitis reformationem pertinentes tulit, tum eam potissimum de Synodis Oecumenicis in stata tempora certisque in locis celebrandis, quarum auctoritate reformatio in capite & in membris perficeretur. Quibus nixa decretis Synodus Basileensis, frustra eam re-

vocal-

vocante Eugenio IV. ad plures annos prorogata est; omnia ferme ad se Ecclesiastica negotia pertraxit, quae apud Sedem Apostolicam pertractari consueverant; plurimas durissimasque Romano Pontifici leges indixit, eisque refragantem monere, in jus vocare, canonicis poenis subicere, dignitate dejicere; alium, ad libitum & ad arbitrium regendum sibi quae ad nutum obtemperantem, in ejus locum subrogare; aliam denique post triennium Oecumenicam Synodum Lugduni celebrandam indicere aggressa est. Quae omnia ad Ecclesiasticam Monarchiam evertendam, & Aristocraticum regimen invehendum comparata esse, non modo Eugenius IV. haud semel conquestus est, verum & Petrus Episcopus Meldensis Caroli VII. Francorum Regis Legatus, coram ipso Eugenio publice sollemniterque professus est (a). Neque sane Galli alia ratione nefarios hosce Basileensium ausus improbare possunt, ac reapse tunc improbarunt, quam quod ambigerent, an tunc Synodus satis Ecclesiam Catholicam repraesentaret. Hoc enim semel constituto, quidquid in Eugenio, & ad coercendum Apostolicae potestatis usum, Synodus egit, ex Adversariorum hypothefi, jure ac legitime egisset; adeoque veram in Eccle-

(a) Nobilissimam Politiam, quae Beatitudinem caelestem habet pro fine, ad Democratiam vel ad Aristocratiam redigentes; & ulterius in malis procedendo, unum sibi in Capite assumerunt, qui non eis praefertur. Et rursus: Quid quaeso magis posset in perpetuitatem schismatis tendere, quam Monarchiam Ecclesiae, quae Christiani-
mostenuit in unitate, tollere &

abolere? quae auctoritatem supremam multitudini, quae cito scinditur, tribuere? quam potestatem judicandi superiores inferioribus dare? Et sic de multis aliis, quae in practica & doctrina Basileensium concurrunt: quibus semel junctis & stantibus, non est pax in Ecclesia Dei possibilis. *Ap. Odoric. Reyn. ad an. 1441. num. 10. & 12.*

Ecclesiam Aristocratiam, quamquam retenta Monarchiae specie ac vocabulo, invexisset.

Sed quoniam constantia sua Romani Pontifices evicerunt, ut pleraque & graviora Basileensium acta rescinderentur, neque reapse Ecclesiae regimen vere ac proprie Aristocraticae gubernationis formam & speciem induit: videamus, an ex eadem Adversariorum hypothese Christianae Reipublicae regimen vere proprieque Monarchicum dici possit: quae altera regularis Reipublicae species est. *Monarchiam*, ut identidem monui, Philosophi Jurisque naturalis consulti, *Reipublicae speciem esse* definiunt, *in qua penes unum summa totius Reipublicae potestas est: summus autem dicitur, qui nullius imperio tenetur, & ceteros cives tum universos, tum singulos coërcere potest.* Ad quam profecto definitionem si Ecclesiae regimen, cujusmodi ab Adversariis constituitur, exigatur, nemo non statim intelliget, illud a vere proprieque Monarchiae forma plurimum abesse. Hi enim, ut saepe dictum est, summam potestatem in universa Ecclesia & generali Concilio esse constituunt; cujus potestatis jure fas eis sit ipsum quoque Romanum Pontificem suis subicere legibus ac decretis, & in refractarium poenis canonicis animadvertere; quemadmodum in Synodis Constantiensi & Basileensi identidem declaratum est. Quod verae Monarchiae ratio perinde non admittit, atque vera Democratia vel Aristocratia esse non possunt, si populus aut Optimates superiori potestati subiecti sint.

Sed ut luculentius perspiciatur, quam longe a verae Monarchiae ratione Ecclesiae regimen ablit, simul-

simulque demonstretur, quam non injuria ad irregulares Respublicas revocetur, si recte Adversarii illius rationem constituunt; age praecipuas Ecclesiastici corporis partes nobis prae oculis constituamus; & an omnes uno veluti spiritu unaque mente regantur; in quo primum ac potissimum regularis Reipublicae forma posita est; sedulo consideremus. Praecipuae olim Ecclesiae Catholicae partes fuerunt, Aegyptus, Oriens, Thracia, Pontus, & Asia, quibus Alexandrinus, Antiochenus, Heracleensis, Caesariensis, & Ephesinus Episcopi, duo quidem priores Patriarcharum, tres autem posteriores, (quos deinceps sibi Constantinopolitanus Antistes Patriarchico jure subjecit) Exarcharum nomine praeerant. Atque inter praecipuas Orientalis Ecclesiae partes Palaestina habita est, quum & Hierosolymitanus Episcopus Patriarchica dignitate auctus est. Quod vero pertinet ad Occidentem & Africam, quamquam ~~quibus~~ Romano Episcopo subdebantur; attamen in universam Africam specialia quaedam erant Carthaginensis Episcopi jura, atque, ut Adversarii volunt, Galliarum & Hispaniarum Ecclesiae suis quodammodo legibus & consuetudinibus utebantur. Quo autem pacto ejusmodi Ecclesiae, in quas olim Christianus orbis distribuebatur, unum tamen sub Romano Pontifice Christi regnum, hoc est regularem Rempublicam, quae uno veluti spiritu ac mente regeretur, constituerent, ex nostrae doctrinae principiis tam facile intelligitur, quam quod diversae Galliarum provinciae unam sub Christianissimo Rege Monarchiam & regularem Rempublicam efficiant. Quandoquidem nostra sententia ex S. Jrenaeo hausta, *ad Romanam Ec-*

Eccle

cle-

clesiam, propter potentiorē, aut potiorē ejus principalitatem necesse est omnem Ecclesiam convenire (a); hoc est, in fidei morumque dogmatibus consentire: atque eam esse dicimus vim unitatis (b), quae principium & originem a Petri Sede trahit, ut cum ea sentiendi necessitatem ceteris imponat. Ita enim proprie ac re ipsa in adserenda fide, sive omnibus Ecclesiis in unam fidem colligandis, Romanus Pontifex vim Monarchicae potestatis exercet. At si Adversariorum hypotheseſim consulamus, fieri profecto non potest, ut omnes Ecclesiae partes, adeoque & universum corpus, a Romano Pontifice, ejusque auctoritate, velut ab una mente regantur. Docent enim Adversarii, quod Romano Pontifice sollemnem aliquam Constitutionem in universum orbem emittente, ut ei ab omnibus pareatur, ut sit omnium una fides; ut idipsum dicamus omnes, & sit universa terra labii unius & sermonum eorundem, non autem sensuum linguarumque divisio atque confusio; docent, inquam, integrum esse Episcopis Apostolicam Constitutionem ad examen revocare, suumque de illa iudicium proferre, & vel eam probare, si traditioni sacrisque litteris consonam judicaverint; secus autem, libere illam rejicere; quemadmodum Honorii ad Sergium epistolae a Catholicis Episcopis neglectae ac reprobatae sunt. Et si unus quidem aut alter Episcopus contradixerit, ceteris consentientibus, fas esse Romano Pontifici, illum poenis Canonice ad obsequium cogere, & Ecclesiae Catholicae communionē exturbare, ne illam pravis opi-

(a) S. Iren. lib. III. advers. haeres. cap. III.

(b) Pet. de Marca de Conc. Sac. & Imp. lib. I. cap. II. num. VI.

opinionibus polluere, ac fidei unitatem vexare ac violare pergat. At si aliqua ex insignioribus Ecclesiis vel Ecclesiae partibus, ut E. G. Aegyptiaca, Asiatica, Africana, Gallicana, Constantinopolitana restiterit; eam non esse Romani Pontificis auctoritatem, ut solus invitas ac repugnantes in suam pertrahere sententiam possit. Sic Asiae Proconsularis Ecclesiae, ut Adversarii docent, morem celebrandi Paschatis quartadecima Luna ad usque Nicaenam Synodum constanter retinuerunt, quamvis ejusmodi institutum Victor damnasset, totamque Sedis Apostolicae auctoritatem in Polycratem Ephesinum aliosque Asiaticos Episcopos exseruisset. Sic Africani & Pontici Episcopi in exsufflando haereticorum baptismo innoxie persistenterunt, quamvis Romanis Pontificibus probaretur, & ab omnibus ratum habendum esse, sollenni sanctione Stephanus decrevisset. Sic Nestorius, quod Orientales aliosque sibi Episcopos conciliaverat, usque ad Ephesinam Synodum Constantinopolitanam Sedem retinuit, & *reverendissimi ac religiosissimi Episcopi* appellatione donatus est, quamquam cum Caelestinus velut haereticum exauctorandum decrevisset, nisi intra decem dies impia dogmata revocasset. Sic denique, ut alia exempla praeteream, Galliarum Episcopi septimam Synodum, decretumque ab ea sacris Imaginibus cultum veluti cum superstitione conjunctum diu reprobarunt, quamquam & Synodum & ejus decreta Romani Pontifices tuerentur. Jam vero quis dixerit, quod gliscentibus intra Ecclesiae sinum ejusmodi dissensionibus & controversiis, confixaque a Romanis Pontificibus dogmata & instituta insignium Ecclesiarum

rum Episcopis praeſtaſſe & innoxie retinentibus, nihilominus univerſam Eccleſiam, eorundem Romano-
rum Pontificum judicio & auctoritate velut uno ſpiritu & una mente fuiſſe gubernatam? Aut eam eſſe vim unitatis, quae principium & originem a Petri Sede trahit, ut eadem cum illa ſentiendi ceteris Eccleſiis neceſſitatem imponat? Quod tamen, ut ſaepe diximus, verae Monarchiae, & cujuſcunque regularis Reipublicae ratio & poteſtas exigeret. Neque hîc conſiderandum eſt, quid aliquando pacis ſtudio & prudenti quadam oeconomia Romani Pontifices tolerarint, aut tolerare poſſint, ſed vis & amplitudo poteſtatis unice ſpectanda eſt: quae ſi tanta non eſt, ut omnes & ſingulas Eccleſiae partes continere valeat, unius doctrinae vinculo, quod ad dogmata moreſque pertinet, colligare; plurimum Romano Pontifici de Monarchica auctoritate deteritur, atque omnino fa-
tendum eſt, ad regularis Reipublicae formam Eccleſiae regimen non quadrare.

Id forſitan Adverſariis abſonum non videbitur, ſed commendandum potius & adprobandum, quoniam aliter conſtare non poſſet Eccleſiarum libertas, quam Chriſtus ſartam teſtamque eſſe voluit, nec ullius abſoluta dominatione violari. Perinde atque ab optimo Principe gubernari, eique parere, quantalibet ſit ejus auctoritas & poteſtas, id vero ſervitus dicendum ſit. Verum, ut ait Poëta (a):

*Fallitur, egregio quiſquis ſub Principe credit
Servitium. Nunquam libertas gravior exſtat,
Quam ſub Rege pio.*

Ne-

(a) Claudian. in ſec. Conſul. Stillicon. ver. 113. & ſeqq.

Neque minus liberi ac felices (a) sub optimo Principe cives sunt, quam in qualibet populari gubernatione. Quemadmodum enim (b) in Republica Democratica unus, qui ceteris virtute praestet, aliam quodammodo Reipublicae induere speciem videtur, perinde atque una mente & unius imperio duceretur: ita sub Rege, qui omnia ad Reipublicae felicitatem referat, nemo non populare regimen esse judicaret. Christus ergo ut optimum in Ecclesia regimen institueret, quum Principi Apostolorum summoque ovilis Pastori confirmandi fratres & oves pascendi curam commisit, caritatem commendavit, dominationis fastum damnavit, suoque exemplo ad omnem modestiam comparavit. Sed ovibus in summum Pastorem aliquam potestatem alicubi dedisse non legimus. Quod enim huc trahere solent illud Matthaei XVIII. *Si peccaverit in te frater tuus* &c. quam id alienum & absonum sit, puto & ipsi Adversarii intelligunt, quamquam & urgere identidem pergunt, ne omnino Scripturarum auctoritate defici videantur. Principem ergo Christiani populi tanquam ovium Pastorem esse voluit: quod munus ut summae in oves auctoritatis est, ita pietatis & caritatis munus est: Christianae autem Reipublicae cives Ecclesiae Principi velut oves & agnos pastori subesse voluit: quarum libertas non in eo posita est ut pro libito vagentur & errent, & hac illacque discurrant, sed ut pastori ad manum sint, eique adhaereant, cumque ducem sequantur. En vera Christianae Reipublicae idea, qualem Christus instituit, & ex sacris litteris informamus. Non enim, ut etiam illud addamus,

(a) Puffend. lib. VII. de Jure N. & Gent. cap. VI. §. V.
(b) Philost. in U. Appollon. lib. V. cap. XII.

mus, in regno veritatis, quod est Ecclesia, vera libertas est, quae magis libeat, opinionem amplecti, seu vera, seu falsa sit; sed ab errandi periculo tutum esse, & certissimis brevissimisque & quam facillimis viis ad veritatem pertingere. Quid enim profuit Polycrati & Asiaticis; quid Cypriano & Ponticis Episcopis libertas, quam sibi perperam vindicarunt; illi quidem in retinendo more celebrandi Paschatis quartadecima Luna; hi vero in Christi baptismo ob nefaria ministri dogmata rejiciendo? Quid Orientalibus profuit, quod adversus Caelestini judicium Nestorium fovere ejusque tueri partes, sui esse juris & officii existimarunt? Quid Gallis profuit, quod aliquando probatam Romanis Pontificibus septimam Synodum decretumque ab ea sacris Imaginibus cultum exagitarunt? Quid denique, ut alia ejusmodi omittam, aliquot Episcopis profuit, quod Romanorum Pontificum adversus Jansenianam haeresim ejusque varios surculos Constitutiones suscipere detrectarunt? Nempe ut non ea appetenda libertas est, quae in delinquendi periculum adducit: ita nec illa libertas diligenda est, quae cum errandi periculo conjuncta est: atque ut praestet a peccandi, ita & ab errandi discrimine quam longissime abesse. Nemo autem unquam in errorem incidit, qui Romanis Pontificibus fidem sollenniter definientibus obsequutus est & constanter adhaesit. Quae enim ad adsequendam veritatem, atque omnes gentes unius fidei vinculo jungendas, brevior & expeditior via, quam si unus homo in Ecclesiarum omnium vertice constitutus, & caelestibus promissis ab errandi periculo tutus, ac divina fultus auctoritate, exortis in Ecclesia circa fidem dissensionibus & controversiis, quae tenenda
& cre-

& credenda sunt decernat, atque eadem omnibus ten-
tiendi necessitatem imponat? Quis hanc necessitatem
cuiuslibet libertati non anteponat? Non afirmemus in-
terim absolute, rem ita esse; id tantum velut hypothesis
habeatur; nempe ita Christum Ecclesiae suae consuluisse,
ut Romanus Pontifex sedens in Petri Cathedra fidei
quaestiones sine ullo errandi periculo definiat. Quis non
hanc viam manifestandae veritati, & consulendo paci
Fidelium accommodatissimam praedicaret? Aut quis
suam adversus illam tueri libertatem vellet? In quo enim
tandem haec ab Adversariis tantopere celebrata libertas
posita est? Nimirum, ut usque ad Synodum Oecumeni-
cam, & donec Ecclesiae consensus exploratissimus ha-
beatur, suam quisque opinionem absque nota vel infam-
ia haeresis tueatur. Non enim eam probant libertatis
speciem, qua Protestantes se efferunt, ut etiam adver-
sus Synodum Oecumenicam, & Ecclesiae universae ju-
diciu suam quisque defendat sententiam. Ergo & ipsi
parendum & obsequendum docent Ecclesiae universalis
judicio, quemadmodum nos etiam Romani Pontificis
sententiae adquiescendum existimamus. Neque enim
ullus Catholicorum Christianae Reipublicae felicitatem
ac libertatem in eo reponit, ut quisque pro libito priva-
toque judicio de fidei rebus constituat. Itaque penes ali-
quem summa esse debet Christianae Reipublicae pote-
stas, atque illud unice inquirendum superest, an Chri-
stiani populi paci ac felicitati magis accommodatum sit,
ut penes unum esse dicatur, an penes universam Eccle-
siam, aut Synodum Oecumenicam, in qua illa reprae-
sentetur.

Si generatim & absolute quaestio proponeretur, an

magis congruum esset, Ecclesiam Democratice vel Aristocratice, an potius Monarchice gubernari; nemo, ut jam dixi, Catholicorum pro monarchica gubernatione non esset. Quaestio ergo tantum inter Catholicos esse potest, an Christianae Reipublicae felicitati magis apta sit simplex ac regularis Monarchia; an potius Monarchia mixta & irregularis, in qua hinc penes Principem, hinc autem penes Optimates, suo apud quemque modo, summa potestas esse videatur. Grotius lib. I. de Jure belli & pacis cap. III. §. IX. de illorum opinione differens, *qui mutuam quamdam subjectionem sibi fingunt, ut populus universus Regi recte imperanti parere debeat, Rex autem male imperans populo subjiciatur*; observat, quod *ii si hoc dicerent, non facienda ob Regis imperium ea, quae manifeste iniqua sunt, verum dicerent, & quod apud omnes bonos confessum est: sed id nullam includit coactionem, aut jus aliquod imperii*. Id & mihi hoc loco praemittendum existimavi adversus eos, qui Romanum Pontificem potestate sua male utentem universali Ecclesiae subjiciunt; nimirum si hoc tantum dicerent, facienda non esse ob summi Praefulis imperium quae manifeste iniqua sint, & ab Evangelii regula abhorreant, verum dicerent, & quod apud omnes in confesso est (a). Quis enim unquam aut Liberio (b) jubenti damnari Athanasium, aut Stephano VI. in Formosum furenti & impie debacchanti, obtemperandum fuisse somniavit? Sed id potestatis coactionis, quam sibi in Romanum Pontificem, Ecclesiae decretis parere, seque moreisque suos ad ea componere de-

tre-

(a) Vid. Ivo epist. CCXXXVI.

(b) Videtur Hilar. Fragm. Historic. VI. num. 8.

trestantem, Constantiensis & Basileensis Synodus adhe-
rebant, argumentum non est. Subjungit Grotius (a):
*Quod si etiam populo alicui propositum fuisset partiri
cum Rege imperium, fines certe potestati utriusque adsi-
gnari debuissent tales, qui cognosci facile possent ex lo-
corum, personarum, aut negotiorum discrimine.* Quum
Christus Matth. cap. XVII. Petro Regni caelorum cla-
ves promisit, ut quaecunque ligaret aut solveret super
terram, ligata aut soluta essent & in caelis Monarchica
eum potestate, ut omnes Catholici fatentur, instructum
iri spondit, quae, ut verba ipsa prae se ferunt, nullis
esset terminis ac finibus coercenda: *Quodcunque ligave-
ris..... Quodcunque solveris.* Quum autem capite
sequenti omnes adloquens discipulos ait: *Quaecunque
alligaveritis super terram &c.* summam Apostolorum
collegio, adeoque & Episcoporum coetui, ut Adversa-
rii contendunt, potestatem tribuit. Duplicem ergo, ex
eorum sententia, in Ecclesia veluti summam potestatem
instituit, ac neutram certis limitibus definivit. Nam ut
nihil Apostolorum collegio, ita nihil Petro subtraxisse
videtur. Quo certe nihil absurdius, & continendae Rei-
publicae, pacique ac tranquillitati fovendae minus ac-
commodatum. Sed rursus ad Grotium oculos admo-
veamus: *Bonitas autem, inquit, aut malitia actus,
praesertim in civilibus, quae saepe obscuram habent
disceptationem, aptae non sunt ad partes distinguendas:
unde summam confusionem sequi necesse est, cognitio-
nem de re eadem pro jure potestatis, obtentu actus boni
malique, hinc ad se Rege trahente, inde populo: qua-
lem rerum perturbationem introducere nulli, quod*

Ffff

sciam,

(a) Vid. Puffend. lib. VII. de Jure N. & G. cap. IV. §. XIV.

sciam, populo in mentem venit. Hanc tamen sapientissimus ille Christianae Reipublicae Conditor in Ecclesiam invexit, si qualem Adversarii existimant, talem esse voluit illius gubernationem. Quum enim potestati Petri nullos praefixerit terminos; *Nihil enim*, ut ait S. Bernardus (a), *excipitur ubi distinguitur nihil*; Principis Apostolorum Successoribus, ut vel ipsi Adversarii fatentur, in omnibus parendum est, quae tamen, ut iidem adjungunt, *clave non errante* praecipiunt, vel ubi feratur *ex Petri aequitate* judicium. At in caussis Ecclesiasticis, ac potissimum in caussis fidei, quae saepe obscuram habent disceptationem, quis judicabit, *clavis erraverit* necne; vel an Petri Successoris judicium ex Petri aequitate fuerit prolatum? Ut in adlatis exemplis, quae saepe nobis Adversarii ingerunt, Polycrates cum Asiaticis, Cyprianus & Firmilianus cum Africanis & Ponticis, & Johannes Antiochenus cum Orientalibus Episcopis, necnon sub Carolo Magno & Ludovico Pio Ecclesiae Gallicanae Praesules, Victoris adversus Quartodecimanos, Stephani adversus Rebaptizantes, Caelestini adversus Nestorium, & Hadriani I. pro VII. Synodo & cultu SS. Imaginum, decreta sive judicia, non errante clave, & ex Petri aequitate prolata fuisse inficiabantur. Quis ergo ejusmodi controversiis finem imponeret? Synodus, inquis, Oecumenica, vel unanims Ecclesiae sensus. Itane vero? At quod ad Synodum pertinet, inter Victorem centum circiter ac triginta anni, septuaginta vero inter Stephanum & priorem Synodum Oecumenicam interfluxerunt. Interim vero in Asia, in Africa & in Ponto ii mores obtinebant, quos ab universa

(a) Lib. II. de Confid. cap. VIII.

sa Ecclesia esse prorsus eliminandos, Synodus Oecumenica judicavit. Nonne consultius fuisset, Victoris & Stephani judiciis eam inesse auctoritatem, quae litem statim dirimeret, cui nemo innoxie refragaretur, quae omnes Ecclesias iisdem fidei ac disciplinae regulis contineret? Caelestini quidem iudicium post breve temporis intervallum Synodus Ephesina probavit. At nemo ignorat, quibus ea Synodus turbis vexata sit. Deinde, Romanis Pontificibus consentientibus, ad unius Imperatoris nutum ex universo terrarum orbe Episcopi olim ad Synodum confluebant. Nunc vero Europa tot inter Reges ac Principes distributa, difficillimum est Oecumenicam Synodum congregari; neque id sane nisi plurimum annorum esse opus potest. Interim vero dum Synodus congregetur, prava dogmata radices agent, & latius propagabuntur. Quanto breviori compendio unius Romani Pontificis auctoritate funditus excinderentur! Quod vero ad Ecclesiae consensum attinet; quanta & hic difficultatum seges occurrit! Quum enim refragante insigni aliqua Ecclesiae parte, uti Asiatica, Africana, Orientali, aut Gallicana, aliarum Ecclesiarum cum Romano Pontifice consensus, Adversariorum opinione, pro unanimi Ecclesiae consensu haberi non possit; si error aliquam ex iis Ecclesiis invaserit, frustra sese pravorum dogmatum sectatores & architecti a Romano Pontifice & ab aliis Ecclesiis pro haereticis haberi contendunt. Sic frustra Eutychem & Dioscorum S. Leo, frustra Sergium & alios Regiae Urbis Episcopos, S. Martinus aliique Romani Pontifices ob Monothelismum velut haereticos judicassent; quamquam eorum judiciis totius fere orbis Episcopi consentirent. Quid enim

(si vera sunt quae de necessitate Conciliorum Adversarii jactant) opus fuisset ad eos velut haereticos judicandos IV. & VI. Synodo, si antequam illae celebrarentur, Euthyches & Dioscorus, Sergius & alii Monothelitae, pro haereticis habiti fuissent, aut haberi ab omnibus debuissent? Deinde, quum liber esse debeat, ut Adversarii volunt, ejusmodi consensus & adhibito propriae mentis ac rationis judicio, praestari a singulis Episcopis debeat; vix erit ut in re potissimum obscura, & multis altercationum nebulis implicata, non plures ab Apostolica definitione dissentiant, ac proinde vix erit controversia, quae hac via componi efficaciter possit: contendunt enim Refractarii, eam esse quaestionis obscuritatem, ut ad eam terminandam, & in bono lumine collocandam, Synodi congregatione sit opus. Denique, ut quod caput est, & huc maxime pertinet, attingamus, si unicuique Episcopo in excipiendis Apostolicis decretis fas est judicii sui libertate uti, quid fiet Monarchicae Romani Pontificis potestati? Quae est enim Monarchia, in qua vigor legum ex subditorum judicio pendeat, ac deriveatur? Quemadmodum ii volunt decretorum fidei robur invictum & immobilem firmitatem ex Episcoporum judicio & cum Romano Pontifice consensione pendere. Quo semel posito, frustra jactatur, Romani Pontificis auctoritatem vinculum esse, quod in eandem fidem omnes adstringat Ecclesias, aut ejus judiciis universam hanc molem, & singulas ejus partes, velut una mente atque uno spiritu vegetari: quae, ut saepe diximus, regularis Reipublicae forma est. Non enim ideo in unam & eandem fidem omnes Ecclesiae conspirant, quia sic Romano Pontifici visum est, aut ipse vult, suaeque au-

cto-

Auctoritate decernit: sed ideo una ubique fides obtinet, quia sic omnibus & singulis Episcopis iudicio suo & ratione utentibus visum est. Quae magis Aristocratici regiminis forma est, aut systematis, ut vocant, sociorum (a) inaequali foedere nexorum; ideo quod ceteri Episcopi aliaeque totius orbis Ecclesiae comiter colere & reverentia prosequi Romanum Pontificem teneantur, ut qui non modo dignitate & imperii maiestate, verum & auctoritate, & quadam potestatis prerogativa ceteris antecellat. Quod tamen, ut omnes facile animadvertunt, quam longissime abest ab ea unitate, qua omnes Ecclesiae partes in unum compingere & colligare corpus Christus instituit: quod adeo longe validiori unius imperii vinculo constringendum fuit.

CAPUT III.

Ecclesiae traditione probatur, praecipua Majestatis jura, quae in qualibet regulari & bene instituta Republica summo Imperanti summaeque Potestati tribuuntur, Romano Pontifici in Christiana Republica convenire. Unde conficitur, ad verae propriaeque Monarchiae formam Ecclesiam esse constitutam.

Demonstratum in duobus superioribus Capitulis est, eam Rempublicam esse optime ac sapientissime constitutam, & paci ac tranquillitati fovendae maxime aptam & accommodatam, quae unius imperio

(a) Vid. Grot. lib. I. de Jure B. & P. cap. III. §. XXI. & Puffend. lib. de Forma Imp. Germ. cap. VI. §. 9.

rio & auctoritate velut anima una unaque mente gubernetur. Contra vero si mutua quaedam subjectio populum inter ac Regem constituatur, ac summa in ipsum quoque Regem potestas penes populum esse dicatur, irregularem inde Rempublicam emergere, quam & molestissimis conflari morbis, & gravissimis vexari dissidiis & patere perturbationibus necesse est. Hinc porro confectum est, Christum; quem optimi regiminis formam in Ecclesiam inferre maxime decuit; quique illam unum esse voluit ovile, unam civitatem, imo & unam familiam & unam domum; in eaque summam vigere pacem, & concordiam & unitatem; non modo in ea Monarchicum regimen sive unius principatum instituere debuisse, verum & talem principatum seu Monarchiam, ut penes unum tum in singulos sive omnes singillatim, tum in omnes conjunctim sive in totum simul Christianae Reipublicae corpus, & per singula membra, summa potestas & auctoritas esset. At quoniam Meldensis Episcopus monet (a): „ Non ex proprio cerebro vanisque rationibus Christianae Reipublicae formam effingendam esse: sed scripturis & traditione demonstrandum, Ecclesiasticam Monarchiam, sub Christo praecipuo Monarcha constitutam, ad formam Monarchiae saecularis penitus institutam esse. Quod, inquit, est falsissimum. Quoniam, inquam, haec nos Meldensis Episcopus monet, ideo ipsi morem esse gerendum existimaui; ut scilicet Ecclesiasticam Monarchiam, sub Christo praecipuo Monarcha constitutam, ad ipsius Ecclesiae traditionem exigere. Verum

ut

(a) Lib. XIII. cap. XV.

ut omnis aequivocatio tollatur, falsissimum quidem esse fatemur, Ecclesiasticam Monarchiam ad formam Monarchiae saecularis penitus esse institutam, si in Monarchia saeculari dominandi fastus & libido, opum amplitudo, & omnis exterior apparatus, splendor & forma spectetur. At si in Monarchia saeculari, quod ad vim Principatus pertinet, prae oculis habeatur: quae, ut saepe diximus, in eo posita est, ut unius auctoritate omnes civilis corporis partes tanquam validissimo vinculo contineantur, & universa Respublica tanquam ab una mente regatur: tantum abest ut hac in re alia seu dispar esse debeat a saeculari Ecclesiasticae Monarchiae forma vel ratio, ut haec potius illi praestare atque antecellere debeat: quum pax ordo, tranquillitas, unitas Christianam Rempublicam magis deceat quam civilem. Quumque Christus nihil suis impensius commendaverit quam pacem & unitatem, eam in Ecclesia formam regiminis instituere debuit, quae ad hunc finem obtinendum esset optime comparata. Cujusmodi est imperium vere Monarchicum, in quo penes unum summa totius Reipublicae potestas consistit. Quae proinde Christianae Reipublicae forma non, ut Meldensis Episcopus gratis adfirmat, ex proprio cerebro vanisque ratiocinationibus efficta est, sed ex ipsa Monarchicae potestatis vi, natura, & objecto seu fine elicita atque depronata est. Sed quoniam nos, ut paullo ante dicebat, ad Ecclesiae traditionem Bossuetius provocat; age, traditionem hac de re consulamus.

Profecto autem, vere proprieque penes Romanum Pontificem Monarchica potestas est, a saeculari seu

seu Politica Monarchia, quod ad vim Principatus pertinet, minime dispar; si quae naturam Monarchici principatus vere proprieque constituunt, ac veluti praecipuae illius notae seu characteres habentur, Romano Pontifici, ex Ecclesiae sensu ac traditione, tribuenda sunt: Atqui haec Romano Pontifici, ex constanti Ecclesiae sensu ac traditione, conveniunt, eique in veterum Pontificum, Patrum & Conciliorum scriptis, qui fontes sunt Ecclesiasticae traditionis, luculentissime tribuuntur: Ergo quam delineamus Christianae Reipublicae & Ecclesiasticae Monarchiae formam, ea non ex proprio cerebro vanisque ratiocinationibus efficta est, sed ad sacrae doctrinae normam & amussim exacta. Vim & ~~viar~~ seu naturam Monarchici Principatus in eo primū Politici Scriptores (a) reponunt, quod non penes multitudinem, ut in Democratia; non penes Optimates, ut in Aristocratia; sed penes unum summa Reipublicae potestas est. Id porro summum esse definiunt Cicero (b) & Aristoteles (c), quo nihil in eo ordine datur superius: & Seneca epist. LXXXV. *Quod summum est, inquit, adjectionem non recipit: Quid enim supra summum erit?* Ordo autem (d) in Republica in gubernando & imperando consistit; ideoque primum in Republica censendum est, quod imperat omnibus & gubernat omnia, ipsum a nemine gubernatur; & hoc ipsum jam summum est, cui si velis opponere aliam pote-

(a) Puffendorf. lib. V. de J. N. & G. cap. VI. § 1. & Bodin. lib. II. de Repub. cap. II.

(b) Lib. II. Tusculan. disput. num. XIX.

(c) Lib. III. Polit. cap. V.

(d) Arnif. lib. 1. de Jure Majest. cap. III. num. I.

potestatem aequalem, efficies ut neutra summa sit. Pone enim populum in Regem, & vice versa hunc in illum habere aequalem potestatem, constat, neutrum pro summo venditari posse, quia imperio superioris subjicitur. Illud ergo in Republica primum & summum est, quod nec superiorem potestatem nec aequalem agnoscit, sed reliquis omnibus Reipublicae membris atque universae Reipublicae dominatur: atque hoc *Majestatem* Politici Scriptores appellant. Nihil porro facilius est nihil magis obvium, quam Ecclesiae traditione, summam Romano Pontifici in Christiana Republica potestatem adferere ac vindicare. Origenes in Cap. VI. Epist. ad Rom. *Petro*, inquit, *quum summa rerum de pascendis ovibus tradere-tur* &c. Perinde est, ut alicui in Republica summa rerum, ac summa Reipublicae potestas tribuatur. Est autem Romanus Pontifex, quemadmodum S. Bernardus ait (a) *potestate Petrus*. Stephanus Dorensis Episcopus in Libello supplici, quem S. Martino Secret. II. Concilii Lateranensis adversus Monothelitas obtulit (b), diserte docet, quod claves Regni Caelorum *Petrus tantummodo Apostolorum princeps* accepit: Quod *primus jussus est pascere oves Catholicae Ecclesiae*: Quod *super omnes potestatem accepit* & *Sacerdotalem auctoritatem*. Quibus verbis omnia plane complexus est, quae summam in Republica potestatem constituunt; ut scilicet nihil ante se habeat, quia *primo nihil est prius*; ut imperet omnibus & omnia gubernet; denique ut nemini subjiciatur. Quae omnia

G g g g

difer.

(a) Lib. II. de Confid. cap. VIII.

(b) Tom. VII. Concilior. Venet. edit. col. 106. & seqq.

diferte in praemillis verbis Apollolorum Principi tribuuntur: Primus enim, non modo tempore, verum & potestate & Sacerdotali auctoritate, quam super omnes accepit, jultus est pascere catholicas oves. Vim autem & potestatem clavium, quas *Petrus tantummodo* accepisse tradit, sequentibus verbis celeberrimos Interpretes exponunt (a): „Traditio clavium symbolum est potestatis; Claves SUMMAM POTESTATEM significant. Huic traduntur claves, cui committitur familia administranda: cujus potestatis debet esse admittere vel excludere domo. Christus ergo quum Petrum adloquens ait: *Tibi dabo claves* &c. perinde est ac si disertius dixisset (b): „Tu deferes clavem Ecclesiae meae, regnique caelestis: Tu aperies, & claudes ac nulli subditus eris ministro, cui ratio, nem sis redditurus. In Libello Monachorum Graecorum, qui in eodem Secretario perlectus est, laudatus Pontifex, Sacerdos Sacerdotum dicitur & Pater Patrum; Sedes autem Apostolica, summa Sedes: *Atque omnibus his praeceminens, Sacerdotis Sacerdotum & Patris Patrum, Domini nostri Martini ter beatissimi Papae.... Hanc Apostolicam & summam expetivimus Sedem.* Quo, inquit, Nat. Alex. (c), Graecorum hominum testimonio Sedem Romanam summam Sedem vocantur, & Romanum Pontificem Sacerdotem Sacerdotum & Patrem Patrum, luculentius splendidiusque nihil excogitari potest. Neque hi tamen soli Romanum Pontificem Sedemque Apostolicam his titulis exornant;

(a) Lamy Comment. in Harmon. lib. IV. cap. XVII.

(b) Calmet in hunc loc. Matth.

(c) Dissert. IV. in Hist. Eccles. saec. I.

runt; verum & Sergius Cyprienſis Episcopus, & Africanus Antistites ex tribus Conciliis, in litteris Synodiceis ad Theodorum Papam, quae in eadem Lateranensi Synodo recitatae sunt: necnon & Patres sextae Synodi in litteris ad Agathonem post Action. XVIII. *Litteras a vestra paterna Beatitudine ad piissimum Imperatorem missas, ut a summo Apostolorum vertice divinae perscriptas agnoscimus.* Quibus omnibus praeverant Patres Concilii Chalcedonenſis in Relatione ad S. Leonem (a): *Sic & Summitas tua filiis quod decet adimpleat.* Similia passim & apud S. Theodorum Studiten legere est (b): *Venit ad eam vox commonitoria velut e caelo missa, ex supremo, ἐκ τοῦ κορυφαίου, ex Romano throno.* (c) *Seipsos avulserunt a corpore Christi, & supremo verticali throno, in quo Christus claves posuit fidei.* (d) *Non effugerunt, quin a supremo Ecclesiae throno, ἀπὸ τοῦ κορυφαίου θρόνου τῆς ἐκκλησίας, arguerentur.* (e) *Uniamur nos vertici Ecclesiarum Dei, τῇ κορυφῇ τῆς ἐκκλησίας τοῦ Θεοῦ, Romae, & per eam tribus Patriarchis.* (f) *Haec enim suprema est κορυφαία Ecclesiarum Dei;* (g) *cui & potestas summa defertur Synodi Oecumenicae.* Huc etiam facit quod Sanctus Prosper cecinit in Carm. de Ingratis.

Sedes Roma Petri, quae pastoralis honore

*Facta caput mundo, quidquid non possidet armis,
Religione tenet.*

Ut scilicet Roma Christiana propter Sedem Petri sit caput

G g g 2

put

(a) 3. Par. Conc. Chalcedon.
cap. 11.

(b) Lib. II. epist. LXII.

(c) Epist. LXIII.

(d) Epist. LXVI.

(e) Epist. LXXIV.

(f) Epist. LXXXVI.

(g) Epist. CXXIX.

put Ecclesiae, quemadmodum Roma gentilis fuerat caput Imperii; ac proinde summam illa in Ecclesia teneat potestatem, quemadmodum haec summam tenuerat in Imperio. A quibus non admodum abludunt quae venerabilis quidam Episcopus Patrenus, apud Liberatum (a), Imperatori suggestit. Sylverio enim Romano Pontifice Iulianiani iussu apud Pataram exfule, *venit ad Imperatorem, & iudicium Dei contestatus est de tantae Sedis Episcopi expulsionem; multos esse dicens in hoc mundo Reges, & non esse unum, sicut ille Papa est super Ecclesiam mundi totius*. Quibus verbis Romani Pontificis potestatem super universam Ecclesiam cum Regum super eorum Regna potestate diserte conferebat. Denique, ut alia plurima omittam, huc egregie faciunt, notissima illa S. Irenaei verba (b): *Ad hanc enim Ecclesiam* (Romanam scilicet, quam etiam maximam & antiquissimam * vocat) *propter potentiores principatum, necesse est omnem convenire Ecclesiam*. Et illa S. Cypriani (c): *Navigare audeat & ad Petri Cathedram, & ad Ecclesiam principalem, unde unitas Sacerdotalis exorta est*. Ex quibus, iisque adfinibus aliorum Patrum verbis colligit Petrus de Marca (d):

» Communi omnium Ecclesiarum consensu fuisse receptum, ut ad Cathedram Petri, tanquam in descriptione circulari lineae ad centrum, respicerent. Quo nihil

(a) Breviar. cap. XXII.

(b) Lib. III. adverf. Haeref. cap. III.

* Vix dubito, quin graece scripserit Irenaeus, *ἀρχαίωτος*, quod male verterit Interpres, *antiquissimae*, quum vertendum hic fuisset, *praecipuae, principis*. Masuet Dissert. III. in Iren. art. IV. num. 32.

(c) Epist. LV. ad Cornel.

(d) Lib. I. de Conc. Sac. & Imp. cap. II. num. IV.

nihil sane luculentius adferri potest ad commendandam Cathedrae S. Petri summam in universam Ecclesiam auctoritatem. Id enim in circulo centrum dicitur, in quod omnes & singulae & divisim & conjunctim, ductae a peripheria lineae desinunt, in quo invicem conjunguntur, in quo immote quiescunt, & nisi centrum varietur & alius circulus describatur, ultra procedere nequeunt. Quare & in civili republica is centrum dicitur, principium, fons & origo unitatis, qui Majestatem obtinet & summam in Republica potestatem, & quo nihil prius aut superius esse potest, nisi ipsius Reipublicae constitutio varietur. Quem locum quum Romanus Pontifex in Christiana Republica obtineat, summam esse oportet illius in Ecclesia Catholica potestatem.

Ex hoc primo ac praecipuo summi Principatus caractere alius proxime ac sponte fluit (a), quod Majestas, quum nihil sit illa superius, in judicium vocari non potest, seu nullius judicio & coërcitioni subdita & obnoxia est. Notum illud Marci Antonini apud Dionem (b): *Nemo nisi solus Deus judex Principis esse potest*. Itemque illud Ambrosii (c): *Liberi sunt Reges a vinculis delictorum*. Neque enim ullis ad poenam vocantur legibus, tuti imperii majestate. Denique & illud Gallorum Procerum ad Chilpericum Regem apud Gregorium Turonensem (d): *Si quis de nobis, o Rex, justitiae tramites transcendere voluerit, a te corripitur potest; si vero tu excefferis, quis te corripiet?*...

Quis

(a) Puffend. lib. VII. de Jur. N. & G. cap. VI. §. II. & Arnif. de Jure Majest. lib. I. cap. III. n. 5. Hobbes de Cive sed. II. cap. VI. n. XII.

(b) In Excerpt. Xiphilini.

(c) In Apolog. David. cap. IV.

(d) Lib. V. Hist. Franc. capite XVII.

Quis te damnabit, nisi is qui se pronuntiavit esse Justitiam? Ejusmodi prerogativa summorum Principum instar etiam Romanum Pontificem decorari, demonstratum est a me, & ut mihi videtur, luculentissime Tomo superiore, duplici Articulo (a); quorum altero ostendi, quod; Lex illa totius antiquitatis munita suffragio: *Prima Sedes non judicatur a quoquam*: a persona Pontificis judicanda, non modo particulares, verum & generales Synodos removet. Altero vero ex Hadriano II. & Romana sub illo Synodo, nec non ex VIII. Synodo Oecumenica demonstravi, Romanum Pontificem nisi in causa haeresis, etiam a Conciliis generalibus judicari non posse: Eandem per, vulgatam olim fuisse inter Gallos opinionem: Denique id juris & ejusmodi Romanae Sedis privilegium ex divino jure descendere. Quae quum ibi probata sint a me plenissime & apertissime, Lectorem ad ea loca remitto. Ac praeter Thomassinum praeclare de hoc argumento differentem (b), videri etiam potest Illustrissimus Petrus de Marca toto capite XI. libri I. de Conc. Sac. & Imp. quod his verbis auspicatur: „Principem, legibus solutum esse, ut etsi in leges impingat, poenis legum coerceri non possit, communis est Theologorum & Jurisconsultorum sententia; ita ut subditi, qui de Principis statu aliquid decernere sibi liberum esse putaverint, lege Julia majestatis teneantur. In hunc quoque dignitatis gradum adscitum esse Romanum Pontificem, Galliarum Reges & Episcopi una cum ceteris saepissime censuerunt.

Ex

(a) Ad Lib. XV. Defens. cap. XX. & XXI.

(b) Dissert. XV. in Concilia Rom. sub Symmacho.

Ex quo autem potestas Principis summa est, seu *summo cum imperio* (a) conjuncta est, consequens est, (b) eam humanis legibus non teneri. Nam leges (c) sunt scita superioris potentiae, quibus in officio continentur, qui sua sponte officium facere recusant. Qua de causa Seneca vocat legem *virtutem armatam*; id discriminis ponens inter virtutem & legem, quod illa ad honestatem hortatur, haec vero etiam cogit. Hanc porro vim oportet legem fortiri a superiore potestate: nihil autem in Republica Majestate superius est. Nullius ergo legibus vinciri potest. Id quod etiam Budaeus confirmat (d) analogia, quae inter Regem & subditos, patrem & liberos, dominum & familiam intercedit. Nam qua ratione liberis in patrem, & familiae in dominum, jubendi quidquam aut vetandi nulla potestas est: ita & Regem aut summum Imperantem extra jus esse decet, quo subditi utuntur. Non esse aliam hac in re a summorum Imperantium Romani Pontificis conditionem, praecclare ea probant Ennodii Ticinensis verba in Libello Apologetico, quem in V. Romana Synodo lectum Patres adprobarunt, & vim Decreti seu Canonis habere voluerunt: *Dico, latorem juris definitionis suae, nisi velit, terminis non includi. Et nisi Princeps fastigii summa moderetur, frustra ad illud quod dederit jus vocatur.* Et ne quis existimet, suis tantum id est Pontificiis, non autem Synodorum legibus Romanum Pontificem non teneri, statim subjungit: *Aliorum forte bo-*
mi-

(a) Grot. lib. II. de Jure B. & P. cap. IV. §. XII.

(b) Puffend. lib. VII. de Jure N. & G. cap. VI. §. III.

(c) Arnif. de Jure Majest. lib. I. cap. III. num. 6.

(d) In Leg. *Princeps*.

minum causas Deus voluerit per homines terminare: Sedis istius Praefulem suo sine quaestione reservavit arbitrio. Voluit Beati Petri Apostoli Successores caelo tantum debere innocentiam &c. Qui ergo nullum praeter Deum superiorem agnoscit, non modo suis, verum nec Synodorum legibus obnoxius est. Potissimum quum & ipsa Conciliorum decreta, ut alibi late probavi (a), vim legum obtinere non possint, nisi a Romano Pontifice confirmentur. Quamobrem ea Ennodii verba Cl. Thomassinus expendens (b): Quum nulla, inquit, ratio sit & germana Synodus, nisi a Romano Praefule convocetur confirmeturque: qua demum in Synodo legitime in ipsum inquireretur? An mendicata enim ab ipso autoritas in ipsummet retorquebitur? An per Synodum a se collectam & authoratam iudex ipse erit, idem qui reus? Quae leges Ecclesiasticae, qui Canones depromentur in disceptanda Romani Praefulis causa, cum cassi & inutiles sint, nisi ab ipso sanciantur vel confirmentur? At frustra Princeps ad illud, quod dedit jus vocatur: nec lator legis lege constringitur nisi volens lubensque. Neque minus convenit quadratque in Romanum Pontificem, atque in alios summos Principes, Budaei ratio. Nam paullo superius vidimus totius orbis Episcopos in Chalcedonensi Synodo congregatos, ad S. Leonem velut ad Patrem filios supplices dirigere litteras: *Summitas tua filiis quod decet adimpleat.* Ipsi etiam, uti pariter superius animadvertimus, *totius ovilis cura*, tanquam summo Pastori, *commissa est.* Non est autem filiorum aut ovium, patrem

(a) Ad lib. XIII. Defens. cap. VIII. art. unic.

(b) Dissert. XV. in Concilia Rom. sub Sym. num. IV.

trem aut pastorem vocare ad officium jubendo & vetando: Quod, auctore Lactantio (a), legum munus & officium est: *Est quidem vera lex recta ratio . . . quae vocet ad officium jubendo; vetando a fraude deterreat.*

In his ergo tribus, de quibus jam disputatum est, vis, atque ut ita dicam, *essentia* vel *via* Majestatis posita est; quae autem sequuntur, ejusdem majestatis veluti quaedam affectiones & facultates sunt (b), veluti facultas Legislativa, coactiva, & judiciaria, facultas instituendi Magistratus, Regni comitia celebrandi &c. quae Politicis majora majestatis jura dicuntur (c): de quibus jam nobis pauca singillatim dicenda sunt, ut ea etiam Romano Pontifici competere demonstremus. In potestate ferendi leges consistere supremum maximumque gradum meri imperii, Politici & Jurisconsulti merito & jure docent (d). Legibus enim tanquam communi praeecepto praescribitur subditis quid cuique faciendum vel omittendum; quid fieri debeat in Republica quid vetari; quis ordo, quod officium sit Magistratum; quid debeant subditi suo principi; quis tenor pacis bellive &c. Quae omnia quum contineant fundamentum totius Reipublicae, in ejus manu collocari debent, in quo & ipsa Respublica collocata est. Hanc autem Majestatem esse, ex Reipublicae definitione patet. Respublica enim est ordo, in quo Majestas dominatur subditis. Penes quem igitur est dominium, penes eundem esse debent exercendae dominationis instrumenta, cujusmodi sunt leges.

H h h h

ges.

(a) Lib. VI. Div. Instit. cap. VIII.

(b) Grot. lib. I de Jure B. & P. cap. III. §. XVIII. Puffend. de Jure N. & Gent lib. VII. cap. IV §. I.

(c) Arnif. Lib II. de Jure Majest. cap. I. num. VIII.

(d) Vid. Arnif. ibid. cap. III. num. I. & seqq.

ges. (a) Quum enim Respublica sit velut unum corpus morale, quod una regi voluntate concipimus; propterea quod unusquisque civium in his quae ad commune bonum felicitatemque respiciunt, suam ei voluntatem subiecit, in quem omnes communi consensione summam auctoritatem contulerunt, sive ille una reapse persona sit, sive populi vel Optimatum coetus; idcirco hunc primum oportet ad suam subjectis populis voluntatem manifestandam certa quaedam & idonea constituere signa, inter quae principem locum obtinent leges: quae sunt generales quaedam fixaeque ac perpetuae regulae, ad quas omnes respicere, suasque exigere actiones debent. Quum ergo Christus Ecclesiam velut unam civitatem, imo & unum corpus, ut in sacris litteris diserte traditur, instituerit; & unitatis ejus originem, fontem & radicem, ac praevalidum vinculum Romanum esse Pontificem destinavit; consequens est, ut eum quoque summa ferendarum legum potestate instruxerit: quam qui illi abrogaverit, frustra eum Ecclesiasticae unitatis centrum esse & originem pronuntiabit. Quam haec inter se apta & connexa sint, observavit etiam Illustrissimus Petrus de Marca lib. I. de Conc. Sac. & Imp. ubi postquam latissime & per plura capita demonstravit, originem communionis & unitatis esse in Ecclesia Romana; capite VIII. & seq. de Romani Pontificis in condendis legibus Ecclesiasticis auctoritate differit, caputque illud VIII. his verbis auspiciatur. „A communionis
 „ cum Romana Ecclesia necessitate ad eam auctorita-
 „ tem inspiciendam accedamus, qua per Gallias, ac
 „ per universas potissimum Occidentis, ac etiam ali-
 „ quan-

(a) Puffend. ubi sup. §. II.

„ quando per Orientis provincias, non reluctantibus
 „ Episcopis aut Imperatoribus, potita est. Hoc in tri-
 „ bus articulis praecipue versatur, qui summae juridi-
 „ ctioni competere solent; nempe in legibus ferendis;
 „ in iudiciis sine provocatione reddendis, & in ea di-
 „ gnitate Principis, ut a nemine judicetur. Primum
 autem illud condendarum legum in negotiis Ecclesiasti-
 cis privilegium; quibus nimirum, ut idem capite nono
 subjungit, *fides & disciplina constitutae sunt*; ejusmo-
 di, inquam, privilegium, seu potius praerogativam &
 potestatem Illustrissimus Auctor Romano Pontifici pri-
 mum vindicat celebri Valentiniani III. Constitutione,
 qua nihil ad rem nostram praeclearius aut illustrius desi-
 derari potest. Quum enim Hilarius Arelatensis Episco-
 pus Metropolitana dignitate, cognitione Leonis I. sum-
 mi Pontificis in Concilio Romano habita, dejectus esset
 anno CCCCXLV. eam sententiam Valentiniani Impera-
 toris Rescripto muniri, ut illius executio nulla cavilla-
 tione impediretur, S. Leo facile impetravit. Sed illius
 Constitutionis expendenda sunt verba, quae, inquit lau-
 datus Auctor, Novatoribus hujus saeculi sanguinem
 suffundere possunt: *Quum igitur Sedis Apostolicae pri-
 matum, Beati Petri meritum, qui est Princeps Sacer-
 dotalis coronae, & Romanae dignitas civitatis, sacrae
 etiam Synodi firmitas auctoritas*. Ex eo scilicet prima-
 tu, ex eo Petri Apostoli principatu, comparat argumen-
 tum, quo fulciantur ea, quae deinceps statuit de jure fe-
 rendarum legum his verbis: *Verum ne levis saltem inter
 Ecclesias turba nascatur, vel in aliquo minui religionis
 disciplina videatur; hoc perenni sanctione decernimus,
 ne quid tam Episcopis Gallicanis, quam aliarum pro-*

vinciarum, contra consuetudinem veterem liceat sine viri venerabilis Papae Urbis aeternae tentare: sed illis omnibusque pro lege sit quidquid sanxit vel sanxerit Apostolicae Sedis auctoritas. Ex quo ergo Petri Apostoli Successores principes sunt Sacerdotalis coronae, & hujus coronae seu circuli veluti centrum habeantur, eorum est omnium Ecclesiarum unitatem continere, ac providere ne ulla inter Ecclesias turba nascatur. Quod irrito conatu ut plurimum illi tentarent, nisi omnibus pro lege habendum esset quidquid pro Ecclesiarum pace Sedis Apostolicae decernat auctoritas. Nolim tamen, subjungit Petrus de Marca, quod e Valentiniano protuli, eo sensu accipi, ac si tum primum legis ferendae auctoritas Sedi Apostolicae a Principe collata esset, quum tantum eo Rescripto fota sit & confirmata. Etenim ante hujus Constitutionis promulgationem decreta quaedam generalia a Romanis Pontificibus edebantur, quae missa per provincias, disciplinae Ecclesiasticae ordinem ubique sancirent. Quod statim probat illustribus ac praecclaris Liberii, Siricii, Innocentii, Zosimi & Caelestini Romanorum Pontificum testimoniis: ex quibus hanc summam colligit: In eo vigere Sedis Apostolicae auctoritatem „ quod Decreta illa generalia sint, & per pro-
 „ vincias mittantur, ad exemplum Edictorum & prin-
 „ cipalium Constitutionum, nec circumscripta sint fi-
 „ nibus Romanae Dioeceseos, ut ceterorum Patriar-
 „ charum Decreta, quae suis cujusque Dioeceseos con-
 „ tinentur.

Frustra autem essent leges, aut eas condendi potestate Princeps incassum instructus esset, nisi ad earum observantiam poenarum inflictione cogere subditos posset.

set (a). Nam quotidiano rerum humanarum experimento compertum est, homines neque foederum aut pactorum sanctitate, neque ea lege, quae inscripta cordibus est, satis ut plurimum in officio contineri. Qui ergo aliter allici & induci efficaciter possent homines, cum ad communes juris naturalis, tum ad speciales cujuslibet Reipublicae leges servandas, nisi penes Principem esset & aequas peccatis poenas constituere, & eas etiam peccantibus irrogare? Quum ergo Romanus Pontifex potestate ferendi leges pro Christianae Reipublicae bono praeditus sit; profecto necesse est, ut ad earum executionem poenarum metu hujusce Reipublicae cives compellere jure possit: alioquin frustra illi Legislatoris titulus tribueretur. Ejusmodi in Romano Pontifice potestatem S. Cyprianus agnovit in suis ad Stephanum litteris, quibus eum monuit, ut Marcianum Arelatensem Episcopum, qui se Novatiani partibus adjunxerat, & pacem unitatemque Ecclesiasticam violaverat, auctoritate sua comprimeret, eoque in ordinem redacto ac sede dejecto, alium in ejus locum ordinandum decerneret. Qua de re hic rursus aliqua ex Illustrissimo Petro de Marca (b) adtexere atque observare libet: Licet enim, inquit, in consilium deponedi Marciani Cyprianus una cum collegio ceterorum Episcoporum consentiat; tamen quia Romanam Ecclesiam, & Petri cathedram, & principalem esse profitebatur, unde unitas Sacerdotalis exorta sit, τοὺς rei judicatae, & summam illam pronuntiandi auctoritatem in eam Ecclesiam confert in re communi, quae unitatem respiciebat, & de qua Relatio
ad

(a) Puffend. de Jure N. & G. lib. VII. cap. IV. §. III.

(b) Lib. I. de Conc. Sac. & Imp. cap. X. num. VIII.

ad eam missa fuerat : *Quapropter*, inquit Cyprianus Stephanum Papam adloquens (a) : *facere te oportet plenissimas litteras ad Coëpiscopos nostros in Galliis constitutos, ne inimicum Collegio nostro insultare patiantur*. Sed illustriora sunt verba quae sequuntur; quibus decernendi & pronuntiandi de re proposita, juxta sententiam Gallicanorum & Africanorum Episcoporum, potestas Romanae Ecclesiae asseritur, eique plenissima executionis cura demandatur : *Dirigantur in provinciam, & ad plebem Arelate consistentem a te litterae; quibus abstento Marciano, alius in locum ejus substituatur*. Nulla, inquit Illustrissimus Auctor, industria Novatores hoc testimonium Cypriani elevare possunt. Futilis est enim illa responsio, non deponi a Stephano Marcianum, sed deponendum declarari. Quinimo conceptis verbis Cyprianus exigit a Stephano, ut suis litteris Marcianum damnet, atque adeo alium substituendum decernat. Eadem potestate usus est & S. Caelestinus in Nestorio Regiae urbis Episcopatu dejiciendo. Qua etiam de re eundem Illustrissimum Praesulem disserentem inducere & audire libet : Cum, inquit (b), Cyrillus Alex. Nestorium crebrioribus litteris ad saniozem mentem hortatus esset, perfidia haeretici illius in dies erumpente, rem omnem ad Caelestinum, *ex more Ecclesiarum*, retulit; ut ipse tanto morbo, qui in Ecclesia grassabatur, pro dignitate loci sui mederetur. Hoc testatur ipse Cyrillus Caelestino (c) : *Longa Ecclesiarum consuetudo suadet, ut ejusmodi res Sanctitati tuae communicentur*. Relatione facta,

(a) Epist. LXVII. ad Steph. Papam.

(b) Ubi supra num. IV.

(c) I. Par. Conc. Ephes. cap. XIV.

cta , Caelestinus Synodo Romae coacta , non solum de fidei capitibus decernit , sed etiam ipsum Nestorium haereseos auctorem a communione sua & ab Ecclesia Constantinopolitana dejicit , nisi intra decem dies nefariam doctrinam conceptis verbis anathematizet ; & Cyrillo dat in mandatis , ut Romanae Sedis auctoritate adscita , & Caelestini *vice & loco cum potestate usus* , sententiam istam exsequatur , & illi Ecclesiae prospiciat . Hoc Caelestini judicium probatum est a Concilio Ephesino ; quod damnationis sententiam in Nestorium trinis litteris evocatum ad Synodum , & judicio se sistere recusantem protulit quidem ; sed ad eam sententiam ferendam coactos se fatentur Patres & a sacris Canonibus , (scilicet ob contumaciam Nestorii , quae Canonibus plectitur) & ab epistola sanctissimi Episcopi Caelestini , qui Nestorium Sacerdotio privarat ad Relationem Cyrilli . Plura hinc addere non est opus , ut haec quoque summae Potestatis seu Majestatis pars & affectio , scilicet facultas contumaces & rebelles poenis coercendi & in officio continendi , Romano Pontifici vindicetur .

Ut legis ferendae jus , (& hinc etiam Illustrissimi Petri de Marca verbis (a) utor) ita & ultima judicia penes Imperatores olim fuere ; qui aut ipsi cognitionem suscipiebant , aut concessa jurisdictione Praefectis praetorio , vel ceteris Magistratibus , vice sacra judicandi potestatem praehebant , appellandi ab eorum sententiis facultate interdicta . Nunc inspiciendum est , an Romani Pontificis judicia nulli essent appellationi obnoxia , & in eo conferri possent cum cognitionibus Principis .
Judicia autem illa exercebantur , aut ratione habita eorum

rum

(a) Lib. I. de Concord. sac. & Imp. cap. X. num. I.

rum negotiorum, quae ad provinciam Romanae Metro-
poleos pertinebant, aut eorum quae in ceteris provin-
ciis oriebantur. Utroque casu, ab ipsius Ecclesiae cu-
nabulis, Pontifices suprema & principali in judiciis red-
dendis auctoritate viguerunt. Verissimam esse Illustris-
simi Praefulis sententiam, innumera veteris aevi Acta
testantur: quibus, quum passim occurrant & obvia sint,
hoc loco inculcandis supersedendum existimavi; satis
esse judicans, unum hîc aut alterum S. Gelasii testimo-
nium exhibere, quo res plane & aperte conficitur. Pri-
mum exstat epist. IV. seu Commonitorio ad Faustum,
ubi inter cetera haec habet: *Ipsi sunt Canones, qui ap-
pellationes totius Ecclesiae ad hujus Sedis examen vo-
luere deferri: ab ipsa vero nusquam prorsus appellari
debere sanxerunt; ac per hoc illam de tota Ecclesia ju-
dicare, ipsam ad nullius commeare judicium, nec de
ejus unquam praeceperunt judicio judicari; senten-
tiamque illius constituerunt non oportere dissolvi, cu-
jus potius decreta sequenda mandarunt.* Alterum ex-
stat epist. XIII. ad Episcopos Dardaniae: *Non reticemus
autem, quod cuncta per mundum novit Ecclesia: quo-
niam quorumlibet sententiis ligata Pontificum Sedes
Beati Petri Apostoli jus habeat resolvendi; utpote quae
de omni Ecclesia fas habeat judicandi, neque cuiquam
de ejus liceat judicare judicio. Siquidem ad illam de
qualibet mundi parte Canones appellari voluerint, ab
illa autem nemo sit appellare permissus.* Quae non mo-
do de judiciis ab Episcopis aut Synodis particularibus,
verum etiam Conciliis Oecumenicis latis esse intelligen-
da, alius ejusdem Pontificis locus demonstrat in Episto-
la seu Tomo de Anathemate; his verbis: *Totum in Se-
dis*

dis Apostolicae positum est potestate. Ita quod firmavit in Synodo (Chalcedonenſi) Sedes Apostolica, hoc robur obtinuit; quod refutavit, habere non potuit firmitatem. Profecto qui pro sua auctoritate, vel, ut in alia epistola ſcribit, *pro ſuo principatu*, Concilii generalis judicia ſeu decreta firmat aut reſcindit; is non modo ſingulorum Episcoporum aut particularium Synodorum, verum & generalium Conciliorum judicia retractat, & ab ejus judiciis non modo ad particulares, verum & ad Oecumenicas Synodos appellare non licet. Haec porro extrema provocatio inter jura Majestatis a Jurisconsultis enumeratur (a) quae abalienari nefas ſit, in eaque veluti formam & ſubſtantialem eſſentiam Majestatis regiae conſtituunt.

Cum praecedente intime cohaeret, & indiviſe conjunctum eſt alterum ſummae poteſtatis ſeu Majestatis jus, quod in conſtituendis Magiſtratibus poſitum eſt; quemadmodum ſequentibus verbis Arnifacius obſervat (b): Venio ad ſecundum caput jurium Majestatis, quod Poëta hoc verſiculo inſinuavit 6. Aen.

Tu regere imperio populos Romane memento :

Illud enim imperium, quo populi reguntur, pro ſecunda parte Majestatis ponimus: quam omnium optime complexus eſt Valerius Publicola duabus primis legibus, quibus Florus lib. I. cap. IX. maxime auſtam liberi populi majeſtatem teſtatur: quarum altera extremam provocationem Populo vindicavit; altera vero cavit, ne quis Romae Magiſtratum gereret, niſi a populo eum accepiſſet; capitali ſtatuta poena in eum, qui contra fe-

I i i c i ſſet,

(a) Vid. Arnif. lib. II. ● Jure Majest. cap. IV. num. 3.

(b) Ibid. num. I.

cillet, & propofita impunitate ei, qui ipfum occidiffet. Duo igitur his legibus complexus eft; jus extremae provocationis, & creationem Magistratuum: quae duo licet alii pro diftinctis juribus recenseant, ab uno tamen principio emanant, & fe mutuo fequuntur. Magistratum enim creare, non eft eligere aut nominare aliquem, cui Magistratum commendatum velimus, fed & eidem vim, potestatem, jurisdictionem, in quibus confistit officium & natura Magistratus, attribuire. Majestas enim ita eligit, ut simul potestatem & imperium communicet; ideoque Magistratum creatio praefupponit in creante summam jurisdictionem, eamque propriam: quia nemo potest mandare alteri, quod ipse non habet. Subjungitque idem Auctor num. 15. non aliter falyam esse posse Rempublicam, quam si omnis jurisdictionis sit penes unam Majestatem, & ab ea non tantum in omnes Magistratus, fed & reliquos Principes & civitates inferiores promanet. (a) *Eam enim esse conditionem imperandi, ut non aliter constet ratio, quam si uni reddatur.* Quamquam ergo aliarum per orbem provinciarum & civitatum Episcopi, haud meri Magistratus aut Pontificis maximi Vicarii (b), fed veri Principes sint, qui provinciam vel civitatem suam, non tanquam alienam, fed ut propriam moderentur; attamen Christianae Reipublicae falus id exigit, ut in eos etiam a Romani Pontificis majestate omnis potestas & jurisdictionis promanet. Id certe palam significare videntur Patres, quorum testimonia protuli ad lib. XIII. Defensionis cap. XI. & seqq. ex quibus hic tantum Innocentii I. verba refricabo

(a) Tacit lib. I. Annal in princ.

(b) Bellarm. lib. I. de Romano Pontif. cap. III.

cabo ex ejus ad Synodos Carthaginensem & Milevitana epistolis, quod eis diserte doceat, quod quemadmodum in civili Republica duo illa Majestatis jura, scilicet extremae provocationis & creandorum Magistratum, sibi cohaerent, & unum ex altero sequitur: ita in Romano Pontifice utraque potestas seu praerogativa conjungitur, unaque ex altera derivatur, scilicet & ut ad eum sit ultima provocatio, atque ut ipse fons sit & origo Ecclesiasticae jurisdictionis. In epistola enim ad Concilium Carthaginense Patres Africanos Innocentius commendat, quod suum de Pelagianis judicium ad Sedem Petri retulissent: *Scientes*, inquit, *quid Apostolicae*, hoc est Petri Apostoli, *Sedi debeatur, a quo ipse Episcopatus*, & *tota auctoritas nominis hujus emerfit*: Et paucis interpositis subjungit, quod Patres *non humana, sed divina decrevere sententia; ut quidquid quamvis de disjunctis remotisque provinciis ageretur, non prius ducerent finiendum, nisi ad hujus Sedis notitiam perveniret, ut tota hujus auctoritate justa quae fuerit pronuntiatio firmaretur: indeque sumerent ceterae Ecclesiae (veluti de natali suo fonte aquae cunctae procederent, & per diversas totius mundi regiones puri capitis incorruptae manarent,)* quid praeciperent, quos abluerent, quos velut in coeno inmundabili sordidatos, mundis digna corporibus unda vitaret. Quorum profecto verborum, ut alibi adnotavi, obvius hic sensus est: Petrum ac Petri sedem fontem esse, principium & originem Episcopalis auctoritatis; ac propterea ad Sedem Apostolicam, velut ad suum fontem aquae recurrerent, referenda esse ex omnibus Christiani orbis regionibus Episcoporum de fidei rebus judicia, ut nativae

reddita puritati sine ullius erroris admixtione perfluant ; indeque velut ex natali fonte, novis aucta viribus & pondere auctoritatis, non jam uni vel alteri regioni facti sint, sed orbem irrigent universum. Addit enim S. Pontifex: *Et quum pro illis curam geritis quibus praevidetis Ecclesiis, sollicitudinem vestram pro omnium utilitate monstratis: & per cunctas totius orbis Ecclesias quod omnibus profit decernendum esse, una deprecitis.* Et in alia epistola ad Concilium Milevitanum: *Quoties fidei ratio ventilatur, arbitror, omnes fratres & Coepiscopos nostros, non nisi ad Petrum, id est, sui nominis & honoris auctorem, referre debere, velut nunc retulit vestra dilectio, quod per totum mundum possit Ecclesiis omnibus in communi prodesse.* Vis argumenti omnino postulat, ut Episcopalis auctoritas aut a Petri Sede velut a causa efficiente dimanet; aut ab ipsa ita pendeat, ut nisi illi conjuncta subsistere non possit, quemadmodum si a fonte rivuli disjungan- tur; ac propterea ut nulla in Ecclesia auctoritas sit, quae vel non a Romano Pontifice proficiscatur, vel non illi omnino subiecta sit. Videtis quae loco superius citato latius per plura capita & ad lib. IX. cap. VI. art. I. de hoc argumento disputata sunt.

Denique ad majora Majestatis jura, quae huc facere possint, jus quoque pertinet Comitiorum. Quod tamen, ut Arnicaeus adnotat (a), ad Majestatem tunc proprie pertinet, quando ita uni competit, ut nefas sit reliquis, eo non indicente, consilii capiendi gratia, convenire. Quomodo Latinis quibusdam populis pax data, communibus tamen commerciis & consiliis inter se

ad-

(a) Arnicaeus, lib. II. de Jure Majest., cap. IV. num. 16. & seq.

ademptis. Liv. lib. VIII. Nec immerito Thucydides (*a*) libertatem sociorum Atheniensium in eo collocat, non tantum quod suis legibus vixerint, sed etiam quod conventus & conciliabula sua libera habuerint. Quum enim in Comitibus plurimum momenti sit, sive ad evitendam, sive ad mutandam, sive ad conservandam Rempublicam, imo quum sint Reipublicae fundamentum, non possunt aliis nisi soli majestati tribui: quippe in cujus tanquam naucleri manu, non tantum navem, sed & gubernacula omnia esse oportet; totam alias navim pessumdatura, si contra nutum naucleri huc vel illuc a quovis dirigi possint. Quapropter Romulus, licet multa alia Senatui & populo concessisset majestatem redolentia, populum tamen convocandi, Senatumque cogendi potestatem sibi tantum reservavit (*b*). Id quod & omnibus Monarchiis commune esse debet. Quum ergo Ecclesiae regimen Monarchicum sit, commune id etiam cum ceteris Monarchiis habere debet Ecclesia, ut generalia veluti Christiani orbis Comitata, seu Concilia Oecumenica, nonnisi Romano Pontifice indicente & auctorante celebrentur; cui nimirum, ut ait S. Theodorus Studites (*c*), *summa Synodi Oecumenicae potestas defertur*. Quamobrem Actione prima Concilii Chalcedonensis Dioscorus secundae Sedis Episcopus inter reos hac potissimum ratione constitutus est: *quod quum personam judicandi non haberet, praesumpsit, & Synodum ausus est facere sine auctoritate Sedis Apostolicae. Quod nunquam licuit, nunquam factum est*. Vid. quae supra

(*a*) Lib. I. Bel. Peloponnes.

(*b*) Dionys. Halicarn. lib. II.

(*c*) Lib. II. epist. CXXIX.

supra ad lib. X. cap. I. art. I. dicta sunt .

Definient ergo, ut puto, Adversarii nobis ingerere, quod Ecclesiasticae Monarchiae formam non ex Scripturis & traditione demonstramus, sed ex proprio cerebro vanisque ratiocinationibus nobis confingimus. Vidimus enim, & perspicuis disertisque veterum Pontificum, Conciliorum & Patrum testimoniis plane aperteque demonstravimus, omnia, aut saltem praecipua & majora majestatis jura, quae vel ad ejus substantiam & naturam pertinent, aut ejus individuae proprietates & affectiones sunt, Romano Pontifici esse tribuenda: adeoque nulla omnino ratio est, cur ejus in Ecclesia Monarchiam ad formam Monarchiae saecularis, quod ad vim & ~~velut~~ Monarchici Principatus pertinet, penitus institutam esse, dicere & adfirmare vereamur.

C A P U T I V.

Romanorum Pontificum imperium non eo summum non est ἡ ἀνωτάτη δυνάμις, nec eorum potestas Conciliorum generalium auctoritate deterior habenda est; propterea quod boni sanctique Pontifices, se se ad Canonum legumque praescriptum Ecclesiam Dei recturos, profiteantur.

N At. Alex. de suprema, ut ait (a), Conciliorum generalium adversus Bellarminum & Auctorem anonymum (Antonium Charlas) auctoritate disserens, aliam;

(a) Dissert. IV. in Hist. Eccles. saec. XV. & XVI. art. I. §. V. edit. Paris. a. n. 1686.

aliam, non fecus ac Bossuetius, esse contendit Ecclesiasticae, aliam saecularis Monarchiae rationem: „ Neque
 „ ex Politico regimine ac Regali trahendam esse ad Ec-
 „ clesiasticum regimen consequentiam, cum alia sit
 „ utriusque forma; ac Regia & Pontificia potestas pro-
 „ prium habeant ac diversum regendi modum ex insti-
 „ tutione divina. Quod ille generatim probat sequen-
 „ tibus veterum Patrum testimoniis: S. Johannis Chryso-
 „ stomi Hom. LXVI. in caput XXVI. S. Matthaei: *Non*
externis similia nostra sunt. Nam apud Gentes, qui
Principes sunt, ipsi dominantur; apud nos autem, qui
ultimus est, ipse summa tenet. Sancti Hieronymi epi-
 „ stola XXX. ad Oceanum: *Aliae sunt leges Caesarum,*
aliae Christi; aliud Papinianus, aliud Paulus noster
praecipit. S. Augustini epistola CLX. ad Apringium ju-
 „ dicem: *Alia causa est Provinciae, alia Ecclesiae. Illius*
terribiliter gerenda est administratio; hujus clementer
commendanda est mansuetudo. S. Leonis epistola LIV.
 „ seu LXXVIII. Queneslianæ Edit. ad Marcianum Augu-
 „ stum: *Alia ratio est rerum saecularium, alia divina-*
rum. Apollinaris Sidonii lib. IV. epistola XIV. ad Pole-
 „ mium: *Noveris, non ut est apud Praefulem Fori, sic*
esse apud Judicem mundi. Gelasii I. in Epistola ad Ana-
 „ stasium Imperatorem, & Nicolai I. in Epistola VIII. ad
 „ Michaëlem pariter Imperatorem verba praetereo, quod
 „ ea nihil ad rem pertinere, nimium exploratum sit. Dis-
 „ crimen autem inter Ecclesiasticam & saecularem Mo-
 „ narchiam in eo speciatim laudatus Auctor constituit:
 „ Quod Regni Ex. Gr. Gallici regimen sit penitus Mo-
 „ narchicum; in eoque unius Regis auctoritate ac vo-
 „ luntate cuncta gerantur, sanciantur ac decernantur:
 „ Ec-

„ Ecclesiae autem regimen non sit mere Monarchicum,
 „ sed Aristocratia temperatum; nec absoluta auctori-
 „ tate vel proprio motu, sed canone regatur Ecclesia.
 Producitque in hujusce sententiae confirmationem se-
 quentia Romanorum Pontificum testimonia: Celesti-
 ni I. in epistola ad Episcopos Illyrici: *Dominentur nobis
 regulae, non regulis dominemur; simus subjeſti cano-
 nibus, cum Canonum praecepta servamus.* S. Leonis
 epistola ad Episcopos Caesariensis Mauritaniae: *Quam
 diligens & quam prudens habenda est dispensatio divi-
 norum munerum & caelestium dignitatum, ne in ali-
 quo Apostolica & canonica Decreta violentur, & his
 Ecclesia Domini regenda credatur.* Gelasii I. epistola ad
 Episcopos Lucaniae scribentis: *Necessaria rerum dis-
 pensatione constringimur, & Apostolicae Sedis mode-
 ramine convenimur, sic Canonum Paternorum decreta
 librare, & retro Praesulum Decessorumque nostrorum
 praecepta metiri; ut quae praesentium necessitas tempo-
 rum restaurandis Ecclesiis relaxanda deposcit, adhibi-
 ta consideratione diligenti, quantum fieri potest, tem-
 peremus: quo nec in totum formam veterum videamur
 excedere regularum.* Hormisdac in Indiculo dato Enno-
 dio & Fortunato Constantinopolim Legatis: *Canones
 solvere, in religionem committere est.* Agapeti ad Cac-
 sarium Arelatensem Episcopum scribentis: *In nullo con-
 tra priscae definitionis constituta vel regulas pro quali-
 bet occasione, vel sub cujuscunque personae respectu,
 venire praesumimus. . . . Divini consideratione judicii
 necesse nobis est, quidquid Synodalis decrevit auctori-
 tas, inviolabiliter custodire.* S. Gregorii Magni lib. II.
 epistola VII. ad Johannem Larissaeum Episcopum scri-
 ben-

bēntis : *Haec consona sanctis Patribus definitione sancimus, ut qui sacris nescit obedire Canonibus, nec sacris administrare, nec communionem capere sit dignus altaribus.* Silvestri II. in epistola ad Seguinum Senonensem Archiepiscopum : *Sit lex communis Ecclesiae Catholicae, Evangelium, Apostoli, Prophetae, Canones Spiritu Dei constituti, & totius mundi reverentia consecrati, & Sedis Apostolicae Decreta ab his non discordantia.* B. Gregorii VII. epistola LVIII. lib. II. ad Manassem Archiepiscopum Remensem scribentis : *Ecclesiasticas causas, non potentiae magnitudine, sed iustitiae censura, finire oportet.* Et lib. V. epistola V. ad Clerum & Populum Aquilejensem : *Nihil novi, nihil nostris adinventionibus superinducere conamur, sed illud solummodo quaerimus, quod & omnium salus postulat & necessitas, ut Evangelica & canonica servetur auctoritas.* Non secundum arbitrium nostrum, sed per viam & doctrinam Orthodoxorum Patrum incedere cupimus. Eugenii III. epistola X. ad Arnaldum Coloniensem Archiepiscopum scribentis : *Apostolica providentia, secundum sacrorum Canonum institutiones, universa regit Ecclesias.* Deuque Innocentii III. epistola CXV. libri II. ad Cantuariensem Archiepiscopum scribentis : *Quae in derogationem sanctorum Canonum attentantur, tanto potius infringi volumus & carere robore firmitatis, quanto auctoritas universalis Ecclesiae, cui praesidemus, ad id nos provocat & inducit.*

Sed haec quam nullo emolumento atque operae pretio ab Adversariis objiciantur, facile intelliget, quisquis animadverterit, quod non minore ferme religione ipsi quoque Reges summiq; Principes sese ad Reipubli-

cae leges adstrictos esse, identidem professi sunt. Hinc notissimum illud ac celebre effatum (a): *Digna vox est maiestate Regnantis, legibus alligatum se profiteri*. Cui plane consonum est illud Alexandri Imperatoris (b): *Nihil tam proprium Imperii est, quam legibus vivere*. Ita Antiochus III. ad Civitates & Praefides Asiae scribere solebat (c): *Si quid contrarium legibus per Epistolam iussero, nolite parere, sed me ignoracione lapsum puteti*. Quod Nicephorus (d) etiam Tiberio Orientis Imperatori adscribit. Quum Trajanus Praefectum praetorio ense cingeret: *Hunc, inquit (e), gladium, si iuste imperavero, pro me; si autem male, contra me stringito*. Et in Rostris quum iuramentum conceptis verbis populo praestaret, legibus quoque se subiecit. Quod illi merito Plinius in Panegyrico laudi vertit his verbis (f): *In rostris simili religione ipse te legibus subiecisti, legibus Caesar, quas nemo Principi scripsit*. Anastasius Imperator prohibuit (g), in disceptationem cujuslibet litigii proferri ullum Rescriptum, ullam Pragmaticam sanctionem, ullam sacram adnotationem, quae generali juri vel utilitati publicae adversa esse videatur. Apud Persas, inquit Grotius (h), Rex summo cum imperio erat, *αυτοκρατωρ & ανηκεν αυτω*, ut de eo Plutarchus loquitur, & ut imago Dei adorabatur, & ut apud Justinum est, non mutabatur nisi morte. Rex erat qui dicebat Proceribus Persarum (i): *Ne viderer meo tantummodo*

usus

(a) L. *Digna vox*. C. de leg. & Const.

(b) L. *Ex imperfectis*. C. de Testam.

(c) Plutarch. in Apophth.

(d) Lib. I. cap. XVII.

(e) Dion in Trajan.

(f) Cap. XLV. num. VI.

(g) L. fin. C. si contra jus vel util.

(h) Lib. I. de Jure B. & P. capi.

te III. §. XVI. num. 3.

(i) Valer. Max. lib. IX. cap. V.

usus consilio, vos contraxi: ceterum mementote, parendum magis vobis esse quam suadendum. Tamen & jurabat quum Regnum adiret, quod Xenophonti & Diodoro Siculo notatum, & leges certa quadam formam latus mutare illi nefas erat, ut & Danielis (a) & Euthicris (b) historiae, & Plutarchus in Themistocle nos docent: *Apud Persas, inquit, religio erat, leges non servare ut semel latae fuerant.* Diodorus quoque Siculus lib. XVII. & multo post tempore Procopius Persici belli libro primo, ubi insignis ad hanc rem historia exstat. Idem de Aethiopum Regibus tradit laudatus Diodorus. Eodem tradente, Aegyptiorum Reges, quos tamen ut alios Reges Orientis summo imperio usos non est dubium, ad multarum rerum observationem obligabantur. Epiri quoque Reges jurare solitos, regnatos se juxta leges, ex Plutarcho in Pyrrhi vita discimus: *Jurabant autem Reges, se imperaturos secundum leges: Epirotae autem, se imperium eisdem conservaturos secundum easdem leges.* Et quoniam Nat. Alex. Gallicum regnum in exemplum adducit, subjiciam hinc quod Johanni Barbeyrac in not. ad Puffend. lib. VII. de Jure N. & G. capit. VI. num. X. adnotatum est (c).

K k k k 2

Si

(a) Scito, Rex, quia lex Medorum atque Persarum est, ut omne decretum, quod constitueris Rex, non liceat immutari. Cap. VI

(b) Si tibi placet, egredietur edictum a facie tua, & scribatur juxta legem Persarum atque Medorum, quam praeteriri illicitum est. Cap. I. Videtis Josephum in Hystoria Vasthae.

(c) Les Princes, qui ont été le plus jaloux de leur indépendance, ont quelque fois reconnu, qu'ils ne

pouvoient rien contre les Loix. En voici un exemple bien remarquable, que M. Sidney n'a pas manqué de rapporter; c'est que, dans le Traité des Droits de la Reine de France, imprimé en 1667 par ordre de Louis XIV. pour justifier les prétentions de ce Monarque sur une partie des Pays-bas Catholiques, on trouve formellement, que les Rois ont cette heureuse impuissance de ne pouvoir rien faire contre les Loix de leur Pays.

Si ergo Principes saeculi & Reges gentium, de quibus ait Christus Luc. XXII. quod *dominantur earum*, & *potestatem exercent inter eas*; legibus tamen principatum subjiunt, & imperium ex earum praescripto administrandum, & Rempubicam gubernandam esse fatentur: Quid mirum, si Ecclesiae Principes, quibus Christus nihil impensius, quam modestiam, lenitatem, patientiam & mansuetudinem commendavit, ad earum legum observantiam se adstrictos esse gloriantur, quae Spiritu Dei conditae sunt, ac totius mundi reverentia consecratae? Nam quae rationes adferri a Politicis solent, cur Principes, etsi a legum humanarum coactione immunes sunt, suos tamen suorumque ac populorum mores ad earumdem legum amussim exigere teneantur, & infinitam atque incircumscriptam potestatem certis limitibus continere: eadem multo magis in summum Ecclesiae Principem quadrant: eaque de causa dispar a Patribus esse dicitur Ecclesiasticae & saecularis Monarchiae conditio. Tenentur enim imprimis Principes suas aliquando servare leges (a) ob aequitatem naturalem & publicam honestatem, quae id exigunt, ut quod ab aliis requirimus, ipsi faciamus. Quod quum notissimo illi naturalis divinique juris principio innitatur (b); quis dubitet, quin etiam Principes complectatur, quos ab iis quae a naturali vel divino jure derivantur, absolutos non esse, apud omnes in confesso est? idque potissimum in iis legibus quae naturali aequitati innituntur: quas, ut recte quidam ait (c), etsi, quod ad forum humanum atti-

(a) Puffendorf. lib. VII. de J. N. & G. cap. VI. §. III.

(b) Arnif. de Jure Majest. lib. I. cap. III. num. 7. & seqq.

(c) And. Ifern. in Praelud. seqd. quaest. 2. num. 36.

attinet, non tenentur servare ut leges; tenentur tamen servare ut rationes. Multum enim interest, aliquid facias prout lex imperat, aut prout ratio docet. Ratio autem & aequitas naturalis postulant, ut in rebus agendis Principes quid eos deceat, consulant, non quantum liceat; ut illud Tullii Iudices admonentis prae oculis semper habeant (a): *Vestri consilii, vestrae sapientiae est, spectare quid deceat vos, non quantum liceat vobis.* Est enim aliquid, ut idem monet (b): *Quod non oporteat, etiamsi licet.* Quo etiam pertinet illud Claudiani Honorium Imperatorem adloquentis:

*Nec tibi quid liceat, sed quid fecisse decebit,
Occurrat, mentemque domet respectus honesti.*

Porro ut nihil magis aequum, honestum ac decorum Principi, quam submittere legibus Principatum (c): ita nihil ab aequitate disjunctius, quam ut jugum aliis imponat, quod sibi intolerabile videatur. Quo spectat illud Minucii Confulis his apud Dionys. Halicarn. (d) verbis increpantis Plebem Romanam: *Et quae vos ipsi ferre nolletis, aequum putatis, alios ea ferre?* Quod Christus Dominus in eo capite, in quo Phariseorum superbiam & hypocrisim carpit, primùm in illis & gravissime reprehendit; jubetque ut ab eo maxime Discipuli sui caveant (e): *Secundum opera eorum nolite facere: Dicunt enim, & non faciunt. Alligant enim onera gra-*

via

(a) Orat. pro Rosc.

(b) Orat. pro Balbo.

(c) L. *Digna vox.* Quod Guntherus lib. VIII. de Gest. Frid. Imp. seqq. verbis expressit:

*Nam nihil, ut verum fatear magis esse decorum
Aut regale puto, quam legis jure solutum
Sponte tamen legi se se supponere Regem.*

(d) Lib. VII. Hist. Rom.

(e) Matth. cap. XXIII.

via & importabilia, & imponant in humeros hominum, digito autem suo nolunt ea movere. Ad quem locum haec S. Johannes Chrysostomus observat (a) :
 „ Duplicem hic nequitiam memorat, quod a subditis
 „ sine ulla venia sedulam requirant vitae puritatem,
 „ multamque sibi licentiam permittant : quod contrarium est boni Principis officio : quod est in rebus ad
 „ se spectantibus iudicem esse severum ac sine ulla venia ; in subditorum vero peccatis mitem & ad veniam
 „ dandam pronum. Hi vero contrarium faciebant. Tales sunt ii omnes, qui verbis philosophantur ; severi
 „ nempe & immisericordes, utpote in operibus inexpertii. Quum ergo nihil aequè Christo cordi fuerit, quam a suis Discipulis Phariseorum jactantiam & hypocrisis removere ; volueritque in hoc ipso capite ut qui futurus erat eorum Princeps, ceteris humilitate praestaret, eorumque minister esset ; quid mirum, si Apostolorum Principis Successores & se se & suam Ecclesiam ceterarum principem eisdem legibus regant ac moderentur, quas aliis Episcopis & Ecclesiis praescribunt ?

Altera ratio, cur Principes suis se se accommodare legibus maxime deceat, inde petitur, quod eorum exemplo efficacissime populi ad earundem legum observantiam incitentur (b). Sanctiores enim & iustiores reputant eas leges, quibus animadvertunt Principem ipsum non dedignari acta sua subicere, libentiusque eisdem obedientiam praestant illius exemplum praec oculis habentes, quo nihil in utramque partem, sive mutare sive con-

(a) Homil. LXXII. et LXXIII. in Matth.

(b) Arnif. lib. I. de Jure Majest. cap. III. num. 10. Puffend. lib. VI. de Jure N. & G. cap. VI. §. III.

conservare velis Rempublicam, efficacius esse, docet Plato (a). Quamobrem, ut ab eodem memoriae proditum est (b), quum Cleomenes bona sua in forum contulisset, *Regem cives universi secuti sunt*. Et quum Consules & Senatores Romani, ex consilio Laevini Consulis, aurum, argentum, aes signatum omne in publicum conferrent; *hunc consensum Senatus*, ait Livius (c), *Equester ordo est secutus, Equestris ordinis Plebs*. Ita sine edicto, sine cohortatione Magistratus, tantum auri & argenti collatum, ut nec Triumviri accipiendi, nec sribae referendo sufficerent. Merito proinde Vellejo Paterculo animadversum est (d), quod *Princeps optimus recte facere cives suos faciendo docet: quumque sit imperio maximus, major exemplo vult esse*. Et Mecoenas in Oratione ad Augustum (e): *Ea ages quae Praefectos agere velis: id enim facilius eos officium docebit, quam metus legum; quum alterum imitatione constet, alterum timore: ac facilius meliora imitentur homines, quum ea in re ipsa conspiciunt, quam pejora vitent, verbis ea prohibita audientes*. Ac praeclare Ovidius:

Sic agitur censura, & sic exempla parantur,

Si iudex, alios quod iubet, ipse facit.

Praeclarius etiam Claudianus (f):

In commune jubes si quid censeve tenendum,

Primus iussa subi: tunc observantior aequi

Fit populus, nec ferre negat, quum viderit ipsum

Aucto-

(a) Lib. IV. de Legib.

(b) In Cleom.

(c) Lib. XXVI.

(d) Lib. II. in fin.

(e) Apud Dion. lib. LII.

(f) De IV. Consul. Honor. ver. 296. & seqq.

*Auctorem parere sibi . Componitur orbis
Regis ad exemplum , nec sic inflectere sensus
Humanos edicta valent , quam vita Regentum .*

Quanto autem Christianae virtutes Politicis praestant ; tanto magis decet , ut ad eas summus Ecclesiae Princeps exemplo suo populos incitet quam legibus & praeceptis . Quamquam enim generatim omnium virtutum , praecipue tamen Christianarum , decus & ornamentum , earumque pretium , non tam in exteriori opere actuque positum est , quam ex interiore spiritu & affectu manat ; prout scilicet quis non invitus aut coactus , sed volens libensque Christianae pietatis officia amplectitur & exsequitur . Nam ad civilis Reipublicae finem non admodum refert , qua quis mente operetur , dum tamen , quod ad exteriores actus pertinet , & prudens , & iustus , & fortis & temperans videatur . At si ad caelestis Reipublicae finem ejusmodi virtutes exigantur , nullus aut modicus est earum fructus , nisi in corde radicem habeant , ac si eas prorsus interior spiritus destituat . *Homines enim vident ea quae parent , Dominus autem intuetur cor .* I. Regum cap. XVI. *Non ex tristitia aut ex necessitate : bilarem enim datorem diligit Deus :* II. Cor. cap. IX. Neque beatus , qui utcunque pauper , sed qui pauper spiritu est ; neque item qui utcunque mitis aut humilis , sed qui mitis & humilis corde est . *Beati pauperes spiritu .* Matth. cap. V. *Discite a me , quia mitis sum & humilis corde .* Ib. cap. XI. Ad excitandum autem & commovendum interiorum adfectum plus valent Principis ac Legislatoris exempla , quam leges & praecepta . Illa enim animum subeunt , & amorem conciliant ; poena vero , quae legi vim & efficacitatem indit , timorem in-

cu-

cutit, qui, ut S. Augustinus identidem monet, manum refrenat & a scelere cohibet: quod nisi etiam caritate fiat, a novi Foederis spiritu ac perfectione quamlongissime abest. Si ergo Principes saeculi, ut populis exemplo sint, naturae lege tenentur suas ipsi aliquando servare leges; multo magis summus Ecclesiae Princeps, Magister ac Legislator, ad ea quae alios docet jubetque, exemplo suo praecire atque incitare debet; quemadmodum Christus Rex & Legifer noster, qui *coepit facere & docere*. Quae verba S. Johannes Chrysostomus exponens: „ Consideres, *inquit* (a), velim, quomodo „ Christus per opera dictis suis fidem conciliarit. Ad „ mansuetudinem hortabatur dicens: *Discite a me,* „ *quia mitis sum & humilis corde*. Docebat pauper- „ tatem, & illam per opera exhibebat. . . . sic etiam „ Discipulos suos facere iussit. Quapropter dicebat „ Paulus: *Sicut habetis formam nostram*. Phil. cap. III. „ Nihil enim frigidius Doctore, qui verbis tantum philosophatur: neque enim hoc Doctoris est, sed hypocritae. Idcirco Apostoli primum exemplo, hinc verbis docebant; imo non verbis opus habebant, operibus ipsis clamantibus. Quum ergo Christianae Republicae veluti summa in caritate posita sit: Hoc est enim maximum & primum mandatum: ex quo Lex pendet & Prophetiae Matth. cap. XXII. haec veluti Christi Discipulorum tessera Joh. cap. XIII. haec vinculum perfectionis ad Colos. cap. III. Et qui diligit legem implevit: Et omnia in hoc verbo instaurantur, *diliges proximum tuum &c.* ad Rom. cap. XIII. caritas autem libera sit non coacta; ipse, ut ita dixerim, Christianismi spiri-

(a) Hom. I. in Acta Apostolorum.

tus exigit, ut quantum fieri potest, Christi grex a Pastoribus non timore sed amore ducatur. Quo pertinent & illud Gregorii Nazianzeni (a): *Vel maxime id lex nostra & Legislator noster sanxit, ut grex non coacte sed sponte ac libenti animo pascatur*: & illud S. Hieronymi (b), qui Regem nolentibus, Episcopum volentibus praesse scribit: & illud S. Johannis Chrysostomi (c): *Legibus ac mandatis omnia peraguntur*; (apud Principes) *hic vero nihil tale: Neque enim licet ex auctoritate praecipere*: ac demum illud Origenis (d): *Quoniam sicut omnia carnalia in necessitate sunt posita, non in voluntate; spiritualia autem in voluntate sic & Principes spirituales. Principatus eorum in dilectione debet esse positus, non in timore corporali*. Quae certe non eo pertinent, ut potestas coactiva & vera jurisdictionis spiritualibus Principibus adimatur: sed ut ii intelligant, quo potissimum spectare debeant, ut scilicet subiectos populos magis dilectione, & bonorum operum sanctaeque disciplinae exemplis, quam legum & poenarum metu, gubernare & in officio continere satagant.

Et haec quidem rationes id imprimis suadent, maxime congruum esse ac decere Ecclesiam Romanam, ut quibus institutis ac legibus alias Ecclesias regit, iis & ipsa regatur. Sed est alia ratio, quae generatim probat, esse aliquas in Christiana Republica, quemadmodum & in ceteris, leges, quas summus Princeps ac Legislator, quacumque potestate praeditus sit, & quamlibet legibus exemptus atque earum vi & coërcitione immunis, non tamen attingere debet, sed omne in id studium operamque

(a) In Apolog.
(b) In Epitaph. Nepot.

(c) Hom. III. in Acta Apostolor.
(d) Tract. XII. in Matth.

que conferre, ut examuffim ac religioſe ſerventur; cujuſmodi ſunt leges, quibus ſtatus, pax & tranquillitas Reipublicae continetur. Nihil enim fere (a) exitu pernicioſius eſt legum novitate, ſi de ſtatu Reipublicae quaeratur. Atque haec ratio magni ponderis ſemper viſa mihi eſt: eoque majus periculum imminet, ſi leges, quibus ſtat Reſpublica, mutari ac moveri contigerit. Nam leges, quae ſervitutum ac teſtamentorum jura continent, quaeque de rebus rationibusque contrahendis ſeruntur, interdum mutari convenit, ut melioribus locus ſit. Sed qui leges, quae ad ſtatum Reipublicae pertinent, mutare ſalva Republica conatur, perinde facit, ut ii qui aedium altiffimarum ſubſtructiones & fundamenta renovare ſe poſſe putant ſalvis aedibus, quae niſi ruant, plus tamen ipſa concuſſio domus incommodi, quam nova materia utilitatis ſit adlatura: eoque magis quum civitas quaſi vetus & caduca domus diutiſſime ſtetit in eodem ſtatu. Eſt enim ab Antiquis accepta, & poſteritati diu probata civitatum conſervandarum diſciplina, ſcilicet, in ea Republica, quae diutiſſime floruit in eodem ſtatu, quantacumque utilitatis ſpecies appareat, inſperata converſione nihil eſſe mutandum. Quod ſi quis pleraſque leges ſaepius mutari doceat oportere, ut quae de annonae, de mercibus evchendis aut invchendis, de poenarum acerbitate aut lenitate, quae parvo momento mutabiles ſunt, aſſentior ego quidem: quum viſiſſimus neceſſitatis nulla legum obligatione teneatur. Leges enim novae ſi ſpem adferunt ut tanquam in herbis non fallacibus fructus appareat, non ſunt illae quidam repudiandae: ſed agitur de legibus, quae ſtatum civitatis

(a) Bodin. lib. IV. de Repub. cap. II.

tis continent: quas, si fieri possit, immutabiles esse, & velim & optem: non quia Respublica legibus inservire debeat; quum Reipublicae ac societatis tuendae causa leges omnes ferantur, nec leges quisquam legum sed Reipublicae causa, salvas esse velit. Est enim haec Rerum omnium publicarum prima ac praecipua lex: SALUS POPULI SUPREMA LEX ESTO. De his ergo legibus, quae populorum consensione, & longo ac diuturno usu firmatae sunt, & quibus post Evangelicas & Apostolicas institutiones, Christianae religionis & sanctitas floret, & pax & tranquillitas constat; de his, inquam, legibus pleraque eorum locorum intelligenda sunt, quae ab Adversariis opportune importune objiciuntur, & quibus Romani Pontifices profitentur, sacras & inviolabiles esse debere eas leges, quibus & longa aetas, & Ecclesiarum consensus summam conciliavit auctoritatem. Quas perinde ac Romani Pontifices, ipsa Concilia Oecumenica sibi intactas, & immotas & inconcussas esse voluerunt; ac proinde ut nihil hinc Adversariorum sententia adversus generalium Conciliorum, ita nostro judicio neque adversus summam Romanorum Pontificum potestatem, efficiatur.

Sed quoniam quae haecenus disseruimus parem ferme efficere videntur saecularis & Ecclesiasticae Monarchiae conditionem, atque adeo non plene satisfactum videtur iis Patrum testimoniis, qui Christi Domini & Apostolorum Principis verbis freti, dominatum Clericis abrogant & absolutam ac simplicem Monarchiam, cujusmodi in aliquot regnis Reges gentium ac saeculares Principes habent; illud etiam ad hunc scrupulum penitus eximendum addemus, novum & insolitum non esse,
ut

ut quae reapse, quod ad vim & substantiam pertinet, & spectata communi notione, conveniunt, si tamen externa specie ac splendore differant, eis & res ipsa & nominis proprietas adimi videatur. Sic enim Ex. Gr. & templa, & Altaria, & Sacrificium, si communes harumce rerum notiones spectentur, non minus vere ac proprie apud Christianos inveniuntur & locum habent ac semper habuerunt, quam fuerint olim vel apud Ethnicos, vel in veteri lege apud Hebraeos. Quae tamen quoniam apud Christianos externa specie longe ab illis aberant, quae Judaeis & Ethnicis in usu erant; hinc aliquando antiquiores Patres & templa, & altaria, & sacrificia generatim & absolute adimere Christianis videntur; veriti nimirum, ne si in Christianorum sacris designandis, communibus cum Judaeis & Gentilibus vocabulis uterentur, talia crederentur esse apud Christianos templa, & altaria, & sacrificia, qualia in aliis sectis frequentabantur, & externa specie oculos intuentium implebant. Quemadmodum ergo ex aliquot veterum Patrum testimoniis haud jure colligunt Novatores, non fuisse olim apud Christianos vera templa & altaria, nec esse in Ecclesia verum & proprie dictum sacrificium: ita ex eo quod aliqui Patres docere videantur, verum dominatum, ut ait Petrus de Marca (a), esse penes Reges, non autem penes Sacerdotes, idque etiam ex Evangelio colligere videri possint; inde profecto non sequitur, non esse in Ecclesia veram Monarchiam a Christo institutam, quae Monarchiae saeculari, quod ad vim & substantiam Monarchici regiminis pertinet, impar non sit; quamquam externa specie ac modo regiminis alia debeat esse

Ec-

(b) Lib. II. de Conc. Sac. & Imp. cap. XVI. num. VI.

Ecclesiastici principatus conditio . Itaque ne quum de Regno & imperio Ecclesiae loquimur , tale cogitemus Regnum & imperium , qualia sunt ea , quae sub sensus cadunt , & oculis obversantur , ex quibus ut plurimum de rebus statuimus & judicamus ; aliquot veterum Patrum , cum Romanis Pontificibus (*a*) , tum generatim Sacerdotibus (*b*) , *dominationem* abrogasse videntur : quorum tamen verba , ut Ecclesiae dogmati consentiant , aliquo interpretamento ab omnibus Catholicis temperanda sunt : neque ulla est ratio , cur nostra haec interpretatio prae ceteris rejiciatur .

CAPUT V.

Quamquam Ecclesiae per Romanos Pontifices gubernationem ad certarum legum praescriptum & amussim exigendam esse diceremus ; non inde tamen consequens esset , summam non esse , & in Ecclesia , & super Ecclesiam eorumdem Romanorum Pontificum potestatem .

Lumen huic Thesi praeferet atque adhibebit Puffendorfii doctrina (*c*) , aliis etiam , ut video , Politicarum rerum Scriptoribus communiter commendata , qui Grotii (*d*) vestigiis insistentes , diserte statuit , Imperium non desinere esse summum , quamquam inter Regem

(*a*) S. Bern. lib. II. de Consid. cap. VI.

(*b*) Origen. Tract. XII. in Matth. & S. Johan. Chrys. Hom. III. in Acta Apostolor.

(*c*) Lib. VII. de Jure N. & G. cap. VI. §. VII. & seqq.

(*d*) Lib. I. de Jure B. & P. cap. III. §. XVI.

gem & cives conceptis verbis in ipsa imperii delatione conventum sit, ut ad certas leges, quas *fundamentales* vocant, imperium gerat. Quamquam enim in qualibet Republica summa potestas populo praeceat, & a nemine in hoc mundo pendeat; magnum tamen, potissimum quod ad Reges pertinet, in modo administrandae potestatis discrimen est. Alicubi enim Princeps iudicio arbitrioque suo populos regit, alibi vero certis inherere regulis debet: unde oritur distinctio potestatis absolutae, & certis quibusdam legibus circumscriptae. Aliud est ergo, horumce Auctorum iudicio, Reges ac supremos Magistratus *summam*, aliud *absolutam* habere in Republica potestatem. Nam qui absoluta potestate praeditus est, nullis Reipublicae contrahitur legibus, quemadmodum ille, cuius imperium ad certas dirigendum regulas est. Qui tamen propterea summam non definit habere in Republica potestatem, quoniam omnia Majestatis iura, quibus in absoluta Monarchia Principes gaudent, iis etiam ille decoratur. Quare totum discrimen in eo positum est, quod Princeps legibus solutus, de rebus agendis suo ipse iudicio statuit atque pronuntiat; at in Monarchia certis legibus circumscripta, Concilium seu coetus populi aut Optimatum una cum Rege quaedam negotia discutit, ejusque consensione opus est, ut quaedam jure ac legitime subditis mandet; quamquam ea, quae in hoc Coetu constituta sunt, non ab eo, sed a solo Rege vim omnem auctoritatemque derivent. Quamobrem in ejusmodi civitate non sunt, quemadmodum in Republica mixta & irregulari, duae voluntates: nam omnia quae vult civitas, vult per voluntatem Regis: quamquam limitatione illa fiat, ut non existente certa conditione,

Rex

Rex quaedam non possit velle, aut frustra velit. Neque etiam summum obtinere locum definit, aut coetus, cujus in summis rebus consensus requirendus est, ipso Rege superior habendus est. Non enim ex quo Princeps non omnia ex libidine facere potest, consequens est, cum non habere summum imperium: neque ex quo aliquis non teneretur alteri praestare in omnibus obedientiam, sequitur, cum alteri aequalem esse, aut illo etiam superiorem. Quemadmodum neque ex eo, quod non possumus alicui pro libitu omnia praecipere, hic vicissim jus sibi adrogare potest aliqua nobis praecipienda. Diverfa namque haec sunt, teneri ad alterius sequendam voluntatem, quoniam ad id pacto me aliquo obstrinxi; & quoniam illi fas est, quascunque libitum fuerit, mihi leges praescribere. Itaque multum inter se distant, longeque diversae sunt atque sejunctae, Potestas summa & Potestas absoluta. Prior enim tantum requirit, ut in eodem ordine nulla ea superior aut illi aequalis habeatur. Posterior autem praeterea exigit libertatem jura sua exercendi, suo dumtaxat adhibito judicio, & ex propriae voluntatis arbitrio. Quomodo autem illa duo consistere possint, Imperium summum & Imperium certis quibusdam pactis quodammodo circumscriptum, explicat Grotius *similitudine Patri familias, qui si quid familiae facturum se promiserit, quod ad familiae gubernationem pertineat, non eo desinet in sua familia jus summum, quantum fert familia, habere. Nec maritus maritali potestate privatur, eo quod aliquid uxori promiserit.*

His ergo positis, de quibus, ut jam diximus, celebrioribus harumce rerum Scriptoribus communiter inter
se

se convenit, facile constat propositae thesifundamentum: quam etiam Illustrissimus Petrus de Marca (a); frustra Meldenfi Episcopo, ut mox videbimus, intercedente, tuetur. Quamquam enim quas vocant *Ecclesiae Gallicanae Libertates*, quas veterum Canonum auctoritate niti depraedicant, firmas & immotas esse debere, & ipse contendat; attamen earum inviolabilem firmitatem, non ex superiore generalium Conciliorum, quemadmodum alii Pragmatici, auctoritate derivat; sed ex copotius quod Romani Pontifices sacrosanctas Ecclesiae leges inconcussas praestare velle merito judicentur, vel etiam ex promissione, qua se ipsi ad veterum Canonum executionem obstrinxerint. „Solet, *inquit*, a plerisque Pragmaticis hoc fere praecipuum constitui Libertatis Gallicanae theorema, Concilium Oecumenicum superius esse summo Pontifice. Unde sequatur, nihil a Sedis Apostolicae Praefulibus tentari posse, quod Synodorum generalium definitionibus adversetur Attamen si cum bona Magistrorum venia, id quod sentio libere profiteri liceat, existimo Libertates Ecclesiae Gallicanae hoc axiomate non omnino niti nam Libertates perinde tuemur, si de Concilii generalis novis decretis, ac si de Romani Pontificis novis Constitutionibus agatur Quare non est quod haereamus in ea regula, quae Romanis stomachum movet, & quae rebus nostris non prospicit ut par est. Fruatur summus Pontifex aut aequo jure cum Conciliis generalibus, aut superiori. I lud unum in foro expendetur, an nova constitutio vel novum Rescriptum rebus Gallicanis consulat, aut no-

M m m

„ ceat .

(a) Lib. III. de Conc. Sac. & Imp. cap. VII.

„ ceat . Si receptos Canones vel receptos mores infrin-
 „ gat aliquo pacto , ejus ratio non habebitur , nisi con-
 „ sensu publico accedente . Praeterquamquod enim
 „ haec novarum legum conditio est , & praecipue Ec-
 „ clesiasticarum , ut assensu eorum , quorum interest ,
 „ probentur ; id sibi praecipue vendicat Canonum reve-
 „ rentia , ut iis Pontifices Romani derogare velle non
 „ censeantur , etsi fortasse formulis Rescripti , ex stylo
 „ Curiae , aliter cautum sit . *Et infra num. II.* Itaque
 „ non agimus cum Sede Apostolica , quasi cum potesta-
 „ te quadam certis regulis ita devincta , ut eas nullo casu
 „ egredi possit ; cum sciamus Canonum dispensatio-
 „ nem , cujus est in Politia Ecclesiastica frequentissimus
 „ usus , summo Pontifici praecipue conceditam . Sed ;
 „ veluti ex pollicitatione , quam suis decretis Canonum
 „ & Constitutionum executionem sponponderunt , a
 „ Beati Petri Successoribus cum debita reverentia exigi-
 „ mus . Quantum enim Canonibus detulerint Romani
 „ Pontifices per omnes aetates , perpetuo & verbis &
 „ factis testati sunt ; eademque opera Libertates nostras
 „ inviolatas spondere visi sunt .

Hanc doctissimi Praefulis opinionem amplectitur etiam ac tuetur Cl. Thomassinus (a) , & cum alios Gallicanarum Libertatum Vindices ac Patronos adjungit , qui eidem sententiae haud obscure suffragantur , veluti Petrum Pithocum , Jacobum Capellum , Antonium Hotmannum , Guidonem Coquille , & Lefchasserium ; tum etiam pluribus eam Cl. Auctor argumentis munire & confirmare satagit . Quod ad utrumque caput pertinet , aliqua ex ea doctissimi Viri disputatione delibabo . Eamdem ,

(a) Dissert. XVIII. in Syn. Rom. an. 732. num. CIII. & seqq.

dem, inquit (a), ac Petrus de Marca, trivit orbitam longe doctissimus Antonius Hotmannus, solo antiquitatis usu ac jure adversus novitatem Libertates has omnes suffulciens. Et post Constantiensem ac Basileensem Synodum perhibet ille quidem vexatam fuisse quaestionem illam, *an superior sit Papa Concilio*; at super sedisse Tridentinos Patres ea quaestione attingenda, & tandem concludit: „Nec facile dirimi posse litem illam; „ & ejusmodi grandes ac generales quaestiones persaepe consultius in suspendio retineri. Conducibilem esse modestam libertatem, sed deprimi plus aequo Pontificiam dignitatem, periculosum id vero esse. Quae eruditissimi Viri verba plus fatis produnt, quam immaniter ille abhorreret a Libertatibus patriis tam inconstanti lubricaeque doctrinae committendis. Nec ab horum vestigiis deflexit Guido Coquille: „In Gallia „ excogitata est ratio haec honesta cohibendorum conatum quibus corruptela in Ecclesiam inveheretur; „ non velut ab abusu appellando a concessione Rescriptorum Pontificiorum: In Pontifice enim agnoscitur supremitas in negotiis Ecclesiasticis: sed tanquam ab abusu provocando ab executione hujusmodi Rescriptorum. Ita in impetrantes culpa derivatur, concedentis honori parcitur, par utilitas decerpitur. Solius etiam antiquitatis praesidio pugnat Leschafierius, praetendens cum Carolo VI. Gallorum Rege, *Jus commune antiquum, antiquos Canones, statuta antiquorum Patrum*: cum Carolo VII. *statuta Sanctorum antiquorumque Patrum*: cum S. Ludovico, *dispositionem Juris communis, sacrorum Conciliorum Ecclesiae Dei*, &

M m m m 2

sta-

(a) Ubi supra num. CVI.

statutorum Sanctorum antiquorum Patrum. Novellum illud jurgium prorsus filet ut cassum & inutile: quum interfit, non quae superior & major, sed quae antiquior sit auctoritas: & minor si modo vetustior, antehabeatur majori sed juniore. Haec ex laudatis Scriptoribus Thomassinus, ex quo etiam aliquot argumenta subjiciam, quibus eadem sententia egregie firmatur.

Nam primo, inquit (a), si Libertas Gallicana perinde refellit nova Conciliorum generalium statuta, atque decreta Pontificum, pristinis suis legibus moribusque refragantia: alienum prorsus est, eam illi sententiae superstrui, qua Concilio Pontifex subjicitur. Discors enim ipsa sibi Concilio Pontificem & subjicit & exaequat; & quidem verbo subjicit, re exaequat; quum adversus utriusque nova decreta ex aequo pristinos suos mores propugnat. 2. Non omnia Gallicanae capita aliquo Conciliorum generalium statuto nituntur. Pleraque Gallicanarum Synodorum antiquis legibus, vel receptis tantum moribus contineri dicuntur. Non ergo pro Conciliorum majestate adversus Pontifices, sed pro antiquitate adversus novitatem quorumcunque, seu Synodali, seu Pontificalium statutorum decernat Libertas Gallicana. 3. Conciliorum Constantiensis & Basileensis decreta, non pura & mera, sed quibusdam *modificationibus* temperata, amplexati sunt Majores nostri; nempe quasi ad Gallicanos mores ususque castigata. Ergo quum his Conciliis veluti munimentis quibusdam maxime se jactent Vindices Gallicanarum Libertatum, vel in his ipsis tamen experiuntur, exaequari quodammodo Concilia Pontificibus, & parem circa horum illorumque decreta

(a) Ubi supra num. CV.

creta exeri libertatem. 4. Quid quod Pragmaticae sanctioni, ad Constantiensia & Basileensia decreta contemplatae, vale diximus tandem; & concordatis, sola Pontificis auctoritate Regioque consensu munitis, acquievimus? Nonne palam est hic saltem defuisse nos, Concilia Pontificibus anteponere? 5. Quid Tridentinum Concilium memorem? Ejus compluribus decretis neque dum Gallicana se coaptavit disciplina: nec tamen superius aliud quod Oecumenico Concilio tribunal, aut quasi generalius Concilium appellavimus. Haec aliaque complura loco citato Cl. Thomassinus, quibus plane & aperte conficitur ac demonstratur, quod quamquam Romanum Pontificem Conciliorum generalium & Ecclesiae teneri legibus profiteremur, non inde tamen consequens esset, summam non esse ipsius Romani Pontificis auctoritatem, aut subditum esse illum eorundem Conciliorum generalium & Ecclesiae potestati. Nam, ut praeclare idem observat (a): Ligantur & Synodi aliarum Synodorum, ligatur Ecclesia suis ipsa legibus, ligantur & Pontifices suis, ligantur denique Successores antecessorum Pontificum decretis; ne ut Paulus ait, secum conflictabunda auctoritas quae struxit, destruat; quae finxit, diffingat. Nec tamen in hac exemplorum strue minor aut inferior est, qui legibus tenetur. Quibus etiam addendum, quod Pontifices, qui de necessaria Canonum observantia loquuntur, & impensius illam commendant, non solos generalium, verum indiscriminatim & universe quorumcunque Conciliorum Canones complectuntur: imo nonnulli Conciliorum dumtaxat Provincialium & Nationalium Canones distincte commemorant.

(a) Ubi supra num. CVI.

rant. Ergone Romanos Pontifices Conciliis etiam Nationalibus & Provincialibus subiciemus? Stat ergo certum & indubitatum, quod quamquam daremus, Ecclesiasticam disciplinam, sive universam, sive particulares spectet Ecclesias, a Romano Pontifice regi, adhibitis regulis, sive universim sive particulatim receptis; non inde tamen consequens esset, quod supremæ illius in Concilia Oecumenica potestati atque auctoritati fraudi sit.

Haec tamen tam clara, tamque perspicua Meldensi Episcopo non probantur (a), ac Petrum de Marca, praeceptum illius doctrinae vindicem & adsectorem vexat, traducitque tanquam Virum *summa quidem doctrina summoque ingenio, at versatili, & in utramque partem aequè composito*. Nihil porro fere aliud objicit, quam eam sententiam non adeo Gallorum prospicere libertati „cui nimirum congruum erat, ut adversus extraordinaria mandata certa praescriptione uterentur, „quod esset in Canonibus firmum aliquid & invictum, „constitutum ab ipsa Ecclesiae potestate: quæ Pontificiam potestatem, si quando extra limites efferretur, „coercere; quin etiam interdum in gravibus scandalis „castigare posset. Quo enim alio firmiore telo usa est „Ecclesia Gallicana ad tuendam libertatem, quam appellatione? At illa nulla est, nisi Concilium statuas „potiore potestate esse.

Sic quidem Gallicanae Libertati egregie consulitur; sed Romani Pontificis Monarchia ab imis fundamentis evertitur. Grotius illorum opinionem amplexus, qui Majestatis partes dividi posse arbitrantur, ut eam argumen-

(a) Lib. XI. Defens. cap. XV.

mentis confirmet (a), statuit, quod quamquam summum imperium unum quiddam sit ac per se indivisum, constans ex illis partibus, quas supra enumeravimus, addita summitate, idest τῆς ἀνωθεν ἐξουσίας, fieri tamen interdum ut dividatur, sive per partes quas vocant potentiales, sive per partes subjectivas... sic enim fieri potest, ut populus Regem eligens quosdam actus sibi servet, alios autem Regi deferat pleno jure. Neque tamen id fit, quotiescunque Rex quibusdam promissis obligatur; sed tunc id fieri intelligendum est, si aut expresse instituat partitio; aut si quid populus adhuc liber futuro Regi imperet per modum manentis praecepti; aut si quid sit additum, quo intelligatur, Regem cogi aut puniri posse. Nam praeceptum est superioris, saltem in eo quod praecipitur: Et cogere non est quidem semper superioris: nam & naturaliter quisque jus habet cogendi debitorem, sed cum inferioris natura repugnat. Itaque ex coactione saltem paritas sequitur, ac proinde summitatis divisio. Ex qua Grotii doctrina aperte colligitur, quod si Ecclesia aut Synodus generalis aliquid Romano Pontifici injungere possint per modum manentis praecepti; aut si statuatur, Pontificem per Ecclesiam aut Synodum generalem cogi aut puniri posse, aut summitas, adeoque & Monarchica potestas, Pontifici adimetur, aut saltem summitatis divisio instituetur. Plurima autem adversus hanc divisionem a multis objici incommoda, Grotius perspectum habebat: *Multi*, inquit, *adversus talem statum quasi bicipitem incommoda multa deferunt*; neque ea jure deferri inficiabatur, sed respondebat: In Civilibus nihil esse, quod omni ex parte incom-

(a) Lib. I. de Jure B. & P. cap. III. §. XVII. num. I.

commodis careat; & jus non ex eo, quod optimum huic aut illi videtur, sed ex voluntate ejus unde jus oritur; metiendum esse. Et id quidem Grotio Puffendorfius ultro largitur (a); dum tamen, inquit, mihi vicissim detur, quod si aliquis populus sibi congruere existimat talem instituere divisionem, corpus Reipublicae effingat admodum irregulare, & permolestis gravissimisque morbis obnoxium. Talemne formam Ecclesiae corpori sapientissimum ejus Institutorem indidisse, credendum est?

Sed eam tamen Grotii doctrinam, ac modum ineundi Regem inter ac populum jurium majestatis divisionem, absolute Puffendorfius improbat ac refellit. Nec enim se intelligere ait, quid sit manens illud populi praeceptum, quod adhuc subsistat, quum penes eum jus imperandi non est. Nam omne praeceptum cum potestate coactiva conjunctum est, qua in praecepti violatores jure animadverti queat. Vel ergo populus quum Regem constituit, talem sibi retinet potestatem necne. Si retinet; Regem nomine tenus instituit; reapse autem Majestas penes populum manet. Sin autem; praeceptum illud inane ac nullius omnino momenti est. Itaque dicendum erat, quod populus adhuc liber pacisci cum Rege poterat, ut certas in administrando regno regulas sequeretur. Quod tamen sine ulla summae potestatis divisione fieri Grotius ipse fatetur. Si autem clausula adjungatur, qua *Regem cogi aut puniri posse* intelligatur; in ea hypothefi, inquit Puffendorfius, summum imperium penes populum est, ac sub specioso Regis nomine principalis quidam Magistratus instituitur, a quo ratio admi-

mi-

(a) Lib. VII. de Jure N. & G. cap. IV. §. XIV. in fin.

ministratiōnis exigi possit. Non enim nisi superior poenas infligere jure potest. Et vis seu coactio, aut *moralis* est, & auctoritate nititur; aut *physica*, & bello & armis infertur. Inter aequales auctoritas unius in alterum locum habere non potest, quia par in parem non habet imperium. Quare aut cogendi Regem populus jus non habet; aut Regi non modo aequalis, verum & illo superior est. Vis autem, quae bello & armis infertur, inter aequales quidem exercetur, sed qui unius Reipublicae foedere minime continentur. Unde colligit laudatus Auctor, quod si populo hoc pacto Regem cogere fas est; uterque in statu naturalis libertatis consistet, atque adeo nulla inter eos Civilis societas intercedet.

Convenit ergo inter Grotium & Puffendorhium, non obesse Majestati aut summo imperio, nec iniri divisionem, si quid in ipsius imperii delatione adjiciatur (a) tanquam regula illud administrandi, neque id fiat per modum legislationis, sed conventionis. Quum enim imperium accipere non sit necessitatis sed voluntatis, sibi legem praescribere videtur, qui certa quadam lege & conditione administrandum illud accipit. Sin autem per modum legislationis id fiat, & ea clausula adjecta, qua intelligatur Regem cogi & puniri posse; non modo summitatis institui divisionem, & corpus Reipublicae effingi informe atque irregulare, & acerbis ac perniciosissimis morbis obnoxium; quod ne Grotius quidem inficiatur; verum, uti Puffendorhius demonstrat, ipsam everti Monarchiam, & Regem effingi, qui Regiae majestatis solum titulum praeferat. Atque adeo consuli quidem in ea hypothefi populi libertati, sed Regiam potestatem

N n n n seu

(a) Vander Muelen ad loc. cit. Hug. Grotii.

seu Monarchicum principatum non modo certis limitibus coërceri, verum & ejus rationem omnino labefactari ac funditus everti. Quibus animadversis, facile quisquis intelligit, quo Meldensem Episcopum consulendi Ecclesiae Gallicanae libertati studium provexerit. Si enim firmum aliquid & invictum & Ecclesiae auctoritate constitutum esse debet, quo ipsa Ecclesia Pontificiam potestatem, si quando extra limites efferretur, coërcere, quin etiam interdum in gravioribus scandalis castigare possit; si quid Puffendorffii adversus Grotium argumenta valent, nomine solo habebimus in Ecclesia Monarchicum Principatum: & sub specioso summi Ecclesiae Principis aut Monarchae nomine summum quemdam Magistratum habebimus, qui Ecclesiae administrationis suae rationem reddere teneatur, quique ab ea cogi ac puniri possit. Stultum est etiam putare, a Majestate appellari posse: quum appellatio semper procedat ab inferiori ad superiorem, majestate vero nihil superius fingi possit. Nisi forte putemus, inquit Arnisaëus (a), ab eadem ad seipsam appellandum esse: quomodo Graecorum quidam a Philippo Macedonum Rege poto ad eundem sobrium appellavit (b): & ab Imperatore male informato ad eundem melius informandum provocari posse, argumento est lib. I. §. *Quid ergo est? Quando appell. c. biduum* &c. Cujusmodi ferme olim fuerunt appellationes ab initio saeculi XIV. ac deinceps in Galliis frequentatae. Quum enim simul & ad Synodum & ad Pontificem, qui Synodo praefuturus erat, provocaretur; ut a Pontifice ipso ad ipsum vel ad Successorem, inquit Cl. Thomassi-

(a) Lib. II. de Jure Majest. cap. IV. num. 8.

(b) Valer. Max. lib. VI. cap. II.

massinus (a): ita a Pontifice ad Synodum, supplicatio erat, etsi provocatio dictaretur. Quod quamquam passim ac promiscue imo & unquam (b) admittendum non est, non tamen adeo Monarchicae potestati repugnat, atque appellatio, qua vere proprieque a Pontifice ad generalem Synodum provocetur.

CAPUT VI.

*Utrum Romani Pontificis Monarchia sit
humanis legibus absoluta, vel eisdem
circumscripta.*

Quamquam Romani Pontificis, si Ecclesiasticae Monarchiae ratio constare debet, summa esse debeat in Ecclesia potestas; non tamen statim appareat, sitne etiam aut esse debeat illius principatus absolutus, an potius certis quibusdam regulis legibusve contineatur. Quandoque enim, ut in superiori capite demonstratum est, populi cum Regibus paciscuntur, ut ad certas leges, quas *fundamentales* appellant, regnum moderentur; nec tamen eorum imperium desinit esse summum, quamquam iis legibus definiatur. Quaerimus ergo, an ea sit etiam Apostolici Principatus conditio; an scilicet quamvis Petrus ejusque Successores ex Christi institutione summam habeant in Ecclesia potestatem, haec tamen ad certas regulas aptanda

N n n 2

& ac-

(a) Dissert. XVIII. in Syn Rom. an. 532. num. CVI. & Dissertation. XII. num. XIII.

(b) Vid. Thomae, Dissert. XII. in Conc. Chalcedon. num. XXVI.

& accommodanda sit, quibus saltem ejus usus & administrationis modus coercetur.

Ut in re gravissima, & quae hinc illinc maximam habet invidiam, caute procedatur, observo imprimis, quod quemadmodum Regnum non eo dicitur liberum & *absolutum*, quod naturalibus ac Divinis legibus solutum sit: ita nec *limitatum* seu circumscriptum dici potest quod iisdem legibus teneatur. Nam si ad ejusmodi leges humanum referatur imperium, nullum est, quod non earum vinculo constringatur. Notum illud Senecae (a):

Omne sub regno graviore regnum est.

Itemque illud Oratii (b):

Regum timendorum, in proprios greges,

Reges in ipsos, imperium est Jovis.

Quum ergo quaerimus, an absoluta & incircumscripta sit Romani Pontificis Monarchia, ad leges naturales & Evangelicas non respicimus, quibus certum est, quod Romani Pontifices, perinde atque alii homines & Christianifideles tenentur. Eademque ratio est de Canonibus seu legibus Ecclesiasticis, quae naturali aut divino jure nituntur. Quo forte referenda sunt plurima eorum Pontificum loca, quae ab Adversariis congeruntur, quibus Ecclesiae Canones inviolabiles praedicantur.

Certum est etiam, non omnibus Regum promissis regiam auctoritatem coarctari. Ut ergo quae vim hanc & potestatem habent, sejungi ab aliis possint; observat Puffendorfius (c), Regem, quum ei primum deferatur imperium, ad recte probeque illud administrandum obstringi

(a) Thyest. vers. 612.

(b) Lib. III. Od. I. vers. 5. 6.

(c) Lib. VII. de Jure N. & G. cap. VI. §. X.

stringi aut generali, quae vel tacita vel expressa est, aut etiam speciali quadam promissione. „ Tacita promissio „ regni bene gerendi, ut *idem subjungit*, in ipsa ejusdem susceptione inesse intelligitur, etiamsi nihil expresse dictum fuerit. Frequentissimum tamen est promissionem illam fieri expresse, non sine juramento certaue rituum solennitate. Neque id inusitatum, ut in ea promissione officium Regis describatur per periphrasin aut numerationem praecipuarum partium. Puta, se diligenter invigilare velle saluti publicae promovendae, bonos defensurum, malos coerciturum, justitiam integre administraturum, neminem oppressurum, & similia. Quae omnia tacite insunt delationi ac susceptioni imperii: atque adeo neque ad haec promissa respicimus in illa Imperii in *absolutum* & *limitatum* divisione. Neque enim ullum imperium est (a), quod non quibusdam limitibus, qui ex ipsa justitiae imperii natura profluunt, circumscribatur. Quum enim regendi jus ad utilitatem & securitatem civium tuendam, introductum sit, constat plane, non in eorum debere damnum atque perniciem redundare; ac proinde utilitas atque securitas Reipublicae limites imperii sunt, ultra quos proferri non debet illius usus. Absolutum itaque manet jus regendi cives summo Imperanti, cui nullae aliae conditiones praescriptae sunt, quam quae ipsi delationi imperii ipso jure cohaerent. Penes autem ipsum est arbitrium judicandi & statuendi de his, quae ad pacem & salutem Reipublicae procurandam apta & idonea, suis quaeque locis ac temporibus videbuntur, Haec

(a) Vander Muelen, ad lib. I. Grot. de Jure Belli & Pacis cap. III. §. XVI. num. 2.

Haec tamen generalis promissio quamquam simplex esse videatur, quum ad particularia negotia accommodatur; mirum, quot capita complectatur! Vix enim fieri potest, ut receptae in aliquo regno consuetudines, aviti mores & leges *fundamentales* convellantur, quin pax & tranquillitas Reipublicae perturbetur; atque adeo in ipsa regni susceptione, & in ea generali, expressa vel tacita promissione haec etiam quodammodo comprehenditur, ut leges & consuetudines diuturno usu firmatae, & quae etiamnum vigent, iisque vigentibus, ipsa quoque Respublica floret ac viget, non modo a Principe non rescindantur atque labefactentur; verum etiam ut omnem is operam conferat ad earum observantiam promovendam; intelligatque, id esse imperii sui potissimum munus, ut leges obtineant, & inviolabiles habeantur. Quo profecto & non alio spectant plurima veterum Romanorum Pontificum testimonia, qui se non violatores & infractores, sed custodes & executores Canonum profitentur; ut illud Zosimi: *Apud nos enim inconvulsis radicibus vivit antiquitas, cui statuta Patrum sanxere reverentiam*; & illud S. Martini, doctissimi Pontificis & egregii Martyris: *Canones Ecclesiasticos solvere non possumus, qui defensores & custodes Canonum sumus, non transgressores*. Hoc ipso ergo quod Apostolicum thronum Romanus Pontifex conscendit, se vindicem ac defensorem Canonum profitetur. Quumque sese obstringat ad Christianam Rempublicam inculpate sancteque gubernandam, & ad pietatem, ac religionis studium, morumque sanctitatem in Clero & in populo promovendam, hoc ipso etiam spondet aut spondere censetur sanctissimarum legum custodiam ac tuitionem, atque earum im-

pri-

primis, quibus Christiana pietas maxime continetur, & quibus vigentibus, ea maxime floret, quaeque, post Evangelicas, *fundamentales* Ecclesiae leges dici quodammodo possunt.

Ea porro generali sponfione tantum abest, ut imperium *absolutum* esse definat ac *limitatum* reddatur; ut Puffendorfius etiam adjungat, neque id semper contingere, quum Princeps in eas regnandi leges seu regulas speciali promissione consentit. Advertit enim duobus modis concipi ac praestari posse ejusmodi promissionem. Primo, ut ea solum conscientia Principis teneatur. Secundo, ut habeatur veluti necessaria conditio, qua praetermissa, ab obedientiae debito soluti populi intelligantur. Quod ut melius percipiatur, videtur mihi, tres incidere posse casus, in quibus a constitutis promissisque regulis Princeps discedat. Primo, ut salus Reipublicae id sine mora, palam ac necessario requirat. Secundo, ut non sit tam evidens urgenfque necessitas, quin ea de re comitia populi aut Senatus consuli commode queant. Tertio, ut non modo nulla urgente seu dubia necessitate, sed mero arbitrio atque ex libidine praescriptas regulas transgrediatur. Nulla porro esse potest controversia, quin etiam in regno legibus circumscripto, ubi praesens necessitas urgeat, liceat Principi praeter leges agere; quum salus Reipublicae suprema lex sit, ad quam ceterae dirigendae sunt. Multis etiam videtur, quod & in regno libero & absoluto, principi *fundamentales*, ut ajunt, Reipublicae leges passim & ex libidine violanti, quoad ejus fieri potest sine graviore ipsius Reipublicae perturbatione, parendum civibus non est. Quod vero pertinet ad casus dubios, & qui in disceptatio-

tionem venire possunt ; de his intelligendum videtur quod ait Puffendorfius , Regis promissis ejus solum obstringi religionem , si nullum in regno constitutum sit Concilium „ quod Rex teneatur consulere , siquidem „ ab iis promissis tempora Reipublicae discedere jubent : atque ejusmodi Concilium jure suo , non precario , super illis negotiis cognoscere possit , & citra „ cujus consensum Regis jussis circa talia cives non obligentur . Quoniam si nullum ejusmodi Concilium in regno est , neque Rex ad illud cogendum in iis casibus teneatur , jus civibus non est jussa principis detrectandi , & ejus acta veluti contra datam fidem & promissionem admissa , irrita denuntiandi . Quoniam si Princeps contendant , salutem publicam , aut insignem Reipublicae utilitatem postulasse , ut a regulis discederetur ; quod sane de Principe communiter praesumendum est ; nihil habent subditi quod reponant , quoniam eorum non est statuere , satis gravis necessitas fuerit necne , quae Principem a praescriptis deflectere regulis compulerit . Statuit ergo laudatus Auctor , populo , qui Principi circumscriptam auctoritatem conferre velit , instituendum esse publicum coetum aut populi aut Optimatum , ad quem Princeps referat ea negotia , quae ad merum illius arbitrium non spectant , & citra cujus consensum nihil de iis omnino decernat , ac si secus factum fuerit , velut irritum habeatur . „ Tali , *inquit* , modo qui Regem sibi constituit populus , obsequium ipsi promississe intelligitur , non absolute & in omnibus , sed quatenus imperium ad capitulationem & leges fundamentales congruit , abs quibus discrepantes actus ipso jure sunt irriti , neque vim obligandi cives obtinent . Atque eadem

dem ratio est, si Princeps populi vel Procerum comitia in ejusmodi casibus cogere teneatur. Ad hanc ergo doctrinam Romani Pontificis Monarchiam exigamus.

Christus Dominus, qui Ecclesiasticae potestatis fons unicus & auctor est, quum Petrum Ecclesiae Principem designavit, futuram ejus auctoritatem amplioribus exsequi verbis non potuit: *Tibi dabo claves regni caelorum: & quodcunque ligaveris super terram, erit ligatum & in caelis: & quodcunque solveris super terram, erit solutum & in caelis.* Profecto si Cives cuiquam imperium alicujus civitatis offerrent, nullaque adjecta lege seu conditione profiterentur, ratum sese habituros quodcunque in civitate juberet aut vetaret; quis unquam iturus esset inficias, civium mentem atque propositum fuisse, Principem constituere, qui *absoluta* in ipsos & incircumscripcta potestate regnaret? Quum ergo Christus clavium promissione Petrum regni caelorum, idest Ecclesiae, Principem designarit, nullaque adjecta conditione vel lege, rata sese in caelis habiturum sponderit, quaecunque ille ligasset aut solvisset in terra; quis neget ei tribuisse in Ecclesia amplissimam & absolutissimam potestatem? Haud equidem diffiteor datam ejusmodi potestatem, quemadmodum ait Apostolus, *in aedificationem, & non in destructionem*; at hoc non efficit, ut sit Petri principatus circumscriptus ac *limitatus*: quemadmodum neque quod Princeps saecularis in omnibus quae jubet ac vetat, non ad perniciem, sed ad salutem Reipublicae spectare debeat. Illud est enim praeterea considerandum, an Christus coetum aliquem instituerit, quem Petrus ejusque Successores consulere in rebus dubiis omnino deberent; citra cujus consensum

irritum esset quidquid ab eis in magnis & arduis Ecclesiae negotiis decerneretur; & cui rationem reddere tenerentur, si quando concessae facultatis limites transgredierentur. At nullum ejusmodi tribunal adversus Petrum ejusque Successores in Ecclesia Christus instituit; quin quum illi claves regni caelorum reapse contulit, & eum Ecclesiae Principem fecit; quidquid est populorum ac gentium velut oves & agnos Petro ut pastori subjecit. Est autem pastoris suo non ovium aut agnorum judicio ovile pascere & gubernare. Hinc S. Gregorius Magnus merito observat (a): quod si *Beatus Petrus quum a fidelibus culparetur; quod ad Gentiles accesserat, cum eis comederat &c. auctoritatem, quam in sanctam Ecclesiam acceperat, attendisset; respondere poterat: ut Pastorem suum oves reprehendere non auderent*. Et S. Avitus Viennensis Episcopus ad Senatores Urbis aliorum Galliae Episcoporum nomine scribens: *Reddet, inquit, rationem, qui ovili Dominico praest, qua commissam sibi agnorum curam administratione dispenset: ceterum non est gregis pastorem proprium terrere, sed judicis*. Hinc quamquam olim Romanus Pontifex, ut ex Ivone & libro diurno Romanorum Pontificum compertum est, observantiam canonum ac disciplinae & sacrorum rituum in sua consecratione in haec verba profiteretur (b): *Disciplinam & ritum Ecclesiae, sicut inveni & a sanctis Praecessoribus meis traditum reperi, inlibatum custodire. Et indiminutae res Ecclesiae conservare, & ut indiminutae custodiantur, operam dare siqua vero emerferint contra disciplinam cano-*
ni-

(a) Lib. IX. epist. XXXIX. ad Theodisiam.

(b) l. Profef. Fid. ap. Garnerium.

nicam, emendare; sacrosque Canones & constituta Pontificum nostrorum ut divina & caelestia mandata custodire. Quanquam haec, inquam, olim Romanus Pontifex in sua consecratione sponderet atque profiteretur, quae primo adspectu Ecclesiasticam Monarchiam ad certas leges adstringere & coarctare videntur; non se tamen ita res habet. Nam statim in eadem Professione subjungitur, quod perspicue demonstrat, ejusmodi promissa solam Pontificis apud Deum obligasse religionem. Additur enim: *Ut pote tibi (B. Petro) redditurum me sciens de omnibus, quae profiteor, districtam in divino judicio rationem.* Ac rursus: *Si praeter haec aliquid agere praesumpsero; vel, ut praesumatur, permisero, eris mihi in illa terribili die divini judicii depropitius.* Quanquam ergo Romani Pontifices observantiam Canonum & legum Ecclesiasticarum in sua consecratione sponderent; non tamen sese, si promissis deessent, Ecclesiae, sed unius Dei judicio obnoxios profitebantur. Prae oculis enim habebant, quod olim Ennodius scripsisset, ac Symmachus & Romana sub eo Synodus confirmasset: *Vult Deo B. Petri Apostoli Successores caelo tantum debere innocentiam, & subtilissimi discussoris indagini inviolatam exhibere conscientiam.* Quare ea promissa non efficiunt aut demonstrant Ecclesiasticam Monarchiam humanis legibus circumscriptam.

Haec tamen non eo sensu accipi velim, perinde ac Rex in Republica, aut Romanus Pontifex in Ecclesia, propterea quod regnum habeant & imperium incircumscriptum, de rebus arduis & negotiis magni momenti, sine consilio & matura cum aliis deliberatione decernere quidquam & constituere debeant. In eadem fidei Pro-

fessione, ad usum noni saeculi, uti Garnerius admonet, aucta atque interpolata, hoc praeterea Pontifex profitebatur: *Si qua vero emerferint contra disciplinam canonicam, communicatione filiorum meorum sanctae Romanae Ecclesiae Cardinalium, cum quorum consilio, directione & rememoratione ministerium meum geram, emendare, aut patienter, excepta fidei & Christianae religionis gravi offensione tolerare*. Attamen, ut saepe citatus Puffendorfius sapienter admonet (a), necessitas, quae incumbit Principi de rebus arduis cum aliis deliberandi, non ei adimit absolutam ac liberam potestatem. Haec enim non in eo posita est, ut quaecunque ei libera sunt, temere & caeco quodam impetu exsequatur; sed ut in negotiorum publicorum administratione, suo tantum judicio utatur; cum quo minime pugnat, illum audire rationes, quae ipsi ab aliis suggerantur. Quapropter etsi coetus Consiliariorum Principi in regno absoluto obsequendi necessitatem ex se & propria auctoritate non adferat; adferre tamen potest, prout ei ante oculos ponit, quomodo in praesenti negotio gerere ille se debeat. Quomodo & infirmus praecepta Medici amplecti & exsequi debet vi legis naturalis, quae unusquisque salutis & conservationis suae curam habere tenetur, quamquam ex se jus nullum Medicus habeat quidquam infirmo praescribendi. Ex quo ergo promiserint olim Romani Pontifices, nihil se acturos in rebus magni momenti sine Cardinalium consilio; & ex quo etiam haec disciplina constanter ab eis servata fuerit, ad graviora expedienda Ecclesiae negotia, aut Ecclesiae Romanae Clericos, aut suburbicarios vel etiam ex reliquo

(a) Lib. VII. de Jure N. & G. cap. VI. §. XII.

quo Occidente, pro negotiorum gravitate, Episcopos ad-
fisciscendi, consequens profecto non est, *limitatam* esse
& ad certas regulas & leges adstrictam Romani Pontifi-
cis Monarchiam. Non enim, ut jam diximus, impe-
rium esse definit absolutum, quod Princeps naturalibus
legibus obstrictus teneatur. Tunc ergo vere ac proprie
auctoritas Principis restringitur & coarctatur (a), quum
subditi in ipsa imperii delatione cum eo pacti sunt, ut si
quid circa quaedam negotia, haud adscitis regni comi-
tiis, privato iudicio & propria auctoritate statueret, de-
cretum irritum esset, & nullius roboris haberetur. Quod
Romae nunquam obtinuit. Nam quod graviora Eccle-
siae negotia, ut habet hujus temporis disciplina; non
nisi per sacras Congregationes, aut in Consistorio expe-
diantur, ex ipsorum Pontificum voluntate pendet. At-
que id etiam aliquando, sine ulla partitione majestatis
in iis regnis obtinuit, quae pleno jure & sola Principis
voluntate regebantur: *Multum* enim, ut ait Grotius (b),
falluntur qui existimant, cum Reges acta quaedam sua
nolunt rata esse, nisi a Senatu aut alio coetu aliquo pro-
bentur, partitionem fieri potestatis: nam quae acta
eum in modum rescinduntur, intelligi debent rescindi
Regis ipsius imperio, qui eo modo sibi cavere voluit, ne
quid fallaciter impetratum pro vera ipsius voluntate
haberetur. Quale erat Antiochi III. Regis rescriptum
ad Magistratus, ne sibi parerent, si quid legibus adver-
sus jussisset. Quale erat etiam rescriptum Imperatorum
Gratiani, Valentiniiani & Theodosii (c): Quoniam ple-
rum-

(a) Puffend. ubi sup.

(b) Lib. I. de Jure B. & P. cap. III §. XVIII. num. I

(c) Cod. Lib. X. Tit. XII. De petis. bogor. sublat. Leg. I.

runque ita in nonnullis causis inverecunda petentium inhiatione constringimur, ut etiam non concedenda tribuamus: ne Rescripto quidem nostro adversus formam latae Legis loci aliquid relinquatur. Quare haec res; quemadmodum laudatus Grotius subjungit, similis est testamentis, quibus adjectum est, ne posterius testamentum valeat: nam haec quoque clausula efficit, ut posterius testamentum non ex vera voluntate profectum praesumatur.

Ad hanc porro regulam exigi etiam debet quod Theologi & Juris canonici Interpretes tradunt, de Pontificis Rescriptis haud exsequendis, si vel in maximam alicujus regni perturbationem, aut in apertam Christianae Reipublicae & Ecclesiasticae disciplinae laesionem atque perniciem ea cedere compertum sit. Docent enim eo casu reverenter agendum cum Romana Sede, ita tamen ut executio Rescriptorum suspendatur. *Non quod aliquis possit esse judex Papae, aut auctoritatem habeat in illum, sed per modum defensionis, inquit Cajetanus (a): Cuilibet enim est jus ad resistendum injuriae, & impediendum defendendumque. Eademque est sententia Innocentii IV. & Hostiensis (b); Cardinalis Turrecrematae (c), Silvestri (d), Jacobatii (e), Victoriae (f), & Cordubensis (g). Scilicet parendum non esse Rescriptis Papae, si ita Canones & disci-*

(a) *Traët. de auct. Papae cap. XXVII.*

(b) *In C. Quare. de consuet.*

(c) *Lib. II. de Eccles. cap. CVI.*

(d) *In summa, verbo Papa §. XV.*

(e) *Lib. VII. de Conciliis art. XII.*

(f) *De Potest. Papae & Conc. Prop. VII.*

(g) *De potest. Papae Quæst. VIII.*

disciplinam violent, ut in apertum Christianae Reipublicae detrimentum cedant, aut si eis status Ecclesiae perturbaretur, aut *insigniter decoloraretur*. Quod tamen, ut sapienter monet Illustrissimus Petrus de Marca (a), sic interpretandum est, ut inde argui non possit defectus auctoritatis in summo Pontifice, sed *defectus intentionis*, ut loquuntur nostri. Nec enim existimandum est, ab illa Sede, quae paternarum regularum, & juris & aequi custodiam ab aliis exigere solet, alienas a commodis Ecclesiae institutiones consulto proficisci. Et si enim legibus ceteris non tenetur, a rectae rationis legibus solvi non potest: Quare ita se gerere solet & debet, ut praemittat *clavem discretionis ante clavem potestatis*, quemadmodum loquitur Innocentius IV. (b). Profecto si Reges ipsi ac Principes saeculares a suorum executione decretorum defilii jubent, aut id velle censendi sunt, si jus violetur, aut damnum ex eis Reipublicae existat: quanto magis judicare ac praesumere debemus, eam esse Romanorum Pontificum voluntatem, si aliquando eis excidat, quod sanctiori disciplinae legibusque, ubi reapse floreat ac vigeant, officere videatur? Tradit Plutarchus in Apophthegm. *Aegyptiorum Reges legem quamdam suam servasse, qua juramento obstringunt iudices, ut Rege ipso injuste flagitante sententiam, ei morem non gerant*. Atque ejusdem generis est quod Imperatores Theodosius & Valentinianus statuerunt (c): *Rescripta contra jus elicitum ab omnibus iudicibus refutari prae-*

(a) Lib. III. de Conc. Sac. & Imp. cap. XV. num. IX.

(b) In C. Quanto de Jurejur.

(c) Cod. Lib. I. Tit. XIX. De precib. Imperat. offerend. Leg. I.

praecipimus, nisi forte aliquid, quod non laedat alium, & pro fit petenti, vel crimen supplicantibus indulgeat; Quorum exempla imitatus esse videtur Sanctus Hilarus Papa (a), quem, ut recte monet Bossuetius (b), ceteri longo ordine consequuntur: Nihil adversum venerandos Canones, nihil contra sanctae memoriae Decessoris mei iudicium valeat, quidquid obreptum nobis esse confiterit. Haec ergo, ut cum saecularium Principum; ita & cum Romanorum Principum, absoluta potestate cohaerent; dum tamen illud addatur, quod si Reges aut Pontifices, in iis quibus iustitia, fides ac pietas manifeste non laeditur, diserta suae voluntatis significatione declarent, novis Rescriptis obesse praecedentes leges aut Canones non debere; ac si auditis etiam contrariis rationibus, in eadem voluntate persistant, eis omnino parendum sit. Quoniam, ut vel ipsa Basileensis Synodus, quamquam absolutae Romanorum Pontificum potestati quam maxime infensa, professi est: Per Concilium (etiam generale) statuta in nullo derogant suae potestati, quin pro tempore, loco, causis & personis, utilitate vel necessitate suadente, moderari dispensareque possit, atque uti summi Principis ἐννεκία, quae ab eo auferri nequit. Sed & longe ante, Concilium Lugdunenfe II. sub Gregorio X. celebratum, ad Romani Pontificis arbitrium (quod & Illustrissimo Petro de Marca (c) observatum est) retulerat de dispensationum; ut vocant, sufficientia disquirere (d), & aestimare, quem

(a) Epist. IV. Tom. V. Conciliorum.

(b) Lib. XI. Defens. cap. X.

(c) Ubi supra num. III.

(d) C. Ordinarii, de offic. ordin. in 6.

quem modum beneficii sui Pontifex esse voluerit. Quod certe egregie probat, suo Romanos Pontifices iudicio uti in Ecclesiae Catholicae gubernatione.

Si ita est, inquis, explodenda deinceps erit eorum opinio, qui Ecclesiasticam Monarchiam haud puram & simplicem, sed Aristocratia temperatam esse decernunt: Quae tamen sententia nostrorum quoque Theologorum calculo commendatur (a). In promptu obvia responsio est, dum Reipublicae statum ab imperandi ratione distare plurimum observemus (b). Nam Reipublicae status regalis esse potest, gubernatio tamen popularis futura est, si Rex omnia imperia, curationes, poenas item ac praemia omnibus ex aequo distribuât: si vero Princeps imperia, honores, Magistratus Patriiis, vel divitibus, vel fortibus, vel studiosis tantum impertiat, regia potestas erit, & quidem simplex & pura, sed Aristocratica ratione temperata. Ita quoque Optimates pauci Rempublicam populari modo regere possunt, si cives omnes omnium Magistratuum participes fecerint: aut Aristocratie, si paucis quibusdam, qui aut virtute, aut censu, aut nobilitate ceteris praestent. Quae diversitas eos in errorem impulit, qui Respublicas plures tribus erroris opinione sibi finxerunt. Atque hoc sensu Bellarminus aliique ex nostris admittunt, esse in Ecclesia „ regimen „ temperatum ex omnibus tribus formis; videlicet summi Pontificis Monarchiam; atque Episcoporum (qui veri Principes & Pastores, non Vicarii Pontificis maximi sunt) Aristocratiam: ac demum suum quemdam in ea locum habere Democratiam, quum nemo

P p p

„ sit

(a) Bellarmin. Lib. I. de Rom Pontif. cap. III.

(b) Bodin. Lib. II. de Repub. cap. II.

„ ut ex omni Christiana multitudo, qui ad Episcopatum vocari non possit, si tamen dignus eo munere „ judicetur. Quo etiam referri potest quod alii docent (a), distinguendam esse Reipublicae formam a modo gubernationis: qui si diligenter spectetur, ut quidam ait (b), comperiemus, nullum esse imperium tam Monarchicum & absolutum, quod non quamdam speciem Aristocratiae referat. Quoniam & Reges, qui libero & absoluto imperio fruuntur, Consiliarios habent, cum quibus graviora negotia communicant, & a quibus sua Decreta probari & firmari volunt. Quod ergo Monarchicum Ecclesiae regimen Aristocratico temperatum esse dicatur, non inde profecto sequitur, liberum illud & absolutum non esse. Verum Adversarii, uti capite secundo demonstratum est, non temperationem reapse cogitant, sed mixturam, unde forma Reipublicae existat plane irregularis, quam plurima consequi incommoda necesse sit, quaeque ad procurandam & fovendam Ecclesiae pacem, quam Christus maxime cordi habuit ac vehementissime commendavit, qualibet simplici forma minus apta & idonea videatur; ut inter simplices formas Monarchia simplex ac pura, omnium iudicio, accommodatissima est: quam proinde in Ecclesia Christum instituisse existimare debemus, quo invicta Romani Pontificis auctoritate omnia Ecclesiae membra tanquam firmissimo vinculo contineret; utque illius iudicio universum hoc Christianae Reipublicae corpus velut una mente ac spiritu regeretur. *Unum est enim, multo magis*

(a) Puffendorf. lib. VII. de J. N. & G. cap. V. §. XII.

(b) Hobbes de Cive Sect. II. cap. VI. num. XIII.

magis quam olim Romanae, Christianae Reipublicae corpus (a), atque adeo unius animo regendum.

CAPUT II.

„ Exponitur tertium Caput Gallicanae Decla-
 „ rationis: hujusque duae partes: id proban-
 „ dum suscipitur, Ecclesiasticam discipli-
 „ nam, sive universam sive particulares spe-
 „ ctet Ecclesias, in Romano Pontifice regi
 „ adhibitis regulis, sive universim sive par-
 „ ticularim receptis.

Q Uum tota haec controversia luculenter, ut mihi videtur, superiore Dissertatione a me exposita fuerit, inde peti commodè ac facile possunt, quae singulis Meldensis Episcopi objectis confutandis opportuna sint. Quamobrem ejus de hoc argumento disputationem levius percurram; brevibus ut plurimum ad ea loca notis adjectis, quae specialem aliquam difficultatem adferre videbuntur, quaeque nativo sensui reddenda erunt, ut cum nostro systemate concilientur. Hoc porro unum in praesenti capite observo, hujus effari, quo tertius Gallicanae Declarationis articulus continetur: *Apostolicae potestatis exercitium & usum Canonibus moderandum*; auctorem laudari Johannem Gersonem. Nec sane immerito, si ad eum sensum respiciatur, de quo inter nos & Gallicanos Theologos disceptatio est. Quamquam enim id semper ipsis Romanis Pontificibus persuasum fuerit, nempe ad Canonum normam

P p p 2

di-

(a) A finius Gallus ap. Tacit. Annal. Lib. I. cap. XII.

dirigendam esse Ecclesiae gubernationem; primus tamen Gerson, aut inter primos, hanc legem seu generalem Propositionem ex superiore generalium Conciliorum auctoritate derivavit. Unde alius sensus ejusdem propositionis existit, quam quo olim innoxie usurpari potuisset. Nemo enim Theologorum unquam dubitavit, Canonum directioni subjectos esse Romanos Pontifices: quemadmodum & Principes summi suis & Reipublicae legibus obnoxii sunt, quod ad vim pertinet directionis; licet ad eorum observantiam, quum summi sint, cogi a superiore potestate non possint (a). Atque idem de Romanis Pontificibus constanter affirmamus. Quum enim summum in Christiana Republica fastigium teneant, compelli ad Canonum observantiam superiore auctoritate non possunt: ad eorum tamen custodiam & tuitionem naturali ac divino jure tenentur. Gersonianum itaque illius Propositionis sensum improbamus, atque illa imprimis eum improbandi nobis suppetit ratio; quod ejus auctor Gerson perhibetur, cujus adeo opinionis non nisi sub initium saeculi XV. inter Catholicos testimonia jacta sunt. Novimus autem ex Tertulliano (b), id esse Dominicum & verum, quod sit prius traditum: id autem extraneum & falsum, quod sit posterius immissum.

C A.

(a) Vid. S. Thom. 1. 2. Quæst. XCV. art. V. ad 3.

(b) Lib. de Praescript. cap. XIII.

CAPUT III.

- „ Ecclesia Romana iisdem Canonibus regit Ec-
„ clesias, quibus ipsa regitur. Probatur
„ ex Romanis Pontificibus.

OMnia fere, quae Illustrissimus Adversarius in hoc Capite adfert Romanorum Pontificum testimonia, in praemissa Dissertatione cap. IV. adlata etiam a nobis & excussa sunt; ac demonstratum est, paria his loca passim occurrere, quibus Imperatores alique Reges ac summi Principes professi identidem sunt, & ab eis ad legum praescriptum esse Rempublicam gubernandam. Nec tamen inde consequens est, Principes summos legum humanarum aut Reipublicae potestati subjacere.

CAPUT IV. &c.

- „ Idem probatur ex Gestis sub Bonifacio II. &
„ ex Concilio Romano sub Johanne IX.
„ de Translationibus.

EA pariter, quae in hoc & sequenti capite Melden-
sis Episcopus exempla profert, id unum egregie
demonstrant, de quo nulla nobis cum Gallis Theologis
controversia est. Nimirum summam semper fuisse pro
Canonum observantia Sedis Apostolicae Romanorum-
que Pontificum religionem; adeo ut si quid eis unquam
humana infirmitate obreptum fuerit, quo Canones vio-
larentur aut indebite solverentur, vel ipsi statim, vel co-
rum

rum Successores id emendare & corrigere studuerint. Cujusmodi & in civilibus Hiltoriis similis Imperatorum aliorumque summorum Principum in publicas leges observantiae ac religionis exempla passim occurrunt.

Haec autem non eo pertinere, ut si quid unquam ea in re ab Ecclesiae Romanae Praefulibus peccatum fuerit, propterea humano debeant subiacere iudicio; haec, inquam, non eo pertinere, ea Stephani V. verba demonstrant ad Basilium Imperatorem super Marini ordinatione, quam ut minus canonicam temere infimulabat, scribentis: *primam Sedem a nemine judicari*. Quod quamquam ad particularem Synodum, qualis, inquit, adversus Marinum Constantinopoli congregari potuisset, Illustrissimus Adversarius referendum esse contendat; nullam tamen cur generalem propositionem sic coarctandam esse definiat, rationem adfert. Nos autem ex eadem Epistola loca proferre possumus, quibus probetur, eandem esse Romanorum Pontificum in Ecclesia, atque tunc erat Imperatorum in Republica potestatem: *Quemadmodum*, inquit, *vobis rerum temporalium principatus a Deo est traditus: ita nobis per corinphaeum Apostolorum Petrum rerum spiritualium principatus..... Audi Dominum ad Petrum dicentem: Tu es Petrus, & super hanc petram &c. De credito nobis ministerio quid porro addit? Tibi dabo claves regni caelorum; & quae sequuntur*. Et paullo inferius adjungit; eundem Apostolorum Principem fontem esse omnium Ecclesiasticarum dignitatum; nimirum quemadmodum civilium Magistratum Imperator: *Omnium enim in orbe terrarum ordo & Pontificatus Ecclesiarum a Principe Apostolorum Petro originem accepit; per quem &*

*nos sincera & incorrupta doctrina instituiamus omnes
& docemus.*

C A P U T V I I.

„ Concilium Mosomense: Rodulphi Glabri lo-
„ cus: Concilium Ansanum: de eo Anony-
„ mi responsiones. De exemptionibus obi-
„ ter: Petri Venerabilis & S. Bernardi loci.
„ An Monachis Cluniacensibus profuerit,
„ quod Romanum Pontificem peculiarem
„ Episcopum habere vellent.

J Amdiu erat quod Hugo & Artaldus ob Remensem
Cathedram acerrime digladiabantur. Agapitus II.
Romanus Pontifex Robertum Episcopum Treviren-
sem legationis suae munere auxerat, ut gravissimam &
difficillimam causam Sedis Apostolicae auctoritate di-
rimeret. Qua ille fretus, Synodo Virduni habita, Re-
mensum Episcopatum Artaldo adjudicaverat, aliamque
ad proximum Januarium Synodum apud Mosomum ce-
lebrandam indixerat. Interim vero Hugo quemdam
suum Clericum Sieboldum Romam direxerat cum lit-
teris velut omnium Provinciae Remensis Episcoporum
nomine ad Pontificem datis, quibus Artaldum expelli,
Hugonem restitui postularent. Quibus acceptis Agapi-
tus, nec fraudem suspicatus, eas ad Episcopos litteras
dedit, quas idem Clericus ad Mosomense Concilium
adtulit, *nihil*, ut ipse narrabat Artaldus (a), *auctori-
tatis canonicae continentes, sed hoc tantum praecipien-
tes,*

(a) Apud Flod. in Chron. & in Hist. Remens. Lib. IV. cap. XXXV.

tes, ut Hugoni Remensi redderetur Episcopium. „Hoc
 „ nostris, inquit Boliuetius, novum & insolens vide-
 „ batur : quippe a consuetudine Romanae Ecclesiae
 „ alienum. Subjungitque sequentia ex Flodoardo ver-
 „ ba, quae ut suo proposito melius congruerent, insigni-
 „ ter detruncavit. „ Pergit Flodoardus : *Quibus reci-*
 „ *tatis, ineuntes Episcopi consilium cum Abbatibus*
 „ *Et ceteris qui aderant sapientibus, responderunt, ut*
 „ *quod regulariter coeptum fuerat, canonice pertracta-*
 „ *retur.* Haec ex Flodoardo Illustrissimus Adversarius
 absque ulla interpunctione describit, qua, ut fieri solet,
 aliquid omissum esse significetur. Ita enim habet Flo-
 doardi locus : *Quibus recitatis Et c. responderunt, non*
esse dignum vel congruum, ut mandatum Legationis
Apostolicae, quam dudum Rotbertus Archiepiscopus,
deferente Friderico Praefule Moguntiacensi, coram Re-
gibus Et Episcopis tam Galliae, quam Germaniae, su-
sceperat, Et partem jam praeceptionis ipsius exegerat ;
propter illas litteras intermitteret, quas insidiator Ar-
taldi Praefulis exhibebat. Imo quod regulariter cae-
ptum fuerat Et c. Ex iis ergo, quae Meldenis Episcopus
 omittenda duxit, habemus : Galliae & Germaniae Epi-
 scopos insistere maluisse publicis ac sollennibus litteris
 per Moguntinum Episcopum Trevirensi oblatis, qui-
 bus huic ad hoc negotium dijudicandum Apostolica
 Legatio injungebatur, quam privatis litteris, quas malo
 dolo veterator elicerat, nihilque canonicae auctoritatis
 continebant ; hoc est, ut ego hunc locum interpretan-
 dum existimo, nullas ex iis notis praeferebant, quibus
 insigniri solent publicae ac sollennes Sedis Apostolicae
 litterae, quibus vis ac robur canonicae auctoritatis inest :
 cujus-

cujusmodi erant quae primū ad Trevirensē Archiepiscopum directae fuerant. Ceterum quam illi auctoritatem ac potestatem ad hanc causam supremo ac peremptorio iudicio definiendam in Romano Pontifice agnovissent, ex eo liquet, quod sententiam Virdunensis Concilii solum usque ad futuram generalem Synodum confirmarunt: reque per Artaldum ad Agapitum delata, hic Marinum in Gallias direxit, qui eidem Synodo Apostolica auctoritate praeesset. Qua apud Engilnheim coacta, Marinus *chartam suae Legationis honorifice protulit*: qua ... significatum est, eum ab ipso universali Papa tali tenore ad nostros fines directum fuisse, quo in omni Ecclesiasticarum legum discussione ipsius existens Vicarius, quaecunque liganda essent Apostolica auctoritate ligaret; & quae solvenda viderentur, parili solveret potestate. Quibus verbis summam sibi Agapitus in interpretandis Ecclesiasticis legibus potestatem vindicabat. Ea vero Germaniae Galliaeque Reges & Episcopi cum universo Clero summo cum gaudio & veneratione, ut dignum fuit, exceperunt, ac se in omnibus consentire & obedire professi sunt. „ Sic Germani (ut Meldenſi Episcopo sua verba reddam) sic Galli Episcopi judicabant.

Pergit Illustriss. Auctor: „ Notum illud neque omit-
tendum Rodulphi Glabri de Episcopis Gallicanis aegre ferentibus Cardinalem a Johan. XVII. delegatum, ut Romani Pontificis auctoritate Basilicam in agro Turonico a Fulcone Andegavensi Comite construam consecraret: quod Hugo Turonensis Archiepiscopus ex causis canonicis facere recusasset. Qua de re Glaber haec scribit (a): *Quod utique audientes Gal-*

Q q q q

lia-

(a) Lib. II. Histor. cap. IV.

liarum Praefules, praesumptionem sacrilegam cognoverunt ex caeca cupiditate processisse. Ac rursus: Licet Pontifex Romanae Ecclesiae ob dignitatem Sedis Apostolicae, ceteris in orbe constitutis Episcopis reverentior habeatur, non tamen ei licet transgredi in aliquo canonici moderaminis tenorem. Denique, universi pariter detestantes, quoniam nimium indecens videbatur, ut is qui Apostolicam regebat Sedem, Apostolicum penitus ac canonicum transgrediatur tenorem. „ Itaque turbinem „ repente coortum, quo concussa Basilica, ac disturbata consecratio est, divino iudicio imputarunt an. MIV. „ Sunt qui Rodulphum Glabrum falsi convictum putant, tabulis ab Illustrissimo Petro de Marca summatim relatis. Atqui Vir doctissimus his tabulis Glabrum non confutatum, sed illustratum voluit. Deinde, has tabulas visas lectasque oportet integras, antequam candidissimo huius aevi Historico detrahamus fidem. „ Denique, utcunque est, ejus testimonio firmatum videmus, de observando etiam a Romano Pontifice canonico ordine, communem Ecclesiae Gallicanae sensum.

Inter alios, qui Rodulphum Glabrum falsi convictum putant tabulis ab Illustrissimo Petro de Marca relatis, Nat. Alex. mihi praesto est, ex quo ea excerpam, quae expediendae huic difficultati sufficere videntur. Rem, inquit (a), aliter gestam esse quam narret Glaber, nec Pontificem aliquid tentasse contra Canones, nec Turonensi Archiepiscopo repugnante, factam esse Bellilocensis Ecclesiae consecrationem, docent ipsius Johannis XVIII. & Sergii IV. Diplomata ex chartophylacio

(a) Syn. Hist. Eccles. Saec. XI. & XII. cap. I. art. I.

lacio ipsius Abbatiae descripta, & edita a Clarissimis Sammarthanis fratribus Tomo IV. Galliae Christianae pag. 150. & 151. (a). Ex iis, inquam, discimus, Johannem oblatum a Fulcone Comite Monasterium Belliloci, S. Trinitati, & SS. Cherubim atque Seraphim memoriae devotum, sub tuitione Romanae Ecclesiae suscepisse, interdixisseque omnibus Episcopis, ne quam ibi jurisdictionem exercerent.... „ Privilegii illius insoliti „ Rescriptum Hugonem Archiepiscopum Turonensem „ commovit. Qui Romam accedens, submissis precibus a Sergio IV. Johannis Successore contendit, ut „ Monasterii consecrationem sibi juxta Canones & Justinianam legem permitteret. Sed repulsus fuit hac „ exceptione, quod Fulconi liberum fuerit in fundo suo „ propriaque haereditate Monasterium construendi, Monasterium ipsiusque consecrationem Romanae Ecclesiae conferre: quia *cujus est hereditas, ipseus est consecratio*. Quare Hugo accepta e manibus Gregorii „ Silvae Candidae Episcopi virgula, jus omne quod sibi „ competeat, in Romanam Ecclesiam transtulit. Sergius vero Petrum Vipernenſis Ecclesiae Episcopum „ in Gallias direxit, Ecclesiam illam vice sua consecraturum. Verba sunt Illustrissimi ac doctissimi Archiepiscopi Petri de Marca, hanc historiam ex veteribus tabulis Monasterii Belliloci referentis (b).... Sed corrigendus praecipue Glaber, qui se Juris ac verae Theologiae haud satis peritum ostendit, cum Romanum Episcopum in aliorum Praefulum Dioecesebus munia Episcopalia exercere non posse asserit, nisi ipsis permitten-

Qq q q 2

ti-

(a) Vid. & Tom. I. pag. 755. & seqq.

(b) Lib. IV. de Conc. Sac. & Imp. cap. VIII. num. II.

tibus. Longe aliter & verius sensit S. Bernardus ad Eugenium scribens (a): *Tu potestate Petrus, unctiōe Christi . . . sunt & alii gregum Pastores Habent illi sibi assignatos greges, singuli singulos: Tibi universi crediti, uni unus. Non modo ovium, sed & Pastorum tu unus Pastor. Pasce oves meas, inquit. Quas? Illius vel illius populi civitatis, aut regionis, aut certi regni? Cui non planum est non designasse aliquas, sed assignasse omnes? Nihil excipitur, ubi distinguitur nihil* Glabro Monacho multa alia opponi possent, quae non sunt huius loci: satis erit addere Johannis Gersonis Academiae Parisiensis Cancellarii verba in ipso Opusculo, quod inscripsit *de Auferibilitate Papae*, Consideratione VIII. „ Nullam aliam Politiam instituit „ Christus immutabiliter Monarchicam & quodammodo Regalem, nisi Ecclesiam. Et oppositum sentientes de Ecclesia, quod fas est esse plures Papas, aut „ quod quilibet Episcopus est in sua Dioecesi Papa, vel „ Pastor supremus aequalis Papae Romano, errant in „ fide & unitate Ecclesiae contra articulum illum: Et „ unam sanctam &c. Et si pertinaces maneant, iudicandi sunt haeretici, sicut Marsilius de Padua, & „ quidam alii. Haec obiter dixisse sufficiat, ne ultra Historiae metas divagemur. Haec Nat. Alex.

His addam, Ex Sergii IV. Diplomate (utcunque de Glabriana fabula statuatur) aperte liquere, Hugonem Archiepiscopum Turonensem, errorem suum agnovisse, palamque in Romano Conventu professum ac deprecatum esse (b): *Igitur Hugo Archiepiscopus cernens se nullum*

(a) Lib. II. de Considerat. cap. VIII.

(b) Tom. I. Galliae Christ. pag. 757.

lum verum aut rectum habere, & qualiter nos eum perdere deberemus, minime posse ostendere, mox profiteri, & dicere coepit, se peccasse, errasse, & coram Omnipotentem Dominum, & nostram Sanctam Romanam Ecclesiam nimis deliquisse, eo quod injuste, & absque aliqua ratione nobis exinde litigasse. Huc etiam pertinent quae infra ex S. Bernardo referemus.

Objicit deinde Illustrissimus Adversarius Concilium non multo post Ansaë in agro Lugdunensi celebratum. „ Ibi, inquit, Gaulenus Episcopus Matisconensis gravem expostulationem habuit de ordinatione Cluniacensium Monachorum a Burchardo Viennensi facta, „ vi privilegii, quod Cluniacenses habebant a Romana Ecclesia &c.

Rem ego totam ex candidissimo Historico Johanne Mabillonio describam, cujus haec sunt verba in Elogio S. Odilonis Abbatis §. VII. (a): 'Tantus Pontificum & Principum erga B. Odilonem ac Cluniacenses affectus cohibere non potuit Monachorum aemulatores, quin eis negotia facerent, tum ob temporalium bonorum possessiones, tum ob privilegia eis concessa, quae nonnulli convellere totis viribus conati sunt Concesserant quippe Pontifices Romani privilegia Cluniacensibus, quibus ex Willelmi conditoris testamenti praescripto, ac Regum & Principum concessu, immunitas omnimoda Monasterio Cluniacensi asserbatur. Scilicet ut Monachi Cluniacensis Monasterii a quocumque Episcopo, prout Abbati placeret, ordinari possent; nec quidquam juris in loco illo haberet Episcopus Matisconensis, imo nec nisi ab Abbate invitatus illuc accedere posset. Haec diserte habent-

(a) Acta SS. Ord. S. Bened. Saec. VI. Par. I.

bentur in Bulla Gregorii V. quae a subsequentibus Pontificibus confirmata fuerunt. Privilegiis istis munitus Odilo Burchardum Viennensem Archiepiscopum invitavit, ut ordinationes apud Cluniacum celebraret. Quod cum ille fecisset, graviter conquestus est Gauslenus Matifconensis Episcopus adversus eum, remque detulit ad Synodum Anfanam, cui anno MXXV. habitae inter alios Pontifices intererat quoque Burchardus. Qui cum a Gausleno ea de re coram Patribus accusaretur, culpam omnem in Odilonem rejecit. Accersitus itaque S. Abbas, cum aliquot e suis Monachis comparuit, protulitque in medium privilegia, quae modo recensebamus, quae licitum est Abbati Cluniacensi, ut posthabito Matifconensi Episcopo, quemcunque mallet Episcopum posset accerere ad celebrandas in Monasterio Cluniacensi ordinationes. At Patres, qui ibi aderant, lectis Synodi Chalcedonensis Canonibus, aliisque antiquorum Conciliorum decretis, censuerunt eis praeponi non debere quod obtendebatur ab Odilone privilegium. Quare Burchardus a Gausleno obtenta venia, pollicitus est, se quamdiu in vivis ageret, tantum olei ei praestitutum, quantum pro Chrismate sacro singulis annis conficiendo opus esset. Ea fuit occasio, ni fallor, cur Johannes XIX. Romanus Pontifex ad Gauslenum, tum etiam ad Burchardum Lugdunensem litteras scripserit, eos graviter reprehendens, quod Monasterium Cluniacense speciali Apostolicae tuitioni commissum, & Odilonem sanctissimum Abbatem vexarent. Defuncto tamen paullo post Gausleno, vestigiis ipsius institit Walterius ejus successor, ut narrant Petrus a S. Juliano, alique passim Scriptores. Unde ansam sumsit, uti videtur, idem Johannes Pontifex

fex Roberto Regi scribendi adversus eos Sacerdotes, qui privilegia per Sedem Apostolicam Cluniacensi Monasterio concessa convellere tentabant. Immo rem ad Synodum, quae Romae anno MXXVII. habita est, delatam fuisse, patet ex ejusdem Pontificis epistola ad universos Fideles, in qua confirmatis de consensu adstantium Pontificum Monasterii Cluniacensis privilegiis, praesente etiam Conrado Imperatore paullo antea coronato, prohibet, ne quis Monachos Cluniacenses excommunicare audeat, aliaque fusius exponit quae videri possunt in Bullario Cluniacensi pag. 9. ceterum haec controversia saepius postea sub Odilonis successoribus recruduit: sed quid tandem ea occasione in Concilio Remensi sub Calixto II. statutum fuerit, legesis apud Ordericum Vitalem. De eadem Synodo disierit etiam idem Cl. Auctor in Annalibus Benedictinis, ubi inter cetera haec habet (a): non tenuit haec Synodi definitio, quae juris tantum communis est, eaque libertas a subsequenter Romanis Pontificibus, praesertim a Johanne XIX. Urbano II. & Callixto item II. in Concilio Remensi, ut suis locis videbimus, asserta est Cluniacensi Monasterio, ut ejus Monachi a quovis Episcopo ordinari possint.

Egregia profecto sunt, neque hic prorsus omittenda, quae apud laudatum a Mabillonio Ordericum Vitalem, Johannes Cremenfis Cardinalis in mox memorata Remensi Synodo pro Cluniacensium privilegiis, & Sedis Apostolicae in eis concedendis auctoritate discessit. Primum enim statuit: „decere ac justum esse, ut Papa in „ Parochiis vestris (sic ille Gallicanos Episcopos adloquebatur) „ aliquid proprietatis possideat, Ecclesiam „ que,

(a) Lib. LV. num. LXXV.

„ quæ, seu domum, vel aliquam possessionem, sua ele-
 „ ctione, sine Fidelium oblatione, liberam habeat.
 „ Quod ubi *ab omnibus*, inquit laudatus Historicus, *grat-*
 „ *anter concessum est*, consequenter *Johannes adiecit*,
 „ annos jam amplius ducentos præterisse, ex quo Clunia-
 „ censis Ecclesia ab ejus fundatore Willelmo Comite Aqu-
 „ tanico Sedi Apostolicæ oblata, variisque a Romanis
 „ Pontificibus privilegiis exornata fuerat. Subjunxitque;
 „ Omnis credentium multitudo credit ac perhibet,
 „ quod qui Apostolicæ Sedi jubente Deo præsidet, li-
 „ gandi atque solvendi potestatem habet. Principis
 „ enim Apostolorum Petri Vicarius est, cui divinitus
 „ dictum est: *Tu es Petrus &c.* Ergo Apostolica Sedes
 „ caput omnium Ecclesiarum a Domino, & non ab
 „ alio, constituta est: & sicut cardine ostium regitur,
 „ sic Apostolicæ Sedis auctoritate omnes Ecclesiæ Do-
 „ mino disponente reguntur. . . Quis ei resistere potest;
 „ cui tanta potestas a Domino concessa est? Quis aude-
 „ t solvere quem Petrus ligavit, sive ligare quem ipse ab-
 „ solvit? Igitur quum Cluniacensis Abbatia soli Papæ
 „ subjiciatur, & ille qui præcipiente Deo in terris su-
 „ per omnes est, ipsam patrocinetur; Romana auctori-
 „ tas Cluniacensium privilegia corroborat, & in virtute
 „ Dei omnibus Ecclesiæ filiis imperat, ne quis eos te-
 „ mere pristina libertate privet &c. Haec ille in prædi-
 „ cto Concilio Remensi, quod Callixtus II. qui olim Gui-
 „ do Viennensis Archiepiscopus fuerat, *de Italia & Ger-*
 „ *mania*, ut habet idem Ordericus Vitalis, *de Gallia &*
 „ *Hispania, de Britannia & Anglia, de Insulis Oceani*
 „ *& cunctis Occidentalibus provinciis*, congregaverat:
 „ pervicitque, ut immota & inconcussa manerent Clu-
 „ nia-

niacensium privilegia, quae olim Ansana Synodus sollicitare ausa fuerat.

Eadem privilegia haud multo post vindicavit etiam Petrus Venerabilis Abbas Cluniacensis, cujus verba refert Cl. Mabillonius in Elogio S. Odonis §. IV. num. 19.
 (a) *agens de libertatis praerogativa, quam Cluniaco rogatu Willelmi conditoris sui primum, dein Abbatum, Romani Pontifices contulerunt. Quem doctissimi Viri locum hinc adtexere haud abs re fuerit: „ Callixtus „ Papa II. in litteris suis Pontio Abbati inscriptis ait, „ privilegium hoc Cluniaco fuisse concessum ab ipso „ foundationis suae exordio; memoratque Pontifices, „ qui illud confirmarunt, nempe Johannem XI. item „ Johannem XII. Agapitum II. Leonem IX. Gregorios VI. ac VII. Alexandrum II. Stephanum X. Victorum III. Urbanum II. Paschalem II. & Gelasium II. Unde Petrus Venerabilis quibusdam obicientibus, quod Cluniacenses proprium non haberent „ Episcopum, Romanum sibi proprium esse respondet: Hunc unum, inquit (b), solum & maximum nos habere Episcopum gloriamur.... Hoc ipsius sanctae Sedis IRREFRAGABILIS SANXIT AUCTORITAS, nec unius tantum sed multorum Decreta inde apud nostram matricem Ecclesiam conservantur. Haec ipsi ita condiderunt, non ut hanc, de qua loquimur, Cluniacensem Ecclesiam alteri Episcopo prius eam possidenti auferrent: sed a fundatoribus, qui eam in proprio alodio construxerant, rogati, in propriam retinuerunt, atque soli Romano Pontifici eam in aeternum subjacere decernentes pluribus*

R r r r

hoc

(a) Afla SS. Ord. S. Bened. Saec. V.

(b) Lib. I. epist. XXVIII.

hoc privilegii confirmaverunt . . . Hoc non soli Cluniacenses obtinent, sed & quampluribus datum cernimus : & longe ante Cluniacum conditam multis aliis Monasteriis ab eadem Apostolica Sede concessum videmus.

Venerabili Abbati objicit Illustrissimus Adversarius S. Bernardum, aitque : „ Nunc Lector viderit, Petrine Cluniacensis an Bernardi Claraevallensis potior sit auctoritas. Paucos equidem esse existimo, qui Petro non anteponant Bernardum accusantem eos, qui hac specie ab Episcoporum auctoritate recesserant.

At nos imprimis ut Bernardum Petro anteponimus, ita Bernardo anteponimus tot Romanos Pontifices, quorum, ut aiebat, *irrefragabilis auctoritas* ipsi in hac causa suffragabatur. Deinde, quod ad S. Bernardum pertinet; notanda haec sunt sanctissimi Abbatis verba in eo ipso loco, qui nobis objicitur (a): *Nonnulla tamen Monasteria, sita in diversis Episcopatibus, quod specialius pertinuerint ab ipsa sui fundatione ad Sedem Apostolicam, pro voluntate fundatorum, quis nesciat? Sed aliud est quod largitur devotio, aliud quod molitur ambitio impatiens subjectionis.* Ex quibus verbis duo magni momenti colligimus. Primum est, haud improbasse S. Doctorem exemptiones & privilegia Monasteriis ab ipsa fundatione ex fundatorum voluntate concessa; atque adeo sanctissimi Abbatis auctoritate reprimi-
tur Rodulphi Glabri & Ansanae Synodi praedictia, qui talia privilegia reprehendere atque convellere aggressi sunt. Alterum est „ S. Bernardum, ut etiam Nat.
„ Alex. animadvertit (b), quantumvis exemptiones
„ Mo-

(a) Lib. III. de Confid. cap. IV.

(b) Hist. Saec. XI. & XII. cap. VII. art. VIII. num. XVII.

„ Monasteriorum ambitione quaesitas improbaverit ,
 „ illas tamen legitimas agnovisse , quae necessitatis aut
 „ communis utilitatis intuitu a Sede Apostolica conce-
 „ debantur . Est etiam tertio loco observandum , quod
 quamquam S. Bernardus privilegia & exemptiones ambi-
 tionis quaesita , & nullo communis utilitatis intuitu , sed
 pro arbitrio & sola Pontificis voluntate concessa , impro-
 bat , ab eisque in posterum concedendis Eugenium de-
 terrere conatur ; non ea tamen ratione , quod superiori
 Canonum potestati Pontificia obnoxia sit , & haec per
 illam coërceatur ; sed quia rectae rationis , justitiae & ca-
 ritatis , sive juris naturalis ac divini legibus , & ipsi Ro-
 mani Pontifices subjiciuntur . Hunc enim sensum aperte
 referunt sequentia SS. Doctoris verba : *Sic faciliando ,*
probatis vos habere plenitudinem potestatis : sed justitiae
forte non ita . Facitis hoc quia potestis , sed utrum & de-
bentis , quaestio est . Et infra : *At quomodo non indecens*
tibi voluntate pro lege uti ; & quia non est a quo appel-
leris , potestatem exercere , negligere rationem ? Agno-
 scebat ergo S. Bernardus in Romano Pontifice potesta-
 tem , cui resisti , a qua appellari non posset , si Canones
 violasset ; idque unum contendebat , non debere illum
 in Legibus Ecclesiasticis relaxandis , aut ordine discipli-
 nae invertendo , voluntate pro lege uti : id enim rationi ;
 id justitiae , id caritati adversari , quae ille pluribus in
 hoc Capite ac vehementer exaggerat ; sed quae tamen
 omnia talia sunt , ut etiam ad quoscunque summos Prin-
 cipes suo quodam modo aptari possint , qui absque judi-
 cio & pro solo arbitrio legum vigorem infringant .

CAPUT VIII.

- „ Concilium Lemovicense II. Gregorius VII.
 „ Romanorum Pontificum & Episco-
 „ porum concors professio de re-
 „ gendo & obediendo secun-
 „ dum Canones.

Nihil omnino est cur circa praefens caput immoremur. Nam quod pertinet ad veterem illam Romanorum Pontificum Professionem, actum nobis de illa est in praemissa Dissertatione capite ultimo. Si autem sese ad Canonum praescriptum Ecclesiam regere Romani Pontifices profitentur; consequens est ut & Episcopi eam quam Canones exigunt, praestent Romanis Pontificibus obedientiam; ac proinde plenam omnimodam & absolutam; quemadmodum egregie S. Bernardus epist. 131. ad Mediolanenses argumentatur: *Sed dicit aliquis: Debitam ei reverentiam exhibebo, & nihil amplius. Esto, fac quod dicis. Quia si exhibeas debitam; & omnimodam. Plenitudo siquidem potestatis super universas orbis Ecclesias singulari praerogativa Apostolicae Sedi donata est. Qui igitur huic potestati resistit, Dei ordinationi resistit. Potest, si utile judicaverit, novos ordinare Episcopatus, ubi haecenus non fuerunt. Potest, eos qui sunt, alios deprimere, alios sublimare, prout ratio sibi dicaverit, ita ut de Episcopis creare Archiepiscopos liceat, & e converso, si necesse visum fuerit. Potest a finibus terrae sublimes quascunque personas Ecclesiasticas evocare & cogere ad suam praesentem.*

*sentiam, non semel aut bis, sed quoties expedire videbit. Porro in promptu est ei omnem ulcisci inobedientiam, si quis forte reluctari conatus fuerit. Quibus, quaeſo, efficacioribus verbis S. Doctor describere potuiſſet Romani Pontificis potestatem nullius omnino iudicio ſubditam, nullis legibus circumſcriptam? Quamquam ergo & Romani Pontifices ad Canonum normam Eccleſiam regere, & Episcopi canonicam illis obedientiam praestare teneantur; inde proſecto conſequens non eſt; aut Romanis Pontificibus potestatem non eſſe ad Canones, prout illis ratio dictaverit, relaxandos; aut fas eſſe Episcopis de Romanis Pontificibus Canones relaxantibus iudicare. Nam & ipſi Canones eam potestatem Romanis Pontificibus confirmarunt; & hoc iudicium ceteris Episcopis illicitum pronuntiarunt. Quo loco egregie faciunt haec S. Gelasii verba (a): *Nobis opponunt Canones, dum neſciunt quid loquantur: contra quos hoc ipſo venire ſe produnt, quod primae Sedi ſana rectaque ſuadenti parere fugiunt. Ipſi ſunt Canones, qui appellationes totius Eccleſiae ad bujus Sedis examen voluere deferri: ab ipſa vero nunquam proſus appellari debere ſanxerunt; ac per hoc illam de tota Eccleſia iudicare, ipſam ad nullius commeare iudicium, nec de ejus unquam praeceperunt iudicio iudicari, ſententiamque illius conſtituerunt non oportere diſſolvi, cujus potius Decreta ſequenda mandarunt. Quis & in his verbis non agnoſcat abſolutam, ut vocant, & nullius iudicio ſubditam Romanorum Pontificum potestatem, ab ipſis etiam Canonibus eorumque conditoribus agnitam & confirmatam; quibus tamen eam ſubjicere**

(a) Epist. IV. ſeu commonit. ad Fauſtum.

cere Adversarii contendunt? Qua in re, ut idem S. Pontifex inferius adjungit, dupliciter ab eis peccatur adversus Canones; primo, quod ejusmodi potestatem Romanis Pontificibus adimunt; secundo, quod sibi judicium de illorum actis usurpant: *Sed religiosi Viri atque perfecti, secundum Canones concessam Sedi Apostolicae potestatem nimirum conantur eripere, & sibi met eam contra Canones usurpare contendunt. O canonum magistros atque custodes!*

Quod autem pertinet ad Acta Concilii Lemovicensis, quod ea in medium proferre operae pretium fuerit; haud facile liquet. Quamquam enim Gallicani Episcopi in ea Synodo irritam esse decernant eorum absolutiōnem, qui eam ficto & fallaci animo, doloque malo a Romanis Pontificibus eliquerint; ipsique etiam Romani Pontifices id maxime velint; quamquam etiam ad occurrendum huic malo, nemini licere velint, *inconsulto Episcopo suo, ab Apostolico poenitentiam & absolutiōnem accipere*: non tamen legem Romano Pontifici constituunt, aut ejus potestatem circumscribunt; perinde atque illi fas non sit, etiam inconsultis Episcopis peccatores reconciliare; sed negligentiae culpam in Episcopos conferunt, si Romam fictis Poenitentibus ex eorum Dioecesebus proficiscentibus, monere ea de re Romanum Pontificem praetermittant. Dicebant ergo Episcopi ad invicem: *Frustra haec querela adversus Caput nostrum mutire audeat: Apostolicus enim absque culpa est, & potius nos culpabiles sumus, nisi litteris nostris ei notum faciamus, de quibus nolumus ut absolvantur. Quum ergo tales deceiverint Apostolicum, ut fraudulentè absolvantur ab eo, irrita est eis illa absolutio &c.*

Non

Non ergo culpaē vertebant Pontifici, quod inconsultis Episcopis absolveret Poenitentes, neque illum ad hanc legem adstringere cogitabant. Quin adprobabant laudabantque Romanum Pontificem haec scribentem in ea ipsa Epistola, ex qua Meldensis Episcopus laciniam adtulit, iis tamen omiſſis, quae illius proposito minime congruebant. *Quod nescienter egi, Frater carissime, non mea, sed tua est culpa. Scis enim, quia quicumque de universa Dei Ecclesia, quae est in toto orbe terrarum, ad me caussa remedii recurrit, impossibile est mihi ejus curam negligere; dicente Domino ad Beatum specialiter Petrum: Pascere oves meas. Quo ergo modo Sedes Apostolica poterit ejicere aliquem de medela nisi rationabili caussa? Debueras certe &c.* quae Bossuetius describit. Quae quum Gallicani Episcopi adprobarint, palam est, eos noluisse Romano Pontifici legem praescribere, ne ipsis inconsultis, quoscumque ad se confugientes reconciliaret.

CAPUT IX.

- „ Libertas in jure antiquo & communi: Prag-
- „ matica sanctio S. Ludovici an ab Ano-
- „ nymo idoneis probationibus
- „ falsi arguatur?

Pragmaticam Sanctionem Sancto Regi Ludovico fuisse suppositam, iis argumentis Thomassinus ostendit, quae plenissimae demonstrationis loco habenda essent, si ab Adversariis ad abrogandam fidem cuiuspiam Monumento, quod eis incommodum esset, profer-

ferrentur. Ergo Cl. Viri conjecturas in medium adferemus, & ab exceptionibus vindicabimus, quibus eas elevare Illustrissimus Adversarius conatus est.

Primum argumentum ex Anonymo Auctore Tractatus de Libertatibus (Antonio Charlas) summatim his verbis refert Bosluetius: *Pragmatica illa a nemine allegata fuit per ducentos annos*: Reponit autem: „Facilis responsio: non enim causa adfuit. Sic certe facile responderetur, quum vis argumenti penitus dissimulatur. Suis ergo verbis Thomassinum differentem audiamus (a). Ait imprimis, Viros esse doctissimos, qui fidem ejus labare putent. Eorum vero animos movere longum de ea Scriptorum omnium silentium, non aevo tantum S. Ludovici, sed duorum admodum post saeculorum.... Quoquo se modo res habeat; constat, in Gestis sanctissimi ejus Regis nihil occurrere quod possit ansam dedisse ei Pragmaticae publicandae, cum nihil unquam ei causae vel negotii fuerit cum Romano Pontifice; vel cum Curia Romana. Denique ne tum temporis quidem allegata est a quoquam, quando diutina efferbuit dissensio inter Bonifacium VIII. Papam & Philippum Pulcrum Regem; quamquam peropportuna tunc quidem ejus fuisset autoritas. Addit alio in loco (b): Quod ne iis quidem temporibus mentio ejus facta est, quibus ea opportunissima fuisset. Grassante schismate Avenionensi, sub Carolo VI. Rege, quando sublatae sunt omnes Curiae Romanae exactiones, nusquam ulum hujus Pragmaticae vestigium. Ne tum quidem commemorata est, ad exempli auctoritatem, ubi sub

Ca-

(a) Tom. II. de Benefic. Par. II. Lib. II. cap. XXXIII. num. IV.
 (b) Tom. III. Par. III. Lib. I. cap. XLIII. num. XVII.

Carolo VII. Pragmatica Sanctio concinnata est. Ejus primū, ut apparet, meminere Delegati Senatus Parisiensis in commonitorio suo ad Ludovicum XI. ut supra declaratum est. Videat ergo Illustrissimus Auctor quo loco haberi debeat facilis illa responsio: *Non enim causa adfuit*. Non enim una, sed plures eaeque gravissimae causae adfuerunt Pragmaticam S. Ludovici Sanctionem in medium adferendi, si edita a sancto Rege fuisset.

At quemadmodum post S. Ludovicum plures eam proferendi causae fuerunt: ita nullae fuerunt, cur ea a sanctissimo Rege promulgaretur. Qua de re, praeter ea quae jam adducta sunt, hīc rursus audire praestat eundem Cl. Thomassinum (a): Adde rursus, si quae fuerunt eo regnante Romanorum Pontificum in Ecclesiam Gallicanam exactiones, eam pecuniam in manus venisse sanctissimi Regis ad sacras ejus expeditiones: ut procul sit a veri etiam specie, iniquo illum animo eas tulisse. Quin & propius a vero abest, sollicitatos non semel a S. Ludovico fuisse Pontifices, ut id genus exactionibus assentirentur: unde & in Pontificem tunc & in Regem tam crebra Cleri murmura. Addam & quod habet Chronicon vetus Neustriæ a summo viro Duchesnio publicatum. Cum anno 1264. flagitasset B. Ludovicus a Papa novam decimam in Clerum ad sacram militiam, Procuratores Ecclesiarum Galliae Cathedralium Lutetiae congregatos, Pontificem per litteras certiores fecisse, quas in angustias detrusa Ecclesia Gallicana his decimis, duodecimis, centesimis, & aliis oneribus fuisset. Ab uno Pontifice spem sibi adfulgere aliquam pristinae

S f f f liber-

(a) Loco mox citato.

libertatis testificantur: *In quibus nisi a Sede Apostolica plenam possit assequi libertatem, pestis ista latissime se diffundet.* Poltremae infelicitatem expeditionis sacrae ex eo profectam esse, quod decimarum & duodecimarum extorsionibus exhaustae essent Ecclesiae & dehonestatae. Occupatus Pontifex precibus & epistolis Regis, durius habuit Procuratores Capitulorum, decimasque concessit ad tres annos, gravibus poenis in contumaces saeviturus. Ubi res ita comparatae erant, locus haud sane erat Pragmaticae istiusmodi.

Quod vero pertinet ad libertatem electionum, idem Auctor observat, non eam tunc adferendam & vindicandam fuisse adversus Apostolicam Sedem, sed adversus turbulentorum hominum factiones, a quibus ea passim per ea tempora violabatur. Non a Romana tunc Curia, inquit, proficiscebantur electionum dissidia & intemperiae, sed a Laicorum factionibus tumultuosis, a quibus extrema vis, caedes etiam quandoque erupere in Ecclesias Bituricensem, Burdigalensem, Carnotensem, ubi & aliquamdiu intermittendae electiones fuerunt. Fidem ejus rei facit Canon concilii Bituricensis anno 1276. ubi praecerat Legatus Pontificius, & unde vibrata sunt anathemata in authores facinorum tantorum. Pleniorum etiam ejusdem rei fidem faciunt ipsius S. Ludovici litterae, quas laudat Petrus de Marca (a), & quibus, ut eas intuenti statim liquet, non adversus Romanam Curiam, sed adversus Haereticos aliosque raptos, Ecclesiarum libertas vindicatur. Ut nulla omnino ratio sit, cur Pragmaticae Sanctionis priora capita, si vere a S. Ludovico edita fuisset, potius adversus Romanos Pontifices, quam ad-

(*) Lib. III. de Conc. Sac. & Imp. cap. I. num. VII.

adversus ejusmodi turbulentos homines torquerentur(a).

Quum ergo edendi Caput V. Pragmaticae Sanctio-
nis nulla per ea tempora opportunitas fuerit; electionum
vero libertas, quae primo, secundo, & quarto Capite
vindicaretur, non a Romana curia, sed a Laicis & factio-
sis hominibus turbaretur: quumque S. Ludovicus Apo-
stolicam Sedem Romanosque Pontifices summo studio
coluerit, & ab his vicissim impensissime cultus atque di-
lectus fuerit; nulla verisimilis ratio est, cur eos laceessere
pragmaticae Sanctiois promulgatione voluerit. Prae-
sertim quum anno 1268. sanctus Rex ad secundam in
terram sanctam expeditionem cum summi Pontificis
consilio se accingeret, monitisque potius cum amicissi-
mo Pontifice quam edictis egisset. Neque is erat Cle-
mens IV. qui his coercendus videretur, innocentissimus
atque abstinentissimus Pontifex. Ac si quod tum exa-
ctum fuisset subsidium, non nisi ad adjuvandum in ex-
peditione bellica Regem impendendum fuisset. Quae
momenta quam gravia sint, nemo non videt. Sed ea
tamen omnia sponte concidere, adfirmat Bossuetius,
„ Si dicamus, inquit, Ludovicum non praesentibus
„ malis, sed qua erat providentia, futuris ac pridem
„ expertis occurrere voluisse: Clementem vero Quartum
„ quo erat abstinentior, eo acquiore animo tulisse pro-
„ hiberi ea, a quibus ipse abhorreret. Dicamus potius,
hoc responsum sponte concidere, si animum adverta-
mus, quod ejusmodi Edicta a prudente Rege edita nun-
quam fuissent, nisi ad ea edenda praesentissimis malis,
gravissimisque & urgentibus causis compulsus fuisset.
Quae quum S. Ludovico nullae, ut jam ostendimus;

S s s s 2

fue-

(a) Videbis Ant. Charlas lib. I. de Libertatib. Eccl. Gal. cap. XV.

fuertint; planum est, Pragmaticam sanctionem illi merito abjudicari, & admodum verisimile est, eam grafsante schismate Avenionensi, aut serius etiam, hoc est circa tempora Concilii Basileensis, fuisse sancto Regi suppositam.

C A P U T X.

- „ Edictum Caroli VI. Decretum Florentinum:
 „ Nulla sunt quae contra Canones: Roma-
 „ nus Pontifex contra Canones agere nolle
 „ praesumitur, ne ipse adversetur sibi: Lo-
 „ cus insignis Concilii Basileensis.

QUa occasione Edictum illud Caroli VI. editum fuerit, & qua olim potestate in Decimis a Clero exigendis, Romani Pontifices etiam in Galliis uterentur, discere Lector poterit ex iis quae latissime disputat Cl. Thomassinus Tom. III. de Beneficiis Par. III. Lib. I. cap. XLIII. Quod vero pertinet ad alia Capita; de iis supra suis locis disputatum est, ac potissimum in libro praecedente ad Caput XI. & in praevia Dissertatione cap. V.

C A P U T X I. &c.

- „ De Decretalibus Epistolis, deque consuetu-
 „ dine recepta, & Canonum origine.

QUO sensu Romanorum Pontificum, Concilio-
 rum, & Patrum loca quae in hoc & duobus se-
 quentibus Capitibus ab Illustrissimo Adversario
 lau-

laudantur & exscribuntur , accipienda & intelligenda sint , in praemissa Dissertatione uberrime nobis ac planissime demonstratum est . Quare nulla ratio est , cur in eis iterum excutiendis immoremur .

CAPUT XIV.

- „ Ecclesia Gallicana antiquam & sanctam sub
- „ Aurelio & Augustino Africanam Eccle-
- „ siam sequitur : Christiani Lupi hal-
- „ lucinationes : Summa doctri-
- „ nae nostrae de Liber-
- „ tatibus .

VIs argumenti , quod in praesenti Capite urget Illustrissimus Praeful , ipso capitis initio sequentibus verbis continetur : „ Qua in re Ecclesia Gallicana eodem spiritu agitur , quo nobilis illa quondam Ecclesia „ Africana . Notum , quid ab ea S. Zozimus Papa missa legatione postulare : quid Patres Africani responderint . Duo tantum observamus : Primum illud , „ Pam Zozimum , cum appellationes Ecclesiae Africanae suae sedi vindicaret , protulisse Canones , eosque „ Nicaenos , in Africa quidem , ut toto terrarum orbe , „ receptos . Alterum , Africanos Patres aperte professos , se ita probaturos appellationes eas , si Canonibus „ Nicaenis juberentur . Ergo neque Zozimus absoluta voluntate agebat , neque Africani Patres ea se gubernari sinebant ; sed in receptis Canonibus pars utraque vim omnem reponebat . Hoc fere est unicum argumentum , quod cum aliquo colore doctrinae nostrae ob-

objiciatur. Ac reapse tum ab omnibus Heterodoxis adversus Catholicum dogma, tum a Parisiensibus Theologis pro Libertatibus, ut vocant, Gallicanis, pari studio in medium profertur. Ideoque in illo excutiendo paullisper est nobis immorandum. Paullisper, inquam, non enim est animus nobilissimam hanc & a praeclarissimis ingeniis diligentissime pertractatam de Appellationibus ad Sedem Apostolicam controversiam de integro ad incudem revocare; sed ea tantum delibare, quae huic capiti illustrando magis apra & idonea videbuntur.

ARTICULUS UNICUS.

Romani Pontifices tum jure Primatus sui, tum vi consuetudinis & Canonum Nicaenorum seu potius Sardicensium, appellationes Episcoporum, & aliquando etiam inferioris ordinis Clericorum undecunque, ac speciatim ex Africa, ad Sedem Apostolicam delatas susceperunt olim & judicarunt: Africani autem Episcopi eis modum aliquem imponi, suis ad Caelestinum litteris petierunt.

JUs appellationum ad Romanam Sedem appendicem esse primatus S. Petro & ejus Successoribus a Christo collati, diserte docet, & sequentibus argumentis demonstrat Nat. Alex. (a): Hoc ipso, inquit, quod Romanus Pontifex est jure divino omnium Episcoporum primus, & ceteris jurisdictione superior, Ecclesiae Caput, Vicarius Christi; consequens est, ut ad ipsum Epi-

(a) Dissert. XXVII. in Hist. Eccles. Saec. IV. Concl. I.

Episcopi cum injuriam patiuntur, appellare possint. Ipsa enim juris naturalis aequitas ab inferiorum Judicum sententiis ad supremum Judicem appellari posse, dicitur & persuadet. Quum itaque Romanus Pontifex ratione sui primatus sit superior Episcopis omnibus divisim sumtis, & Conciliis etiam Provincialibus ac Nationalibus, ad ipsum appellare posse Episcopos, Metropolitanorum, Primatum, Patriarcharum, aut Conciliorum, sive Provincialium, sive Nationalium, sive Patriarchalium judiciis depositos, necessario sequitur: ac proinde jus appellationum Episcopali ad Romanam Sedem Pontificii primatus est appendix. Praeterea, Romanus Pontifex ratione primatus tenetur invigilare executioni Canonum, eorumque observantiam urgere ac promovere: quo munere fungi non potest, nisi ipsorum infractores plectere possit. Si igitur violati fuerint Canones in Episcoporum depositione, ipsi ad Romanum Pontificem provocare possunt, ut in irritum mittat sententiam iniquiorem, ut eorum qui injuriam passi sunt, jura resarciat, ut eos qui contra Canones peccarunt, infligendis etiam poenis canonicis, ad eorundem compellat observantiam & executionem. Jus itaque suscipiendi appellationes Episcoporum dejectorum & eas judicandi, Romano Pontifici conveniens, appendix est primatus Sancto Petro & ejus Successoribus a Christo collati.

Id etiam omnino persuasum ipsi Romani Pontifices habuerunt, ut vel ex his verbis Bonifacii I. in epistola ad universos Episcopos per Thessaliam constitutos compertum est (a): *Certe si in quoquam ejus supra debitum fuit visa correctio; quoniam ideo tenet Sedes Apostolica prin-*

(a) Epist. IX. in Collect. Lucae Holsten,

principatum, ut querelas omnium licenter acceptet; interpellari nos super hoc missa legatione convenerat, quos curam omnium rerum manere videatis. Quibus verbis jus Episcopaliū appellationum ad Sedem Apostolicam repetit, non ex speciali ejusdem Sedis potestate super provincias Illyrici, sed ex ejus principatu, propter quem & omnium querelae ad Romanos Pontifices deferri, & rerum omnium sollicitudo pertinere debet.

Canones, qui hoc idem jus Sedi Apostolicae confirmarint, haud semel in suis epistolis laudat S. Gelasius: Ita enim epistola IV. seu commonitorio ad Faustum: *Ipsi sunt Canones, qui appellationes totius Ecclesiae ad hujus sedis examen voluere deferri. Ita & epistola XIII. ad Episcopos Dardaniae: Non reticemus autem, quod cuncta per mundum novit Ecclesia: quoniam quorumlibet sententiis ligata Pontificum, Sedes B. Petri Apostoli jus habeat resolvendi; utpote quae de omni Ecclesias habeat judicandi, neque cuiquam de ejus liceat judicare judicio: siquidem ad illam de qualibet mundi parte Canones appellari voluerint, ab illa autem nemo sit appellare permissus.*

Consuetudinem laudat S. Leo in epistola (a) ad Episcopos Viennensis Provinciae: *Nobiscum itaque vestra Sanctitas recognoscat, Apostolicam Sedem, pro sui reverentia, a vestrae etiam Provinciae Sacerdotibus innumeris relationibus esse consultam, & per diversarum, quemadmodum vetus consuetudo poscebat, appellationem caussarum, aut retractata aut confirmata fuisse judicia.*

Canones & consuetudinem complexus est S. Inno-

cen-

(a) Epist. LXXXIX, Tom. IV. Conc. Edition. Quæst. X.

centius I. epistola II. ad Victricium Rotomagensem Episcopum cap. VI. *Si majores causae in medium fuerint devolutae, ad Sedem Apostolicam, sicut Synodus statuit, et beata (scu potius, vetus) consuetudo exigit, post judicium Episcopale referantur.* Quem locum de appellationibus Episcoporum Hincmarus Remensis Episcopus interpretatur (a) : quamquam haud ignorem aliam esse hodie Clarissimorum quorundam Virorum opinionem (b).

At majoris ad rem nostram momenti est, quod in eadem Epistola capite praecedente his verbis statuitur : *Si quae autem causae vel contentiones inter Clericos tam superioris ordinis, quam etiam inferioris fuerint exortae ; ut secundum Synodum Nicaenam, congregatis ejusdem provinciae Episcopis jurgium terminetur : nec alicui liceat, (sine praejudicio tamen Romanae Ecclesiae, cui debet in omnibus causis reverentia custodiri) relinquit his Sacerdotibus, qui in eadem provincia Dei Ecclesiam nutu divino gubernant, ad alias convolare provincias.* Quo loco nemo non videt, sic tribui ab Innocentio Provincialibus Synodis judicium causarum tam superioris quam inferioris ordinis Clericorum ; ut id tamen sine praejudicio jurium ac privilegiorum Ecclesiae Romanae intelligendum esse, ab eodem sollicite adnotetur. Atque adeo jus sibi vindicat de omnibus causis judicandi, quae ad Ecclesiam Romanam per appellacionem sive a superioris sive ab inferioris ordinis Clericis deferantur. Pro ejusmodi autem privilegio (id

T t t

quod

(a) Epist. IX. cap. XII. & alibi.

(b) Petrus de Marca lib. I. de Conc. Sac. & Imp. cap. X. num. VII. & Petrus Coustant. in Not. ad hanc Epist.

quod sane perquam diligenter observari velim) nullum Innocentius aut Nicaeni aut Sardicensis Concilii Canonem profert. Nam, ut Petrus Coustant in Notis admonet: „ Verba illa, *secundum Nicaenam Synodum*, non „ adeam exceptionem, quae clauditur parenthesi, sed „ ad antecedentia tantum referuntur. Quare nec ejusdem Cl. Viri, neque Hincmari (a) sententia mihi probatur, qui ut privilegium illud Romanae Sedis ad solas Episcoporum causas & appellationes coercerent, ad Canonem IV. & V. aut VII. Sardicensis Concilii, in quibus de iis tantum causis & appellationibus sermo est, respici existimarunt; perinde ac nulla unquam privilegia Sedi Apostolicae adferere Romani Pontifices ausi sint, quam quae alicujus Synodi Canone niterentur. At Innocentius neque ullam hinc Synodum memorat; quod certe facere non omisisset, si ad alicujus Canonem respexisset; neque ullam porro commemorare potuit; quum nulla vetustiore Synodo statutum esset, sic etiam inferioris ordinis Clericorum causas per provinciales Synodos esse terminandas, ut nullum Ecclesiae Romanae praepjudicium adferri debeat, si eorum quoque appellationes suscipere aliquando velit, aut eorum ad se causas evocare. Quod tamen Innocentius aperte his verbis constituit, quae generatim omnes causas, de quibus hinc sermo est, scilicet tam superioris quam inferioris ordinis Clericorum, complectuntur. Porro Romani Pontifices ab ea mente quam longissime aberant, ut Sedis suae privilegia aut Nicenae aut aliis Synodis, earumque Canonibus & Constitutis accepta referrent; adeoque ut iis omnino limitibus continerentur.

Bo-

(a) Opusc. XL VII. seu epist. ad Johan. VIII. cap. XII.

Bonifacius I. Innocentii post Zosimum successor haec scribit exordio epistolae superius laudatae ad universos Episcopos Thessaliae (a) : *Institutio universalis nascentis Ecclesiae de Beati Petri sumsit honore principium, in quo regimen ejus & summa consistit. Ex ejus enim Ecclesiastica disciplina per omnes Ecclesias, religionis jam crescente cultura, fonte manavit. Nicaenae Synodi non aliud praecepta testantur : adeo ut non ali- quid super eum ausa sit constituere, quum videret nihil supra meritum suum posse conferri : omnia denique huic noverat Domini sermone concessa. Hanc ergo Ecclesiis toto orbe diffusis velut Caput suorum certum est esse membrorum. Quae verba, uti Lucae Holstenio & P. Coustant animadversum est, Hadrianus I. epist. XCVII. Codicis Carolini transcripsit. Concinit & Nicolaus I. epistola VIII. ad Michaëlem Imperatorem : Si instituta, inquit, Nicaenae Synodi diligenter inspiciantur, invenietur profecto, quia Romanae Ecclesiae nullum eadem Synodus contulit incrementum : sed potius ex ejus forma, quod Ecclesiae Alexandrinae tribueret particulariter, sumsit exemplum. Cur autem Nicaena Synodus nullum Ecclesiae Romanae, SS. Pontificis opinione, contulerit incrementum, luculentius declarant haec ejusdem Epistolae verba : Ecclesiae Romanae privilegia Christi ore in B. Petro firmata, in Ecclesia ipsa disposita, antiquitus observata, & a sanctis universalibus Synodis celebrata, atque a cuncta Ecclesia jugiter venerata, nullatenus possunt minui, nullatenus infringi, nullatenus commutari : quoniam fundamentum, quod Deus posuit, humanus non valet amovere conatus &c.*

Ex quibus verbis etiam Nat. Alex. probat jus appellationum ad Romanam Sedem a Synodo Sardicensi non esse institutum, sed confirmatum & celebratum, esse autem appendicem primatus S. Petro & ejus Successoribus a Christo collati. Ex quibus SS. Pontificum testimoniis compertum est, eos neque Nicaenae, neque aliis Synodis accepta retulisse Sedis Apostolicae privilegia, sed Christi institutioni, a quo illi *omnia*, ut loquitur, Bonifacius, *concessa* sunt, quique illam omnibus Ecclesiis toto orbe diffusis velut caput suorum voluit esse membrorum. Unde profecto consequens est, non esse illius Sedis privilegia Conciliorum Canonibus circumscribenda; atque adeo ea Innocentii verba, quibus generatim *in omnibus causis*, scilicet tam superioris quam inferioris ordinis Clericorum, Sedi Apostolicae reverentia deferatur, ad normam Sardicensium Canonum restringenda non esse.

Haud me latet, Africanam Ecclesiam jam olim ab ipso S. Cypriani aevo ac deinceps, his speciatim inferioris ordinis Clericorum ad Sedem Romanam appellationibus vehementer intercessisse. Verum neque illud ignoro, Romanos Pontifices hoc Sedis suae privilegio nunquam omnino cedere voluisse, nec iis appellationibus suscipiendis penitus unquam abstinuisse. Nat. Alex. qui, ut ex superioribus constat, jus Episcopaliū appellationum adversus Petrum de Marca velut primatus appendicem tuetur, hoc primo loco ex eodem Illustriss. Praefule (a) sibi objicit argumentum. Cum S. Cyprianus, ex sententia Concilii sui, a communione rejecisset quosdam Clericos, & quemdam Pseudo-Episcopum

Hac-

(a) Lib. VII. de Conc. Sac. & Imp. cap. I. num. III.

Haereticorum , irascitur adversus Cornelium Episcopum Romanum , quod cum illi Romam accessissent , haesitasset aliquantulum Pontifex , an eos in communionem suam reciperet . Hanc ob rem Cyprianus apud Cornelium aperte edisserit jura Episcoporum uniuscujusque Provinciae ; quae in eo versantur , ut ad eos pertineat discussio judiciumque causarum , & regimen gregis , rationem administrationis suae Deo reddituros ; neque licere , Romam aliove appellare . Neque enim minorem esse auctoritatem Episcoporum Africanorum , quam reliquorum . Damnatos porro , si ad Cyprianum accedere voluerint , auditurum se lubenter , & poenitentiam eorum amplexurum , si crimine ullo fuerunt involuti . Quae omnia constant ex ipsius S. Cypriani epistola LV. ad Sanctum Cornelium : Unde consequens esse videtur , supremam illo aevo fuisse Conciliorum Provincialium auctoritatem , nec ab eorum judiciis licuisse ad Sedem Apostolicam appellare .

Hunc nodum distinctionis ope solvit laudatus Auctor . Assentitur enim , supremam fuisse Conciliorum Provincialium auctoritatem in causis simplicium Presbyterorum , secus autem in causis Episcoporum . Fortunatus autem , inquit , Felicissimus & alii , de quibus S. Cyprianus praefata in epistola loquitur , meri erant Presbyteri : *Maxime* , inquit , *quando* & *Fortunati nomen jam satis noffes , qui est unus ex quinque Presbyteris jampridem de Ecclesia profugis , & sententia Coepiscoporum nostrorum , multorum & gravissimorum Virorum , nuper abstentis* . Deinde S. Cyprianus eos , de quibus loquitur , sibi inferiores ac subditos fuisse ait : *Oportet eos , quibus praesumus , non circumcursare* . Non mi-

mirum itaque quod de iplis dicat : *Jam caussa eorum cognita est , jam de eis dicta sententia est* : Et quod illorum causam audiri debere contendat , ubi crimen admissum est , ubi schisma conflatum ; nec posse ipsos ad alia tribunalia confugere .

Ex hac porro Cl. Viri disputatione hanc ego colligo consecutionem : contendisse quidem Sanctum Cyprianum , haud admittendas esse a Romanis Pontificibus simplicium Presbyterorum appellationes : Cornelium vero eas a se primatus sui suaeque Sedis praerogativa suscipi & judicari posse , minime dubitasse . Nam litteris ad S. Cyprianum , quae interciderunt , *ut Fortunatus ille Romam , ibi judicandus , veniret praecipiebat* ; ut Cl. Coustant animadversum est in Notitia Epistolarum non exstantium , quae ad Cornelium attinent §. XIII. num. 22. ubi & subjungit , quod „ quae Cornelium in-
 „ ter & Cyprianum ex occasione Fortunati & Legato-
 „ rum ejus nata est de cognitione causarum controver-
 „ sia , Zosimi Papae & Aurelii Carthaginensis Episcopi
 „ temporibus ex causa Apiarii recruduit . Sed & tunc
 „ Africani Praefules ad Caelestinum Papam rescriben-
 „ tes , mox laudati (*sub S. Cypriano*) Concilii decreto
 „ steterunt . Verum ut illi huic decreto sibi esse insisten-
 „ dum existimarunt : ita laudatus Caelestinus , Zosimus ,
 Bonifacius alique Romani Pontifices Corneli Decessoris sui exemplo insistere potuerunt . Atque ut Adversarii nobis objiciunt S. Cypriani & aliorum Africae Proconsularis Episcoporum Decretum : ita nos illis objicimus S. Corneli & Ecclesiae Romanae ; quorum certe excellentior est , quam Episcopi & Ecclesiae Carthaginensis , auctoritas ; exemplum .

Sta-

Statim post Sardicense Concilium appellationum usum frequentem in Ecclesia Occidentali fuisse, Nat. Alex. primo loco demonstrat ex caussa Caeciliani Carthaginensis Episcopi, quem a Donatistis exagitatum; & in multis eorum Conciliis damnatum, ad Apostolicam Sedem appellare potuisse, & ad ejus tribunal causam suam dicere, S. Augustinus agnoscit: cum tamen de caussa fidei non ageretur, sed de caussa merae disciplinae, & de Caeciliani ordinatione, quem a Traditore, Felice nimirum Aptungitano consecratum, Episcopali honore & dignitate frui non posse contendebant, quaestio esset. Ait vero Sanctus Doctor (a), eum potuisse non curare conspirantem multitudinem inimicorum, quum se videret & Romanae Ecclesiae, in qua semper Apostolicae Cathedrae vixit principatus, & ceteris terris, unde Evangelium ad ipsam Africam venit, per communicatorias litteras esse conjunctum: ubi paratus esset causam suam dicere, si Adversarii ejus ab eo illas Ecclesias alienare conarentur. Illam vero consuetudinem, subjungit laudatus Auctor, appellandi ad Ecclesias Apostolicas, & maxime ad Romanam, quae princeps est ceterarum, inde repetit S. Augustinus, quod Caecilianus non esset ex ordine Presbyterorum, Diaconorum, aut inferiorum Clericorum; quorum causae in Provinciis finiebantur, & qui in judicio Metropolitanis & Synodi Provincialis acquiescere debebant, nec ad Romanum Pontificem poterant secundum Canones appellare; sed ex ordine Episcoporum, quibus appellatio hujusmodi permittebatur: *Neque enim, inquit, de Presbyteris, aut Diaconis, aut inferioris ordinis Clericis; sed*

(a) Epist. XLIII. al. CLXII.

sed de Collegis agebatur, qui possint aliorum Collegarum judicio, praesertim Apostolicarum Ecclesiarum, causam suam integram reservare. Unde colligit Nat. Alex. etiam ante Concilium Sardicense, usum appellationum in Ecclesia Occidentali invaluisse; adeoque multo magis obtinuisse post illius Concilii celebrationem.

Quamquam autem ex eo S. Augustini loco colligi possit, ingratas fuisse Africanis Episcopis Clericorum inferioris ordinis appellationes; attamen servatam ab eis fuisse etiam in hujusmodi causis debitam Sedi Apostolicae reverentiam; quemadmodum Innocentius exigebat; constat ex appellatione Caelestii, in Synodo Carthaginensi anno 412. damnati, ad Innocentium I. ex qua secundum pro usu appellationum argumentum idem Natalis desumit. Appellationis autem Caelestii, qui nedom Presbyter erat, testes producit Marium Mercatorem in Commonitorio, & Paullinum Diaconum in Libello ad Zosimum Papam: qui illi quidem crimini vertunt, quod appellationem prosequutus non est, sed ob appellationem interpositam eum minime reprehendunt: laudat & Zosimum ipsum epistola III. ad Episcopos Africanos: qui non modo appellationis Caelestii testis locupletissimus est; verum etiam, ut idem Nat. Alex. alibi observat (a), supremi judicis auctoritate in eo usus est, quod appellationem, cujus ille jure ceciderat, merita ipsius minime prosequendo, in integrum restituit. „ De causa quidem fidei agebatur, subjungit saepe „ laudatus Auctor: sed si in decernendis fidei causis superior fuit Romani Pontificis auctoritas Nationalibus „ Conciliis, adeoque ad ejus Sedem jure appellatum „ est:

(a) Dissert. III. in Hist. Eccles. Saec. V. in fin.

„ est : quidni & in causis merae disciplinae appellari
„ eodem jure potuerit ? Ergo Caelestius nondum Pres-
byter eodem jure, quo in causa fidei a Synodo Cartha-
ginensi ad Sedem Apostolicam appellavit, ad eandem
etiam in causa disciplinae appellare potuisset.

Jam vero temporum nos series & ordo perduxit ad
celebrem illam ac perdifficilem controversiam, quae Zo-
simum ac Successores, Bonifacium scilicet & Caelesti-
num, cum Africanis Episcopis commisit. Circa quam,
memoria primum repetendum est, id generatim Mel-
densem Episcopum observasse : „ quod neque Zosimus
„ in hoc negotio absoluta voluntate agebat, neque Afri-
„ cani Patres ea se gubernari sinebant ; sed in receptis
„ Canonibus pars utraque vim omnem reponebat. An
haec omnino cum veritate consentiant, videamus. Con-
troversia, ut nemo ignorat, propter Apiarium Presbyte-
rum Siccensem exorta est, qui propter scelera ab Episco-
po suo Urbano communionem privatus & gradu dejectus
ad Zosimum appellavit, a quo & communioni & gradui
pristino restitutus est. Sententiae pro Apiario latae ex-
secutores Zosimus ad Carthaginensem Synodum Lega-
tos Apostolicos destinavit, Faustinum Episcopum Po-
tentinum, Philippum & Afellum Presbyteros : quibus
haec quatuor cum Africanis Episcopis gerenda manda-
vit. *Unum de appellationibus Episcoporum ad Roma-
nae Ecclesiae Sacerdotem ; alterum, ne ad comitatum
Episcopi importune navigent ; tertium de tractandis
Presbyterorum & Diaconorum causis apud finitimos
Episcopos, si a suis excommunicati perperam fuerint ;
quartum de Urbano Episcopo excommunicando, vel
etiam Romam evocando, nisi ea quae videbantur cor-*

Vuuu

ri-

rigenda, corrigeret; id est, nisi Apiarium Presbyterum suum, qui de sententia exaustrationis in se lata ad Sedem Apostolicam provocaverat, gradui suo restitui pateretur. Quae omnia constant ex epistola Synodica Africani Concilii ad Bonifacium Papam, quae Codici Canonum Ecclesiae Africanae cap. CXXXIV. inserta est. Ex his porro quatuor Capitibus duo tantum, scilicet primum & tertium, id est, ut Romam liceat Episcopis provocare; & ut Clericorum causae apud Provinciarum suarum Episcopos finiantur; Sardicensibus Canonibus, quos veluti Nicaenos Zosimus laudaverat, nitebantur, De quarto autem Capite nihil omnino eisdem Canonibus statutum fuerat. Quare illud sibi haud alia ratione poterat Zosimus vindicare, quam illa Innocentii I. praedecessoris sui generali regula, quae statuit, in omnibus causis tam superioris quam inferioris ordinis Clericorum Sedi Apostolicae reverentiam custodiri. Ac proinde ea non erat, ut Innocentii, ita & Zosimi mens, Romanae Sedis privilegia Conciliorum legibus veluti certis ac definitis terminis contineri.

Innocentii & Zosimi vestigiis institit ejusdem Zosimi post Bonifacium successor Caelestinus. Quum enim Apiarius anno 419. Concilii Carthaginensis sententia remotus ab Ecclesia Siccensi, Tabracam celebrem in Proconsulari provincia civitatem se se recepisset; ab urbis hujus civibus denuo nefandis flagitiis accusatus, eaque de causa ab altero Carthaginensi Concilio communione privatus, Romam confugiens, mentitusque se ab hac sententia provocasse, communioni a Caelestino restitutus est, misso in Africam eodem Faustino, ut & ibi ei communio redderetur. Ubi in Africam Caelestini

Le-

Legatus pervenit, Synodum Carthaginē convocavit, atque omni ope contendit (a), *quasi Ecclesiae Romanae adferens privilegia*, ut Apiarius ab Africanis Episcopis in communionem susciperetur. Quod ille tamen obtinere non potuit ob evulgata tandem ipsius Apiarii confessione scelera, quorum jam ab aliquot annis infamia in Africa laborabat. Hac de causa Africani Patres Caelestinum interpellarunt, ne inferiores Clericos, imo & Episcopos in Africa a communione suspensos, *prae-propere vel indebite*, ad communionem admitteret. *Ut Presbyterorum & sequentium Clericorum improba refugia*, idest appellationes repelleret. Ut Ecclesiastica negotia ab Africanis Synodis terminari permitteret. Ne Legatos a latere & executores Romanorum judiciorum in Africam destinarer. Denique, ne Faustinum, dijudicata jam Apiarii causa, ulterius manere in Africa pateretur. Quae omnia illi tanquam Nicaenis freti Canonibus expetere sibi jure videntur. Atque hinc exsistit argumentum, quod *adversus* summam Sedis Apostolicae auctoritatem & Romanas appellationes velut Achilleum ab Adversariis profertur.

At ego eis primum repono, quod si Africanis Patribus visum est, fas non esse Episcopis, aut saltem inferioris ordinis Clericis, ad Sedem Apostolicam appellare, quod de hac re nihil Nicaenis Canonibus constitutum esset: secus tamen, post Cornelium & Innocentium, visum est Zosimo, Bonifacio & Caelestino, Romanaeque sub eis Ecclesiae: quorum certe, ut etiam superius animadverti, longe praeclarior est atque eminens

V u u u 2

tior

(a) Africani PP. Epist. Synodica ad Caelestin. cap. ult. Cod. Afric. Eccl.

tior auctoritas, quam Aurelii, & ex tota Africa Carthagenensis Concilii. Qui ergo deinceps Romani Pontifices vel ex Africa, vel ex aliis Ecclesiis etiam inferioris ordinis Clericorum, etiam in causis criminalibus seu violatae disciplinae appellationes susceperunt, Cornelii, Innocentii, Zosimi, Bonifacii, & Caelestini vestigiis inhaeserunt, adversus quorum auctoritatem frustra Milevitani aut Carthagenenses Canones proferuntur. Quos certum est, (neque id plures ex ipsis Adversariis inficiantur) jura Primatus S. Petro ejusque Successoribus a Christo collati aperte violasse, siquidem, ut quidam volunt, ipsorum quoque Episcoporum ad Sedem Apostolicam appellationes improbarunt. Sed quum videamus, & post vetus illud sub S. Cypriano Concilium, & post Milevitanum II. & post hanc sub S. Caelestino Carthagenensem Synodum, non modo Episcopos, verum & inferioris ordinis Clericos in Africa damnatos ad Sedem Apostolicam confugisse (a); valde animus propendet in Eminentissimorum ac doctissimorum Cardinalium Baronii, Bellarmini, atque Perronii sententiam: qui non ipsas generatim appellationes Africanis Patribus improbatas fuisse contendunt; sed eis aliquem statui modum expetiisse; ut scilicet non *facile*, non *praepropere*, vel *indebite* susciperentur. Nec moveor argumentis, quae adversus laudatos Cardinales Nat. Alex. & alii intorquent: quod nempe rationes, quibus in ea ad Caelestinum epistola Africani Patres usi sunt, non solum

(a) Diaconus Donadeus Victoris Episcopi sui iudicio gradu dejectus ad S. Gregorium appellavit. Qua de re exstat epist. S. Pontifi-

cis VIII. libri IX. ad Columbum Episcopum Numidiae, qua jubet, ut si querela ejus veritate fulciatur... suo ordini reformetur.

lum frequentiore usum appellationum, sed jus ipsum ejusmodi disciplinae aggredi videantur. Nam novum & infuetum non est, ut rationes, quae praesertim in aestu disputationis adferuntur, nimis, ut ajunt, probent, quam probare deberent, atque ii etiam vellent, a quibus illae adhibentur. Quod vero pertinet ad Canonem XXII. Concilii II. Milevitani, quo appellantiibus ad Transmarina Concilia communione intra Africam interdicitur; legitimum ejus sensum, inquit Nat. Alex. suggerunt verba, quibus is Canon in Codice Hadriani I. quem Carolo Magno dedit, enuntiatur: *Ut Clerici, qui ad Transmarina, non ad Primates suos provocaverint, in communionem non recipiantur.* „ Ex quibus constat, „ inquit laudatus Auctor, quod Clericis Africanis vitio „ non vertebatur, quod provocarent ad Transmarina, „ sive ad Tribunal Romani Pontificis; sed quod per sal- „ tum provocarent, contemtis judiciis Primatum suo- „ rum & Conciliorum Africae; quae maxima erat ve- „ teris disciplinae corruptela. Monetque & prae oculis habenda esse verba Canonis LXXII. Codicis Africani, quae sic habent: *Quicumque non communicans in Africa, in Transmarinis ad communicandum obrepserit, jacturam Clericatus accipiat.* „ Nam cum obrepsum, „ ex Ulpiano, idem sit quod mendacio & dolo im- „ tratum; hujus Canonis genuinus sensus est: si quis „ excommunicatus in Africa, mendaciis & dolis im- „ petraverit communionem a Romana Sede, Clerica- „ tu privetur. Verum eos non percellit Canon iste, „ qui legitimae appellationis suffragio, ad Sedem Apo- „ stolicam confugerint.

CAPUT XV.

- „ Libertates quo sensu privilegia dicantur ,
 „ nempe ut jura antiqua libertatum radix.
 „ An Petrus de Marca audiendus ,
 „ qui Conciliorum superiorem
 „ potestatem a Libertati-
 „ bus separat?

DE hac Petri de Marca sententia late disputatum est supra Cap. V. praeviae Dissertationis; nec opus est, ut alia confutando Boliuctio hoc loco proferantur.

CAPUT XVI. &c.

- „ Haec doctrina non obest dispensationibus
 „ Apostolicae Sedis: Concilii Basileensis
 „ locus: Gersonis doctrina a Sancto
 „ Bernardo ducta.

Quae in hoc & tribus sequentibus Capitibus Meldensis Episcopus disserit de dispensationibus, ut vocant, sine causa, nolo in praesentia ad examen revocare. Non enim ea mens est Romanorum Pontificum, gratis, & pro arbitrio, & sine causa Ecclesiasticae disciplinae regulas relaxare. Attamen *si de dispensationis exhibitae sufficientia dubitetur*; non ad Reges, non ad Episcopos, non ad Synodos hujus rei judicium pertinere contendimus; sed *esse super hoc ad Sedem Apostolicam recurrendum*; quemadmodum II. Lugdunensis

ge-

generalis Synodus statuit (a); judicamus: *Cujus est*, ut Patres adjungunt, *aestimare, quem modum sui beneficii esse velit*. Praeterea, quamlibet Romani Pontifices improvidis dispensationibus rectae rationis, jurisque adco naturalis, aut etiam divini leges, quemadmodum S. Bernardus docet, transgredi possint ac violare; non tamen humano judicio esse illos obnoxios existimare debemus: a quo manifeste eos eximit idem S. Bernardus, eo ipso in loco, in quo adversus ejusmodi dispensationes vehementius invehitur (b): *Sic facitendo, probatis vos habere plenitudinem potestatis, sed justitiae forte non ita. Facitis hoc quia potestis: sed utrum & debeatis, quaestio est At quomodo non indecens tibi voluntate pro lege uti; & quia non est ad quem appelleris; potestatem exercere, negligere rationem?* Denique, in omnibus generalium Conciliorum Decretis, quae de morum reformatione & Ecclesiastica disciplina sancita sunt, eam obtinere ac valere debere regulam judicamus, quam sequentibus verbis Synodus Tridentina constituit (c): *Omnia & singula, sub quibuscumque clausulis & formis, quae de morum reformatione atque Ecclesiastica disciplina in hoc sacro Concilio statuta sunt ita decreta fuisse, ut in his salva semper Sedis Apostolicae auctoritas & sit & esse intelligatur*. Quae certe quamlongissime absunt ab intolerabili typho, quo Basileensis Pseudo-Synodus suis subijcere decretis Romanos Pontifices olim contendit.

CA-

(a) Canon. XVIII.

(b) Lib. III. de Considerat. cap. IV.


(c) Session. XXV. cap. XXI.

CAPUT XX. &c.

„ An Auctor Anonymus tractatus de Liberta-
„ tibus ad tertiam propositionem Decla-
„ rationis Gallicanae rectum
„ aliquid aut ad rem
„ dixerit.

Quae in hoc & sequentibus hujus Libri Capitibus Bossuetius disputat adversus Auctorem Tractatus de Libertatibus, ea mihi pro more praetermittenda decrevi, ut qui, quemadmodum identidem monui, non quid alii dixerint, tueri instituerim, sed rem potius ex integro retractare: neque aliorum vestigiis insistere, & quo antea ab aliis itum erat, sed quo potius eundum esset, sedulo investigare decreverim. An porro felicius aliquando scopum attigerim, aliorum esto judicium.

F I N I S.





0066432

